

2047 I  
TEOLOGIA



Ther  
2047

17. Vll. 103



*Rev. Patris*  
**JOANNIS GRASSET, S.J.**  
**NOVA**  
**FORMA**  
**MEDITATIONUM,**  
IN  
SINGULOS ANNI DIES;  
CUM SCIENTIA  
**SANCTORUM:**  
NOSSE MORI.

Post  
Tertiam Editionem Gallicam  
Anno 1673. Parisiis impressam,  
*Latine reddita*

A  
Quodam Societatis JESU  
Sacerdote.

**EDITIO QUARTA**  
CUM PRIVILEGIO CÆSARE  
FACULTATE SUPERIORUM

---

**Augustæ Vindelicorum & Cracoviae**  
Sumptibus Christophori Hartl, & Consortiun  
& Bibliopol. Universitatis Cracovien.  
Anno 1752.

# FACULTAS R. P. PROVINCIALIS

Cùm

## PRIVILEGIO CÆSAREO.

CUM D. Christophorus Bartl typis recuderē desideret librum, cui Titulus: Nova forma meditationum ad singulos anni dies &c. a Patre Joanne Grasset Soc. JESU conscriptum, & jam alias latino idiomate editum, ego Adamus Dichel Societatis JESU per Superiorem Germaniam Præpositus Provincialis, potestate ad id mihi facta ab Adm. Reverendo Patre Nostro Ignatio Vicecomite Universæ Societatis Præposito Generali, eisdem ad primam duntaxat hanc editionem facultatem impertio; simulque communico Privilegium Cæsareum, quo aliis Bibliopolis, & Typographis &c. prohibetur, ne dictum librum citra consensum Superiorum recudere, intra fines S. R. Imperii inferre præsu-

In quorum fidem has ei manu propria, consueto Officii Sigillo munitas dedi.


Adm. Brisgoiæ 2, Julii 1752.

(S.)



ADAMUS DICHEL.





## MONITA NECESSARIA

Ad meliorem usum sequentium Meditationum.

**C**ompluribus Orationi mentali assuetis minùs probantur Meditationes fusiùs propositæ, vel quòd illis perlegendis tempus sufficiens non habeant, vel quòd memoriâ illas retinere non valeant. Accedit, quòd eorum mens, videns jam factum, quod ipsis faciendum erat, & inveniens absque labore, quod scrutatione intellectûs quærendum fuerat, negligentior evadat, & veluti otiosa evagetur in vastitate illa materiæ ab aliis prolixius explicata. Contrà ubi strictim collectum habent meditandi argumentum, absque difficultate illud memoriâ retinent, cum profectum expendunt, & cum delectatione degustant, haud secùs atque artifices tantò suaviùs an opus à se perfectum, quantò majori impendio illud perfecerunt.

Venator, quò longiori tempore investigavit, eò liquidiorè perfunditur, ubi eam denique invenit, & accepit. proprio conatu eruta vehementiùs cogit, ànimum, quàm centum veritates apositæ.



Longè suaviùs sentit animus effectum gratiæ, quando consistens in terra deserta & in-  
via, & inaquosa, videt cælitùs delabi manna  
in nutrimentum, & scaturire aquas è petra  
durissima ad restinguendam sitim.

Regnum cælorum simile est grano sinapis,  
quod licèt minimum sit, multùm tamen cale-  
facit stomachum ubi contritum fuerit ac con-  
tusum.

Neutiquam obruenda est mens nimii mate-  
riæ copiâ, sicut nec stomachus nimîâ quanti-  
tate ciborum, quibus bene digerendis non suffi-  
cit. Atque hinc est, quòd S. Ignatius peritissi-  
mus orandi Magister, in aureo Exercitiorum  
spiritualium libello Meditationes tradiderit ad-  
modum breves, & tantò breviores, quantò  
ampliùs quis in Exercitiis fuerit progressus: ad  
hoc nempe, ut anima omnem suam in Deo  
ponat fiduciam, lumen ab eo ardentè expe-  
tat, potentias suas seriò applicet, è cælo auxi-  
lium avidè expectet, clarè agnoscat, quàm  
modicum ex se habeat, ut inde humilietur,  
& quantum à Deo recipiat, ut ad referendas  
gratias inde exstimuletur.

Immagna sanè differentia est inter lectio-  
nem & Meditationem. Qui legit librum bonum,  
labore debet, quod legit, sine difficultate,  
labore, veritas menti legentis patere  
sque inquisitione; qui verò meditatür,  
inquisitionis propriæ labore perscrutari de-  
bet Evangelicum, ut reperiat thesau-  
rum in eo reconditum. Verum quidem  
non omnes homines sint capaces,  
ut



ut propriâ industriâ latentes eruant veritates,  
& convincentes efforment discursus, unde com-  
pulsî sunt maximi quique nostri ævi scriptores,  
in publicum edere prolixas Meditationes, in  
quibus propositæ sunt veritates, cum omni,  
quam habent, efficacia & extensione, ut, qui  
non pollent mente ita perspicaci, & occulta  
rimante, juventur lectione ejusmodi verita-  
tum prolixiùs propositarum, neque aliud porrò  
inter orandum illis, quod agant, supersit, nisi  
ut bene afficiantur erga ea, quæ pensiculatè  
legerunt. Qui verò mentem nacti sunt viva-  
cem, agilem, curiosam, ardentem ac solidam,  
modicum exigunt materiæ, quâ se occupent:  
qua in re similes videntur igni, qui, ubi ni-  
miâ nutrimenti mole obruitur, penitus extin-  
guitur.

Fateor equidem, quòd sit perdifficile, omnium  
genio satisfacere; polliceri tamen nihilominus  
audeo, quòd tam his, quàm illis commodæ fu-  
turæ sint Meditationes, quas trado. Qui pa-  
rùm materiæ exigunt, vel in unica solùm linea  
reperient, quo se longo tempore utiliter occu-  
pent, qui verò copiam materiæ expetunt, tra-  
seundo ab una linea ad alteram, tempore per-  
desituentur, quàm argumento fructuosæ me-  
tationis.

Rerum sacrarum intelligentes facilè per-  
cient, quòd potissima pars propositionum  
bus constant hæ meditationes, sint Sæ-  
Sanctorum Patrum, verbotenus ferè in  
cum idioma translata. Destinaveram  
tare in margine, sed considerando



modi citationes doctrinalibus potius libris con-  
veniant, & quòd eas in suis quoque Medita-  
tionibus prætermiserit P. Ludovicus de Ponte,  
supervacaneum duxi illas attexere. At loco  
textuum SS. Patrum, adjeci Sententias Sacrae  
Scripturae, quæ essent veritatum in Medita-  
tionibus propositarum fulcimentum & condi-  
mentum, insulsa namque & insipida sunt homi-  
num verba absque sale Verbi Divini. Illa ne-  
quaquam tantam vim habent ad permovenda  
hominum corda, quantam habent Textus Sa-  
cri, quorum pondus & autoritas longè effi-  
caciùs commovent hominum animos, quàm  
omnes locutiones humanæ. Itaque qui volent  
operari per fidem, poterunt inhærere adductis  
Divinae Scripturae Sententiis; qui verò volent  
intellectûs ratiocinatione, argumentum discursus  
ex ipsis deproment Meditationibus.

Proponuntur autem hîc Meditationes de po-  
tissimis virtutibus & vitiis, uti & de Præcipuis  
Mysteriis vitæ Domini nostri Jesu Christi, &  
B. V. Mariæ; & quia sensus harum veritatum  
concludi debebat unâ aut alterâ lineâ, necessa-  
rium erat concinnare has Meditationes in forma  
sententiarum, & brevium dictorum, ut sua-  
nimo illaberentur, absque tamen rhyth-  
mi consonantia, quam vitavi, ut potui.  
Sens fateor, quòd aliqua hîc sæpiùs quan-  
to repetantur. Sed quis est Meditationum  
in quo non idem eveniat? & quis potest  
materias adeò similes, ut non in easdem  
incidat cogitationes? Addo, quòd  
in proficuum, easdem materias bis  
aut



aut ter meditando repetere; veritas enim, quæ aliquo tempore non movet, alio subinde tempore efficacius movet, ut sapienter advertit S. Ignatius. Atque hinc de industria quædam hinc inde repetii, quæ facili negotio potuissent mutare.

Ordo Meditationum respondet tribus statibus Vitæ Spiritualis, Incipientium, Proficientium, & Perfectorum, ut nempe quivis facile reperire possit argumenta Meditationum, suæ dispositioni conformia. Hæc ipsa methodus est, quam servavit P. Ludovicus de Ponte, quam & mihi sectandam credidi.

Verum ut illis quoque satisfacerem, qui desiderant habere Meditationes toto anni decursu usui futuras, adjunxi Indicem, quo designantur materiæ Meditationum in singulos anni dies. Quoniam autem fieri non potest, ut proponantur materiæ hujus generis semper diversæ pro toto anno, & Meditationes hæc plenæ sunt magno numero veritatum, quarum quælibet sufficit occupationi plurium dierum, necessario bis aut ter, intra annum idem argumentum Meditationis proponendum mihi fuit, relinquendo cujusvis devotioni libertatem mutare Meditationem, si illa, quæ assignatur mihi ipsi arrideat.

Præfixi cuivis diei argumenta magis conformia Evangelio Dominicæ, quod pro cujusvis hebdomadæ initium legere conforet. Idem observavi in Festis Sanctis, suggero enim Meditationes aut de illis sanctis, aut de argumento Evangelii.



in Missa legitur. Qui legent compendium vitæ illorum, faciliè poterunt eorum exempla componere cum veritatibus, quas meditantur.

Sunt quidam bonæ mentis, qui cupiunt quovis mense sese ad mortem ritè disponere: horum devotioni ut satisfacerem, ad finem cuiuslibet mensis assignavi quatuor Meditationes huic scopo perquam accommodatas. Illi verò, quibus menstrua hæc ad mortem præparatio minùs arridet, poterunt assumere alias designatas materias, aut ipsi seligere illas, quæ præplacuerint ex Indice omnium Meditationum.

Ut fructus ex his Meditationibus hauriatur, hic ferè modus est adhibendus. Post prævias præparationes ordinarias, de quibus dixi in Methodo Orationis à me edita, lege cum reverentia & attentione Verba S. Scripturæ, & singula accuratè perpende. Elice actus fidei, & si mentem tuam his bene occupatam advertas, illis inhære, neque ad alia mentem transfer.

Quòd si verò animus non satè pascatur sensu Verborum Divinæ Scripturæ, lege primam partem Meditationis tibi propositæ, & inhære veritati, quæ majorem in animo tuo effectum excitabit, aut incipe à primis duabus. Stude, ut bene penetres sensum, reflectionem institue super teipsum & adverte, utrùm tua huic veritati conformis sit: sin minùs, exerce inde dolorem, & elice bonum propositum. Exempli gratiâ si mediteris de Patientia, teneris ad has duas lineas: *Quidquid est in comparatione pænæ, quam* Revoca tantisper in memoriam potissima



tissimâ peccata vitæ tuæ, compara locum, in quo es, cum illo, in quo deberes esse; poenas, quas toleras, cum illis, quas deberes tolerare. Metire tempus dolorum tuorum cum æternitate, & vide, an causam habeas conquerendi. Dic: si Deus justitiam suam in me exercuisset, ubi modò degerem? an non suaviùs hîc vivo, quàm in inferno? si illic habitarem in turba damnatorum cum ardoribus sempiternis, an non felicem me æstimarem, si inde liceret huc redire, ac perpeti, quæ modò perpetior? Cur igitur conquerar? nunquid iniquè Deus mecum agit? An non infinites duriora sum promeritus? Prosequere hanc considerationem, & compelle cor tuum, donec acquiescat, & Dei ordinationi se plenè submittat. Dein elice affectus. Gratias age Domino nostro, ob bonitatem & misericordiam tibi exhibitam. Veniam pete de tua impatientia, & statue patientiùs, quàm hactenus, tolerare adversa.

Progredere deinceps ad lineam sequentem: *In comparatione gloriæ tuæ, quæ mihi est præparata*, quam meditaberis, ut præcedentem, avolando, apìs instar, à flore in florem, donec inveneris mel devotionis.

Quòd si nullâ ratione movearis, ne tamen eapropter intermitte Orationem, sed pertranquillus in Dei præsentia, aut utere precibus, quas docui in Methodo Orationis. Vides etiam legere verba devotione plenè sunt ad finem quartæ Partis, ubi reperitur que dubio consolationem.



Quando præter modum aut ordinem agita-  
beris affectibus gaudii aut tristitiæ, consultum  
erit, etiam extra statuta Orationis tempora hoc  
agere. Eleva cor tuum ad Deum, roga illum,  
ut manifestam tibi faciat voluntatem suam.  
Dein librum fortuito aperiens, inhære medi-  
tationi, in quam fortè incideris, & frequen-  
ter reperiens, quod quæres. Providentia Dei,  
inquit Sapiens, ludit in orbe terrarum cum ho-  
minibus, & libenter se manifestat in fortuitis  
& inopinatis ejusmodi casibus.

Quoniam jussus sum nomen meum novæ huic  
editioni præfigere, obsecro & obtestor bonos  
omnes, per charitatem, quam debent miseris,  
ut mei inter precandum meminisse velint.

*Sequuntur duo Indices. Prior, omnium Medita-  
tionum, quæ toto libro continentur. Posterior,  
Meditationum in singulos anni dies.*







# PRIMA PARS MEDITATIONUM PRO VIA PURGATIVA. MEDITATIO I.

*De Fine Hominis.*

**A** Deo ex nihilo conditus sum. Dei sum  
totus. Non subsisto, nisi in Deo.  
Non vivo, nisi ut serviam Deo. Sicut  
non possum existere, nisi à Deo, ita  
non possum existere, nisi propter Deum.  
Necessarium non est, me in mundo existere.  
Quòd si tamen existam, necessariò oportet  
me totum esse Dei.

Omnia mihi loquuntur de Deo. Omnia  
me rapiunt ad Deum. Omnia mihi Dei  
glorificationem ingenerant. Omnia mihi exprobrant  
quòd vivere non merear, nisi vivam per  
Deum. Quòd cor habere non merear,  
velim Deum diligere. Quòd non possim

A



bus Dominis servire, sed quòd oporteat me aut dæmonis, aut Dei mancipatum esse obsequiis.

Utri illorum hætenus obtemperavi? Cujus dominio me subjeci? Cujus obsequiis me impendi? Cujus beneplacitum adimplevi? Heu! dæmonis imperiis sum obsecutus. En Dominum, quem Deo prætuli! Illi me mancipavi. Omnem voluntatem ejus explevi.

Ah! exhorresco perfidiam meam. Agnosco iniquitatem meam. Cupio deinceps soli Deo adhærere. Nolo amare, nisi Deum. Nolo vivere, nisi propter Deum. Nolo servire, nisi Deo. Necessitatem mihi imponam Deum amandi, ejusque beneplacitum in omnibus exequendi.

### Verba S. Scripturæ.

*Notum fac mihi Domine finem meum, ut sciam, quid desit mihi. Psalm. 38. 5. & 6.*

*In gloriam meam creavi eum, formavi eum, & feci eum. Isa. 43. 7.*

*Universa propter semetipsum operatus est Dominus. Prov. 16. 4.*

*Ego sum principium & finis. Apoc. 1. 8.*

*Filios enutrivì, & exaltavi, ipsi autem repperunt me. Isa. 1. 2.*

## MEDITATIO II.

### *De Dominio Dei in Creaturas.*

Semper extitisti in rerum natura. Fuit  
us, quo non extiteras. Deus te  
edu,



eduxit ex nihilo. Ipse tibi dedit, quidquid es. Tu ergo es creatura ejus. Ille absolutum in te habet dominium. Potest tibi imperare, quidquid ipsi placet. Potest tibi prohibere, quidquid ipsi placet. Potest tibi permittere, quidquid ipsi placet. Potest te collocare, ubicunque ipsi placet. Potest te conservare, aut destruere. Potest te extollere, aut deprimere. Potest te consolari, aut affligere. Potest tibi mortem accelerare, aut vitam extendere. Sicut ille à nemine dependet, ita nemini obligatur.

Deus est primum Principium tuum. Ipse est Dominus vitæ tuæ. Ipse est Conservator tuus. Ipse est Reparator tuus. Dependes ab illo necessariò. Dependes ab illo essentialiter. Dependes ab illo absolute. Dependes ab illo semper. Dependebis ab illo æternùm. An non æquissimum est, obedire te illi, à quo totus, quantus est, dependes?

Qui plantavit vineam, nunquid jus habet vescendi fructibus ejus? Qui domum construxit, nunquid jus habet inhabitandi illam? Quanta iniquitas, ejicere Deum ex corde, quod manibus suis ipse efformavit? Ex corde, quod sanguine suo redemit? Ex corde, in quo desiderat commorari? Ex corde, quod cupit sanctificare? Quanta arrogantia vasis testæ murmurare contra figulum, à quo fuit factum?

Deus est ultimus finis tuus. Creavit gloriam suam. Desiderat te beatum e quem in finem te in hunc mundum Res quælibet tendit in finem suum.



terminus motuum ejus. Est centrum quietis ejus. Est principium virtutis ejus. Est pondus inclinationis ejus. Est cumulus perfectionis ejus. Extra finem sibi proprium res quaecunque infelix est, infirma est, vitiosa est. Ah! cur non ergo ad Deum contendimus? Ah! cur à Deo deficimus?

O Deus meus, & finis meus! Tu es principium vitæ meæ. Tu es centrum quietis meæ. Manus tuæ fecerunt me. Manus tuæ conservant me. Manus tuæ sustentant me. Manus tuæ defendunt me. Semper hæreo intra brachia tua, nec tamen unquam cogito de te. Semper verfor in corde tuo, nec tamen unquam amo te. Creaturæ tuæ omnia mihi præstant obsequia, & ego tibi servire recuso. Egone illas condidi? Egone vitam meam pro illis posui?

O mi Deus! creâsti me propter te, & mortuus etiam es propter me. Promittis mihi æterna bona. Minaris mihi æterna mala. Et hæc omnia me non percellunt. Et post hæc omnia necdum amo te.

O Deus meus, & Dominus meus! exure Paradisum, extingue infernum. Non requiro aliam mercedem obsequii à me tibi præstiti, quàm illam gloriam, quæ est, Tibi serviisse. Grande nimis præmium est Paradisus amanti. Exigua nimis poena est infernus non aman-

quantum me oblectant hæc animi sensa!  
 à Deo. Ego sum Dei. Ego sum in  
 go sum propter Deum. A Deo,  
 eo Principio. Dei, ut supremi Do-  
 mini



mini mei. In Deo, velut in Centro meo. Propter Deum, velut ultimum Finem meum. Heu me! Ita haecenus vixi, ac si existerem à meipso. Ac si essem mei ipsius. Ac si existerem propter me ipsum. Ac si sufficerem mihi-metipsi. Ah! ero deinceps totus tuus. Non serviam alteri Domino, nisi tibi. Non quæram quietem, nisi in te. Non laborabo, nisi propter te.

### Verba S. Scripturæ.

*Dominus Deus vester ipse est Deus Deorum, & Dominus Dominantium, Deus magnus & Potens, & Terribilis. Deut. 10. 17.*

*Si Pater ego sum, ubi est honor meus? & si Dominus ego sum, ubi est timor meus? Malach. 1. 6.*

*Manus tuæ fecerunt me, & plasmaverunt me. Job. 10. 8.*

*Quis plantavit vineam, & de fructu ejus non edit? 1. Cor. 9. 7.*

*O homo, tu quis es, qui respondeas Deo; Rom. 9. 20.*

*Nonne Deo subiecta erit anima mea? Psal. 61. 1.*

### MEDITATIO III.

#### *De Cura propria Salutis.*

**S**alus mea est negotium meum. Salus  
est unicum negotium meum. Salus  
est summum negotium.



Deus ab omni æternitate cordi habuit hoc negotium. Filius Dei mortuus est in cruce propter hoc negotium. Angeli nostri boni operam suam conferunt in hoc negotium. Mundus universus non est conditus, nisi propter hoc negotium.

Omnis felicitas mea innititur huic negotio. Æternitas mea vertitur in hoc negotio. Omnes dæmones adversantur huic negotio. Non possum absque vigili cura feliciter conficere hoc negotium. Stultus itaque sum, si non seriò tractem hoc negotium.

Ego interim negligo hoc negotium. Omnia alia cogito, præterquam hoc negotium. Cætera omnia majori mihi curæ sunt, quàm hoc negotium. Ah! nolo deinceps sollicitus esse, nisi de hoc negotio. Nulli rei majorem operam impendam, quàm huic negotio.

### Verba S. Scripturæ.

*Unum est necessarium.* Luc. 10. 42.

*Quid prodest homini, si mundum universum lucretur, animæ verò suæ detrimentum patiatur?* Matth. 16. 26.

*Quam dabit homo commutationem pro anima sua?* Ibidem.

*Attende tibi.* 1. Tim. 4. 16.

*Miserere animæ tuæ, placens Deo.* Eccli.



## MEDITATIO IV.

### *De Avulsione à Creaturis.*

**N**unquam inveni verum gaudium in creaturis. Nunquam in illis quietem inveni. Nunquam in illis securitatem inveni. Nunquam in illis fidelitatem inveni.

Vanæ sunt, & instabiles. Impuræ sunt, & indigentes. Illæ propter me fuerunt procreatæ. Ego non fui conditus propter illas. Illæ abjectiores sunt, quàm ego. Ego multò nobilior ac præstantior sum, quàm illæ. Occupare me possunt, at satiare me non possunt, Perturbare possunt cor meum, at sedare illud non possunt.

Mi Deus ! Cor meum permodicum est in sua substantia ; sed infinitum est in suis desideriiis. Tantum est, quanta est beatitudo tua, cujus capax est. Condidisti cor meum ad te amandum. Formâsti illud ad imaginem & similitudinem tuam.

Cor meum est fluvius, qui in mare delabitur. Est ignis, qui sursum ad suam spheram contendit. Est radius, qui ad suam properat redire originem. Est ferrum, quod appetit suo uniri magneti etiam non cognito.

Heu ! quàm infelix fui, quando creaturam amavi. O mi Deus ! quoniam conditus propter te faciliè perspicio, quòd nunquam possessuris sim pacem, aut quietem a te.



## Verba S. Scripturæ.

*Vanitas vanitatum, & omnia vanitas.*  
Eccle. 1. 2.

*Vidi in omnibus vanitatem & afflictionem  
animi, & nihil permanere sub sole.* Eccle. 2.

II.

*Convertere anima mea in requiem tuam,  
quia Dominus bene fecit tibi?* Psal. 114. 7.

*Ut quid diligitis vanitatem, & quæritis  
mendacium?* Psal. 4. 3.

## MEDITATIO V.

*De Voluntate Dei.*

**N**on existo in mundo, nisi ut exequar,  
quod Deus vult. Mortem incurrere me-  
teor, nisi exequar, quod Deus vult. Nun-  
quam perfectus ero, nisi exequar, quod Deus  
vult. Nunquam quiete fruam, nisi exequar,  
quod Deus vult. Volens nolens exequi de-  
bebo, quod Deus vult.

Sapiens ero, Sicut Deus, si idem cum ipso  
iudicium habeam. Justus ero, sicut Deus,  
si eandem cum ipso regulam habeam. San-  
ctus ero, sicut Deus, si eundem cum ipso  
morem habeam. Potens ero, sicut Deus,  
si eundem velim, quod ipse vult. Beatus ero,  
sicut Deus, si eandem cum ipso delectatio-  
nem habeam. Omnia mihi obediens, sicut  
Deus, si eandem cum ipso voluntatem ha-

Heu!



Heu ! quàm infelix hætenus fui , quamdiu contra Deum bellum gessi. Omnia repugnârunt voluntati meæ , quando Divinæ voluntati repugnaui. O mi Deus ! ne tradas me concupiscentiis meis. Ne permittas ampliùs , ut te offendam. Everte voluntatem meam , ne per ipsam evertatur voluntas tua. Compelle me , si tibi obtemperare detrectem. Exequere circa me voluntatem tuam , si quando recusem exequi beneplacitum tuum.

## Verba S. Scripturæ.

*Vita in voluntate ejus.* Psal. 29. 6.

*Sicut fuerit voluntas in cælo , sic fiat.* 1. Machab. 3. 60.

*Non quod ego volo , sed quod tu.* Marc. 14. 30.

*Domini voluntas fiat.* Act. 21. 14.

*Domine , quid me vis facere ?* Act. 6. 9.

## MEDITATIO VI.

*De obligationibus Deum amandi , eique serviendi.*

**Q**uia Deus est prima ac suprema Essentia. Quia ipse manibus suis formavit me. Quia creavit me , ut ipsum diligerem. Quia eripuit me ex inferno. Quia vitam suam mihi donavit. Quia redemit me sanguine suo. Quia nutrit me carne suâ. Quia animavit me spiritu suo. Quia promittit mihi Be-



nem suam. Quia ab æterno dilexit me. Quia cumulavit me beneficiis infinitis. Quia remisit mihi scelera infinita. Quia se totum mihi dono largitur. Quia totus, quantus sum, omni jure illi subiectus sum. Quia non subsisto nisi per ejus gratiam. Quia ipse mei amore exardescit. Quia unice desiderat me pari secum felicitate beatum efficere.

Amabo itaque Deum ex toto corde meo. Non serviam alteri Domino, quàm ipsi. Adimplebo omne ejus beneplacitum. Gloriæ ejus me totum consecrabo. Mi Deus! Opto, ut vivere desinam, nisi vitam omnem unice tuis obsequiis velim impendere. Destruere meum esse, nisi velim tuus esse. Everte desideria mea, si quid aliud desiderem præter te.

### Verba S. Scripturæ.

*Servus meus es tu.* Isai. 41. 9.

*Tuus sum ego.* Psal. 128. 94.

*Sive vivimus, sive morimur, Domini sumus.* Rom. 14. 8.

*Non estis vestri, empti enim estis pretio magno.* 1. Cor. 6. 19. & 20.

*O Domine! quia ego servus tuus, & filius ancillæ tuæ.* Psal. 115. 16.

### MEDITATIO VII.

*Contemplationes utiles ad mentem à mundo avellendam.*

Quis me introduxit in hunc mundum? Cur ego in hoc mundo? Quid ago in hoc mun-



mundo ? Quâ quiete fruor in hoc mundo ?  
Quando emigrabo ex hoc mundo ? Quò ibo,  
cùm discedendum mihi erit ex hoc mundo ?  
Quid me fecisse optabo, cùm per mortem  
egressurus ero ex hoc mundo ?

Ergone ob caduca fallacis mundi bona, per-  
peram dilecta, æternis torquebor incendiis ?  
si perdam animam meam, quid mihi prode-  
rit lucrum totius mundi ? Et tamen interea om-  
nis labor meus unicè intentus est comparandis  
perfidii mundi bonis.

O mi Deus ! aut eripe me ex hoc mundo,  
aut avelle cor meum à vanitatibus mundi.  
Effice, ut mundus moriatur mihi, aut ut ego  
moriar mundo. Separa animam meam à cor-  
pore suo, aut tolle à me noxium mundi amo-  
rem.

## Verba S. Scripturæ.

*Quid prodest homini, si mundum universum  
lucretur, animæ verò suæ detrimentum patia-  
tur ? Matth. 16. 26.*

*Vos de hoc mundo estis : ego non sum de hoc  
mundo. Joan. 8. 23.*

*Pater iuste, mundus te non cognovit. Joan.  
17. 25.*

*De mundo non estis. Joan. 15. 19.*

## MEDITATIO VIII.

### *De Morte.*

**M**Orieris aliquando. Non nisi semel  
tùm morieris. Nescis, quando si



turus. Nescis, quomodo sis moriturus. Nescis, quo loco sis moriturus. Nescis, quo in statu sis moriturus. Morieris citius, quam tibi persuadeas. Nisi mortem sollicitè præmediteris, mors improvisa te obruet.

Mors est talis, vita qualis. Non addiscitur uno momento, quod nunquam antè fuit tractatum. Non dediscitur uno momento, quod semper antè fuit in usu.

Post mortem supremo siteris Judici. Post iudicium migrabis in æternitatem. Quid tunc optabis fecisse? Quid tibi proderunt caduca mundi bona, tot curis conquesta?

O Mors! O Iudicium! O Salus! O Æternitas. Mortuus sum, nisi seriò mortem præcogitem. Amens sum, nisi Æternitatem præmediter. Non mereor salvari, nisi timeam damnari.

### Verba S. Scripturæ.

*Ecce propè sunt dies mortis tuæ, Deut. 31.*

14.

*O mors! quàm amara est memoria tua homini pacem habenti in substantiis suis. Eccli.*

41. 1.

*Nescit homo finem suum. Eccle. 9. 12.*

*Statutum est hominibus semel mori. Hebr.*

27.

*Et vos estote parati, quia quâ horâ non scitis, filius hominis veniet. Luc. 12. 40.*

*Dispone domui tuæ, quia morieris tu. Isa.*



## MEDITATIO IX.

*De Morte Justorum.*

**O** Quàm jucundum est mori illis, quos vivere non delectat ! Sine afflictione relinquitur, quod sine adhæsione possidetur. Suavis mors illi est, qui nullum in hac vita querit solatium. Anima sine dolore migrat è domicilio, quod nunquam libenter incoluit. Acceptabile est divortium illis, qui se mutuo non diligunt. Quod perditè amas in vita, afflictio tibi erit in morte. Quod te affligit in vita, solatium tibi erit in morte.

Quid potest in morte affligere animum, à rebus omnibus, dum viveret, sponte avulsum ? Fortis est, ut mors, dilectio. Prævertit nempe dilectio id, quod morti alioquin foret præstandum. Separat animam à suo corpore, nec quidquam morti separandum relinquit. Quid necesse est ? violentiam à morte inferri animo, qui nulli creaturæ hæret affixus ? Thesaurus meritorum sanctis Virtutum actibus comparatus, bonum est, quod animo eripi non potest. Pretiosa sanè hæreditas, quâ mors spoliare te non valet. O quantum tibi morienti erit solatium, vitam bonis operibus exegisse !

Nihil pulchri est in hac vita, nisi ostium pulchrum, per quod inde egrediaris. In omnia bona, quæ desiderari ab homine sunt, maximum est, sanctè mori. Mortis tamen illi est formidanda, qui bene



Mors namque est finis certaminum ejus. Est corona meritorum ejus. Deus in die illa mala conservat animam sibi fidelem. Jubet illam quiescere in fine suo. Munit illam gratiâ suâ. Mitigat dolores ejus. Dissipat terrores ejus. Angelis suis mandat, ut solentur illam, & protegant. Ut illam in pace conservent, atque ad Paradisum deducant.

O quàm pretiosa est in conspectu Domini Mors Sanctorum ejus ! O quàm honorabile Deo est hoc sacrificium ! O quàm acceptabilis Deo est hæc victima ! Mi Deus, poterône sperare bonam mortem, cùm vitam usque adeò perversam egerim ? Verum est, perdidi innocentiam meam, quam tamen reparare possum per Pœnitentiam. Ah ! Vivam vitâ justorum, ut mori possim morte justorum.

### Verba S. Scripturæ.

*Beati mortui, qui in Domino moriuntur.*  
Apoc. 14. 13.

*Timenti Dominum bene erit in extremis, & in die defunctionis suæ benedicetur.* Eccli. 1. 13.

*Pretiosa in conspectu Domini mors Sanctorum ejus.* Psal. 115. 15.

*His fieri incipientibus, respicite, & levate capita vestra, quoniam appropinquat redemptio vestra.* Luc. 21. 28.

*In lætitia egrediemini, & in pace deducemini montes & colles cantabunt coram vobis, &c.* Isa. 55. 12.



## MEDITATIO X.

*De Morte Peccatorum.*

**M**ors est grande malum. Gravius malum est peccatum. Sed mors juncta peccato est malorum omnium terribilissimum. Est malum universale. Est malum æternum. Est malum sine remedio. Est comminatio maximè terrifica, quam Deus irritatus potest intentare.

O quàm formidanda est mors impiorum ! Consternantur horrore, cùm se ex improvise vident constitutos in ultima linea temporis, quod tam impiè dissipârunt. Cùm se advertunt jamjam abripi in carcerem æternitatis, ex quo nulla est redemptio.

Incipere videre, quod nunquam fuerat spectatum. Incipere comprehendere, quod nunquam fuerat cogitatum. Incipere experiri, quod nunquam fuerat apprehensum. Incipere sentire, quod nullo experimento fuerat præcognitum. Incipere pati cruciatus æternitati commensos. Desertâ patriâ deliciarum, ingredi locum tormentorum. Descendere ex paradiso in profundum inferni. Transire ab opulentia ad extremam indigentiam. Præcipitari ex throno gloriæ in abyssum confusionis. O quàm terribilis est hæc mutatio ! O quàm dura est hæc calamitas ! O quàm hæc novitas est improvise ! O quàm hic cæcus est expavescendus !



Quod in justis accendit desiderium, impiis incutit terrorem. Homo justus nihil ardentius desiderat, quàm comparere in conspectu Dei. Homo impius nihil magis formidat, quàm sibi in conspectu Dei. Quantus horror erit impio videre se coram Deo, quem irritavit? Coram Patre, quem injuriis affecit? Coram Rege, quem despectui habuit? Coram Amico, quem perfidè prodidit? Coram Belli Duce, quem turpiter deseruit? Coram Sponso, cui fidem fregit? Coram Judice, quem atrociter offendit? Coram Salvatore, quem sceleribus suis in crucem egit? Nihil magis reformidat impius, quàm metuendum irati Judicis aspectum, quem tamen minimè poterit subterfugere.

Tunc intuebitur omnia sua flagitia, quæ insurgent ad ipsum accusandum. Videbit demones truculenter illi inhiantes. Videbit supra se Judicem irâ succensum, fulminantem æternæ damnationis sententiam. Videbit infra se patentem inferni puteum, in quem mox erit præcipitandus. Videbit retro se mundum, à quo turpiter fuit deceptus. Videbit ante se bona sua perditè amata, jamjam ipsi eripienda. Videbit juxta se creaturas, quæ ipsi fuere occasiones peccandi. Videbit intra se corpus suum jamjam deserendum.

O Jesu Crucifixe! Quàm conspectus tuus consolabitur tunc justos! Quàm conspectus tuus consternabit tunc impios! Quomodo audent in te respicere, quem crucifixerunt? Quia tua vulnera sanguine diffluent in præteritam crudelium tuorum carnificum.

Et



Et qualis erit mors mea? talis qualis vita tua fuit. Moriârne morte Justorum? Omnino, si vivas vitâ Justorum. Moriârne morte impiorum? Omnino, si vivas vitâ impiorum. Vivam itaque deinceps in gratia, ut moriar in pace. Vivam sanctè, ut moriar tranquillè. Vivam in pœnitentia, ut moriar in securitate.

## Verba S. Scripturæ.

*Mors peccatorum pessima. Psalm. 33. 22.*

*Virum injustum mala capient in interitu.*  
Psal. 139. 12.

*Cur timebo in die mala? iniquitas calcanei mei circumdabit me. Psalm. 48. 6.*

*Relinquent alienis divitias suas, & sepulchra eorum domus illorum in æternum. Psalm. 48. 12.*

*Mortuus est & dives, & sepultus est in inferno. Luc. 16. 22.*

*Nisi pœnitentiam habueritis, omnes similiter peribitis. Luc. 13. 3.*

## MEDITATIO XI.

### De Iudicio.

**D**EUS est oculus, qui videt omnia. Est auris, quæ audit omnia. Est manus, quæ scribit omnia. Non video, & tamen video. Non intelligo, & tamen intelligo. Non cognosco, & tamen cognoscor.



lus, qui omnia detegit, tectus est. Auris, quæ audit omnia, latet abscondita. Manus, quæ scribit omnia, est invisibilis.

Nihil perditur, nihil exerrat. Omnia ex tempore transeunt ad æternitatem. Quod transiit, revertetur. Quod amissum credebatur, reperietur. Crimen sepultum resuscitabitur. Id, quo tempus malè prodigitur, non transibit cum tempore.

Omnia discutientur, sine exceptione. Omnia judicabuntur, sine personarum acceptatione. Omnia condemnabuntur, sine remissione. Omnia punientur, sine commiseratione.

Heu mi DEUS! Ubi me abscondam, quando ad tribunal evocabor? Quid respondebo, quando interrogabor? Quid de me fiet, quando judicabor? Quid fecisse optabo, quando condemnabor?

Venite ad me, benedicti Patris mei; O verba amabilia! Discedite à me maledicti; O verba terribilia! Nos ipsi scribimus in hâc vitâ sententiam, quæ tunc pro nobis, aut contra nos pronuntiabitur. Heu me infelicem! quando manifestabuntur crimina mea. Heu me infelicem! quando manifestabuntur arcana cordis mei. Heu me infelicem! quando dicetur: En hominem, & bona, quæ ipsi præstiti: En hominem, & mala, quæ contra me commisit.

### Verba S. Scripturæ.

*Omnes stabimus ante tribunal Christi. Rom.*  
*Omnes*



*Omnes nos manifestari oportet ante tribunal Christi, ut referat unusquisque propria corporis, prout gessit, sive bonum, sive malum.*

2. Cor. 5. 10.

*Cuncta, quæ fiunt, adducet Dominus in iudicium.* Eccle. 11. 9.

*In fine hominis denudatio operum ejus.* Eccli. 11. 29.

*Si justus quidem vix salvabitur, impius & peccator ubi parebunt?* 1. Petri 4. 18.

## MEDITATIO XII.

### De Inferno.

**I**Nfernus est carcer Justitiæ DEI. Est armamentarium vindictæ ejus. Est terminus furoris ejus. Est centrum malorum omnium. Est puteus profundus mortis, nunquam morituræ. Est regnum Dæmonum. Est patria desperatorum. Est regio lacrymarum. Est locus tormentorum. Est terra maledictionis. Est exilium sine solatio. Est jactura, sine recuperatione. Est labor sine quiete. Est dolor sine fine. Est malum sine remedio.

Ibi homo erit separatus à DEO. Homo erit maledictus à DEO. Homo odio habebitur à Deo. Deus illum odio habebit, nec poterit eum amare. Odium ejus erit infinitum. Odium ejus erit irreconciliabile. Odium ejus erit universale. Odium ejus æternum.



In Cælo erunt omnia, quæ amabis. In inferno erunt omnia, quæ detestaberis. In Cælo erunt puræ delectationes. In inferno erunt puri dolores. In Cælo nullius rei erit indigentia. In inferno erit indigentia rerum omnium.

O rerum vicissitudo expavescenda! Impius fugit Deum in terrâ, quem tamen ubique reperit. Quærit Deum in inferno, nec tamen unquam illum inveniet. Quid dico: Fugiet Deum? Heu! reperiet eum ubique, nec tamen unquam illum amabit. Dei præsentia efficit Paradisum. Dei præsentia efficit infernum. Maxima pœna reprobis est, Deum ubique præsentem habere, sed irritatum.

O æternitas! quàm longa es! O æternitas! quàm terribilis es! O nunquam, quod nunquam finietur! O Semper, quod semper durabit! O Præsens, quod semper cohæret cum præterito! O præteritum, quod semper cohæret cum futuro. O æternitas! an nunquam te formidabimus? O æternitas! an nunquam te animo comprehendemus? Si te semper mente revolveremus, nunquam peccaremus.

### Verba S. Scripturæ.

*Terram miseriæ, & tenebrarum, ubi umbra mortis, & nullus ordo, sed sempiternus horror inhabitat.* Job. 10. 22.

*Inutilem servum ejicite in tenebras exteriores. Ibi erit fletus & stridor dentium.* Matth.



*Qui pœnas dabunt in interitu æternas à facie Domini, & à gloria virtutis ejus. 2. Theff. 1. 9.*

*Pones eos, ut clibanum ignis in tempore vultus tui: Dominus in irâ suâ conturbabit eos, & devorabit eos ignis. Psal. 20. 10.*

*Peccator videbit, & irascetur; dentibus suis fremet, & tabescet: desiderium peccatorum peribit. Psal. 111. 10.*

## MEDITATIO XIII.

### *De duplici Æternitate.*

**V**ivere semper & nunquam mori. Mori semper & nunquam vivere. Possidere omnia, & nihil desiderare. Desiderare omnia, & nihil possidere. Semper quiescere, & nunquam laborare. Semper laborare, & nunquam quiescere. Semper lætari, & nunquam tristari. Semper tristari, & nunquam lætari. Semper Deum amare, & nunquam posse illum odio habere. Semper Deum odisse, & nunquam posse illum amare. En! quæ sit hæreditas bonorum. En! quæ sit pœna impiorum.

O quàm amabilis est Paradisus! O quàm horribilis est infernus! O quàm fallax est mundus! O quàm cæcus est homo! O quàm breve est tempus! O quàm longa est æternitas! Longum non est, cujus extremum conspicitur. Breve non est, cujus nullum apparet extremum.



## Verba S. Scripturæ.

*Ibunt hi in supplicium æternum: Iusti autem in vitam æternam. Matth. 25. 46.*

*Utinam saperent, & intelligerent, & novissima providerent! Deut. 32. 29.*

*Vermis eorum non morietur, & ignis eorum non extinguetur. Isai. 66. 24.*

*Discedite à me maledicti in ignem æternum, qui paratus est diabolo & Angelis ejus. Matth. 25. 41.*

*Venite Benedicti Patris mei, &c. Matth. 25. 34.*

## MEDITATIO XIV.

*De peccato mortali.*

**Q**uid feci? Offendi Majestatem infinitam. Injuriâ affecti Perfectiones infinitas. Destruere conatus sum Bonitatem infinitam. Violavi obligationem infinitam. Commisi igitur injustitiam infinitam. Mereor itaque poenam infinitam.

Deus odit peccatum, quantum potest odisse. Odit peccatum, quantum amat Filium suum. Odit peccatum, quantum amat semetipsum. Odit peccatum unice. Odit infinite. Odit necessario. Odit essentialiter. Etenim illud odio persequetur.

Et ego amo id, quod Deus odit. Quantum in me est, ita illud amo, sicut Deus odit.



odit. Illud amo unicè, quod ille odit unicè. Amo immodicè, quod ille odit infinitè. Amo liberè, quod ille odit necessariò. Amo constanter, quod ille æterno odio persequetur.

Persequar deinceps peccatum eo odio, quo debeo. Tanto illud odio persequar, quanto amore meipsum, & Deum prosequi debeo.

Abominabor peccatum unicè, infinitè, necessariò, constanter, æternùm.

### Verba S. Scripturæ.

*Altissimus peccatores odio habet, & impiis reddet vindictam. Eccli. 12. 3. & 4.*

*Quid fecisti? Vox sanguinis fratris tui clamat ad me de terrâ. Gen. 4. 10.*

*Deus propitius esto mihi peccatori. Luc. 18. 13.*

*Anima, quæ per superbiam aliquid commiserit, sive civis ille sit, sive peregrinus, quoniam adversus Deum rebellis fuit, peribit de populo suo. Num. 15. 30.*

*Odio sunt Deo impius & impietas ejus. Sap. 14. 9.*

*Quem fructum habuistis tunc in illis, in quibus nunc erubescitis? nam & finis illorum mors est. Rom. 8. 21.*



## MEDITATIO XV.

*De Peccato veniali.*

**M**agna culpa est, quæ Deo adversatur. Magna injuria est, quæ Deo infertur. Omne peccatum veniale DEUM ignominiâ afficit. Offendit Sanctitatem Dei. Contristat spiritum Dei. Frigescere facit amorem Dei. Imminuit gratias Dei. Seducit nos à recto tramite Divinæ gubernationis.

Magis contemno Deum unico peccato veniali, quàm honorare illum possim omnibus bonis operibus. Consultius est, abstinere vel ab uno peccato veniali, quàm bona opera omnis generis exercere. Peccatum vulnerat, & deformat animam meam. Obscurat intellectum meum. Debilitat voluntatem meam. Commovet passiones meas. Committendo peccata modica, periculo me expono patrandi grandia. Habitus venialis peccati sensim sine sensu deducit ad mortale.

O quantum te contempsi, Deus Majestatis! O quantum te affixi, Deus Bonitatis, O quantis injuriis te affeci, Deus Sanctitatis!

Anima mea! time malum, quod deducit ad mortem. Cave peccata modica, si velis vitare grandia. Modico cælum comparatur: & modico cælum deperditur. Peccatum veniale damnare te non potest; interim tamen à levissimo peccato Damnatio frequenter incipit exordium.

Ver-



**Verba S. Scripturæ.**

*Qui in modico iniquus est, & in majori iniquus est. Luc. 16. 10.*

*Ecce quantus ignis, quàm magnam silvam incendit! Jac 3. 5.*

*Nolite contristare Spiritum sanctum. Ephes. 4. 30.*

*Qui spernit modica, paulatim decidet. Eccli. 19. 1.*

*De omni verbo otioso, quod locuti fuerint homines, reddent rationem in die judicii. Matth. 12. 36.*

**MEDITATIO XVI.**

*De Pœnitentia.*

**A** Ut infernus, aut Pœnitentia. Non sunt nisi duæ viæ ad æternitatem, lata, & arcta. Lata deducit ad infernum. Arcta deducit ad cælum. Lata est planior. Arcta est asperior. Lata frequentatur à plurimis. Arcta à paucis teritur.

In quâ tu progredieris? Ambulas in via lata. Vivis secundum mortem communem. Non imitaris nisi vitia aliorum. Non imitaris aliorum virtutes. Non obsecundas nisi pravis inclinationibus tuis. Non sequeris nisi cupiditates tuas indomitas. Horres arctam salutis semitam, semper declinas ad laxiorem viam perditionis. Audax es ad peccandum; sed timor animosus ad agendam pœnitentiam.



Quam nisi promptè agas, subitò morieris. Nisi illam agas in tempore, serò nimis illam ages in æternitate.

O mi Deus! noli mihi parcere in tempore, dummodo mihi parcas in æternitate.

## Verba S. Scripturæ.

*Facite fructus dignos pœnitentiæ. Luc. 3. 8.*

*Nisi pœnitentiam habueritis, omnes similiter peribitis. Luc. 13. 3.*

*Intrate per angustam portam; quia lata porta, & spatiosa via est, quæ ducit ad perditionem, & multi sunt, qui intrant per eam. Matth. 7. 13.*

*Quàm angusta porta, & arcta via est, quæ ducit ad vitam, & pauci sunt, qui inveniunt eam. Ibidem. 14.*

*Pœnitentiam agite, appropinquavit enim Regnum Cælorum. Matth. 3. 2.*

## MEDITATIO XVII.

### *De Conversione non differenda.*

**N**isi pœnitentiam agas, non salvaberis. Nisi promptè ac celeriter illam agas, fortè nunquam ritè illam perages. Non habebis semper hoc tempus. Non habebis semper hanc gratiam. Non habebis semper hanc salutem. Qui abutitur tempore, perit tempore. Qui abutitur gratiâ, perit gratiâ.



vatur gratiâ. Qui abutitur suâ libertate, privatur suâ libertate.

Cur differs conversionem tuam? Decetne te malum esse, quia Deus bonus est? Deine patientia causa sit protervitatibus tuâ? Num ejus Justitia serviat iniquitati tuâ?

Peccare cum spe obtinendæ veniæ, est peccare per temerariam fidenciam. Est conservare vitium per gratiam, quâ illud deberet destrui. Est nutrire peccatum, per remedium, quo deberet extingui. Est mutare pœnitentiam in fulcrum suæ impœnitentiæ.

Cur differs id, quod aliquando est faciendum? Quod cras cum fructu peragi poterit, an non & hodie fructuosè peragetur? Tunc certò tibi promittas vitam crastinam? Habebisne die crastinâ eandem gratiam? Habebisne cras eandem voluntatem? Ergone negotium æternitatis fundandum est in incertitudine futuri temporis?

Id, quod fieri potest, certò fiet, si Deus non impediat. Dæmon certò vitam tibi arumpet, nisi Deus ejus conatum impediat.

Morimur, sicut viximus. Mors est Echo vitæ. Quomodo odisse poteris in morte, quod totâ vitâ amâsti? Quomodo amabis in morte, quod totâ vitâ odisti? Latro salvatus est, ne desperes. Sed non nisi unus salvatus est, ne justo fidentiùs tibi pœnitentiam promittas.

Dicis, te à re nulla urgeri. Et ego affirmo, te ab omnibus urgeri. Tempus, quod tibi elabitor, urget te. Gratia, quæ tibi offertur, urget te. Paradisus, qui tibi paratur, urget te.



urget te. Infernus, in quem præceps abis, urget te. Mors, quæ tibi minatur, urget te. Judicium, quod imminet, urget te.

O mi Deus! Stultum nimis est, differre id, quod nimis citò fieri non potest. Insanum est, continuò exercere id, quod fieri nunquam debet. Nolo expectare crastinum, quia certus non sum de vita in crastinum protrahenda. Vita mea tota quanta, tua est, mi Deus! Cur tibi non nisi modicam ejus partem impendam? Tu mihi indulges tempus ad te amandum; an æquum est, ut illo abutar ad te offendendum? Si offeram Sacrificium Caini, reprobabor sicut ipse. Nunquam satis providere quis sibi potest de securitate, quando agitur de æternitate.

### Verba S. Scripturæ.

*Convertere ad Dominum, & relinque peccata tua. Eccli. 17. 21.*

*An divitias Bonitatis ejus, & Patientiæ, & longanimitatis contemnis? Ignoras, quoniam Benignitas Dei ad pænitentiam te adducit. Rom. 2. 4.*

*Pænitemini igitur, & convertimini, ut deleantur, peccata vestra. Act. 3. 19.*

*Non tardes converti ad Dominum; & ne differas de die in diem: Subitò enim veniet ira illius, & in tempore vindictæ disperdet te. Eccli. 5. 8.*

*Vir, qui corripientem se durâ cervice contemnit, repentinus ei superveniet interitus. Eccli. 29. 1.*

Me-



## MEDITATIO XVIII.

*De Conditionibus veræ Penitentia.*

**V**era pœnitentia ortum trahere debet ex  
imo cordis. Cor peccatum concepit,  
quod proin à corde rursus est destruendum.  
Cor longè recessit à Deo; Cor ergo reverti  
debet ad Deum. Odium procedit ex amore.  
Nemo odit, nisi quia amat. Tantùm quis  
odit, quantùm amat. Quare odisse debeo  
peccatum tantùm, quantùm debeo amare  
Deum. Tantùm, quantùm debeo amare me-  
ipsum. Tantùm, quantùm debeo amare Pa-  
radisum. Tantùm, quantùm debeo timere  
infernum. Deum unicè amare debeo; ergo  
peccatum debeo unicè odisse. Omnia debeo  
amare propter Deum. Ergo omnia debeo  
odisse propter peccatum. Deum amare debeo  
super omnia. Ergo peccatum debeo odisse  
super omnia. Non possum excedere in amo-  
re Dei. Neque possum excedere in odio pec-  
cati.

Pœnitentia nihil prodest, nisi sit de omni-  
bus peccatis. Si gratia non deleat omnia pec-  
cata, nullum delet. Non potest quis solùm  
ex parte Deo reconciliari. Non potest quis  
simul amari, & odio haberi. Non potest  
quis in peccato simul existere & in gratiâ. Non  
potest quis Dei simul esse, ac Dæmonis. Non  
potest quis Cælo dignus simul esse ac inferno.  
Si quis non credit omnia, nihil credit.



quis non odit omnia, nihil odit. Ut sis filius Ecclesiæ, oportet credere omnes veritates. Ut sis filius Dei, oportet odisse omnia peccata. Saul excipit aliqua, & hæc est causa perditionis ejus. Inimicus Dei factus est, quia vivum servavit unum hostium suorum. Quid prodest tibi, vincere unum peccatum, si alterius sis mancipium? Quid prodest tibi, desistere iracundiam tuam, si mancipium sis impuditiæ tuæ? Satis est unum vulnus lethale, ad vitam corpori adimendam. Satis est unum peccatum mortale, ad vitam animæ tollendam.

Homo nequaquam est poenitens, qui poenitere non vult, nisi pro aliquo tempore. Oportet semper odisse malum, quod semper odio habetur à Deo. Amicitia non censetur dissoluta, quam quis statuit renovare. Estne hoc odisse peccatum, velle illud iteratò committere? Estne hoc veram habere contritionem, aliqualem tantùm sentire aversionem?

Potest quis odisse peccatum suum, etiamsi non sentiat odium. Potest quis sentire dolorem, etiamsi non habeat verum dolorem. Is verè odit peccatum, qui decrevit illud destruere. Poenitentia sincera non est, si occasiones peccandi non fugiat. Si ames causas peccati, peccatum pariter amas.

Non satis est, peccata odisse. Oportet & damna reparare. Oportet reddere bona, iniquo titulo partita. Restituere honorem, proximo ablatum, reparare scandala, aliis data. Satisfacere illis, quibus offensus. Oportet per dolorem castigationem, quam quis peccando hausit.



fit. Deus in pœnitentiam transfert jus, quod ipse habet, puniendi peccatorem. Si pœnitentia parca sit in pœnis injungendis, Justitia Dei parca non erit. Si pœnitentia severè puniat crimina, justitia Dei non puniet.

O mi Deus! quàm justas causas habeo timendi, ne adhuc hæream in statu peccati! Odióne illud habui sincerè? in fine anni is ipse sum, qui fui à principio? Ah! statuo vitam mutare. Mi Deus! Muta, obsecro, cor meum. Da mihi spiritum novum, ut vitam deinceps novam instituam.

### Verba S. Scripturæ.

*Si in toto corde vestro revertimini ad Dominum, auferrete Deos alienos de medio vestri.* 1. Reg. 7. 3.

*Qui abscondit scelera sua, non dirigitur: qui autem confessus fuerit, & reliquerit ea, misericordiam consequetur.* Prov. 28. 13.

*Convertimini ad me in toto corde vestro, & scindite corda vestra, & non vestimenta vestra: Convertimini ad Dominum Deum vestrum, quia benignus est, & misericors, patiens, & multæ misericordiæ, & præstabilis super malitia.* Joël. 2. 13.

*Anania, cur tentavit Sathanas cor tuum, mentiri te Spiritui sancto, & fraudare de pretio agri? Non es mentitus hominibus, sed Deo.* Act. 5. 3.

*Non est reversa ad me, prævaricatrix in toto corde suo, sed in mendacio.* Jer. 3. 10.



*Proijcite à vobis omnes prævagationes vestras, & facite vobis cor novum, & Spiritum novum, & quare moriemini, Domus Israël? Ezech. 18. 31.*

## MEDITATIO XIX.

*De Fugâ Occasionum, & malarum Societatum.*

**I**Ncassum te abscondis, quia societas tua facile prodit, qualis sis. Simile simili gaudet. Talis es, quales sunt illi, quorum consuetudine frequentius uteris. Si admittas perverfas Societates, credi facile potest te esse flagitiosum, aut saltem quod paulò post similis futurus sis illis, quibuscum crebrius versaris.

Bonum Exemplum efficit homines bonos. Malum Exemplum efficit malos. Ignorantia, & verecundia sunt duo propugnacula innocentiae. Multa crimina ignorares, nisi ea ab aliis committi vidisses. Exhorresceres peccatum, si nemo illud patrare te docuisset. Exemplum splendorem conciliat sceleri. Suadet illud justum esse ac licitum. Auctoritatem sceleri tribuit, & quasi necessitatem. Erubescit quis esse innocens in Societate malorum. Nemo erubescit peccatum, quod exemplo coronatur. Vanum est, sperare, te bonum futurum inter malos. Malum facillimè contrahitur, quia natura in illud propendet. Imitatur id, quod ab aliis videt patrari. Nihil in vetitum. Non semper sanus est, qui  
vivit



vivit cum sanis. Sed facilè morbum contrahit, qui conversatur cum ægris.

Descende in infernum, & intueri execrabiles illas victimas. Audi lamentabiles illorum ejulatus. Inquire causas infelicitatis eorum. Nullus reproborum erit, qui non multis cum lacrymis respondebit: Exemplum prævum me perdidit. Societas perversa me damnavit.

Placere cupimus illis, quos amamus. Frequenter conversamur cum illis, qui genio nostro præ aliis arrident. Nunquam placebis vitiosis, si non pariter cum illis sis vitiosus.

At nihil, inquis, ego mali perpetro. Semper innocens maneo ovicula, tametsi vivam in medio luporum. Semper conservo dulcedinem aquæ in medio salis maris. Semper respiro aërem innoxium in domo peste infectâ. Ego autem affirmo, te esse mortuum, nisi credas te esse ægrotum. Potestne absque peccato amari occasio peccandi? An non grande malum est, scandalum proximo datum? Quis credere possit, te esse castum inter lascivos? Saltem non diu perseverabis esse castus. Exemplum est magister pessimus. Citò addisces perpetrare scelus, quod ab aliis videris parrari. Occasio te alliciet. Societas te abripiet. Tentatio incrementum capiet. Timor imminuetur. Gratia infirmabitur. Pudor extinguetur. Natura succumbet. Habitus invalescet. Voluntas obdurescet. Ecce progressum iniquitatis. Ecce viam in poenitentiae. Ecce terminum impietatis.



O Anima Christiana! devita occasiones. Fuge pravas Societates. Noli amare illos, quos imitari non licet. Noli imitari illos, quos amare non licet. Noli placere illis, qui displicent Deo. Procul discede ab illis, qui longè recedunt à Deo. Fuge personas contagiosas. Evita occasiones periculosas. Gratiam habes, illas non adeundi. Gratiam habes, te ab illis subtrahendi. Habebisne etiam gratiam, inter illas sine peccato commorandi? An non arrogantis præfidentia scelus est, gratiam sibi promittere in occasione peccandi studiosè quæsità? Saltem perquam infirma erit gratia, & inimicus tuus admodum robustus erit. Est canis alligatus catenâ. Mordet nos, si appropinquemus. Expectat nos oblata occasione. Si eò sponte te conferas, (Anima temeraria!) succumbes tentationi. Qui amat periculum, peribit in illo.

### Verba S. Scripturæ.

*Noli esse amicus homini iracundo, neque ambula cum viro furioso, ne fortè discas semitas ejus.* Prov. 22. 24.

*Qui tetigerit picem, inquinabitur ab ea, & qui communicaverit superbo, induet superbiam.* Eccli. 13. 1.

*Qui se jungit fornicariis, erit nequam.* Eccli. 19. 3.

*Si quis inter vos est fornicator, cum hujusmodi cibum non sumite.* 1. Corinth. 5. 11.

*Qui amat periculum, in illo peribit.* Eccli. 7.

Rece-



*Recedite à tabernaculis impiorum, & nolite tangere, quæ ad eos pertinent, ne involvami-  
ni peccatis eorum. Num. 16. 26.*

*Si oculus tuus dexter scandalizat te, erue  
eum, & projice abs te; expedit enim tibi, ut  
pereat unum membrorum tuorum, quàm totum  
corpus tuum mittatur in gehennam. Matth.  
5. 29.*

*Denunciamus vobis, Fratres, in Nomine  
Domini JESU Christi, ut subtrahatis vos  
ab omni fratre ambulante inordinate. 2. Thess.  
3. 6.*

## MEDITATIO XX.

### *De bonâ & malâ Conscientiâ.*

**O** Quàm bonum est, Deo servire! O quàm  
jucundum est, Deum amare! Quàm  
bonus est Deus amantibus se! Quàm terribi-  
lis est Deus offendentibus se! Quàm felix est  
bona conscientia! Quàm infelix est mala con-  
scientia! Quantis gaudiis innatat cor sanum!  
Quantâ tristitiâ absorbetur cor ægrum! Quan-  
ta quies in anima bona! Quanta perturbatio  
in anima impia!

Conscientia justî, est Paradîsus. Conscien-  
tia peccatoris, est infernus. Deus possidet  
animam justam. Dæmon possidet animam  
sceleratam. Homo probus nihil timet. Ho-  
mo improbus metuit omnia. Homini justo  
bene convenit secum ipso. Homini scelestus  
malè convenit secum ipso. Homo viri



studiosus, libenter moratur secum ipso, quia omnia interiora ejus sunt in pace. Homo impius horret ingredi in seipsum, quia omnia interiora ejus sunt perturbata. Homo justus vitam plùs æquo non diligit. Homo peccator nihil magis metuit, quàm mortem.

O quàm dulcis est virtus! O quàm vitium est amarum! O quàm pretiosa est mors Justorum! O quàm horribilis est mors peccatorum! Ah! amabo Deum in tempore, ut amare illum valeam in æternitate. Vitam nunc sanctam instituam, ut sperare possim mortem beatam.

## Verba S. Scripturæ.

*Peccatum meum contra me est semper.* Ps. 50. 5.

*Non est pax impiis, dicit Dominus.* Isa. 48. 22.

*Secura mens, quasi juche convivium.* Prov. 15. 15.

*Tribulatio, & angustia in omnem animam hominis, oporantis malum.* Rom. 2. 9.

*Infernus domus mea est.* Job. 17. 13.

*Gloria nostra hæc est, testimonium conscientiae nostræ.* 2. Cor. 1. 12.

## MEDITATIO XXI.

### *De Pace Animi.*

Optarem equidem in pace vivere. Quæ causa est, quòd pace non fruar? Nón- quia nimium indulgeo sensibus meis?

Nb.



Nónne, quia nimis adhæreo voluntati meæ? Nónne, quia repugno superioribus meis? Nónne, quia nihil pati sustineo? Nónne, quia vanis desideriis ardeo? Nónne, quia ambitio me inflat? Nónne, quia invidia me torquet?

Nónne, quia Deo bellum moveo? Nónne, quia resisto voluntati ejus? Nónne, quia me oppono Providentiæ ejus? Nónne, quia volo, quod ille non vult? Nónne, quia nolo, quod ille vult? Quis potest in pace vivere, si Deo bellum moveat? Quis potest contentus quiescere, si malè cum Deo conveniat!

O anima mea! si contra Deum insurgis, Deus quoque contra te insurget. Si perturbes pacem ejus, perturbabit ille quietem tuam. Si custodias mandata ejus, mandata ipsius te pariter custodient. Si perturbes dispositionem ejus, dispositio ejus te pariter conturbabit. Nihil desidera, & habebis omnia. Imple Voluntatem Dei, & Deus tuam pariter adimplebit.

### Verba S. Scripturæ.

*Voluntatem timentium se faciet.* Psalm. 144. 19.

*Unde bella & lites in vobis? Nónne hinc, ex concupiscentiis vestris?* Jac. 4. 1.

*Gloria in altissimis Deo, & in terrâ pax hominibus bonæ voluntatis.* Luc. 2. 14.

*Pacem meam do vobis; non turbetur vestrum.* Joan. 14. 27.



*Pax multa diligentibus legem tuam. Psal.*  
118. 165.

## MEDITATIO XXII.

### *De vanis Desideriis.*

**N**Um contenta vivis anima mea? Quid desideras super terram? An Deus tibi non sufficit? Nunquid ipse est omnis tua felicitas? Quando, obsecro, fruebaris quiete absque illo? Et quando inquieta eras cum illo? Quid quæris præter Deum? Quid satiare te potest, si Deus tibi non sufficit?

Desideria tua sunt tyranni tui. Illa te redunt infelicem. Illa cor tuum discerpunt.

O quàm felix esses, si nihil desiderares! Quid lucraris desideriiis tuis? Vanis desideriiis cælum præclusum est. Hæc sunt dæmones inferni. Hæc torquent damnatos. Cessa desiderare, & liber exhibis ab inferno tuo.

O mi Deus! Omnis abundantia extra te, egestas mihi est. Omnis dulcedo amarities mihi est. Avarum nimis est cor, cui Deus non sufficit.

### Verba S. Scripturæ.

*Radix omnium malorum est cupiditas. 2.*  
Tim. 6. 10.

*Desiderium peccatorum peribit. Ps. 111. 10.*

*Desideria occidunt pigrum. Prov. 21. v. 25.*

*Omne desiderium averte à me. Eccli. 23. 5.*

*Ne tradas me, Domine, à desiderio meo  
tori. Psal. 139. 9.*

*Mar-*



*Martha, Martha, sollicita es, & turbaris  
erga plurima. Luc. 10. 41.*

## MEDITATIO XXIII.

### *De Tepiditate.*

**H**eu! quàm infelix est anima tepida! Deus illi jam non sapit. Caret Divinis solatiis. Exerrat à semitis Divinæ Providentiæ. Peccat sine timore. Mala perpetrat sine remorsu. Horret in seipsam reverti.

Ægra est, nec sentit vim mali. Perversa est, & credit se bonam. Mancipium cupiditatum est, & liberam se credit. Abutitur omnibus remediis. Reijcit omnes inspirationes. Insensibilis est ad omnes gratiæ motus. Devotionem nihili pendit. Proximis est offendiculo. Communitati molesta est. Gravis est cordi Dei, è quo jamjam est eiicienda, fortè nunquam deinceps intra illud reditura.

Súmne ego in statu, usque adeò miserabili? Calidúsne sum, an frigidus? Súmne totus Dei? An dimidiâ tantum ex parte? Anima ergo mea est tepida.

O Divine Salvator, quanto tempore jam te affligo, quanto tempore cor tuum premo! Ah! noli me adhuc evomere. Noli me privare amore tuo. Repelle me, si ita tibi libeat, à Paradiso tuo; sed noli me eiocere è corde tuo. Retrahe bona tua ab anima mea. Sed non subtrahe mihi amorem tuum.



plùs timeo odium & aversionem tuam, quàm omnes poenas inferni.

Memento, anima mea, felicissimi illius statûs, ex quo excidisti. Restaura fervorem tuum pristinum. Quod nisi quanto cyùs facias, tolletur candelabrum tuum, & alius in locum tuum substituetur. Jesus te incipiet evomere è corde suo, intra quod fortè nunquam deinceps recipieris.

### Verba S. Scripturæ.

*Utinam frigidus esses, aut calidus! sed quia tepidus es, incipiam te evomere ex ore meo.*  
Apoc. 3. 15. & 16.

*Spiritu ferventes.* Rom. 12. 11.

*Memor esto, unde excideris, & age pœnitentiam, & prima opera fac: Sin' autem, veniam tibi citò & movebo candelabrum tuum de loco suo.* Apoc. 2. 5.

## MEDITATIO XXIV.

### De Odio Mundi.

**M**undus est fallax. Oportet eum contemnere. Nihil præstat eorum, quæ promittit. Bona illius vera non sunt. Non sunt solida. Non sunt pura. Non sunt duratura. Non possunt replere cor. Non possunt satiare mentem. Molestias generant sollicitudines. Nec unquam quietem indulgent. Non unquam stabili fruebaris quiete, quam in mundo eras ab obsequiis?

Opor-



Oportet odisse mundum, quia est inimicus Jesu Christi. Quia est fautor dæmonis. Quia est tyrannus virtutis. Qui amat mundum, credit axiomata mundi. Non credit effata Evangelii. Ergo non nisi nomine, Christianus est; corde autem est infidelis. Dæmones credunt Deum, & contremiscunt. Sed non credunt in Deum, quia non faciunt voluntatem ejus. Amator mundi credit Deum, sed non credit in Deum. Sathan credit, & contremiscit. Amator mundi credit, & illudit. Deterior ergo est dæmone. Quicumque est amicus sæculi hujus, inimicum Dei se profitetur. Estne hoc esse fidelem Regi suo, amare hostes ejus?

Fugiendus est mundus. Societas ejus periculosa est. Neque in eâ quis potest securè vivere. Mundus est mare plenum scopulis. Mundus judicatus est. Mundus condemnatus est. Mundus maledictus est. Mundus excommunicatus est. His expensis, poterisne adhuc commercium habere cum mundo? Satiùs est, odio haberi ab impijs, quàm amari. Si mundo adhæreas, morieris in peccato tuo.

Cur vis diligere mundum? An ille te creavit? An ille te redemit? An ille te salvabit? Jesus dicit, se non esse de hoc mundo: Et tu dicis, te esse de hoc mundo. Ergo non es Discipulus Jesu Christi.

An non renunciasti mundo, quando fuisti baptizatus? Renunciasti fallaci mundo, antequam haberes usum rationis. Et nunc eum adoras, cum polles usu rationis. Renun-



ſi illi, antequam utereriſ libertate; & modò cum plenâ libertate eum diligis. Certè ſi in primo mundi ingreſſu uſum rationis habuiſſes, utiquè baptizari recuſaſſes.

O JESU! Quot mundus cultores habet, & quàm paucos tu numeras tuo addiſctos obſequio! Decipit mundus omnes homines, & omnes illi ſerviunt. Tu neminem decipis; nec tamen quiſquam tibi obedit.

O mi Deus! Ego Chriſtianus ſum. Fides me docet contemnere mundum, & non adorare. Malo eſſe parvus cum humili JESU, quàm eſſe magnus cum mundo ambitioſo. Malo plorare cum JESU affliſcto, quàm gaudere cum mundo delitioſo. Malo carere omnibus cum paupere JESU, quàm poſſidere omnia cum mundo ſclerato.

### Verba S. Scripturæ.

*Væ mundo à ſcandalis!* Matth. 18. 17.

*Ego non ſum de hoc mundo.* Joan. 8. 23.

*Nunc judicium eſt mundi.* Joan. 12. 31.

*Non pro mundo rogo.* Joan. 17. 9.

*Confidite, ego vici mundum.* Joan. 16. 33.

*Qui diligit mundum, Cbaritas Patris non eſt in eo.* 1. Joan. 2. 15.

*Quicumque voluerit amicus eſſe ſæculi hujus, inimicus Dei conſtituitur.* Jac. 4. 4.



## MEDITATIO XXV.

*De parvo numero Electorum.*

**Q**uando diluvium inundavit universam terram, non nisi octo homines in arca salvati sunt. E sexcentis millibus armatorum non nisi duo Jordanem transierunt. Agri undique frumento seminati vix quarta pars fructus reddit. Ex multis, qui in stadio currunt, non nisi unus accipit bravium.

Via inferni lata est, & plurimi hominum illam tenent. Via Paradisi arcta est, & pauci eam inveniunt.

Deus omnes homines vult salvos fieri, neque unquam illos deserit, nisi ipse prius deseratur. Nemini denegat suam gratiam. Cur ergo tam pauci salvantur?

Quia natura nostra corrupta est. Quia semper tendit ad infima. Quia nulla naturæ infertur violentia. Quia delectationibus sensuum fræna laxantur. Quia dolosa mundi axiomata adorantur. Quia non agitur poenitentia. Aut quia non agitur debito, quo agenda est, modo. Quia serò nimis inchoatur. Quia differtur ad extremum vitæ terminum, quando viribus jam deficientibus, scelera patrari ultrà non possunt.

Deus contemnit morientes, qui eum contempsere viventes. Dæmon retinet morientes, quos possedit viventes.

Rarò in senectute exuuntur pravi habitus in juventute contracti. Plerique secum  
feru



ferunt ad sepulchrum vitia primæ suæ ætatis.  
Penetrant intima ossium, & cum impio sub  
cineribus dormiunt.

O mi Deus! an salvus ero, an damnatus?  
Si salvandus sim, id fiet ex gratia tua. Si  
damnandus sim, id accidet ex culpa mea.  
Nihil enim mihi deest ad consequendam sa-  
lutem. Quid fecisse optabo moriturus?  
Quanta poenitudo me torquebit in inferno?  
An longum nimis est modicum tempus, quo  
me præparem ad æternitatem?

### Verba S. Scripturæ.

*Intrate per angustam portam: quia lata  
porta & spatiosa via est, quæ ducit ad per-  
ditionem, & multi sunt, qui intrant per  
eam. Quàm angusta porta, & arcta via est,  
quæ ducit ad vitam! Et pauci sunt, qui in-  
veniunt eam. Matth. 7. 13.*

*Contendite intrare per angustam portam.  
Luc. 13. 24.*

*Multi sunt vocati, pauci verò electi. Matth.  
20. 16.*

*Perditio tua ex te Israël: tantummodo in  
me auxilium tuum. Osee 13. 9.*

*Quid est, quod debui ultrà facere vineæ  
meæ, & non feci ei? Is. 5. 4.*

*Ossa ejus implebuntur vitiis adolescentiæ  
ejus, & cum eo in pulvere dormient. Job.  
20. 11.*



**MEDITATIO XXVI.***De Scandalo, aut malo Exemplo.*

**E**Xemplum pravum, est pessimus magister. Docet malum illos, qui id ignorant. Persuadet peccatum illis, qui id exhorrescunt. Expeditum efficit scelus illis, qui id formidant. Vitium commendat illis, qui id odio habent. Grandibus illud prædicat, velut honorificum. Inculcat illud, ut necessarium, parvis. Suadet illud, ut licitum, bonis. Reddit illud acceptabile impiis.

Profligatæ vitæ peccator plus mali efficit, quàm sanctissimus quisque boni præstet. Exemplum pravum plures damnat, quàm ab omnibus sacris Oratoribus ad salutem perducti fuerint.

Ignorantia est pars innocentiae. Vix unquam quis malum patraret, nisi id ab aliis patrari conspiceret. Erubescit quis esse bonus, quando versatur inter malos.

Non nisi quæ perfecta & absoluta sunt, producunt sibi similia. Oportet esse exquisitè sceleratum, ut quis alios pervertat. Vulgatæ nequitiae homo est quidam Anti-Christus. Est magister iniquitatis. Est corruptor innocentiae. Est pestis bonorum morum. Est vicarius dæmonis. Est executor voluntatis ejus.

Manifestæ improbitatis homo evertit imperium Jesu Christi. Extendit regnum Lucif  
ri.



ri, sub cujus vexillo militat. Ad cujus castra plurimos adducit. Trucidat innocentiam. Damnat animas fratrum suorum. Tot scelera committit, quot ab aliis ejus hortatu, aut exemplo patrantur. Tot ex causis damnabitur, quot ille homines damnavit. Tot gehennæ patietur incendia, quot animas eò præcipitavit.

O anima protervè scelerata! Quid JESUS in te commisit, ut eum persequaris? Quid proximus tuus mali tibi intulit, ut eum orco transcribas? An tu ideo nequam es, quia ipse bonus est? An ideo malum illi machinaris, quia innocens est? An non sat multa crimina accumulâsti, ut aliorum quoque sceleribus te velis onerare? Quam quietem habebis in inferno, ubi tot habebis carnifices, quot pessimis exemplis tuis eò deturbasti.

O mi Deus! Ignosce mihi propria peccata mea, neque imputa mihi crimina aliorum. Hactenus tyrannus fui. Sed deinceps martyr ero. Vixi hactenus instar dæmonis. Vivam deinceps instar Angeli. Unicè hactenus laboravi, ut perderem animas. Laborabo deinceps totis viribus, ut illas salvem. Non ero unquam de salute meâ securus, nisi tot salvem animas, quot antè damnavi. Non sum natus tantum propter me ipsum. Proximo etiam meo obstrictus sum. Vita mea non est necessaria nisi mihi. At fama de me bona, aliis quoque est necessaria. Mihi debeo pudicitiam. Sed ingenuum pudorem ac verecundiam debeo toti mundo.

Ver-



**Verba S. Scripturæ.**

*Væ mundo à scandalis! Matth. 18. 7.*

*Qui scandalizaverit unum de pusillis istis, qui in me credunt, expedit ei, ut suspendatur mola asinaria in collo ejus, & demergatur in profundum maris. Matth. 18. 6.*

*Si scandalizaverit te manus tua, abscinde illam: bonum est tibi, debilem introire in vitam, quàm duas manus habentem ire in gehennam, in ignem inextinguibilem. Marc. 9. 42.*

*Væ illi, per quem scandalum venit! Luc. 17. 1.*

**MEDITATIO XXVII.**

*De Pœnitentia Exteriori, & Mortificatione.*

**N**ihil magis alteri est unitum, quàm anima corpori. Nihil minùs alteri est unitum, quàm anima corpori. Quando unum progreditur, alterum retrogreditur. Quando unum ascendit, alterum descendit. Quando unum est sanum, alterum est ægrum. Quando unum est robustum, alterum est infirmum. Non sum homo, si obediam indomitæ cupiditatibus meis. Non sum Christianus, nisi bellum moveam pravis affectionibus meis. Non sum pœnitens, nisi acriter comprimam erumpentes animi motus. Incertus sum, utrùm remissa mihi sint peccata mea. Incertus sum, utrùm pœna mihi sit condonata. Incertus sum, utrùm Deus non  
me



me sit castigaturus afflictione spiritûs. Incertus sum, utrûm Deus me non sit puniturus poenâ corporis. Si mihi parcam, Deus mihi non parcet. Si sponte me castigem, Deus me non puniet. Si me odio habeam, Deus me amabit. Si me amem, Deus odio me habebit.

Castigabo deinceps corpus meum, ut sim prædestinatus. Oppugnabo hunc inimicum Dei, ut merear coronari. Mortificabo sensus meos, ut vivam vitâ spiritûs. Crucifigam cum JESU, ut resuscitem cum JESU. Aversabor corpus meum, nisi plagas habeat, ut corpus JESU. Quia ipse horreo me affligere, libens tolerabo plagas, à Deo mihi infligendas.

Anima Christiana! Effice è corpore tuo victimam viventem, & morientem. Coerce perturbationes tuas, sensus tuos, desideria tua. Afflige te in omni tempore, in omni loco, in omnibus rebus. Poenis sponte susceptis subige corpus cum moderatione & prudentia. Dona Deo carnem tuam, & ille tibi donabit Spiritum suum.

Curam habe exteriorum, & illi curæ erunt interiora tua. Fac, quod facile tibi accidit, & ille præstabit, quod arduum tibi est. Progredere, dum potes; & ille te portabit, cum progredi ultra non poteris.

### Verba S. Scripturæ.

*Caro concupiscit adversus Spiritum, & Spiritus adversus carnem. Gal. 5. 17.*

*Qui*



*Qui in carne sunt, Deo placere non possunt.* Rom. 8. 8.

*Qui Christi sunt, carnem suam crucifixerunt cum vitiis, & concupiscentiis.* Gal. 5. 24.

*Si secundum carnem vixeritis, moriemini.* Rom. 8. 13.

## MEDITATIO XXVIII.

### *De Excellentia Mortificationis.*

**Q**uid est Mortificatio? Est mors amoris, quæ vitam tollit sceleratam. Quæ avel-  
lit animam à sensibus. Quæ eam separat à  
suo corpore. Quæ illi tribuit vitam Spiritûs.

Quid est mortificatio? Est sacrificium amo-  
ris. Cujus Sacerdos est Spiritus sanctus. Cor-  
pus est victima. Cor est Altare. Tribulatio  
est gladius. Amor est ignis. Gloria est fru-  
ctus.

Quid est mortificatio. Est martyrium amo-  
ris sine crimine, & sine tyranno. Minus cru-  
entum, quàm martyrium Fidei, sed magis  
prolixum, & magis molestum; magis libe-  
rum, & magis voluntarium; magis hono-  
rificum, & magis innocens; magis tædio-  
sum, & magis constans.

Quid est mortificatio? Est continuatio Sa-  
crificii JESU, quo completur id, quod deest  
passioni ejus. Quæ corpora nostra efficit  
membra ejus. Quæ nos animat Spiritu ejus.  
Quæ nos participes efficit dolorum ejus. Quæ  
nobis meretur thesaurum gratiæ ejus. Quæ  
nos disponit ad thronum Gloriæ ejus.



O utinam moriar morte iustorum, ut vivam vitâ iustorum! O utinam evadam victima amoris, ut moriar morte amoris!

## Verba S. Scripturæ.

*Obsecro vos, Fratres, per misericordiam Dei, ut exhibeatis corpora vestra hostiam viventem, sanctam, Deo placentem. Rom. 12.*

I.

*Quotidie morior. 1. Cor. 15. 31.*

*Christo confixus sum Cruci. Gal. 2. 19.*

*Adimpleo ea, quæ desunt passionum Christi, in carne meâ, pro corpore ejus, quod est Ecclesia. Col. 1. 24.*

*Si Spiritu facta carnis mortificaveritis, vivetis. Rom. 8. 13.*

## MEDITATIO XXIX.

*De utilitate, & necessitate Tentationum,*

**B**onum purificatur à malo. Furentium ventorum turbo corroborat arbores. Ventus segregat à tritico paleas. Ignis excoquit aurum. Nix terram calore fovet. Pugna probat virtutem. Infirmitas conservat humilitatem. Tentatio auget charitatem. Nihil est, cui non aliud adversetur. Bellum producit pacem. Omnia subsistunt per oppositionem. Nunquam salvuseris, nisi per tentationem.

Nisi tenteris, non es prædestinatus. Nisi pugnes, non coronaberis. Nisi impugneris, jam devictus es.

Cer-



Certamen hoc molestum quidem est; sed necessarium. Exercitium præbet virtuti tuæ. Comparat tibi coronas. Id, quod animat repugnantem conatum tuum, coronabit patientiam tuam. Sensus nihil nocet, ubi animus non præstat consensum.

Deus tecum est, quid times? Fortior es inimico tuo. Non potest te vincere, nisi volentem. Non potest te mordere, nisi sponte appropinquantem.

Principiis obsta, & sollicitè observa tentationis initia. Ora Deum assidue. Occasiones evita. Fortiter insiste tuis propositis. Consilium pete in tuis dubiis. Auxilium quære in tuis certaminibus. Cælum conscende, ut videas thronum tibi vincenti paratum. Descende in infernum, ut consideres locum tibi succumbenti destinatum.

Fortè ab hac pugna pendet salus tua. Ex hoc momento pendet æternitas tua. Ex hac victoria pendet vita tua. Ex hac tentatione pendet prædestinatio tua.

O Jesu! mi Rex! pugno propter te, & coram te. Tu es spectator laborum meorum. Tu es testis infirmitatum mearum. Non sustine, ut tuus sim proditor. Non permitte, ut me perdam. Exurge Domine Deus exercituum.

Veni exemplò in auxilium meum. Defende me contra hostes tuos. Dissipa illos, qui oderunt.



## Verba S. Scripturæ.

*Qui non est tentatus, quid scit? Eccli. 34.*

9. *In igne probatur aurum, & argentum: homines verò receptibiles in camino humiliationis. Eccli. 2. 5.*

*Omne gaudium existimate, fratres mei, cùm in tentationes varias incideritis. Jac. 1. 2.*

*In paucis vexati, in multis bene disponentur. Sap. 3. 5.*

## MEDITATIO XXX.

*De causis nostrarum Tentationum.*

**Q**Uæ sunt causæ mearum tentationum? Quia arrogans es, & superbus. Aut quia non seriò custodis sensus tuos. Aut quia non evitas occasiones. Aut quia contraxisti pravos habitus. Aut quia non vivis ordinate. Aut quia deseruisti vocationem tuam. Aut quia cor tuum creaturis adhæret. Aut quia non satis es occupatus.

Quia homo es. Quia Christianus es. Quia desideras felicitatem consequi.

Cur dæmon me tentat? Quia odit imaginem Dei. Quia invidet homini. Quia sibi illum vult mancipare. Quia cupit habere socios suæ damnationis. Quia vult possidere cor tuum. Quia vult conscendere thronum Dei. Quia vult prophanare Templum Dei. Quia vult à te adorari. Quia vult crucifigere JESUM Christi.



Christum. Quia vult renovare ignominias ejus. Tunc obsecundabis desideriis ejus? Tunc satisfacies perversis cupiditatibus ejus? Hoc autem toties agis, quoties tentationi consentis.

Cur Deus me permittit tentari? Propter suam gloriam, & majus tuum bonum. Vult explorare amorem tuum. Vult tibi ingenerare intimam sui ipsius cognitionem. Vult experiri virtutem tuam. Vult te continere in debita subjectione. Vult te instruere ad pugnam. Vult exstimulare segnitiam tuam. Vult te avellere à creaturis. Vult te obligare, ad opem ab ipso efflagitandam. Vult tibi occasionem præbere, beatitudinem promerendi.

O mi Salvator! jam non miror, me tentari, cum tu quoque fueris tentatus. Bonum est, ut cognoscam te. Bonum est, ut cognoscam me.

Agnosco, quòd tentatio me impediat, quò minus temerè præfidam.

Tenta me, mi Deus! Proba me. Vide, num ulla in me sit iniquitas. Ah! noli, noli me tentare. Heu! Agnosco infirmitatem meam. Libera me potius à tentatione mea. Aut saltem roboram me contra tentationem meam. Dæmon æquè tibi infensus est, ac mihi. Defende te in me, & per me.

### *Verba S. Scripturæ.*

*Tentavit Deus Abraham. Gen. 22. 1.*

*Nolite timere, ut enim probaret vos, venit Deus. Exod. 20. 20.*



*Tentat vos Dominus Deus vester, ut palàm fiat, utrùm diligatis eum, an non. Deut. 13.*

3.

*Anania, cur tentavit satanas cor tuum?*

*Act. 5. 3.*

*Unusquisque tentatur à concupiscentiâ suâ abstractus, illectus. Jac. 1. 14.*

*Deus tentavit eos, & invenit illos dignos se. Sap. 3. 5.*

## MEDITATIO XXXI.

*De Perturbationibus animi, & Anxietatibus mentis.*

**O** Quantum me torquent pessimæ cogitationes! Et cur, obsecro, inde affligeris? Timeo, ne consentiam.

Si times, non consentis. Timor tuus securum te debet reddere. Sed lapsus sum, inquis, in peccatum. Oportet ergo promptè inde resurgere. Deus irâ contra me exarsit. In tua potestate est, cum placare.

Progredere majori cum diligentia. Labora majori cum fidelitate. Confitere sine dilatione. Humilia te sine perturbatione. Malum unum non reparatur alio malo. Peccatum non sanatur peccato.

Tentatio hæc admodum importuna est. Ita sanè: sed necessaria tibi est. Continet te in humilitate. Efficat, ut pergas Deo subjectus esse. Obligat te ad orandum. Impedit nimiam tui præfidentiam. Sine tentatione non

po-



potes probari. Sine certamine non potes coronari. Sine cruce non potes salvari.

O mi Deus ! assiste mihi auxilio tuo , & dæmones non timebo , licet omnes contra me insurgerent. Non sum , nisi infirmitas , sine te. Tecum autem non sum , nisi fortitudo. Si habeo , unde me perdam , tu habes , unde me salves.

*Verba S. Scripturæ.*

*Non turbetur cor vestrum.* Joan. 14. 1. & 27.

*Quia acceptus eras Deo , necesse fuit , ut tentatio probaret te.* Tob. 12. 13.

*Fidelis Deus est , qui non patietur vos tentari supra id , quod potestis , sed faciet etiam cum tentatione proventum , ut possitis sustinere.* I Cor. 10. 13.

*Beatus vir , qui suffert tentationem.* Jac. 1. 12.

**MEDITATIO XXXII.**

*De Inclinationibus Naturæ.*

**A** Mare ex inclinatione ac propensione naturæ , est amare , ut amant bestię. Amare eum inclinatione , est amare , ut amant homines. Amare sine inclinatione , est amare , ut amant Christiani. Amare contra suam inclinationem , est amare , ut amant Sancti.

Charitas Christiana complectitur totum mundum. Motivum ejus est unicum , & uni-



versale. Si amem propter Deum illum, in quem propenso sum animo, amandus mihi pariter erit, qui genio meo adversatur. Uterque est creatus à Deo. Uterque factus ad imaginem Dei. Uterque redemptus sanguine Dei. Uterque vocatus ad gloriam Dei.

Non est necesse, omnes homines æquali amore diligi. Necessarium tamen est, nullum hominem odio haberi. Amicitiaæ particulares, sunt odia universalia. Uniones ex naturali inclinatione ortæ, sunt schismata, & hæreses cordis. Quantum afficeris erga unam personam, tantum te avertis ab omnibus aliis.

Si totum te impendas uni personæ, nihil obsequii præstas cæteris omnibus, committis injustitiam. Negas illis, quod ipsis debes, saucias charitatem. Dividis unitatem. Contemnis regularem observantiam. Offendis communitatem. Fugis solitudinem. Horres conversari coram Deo. Committis plurima peccata. Mens tua est sine collectione. Cor tuum sine devotione. Preces tuæ sine gustu. Communiones tuæ sine fructu. Vita tua sine pace. Labores tui sine merito.

O miDeus! quantum in morte exhorrescerem, si cognoscerem, quod te non amâssem. Si non amem omnes fratres meos, ne vel unum quidem propter te amo. Si averfionem ab uno foveam, neque charitatem erga omnes alios habeo. O quàm tempus malè prodigitur! O quàm noxiæ sunt privata familia-ritates! O quot colloquia peccaminosa!



Propter te, mi Deus! Amabo omnis generis homines. Amabo amicos meos, & inimicos meos. Amabo cognatos meos, & extraneos. Amabo divites, & pauperes. Amabo magnos & parvos. Amabo pari charitate suaves & morosos, hilares & tetricos. Amabo illos, qui bona mihi præstant. Amabo & illos, qui mala mihi inferunt. Quia omnes sunt tibi subjecti. Quia omnes sunt filii tui. Quia omnes sunt membra tua. Quia omnes diligis. Quia existis in omnibus. Quia mihi imperas, ut omnes diligam.

*Verba S. Scripturæ.*

*Non est acceptio personarum apud Deum.*  
Rom. 2. 11.

*Solem suum oriri facit super bonos & malos, & pluit super justos, & injustos.* Matth. 5. 45.

*Non accipies personam.* Deut. 16. 19.

*Nunquid non Pater unus omnium nostrum? Nunquid non Deus unus creavit nos? Quare ergo despicit unusquisque nostrum fratrem suum?* Malach. 2. 10.

*Hi sunt, qui segregant semetipsos, animales spiritum non habentes.* Judæ vers. 19.

**MEDITATIO XXXIII.**

*De Animo ab aliis averso.*

**V**ulnera cordis sunt lethalia. Odium occidit charitatem. Nobilissima ex omnibus victoriis est, triumphare effrenes animi



ab aliis averſi motus. Amare amicum, eſt virtus Pagani. Amare inimicum, eſt virtus Chriſtiani.

Fortior eſt hæc dilectio, quàm omnes aliæ. Quia debellat hoſtem potentiffimum, innatam ſcilicet animi abalienationem ab iis, qui genio noſtro minùs videntur conformes. Eſt amor amplior, quàm omnes cæteri, quia amplectitur amicum & inimicum. Eſt amor purior, quàm omnes alii, quia unicè propter Deum inimicus diligitur. Eſt amor diviniore, quàm omnes alii, quia ex ſolo naturæ dictamine nemo diligit inimicum. Eſt amor magis meritorius, quàm omnes alii. Quia nihil magis arduum, quàm inimicum diligere.

Deus amat omnia, quæ fecit. Solum peccatum Deus averſatur. Creaturæ, quæ ſibi mutuò adverſantur, in mente Dei quieſcunt in pace. Deus nullam habet antipathiam, quia eſſentia ejus eſt infinita. Magnæ animæ nullas fovet inimicitias. Dominantur omnibus objectis. Non ſunt diviſæ ex diverſitate materiæ.

Intra cor illorum omnia verſantur in pace. Solum peccatum nullam illic quietem habet. Quia Sanctitati repugnat. Amor proprius diviſus eſt. Amor Divinus non dividitur. Inclinationo naturæ præfixos habet certos limites. Charitas ſine limite, complectitur omnia. Amare omnia præter peccatum, eſt amare ex charitate. Eſt eſſe ſimilem Deo. Eſt habere cor æquè amplum, ac cor Dei.

O quàm felix eſſem, ſi certò ſcirem, me Deum verâ charitate diligere ! Non poſſum  
veræ



veræ charitatis certius habere indicium, quàm ſi amem inimicos meos propter Deum. Si diligam illos, qui moleſtias mihi creant. Si beneficiis cumulem illos, qui mihi negant. Si amem illos, qui me odio habent. Si illos benevolo affectu proſequar, à quibus naturalem ſentio averſionem. Tunc enim verò tam certus, ſum, quàm eſſe poſſum, quòd Deum ſincere diligam. Quòd omnia peccata mea ſint mihi remiſſa, quia propter illum diligo inimicos meos.

O mi Deus & Domine mi ! volo meum erga te amorem teſtatum facere, amando propter te illos, qui nihil habent amabile, benefaciendo illis, qui mihi inferunt mala. Converſando cum illis, qui mihi adverſantur. Affociando me illis, quos durum eſt mihi etiam intueri. Hinc, mi Deus ! cognoſces, quòd ſim Filius tuus, quòd ſim diſcipulus tuus. Quòd non vivam ſecundum genium meum. Et quòd te diligam ex toto corde meo.

### Verba S. Scripturæ.

*Si diligitis eos, qui vos diligunt, quam mercedem habebitis ? nōne & publicani hoc faciunt. Matth. 5. 46.*

*Si ſalutaveritis fratres veſtros tantum, quid ampliùs ; facitis ? nōne & Ethnici hoc faciunt ? Matth. 5. 47.*

*Amen dico vobis, quamdiu non feciſtis uni de minoribus his, nec mihi feciſtis. Matth. 25. 45.*

*Diviſum eſt cor eorum, nunc interibunt. Of. 10. 2.*



## MEDITATIO XXXIV.

*De immodicâ sui Fiduciâ.*

Quis es tu, qui arrogantius sentis de te ipso? Quis antè fuisti? Quis modò es? Quis eris aliquando? Scis, quòd peccaveris: sed nescis, an peccata tua sint tibi remissa. Scis, quòd Deum offenderis: sed nescis, utrùm veniam ab eo obtinueris. Scis, quòd perdideris gratiam: sed nescis, utrùm eam recuperâris.

Sed, inquis, jam fui confessus peccata mea. Fuitne autem bona confessio tua? Fuitne integra? Fuitne conjuncta cum dolore? Fuitne dolor ille supernaturalis? Fuitne sincerus? Fuitne de omnibus peccatis? Fuitne ex toto corde elicitus? Fuitne pro totâ vitâ? Num visus es mutare mores tuos? Num verus est dolor, qui, ubi primùm conceptus est, statim moritur? Nullius quidem culpæ tibi conscius es, sed non per hoc justificatus es. Non oportet quidem inquietè turbari de præterito, sed neque justo fidentiùs sentiendum est de futuro.

Quis modò es? Possidésne Dei gratiam? An nihil culpæ lancinat conscientiam tuam? Cor hominis est valde reconditum. Spiritus Dæmonis est admodum callidus. Vitia imitantur virtutes. Cupiditates turbant cognitionem. Facile quis sibi persuadet, quod amat, innocenter à se amari. Nullus sibi ipsi hostis est. Omnia defendimus, quæ amamus. Reputa-



putamus quædam peccata esse tantum venialia, cum tamen quandoque sint mortalia. Judicantur quandoque leves esse detractioes, quæ tamen calumniæ sunt gravissimæ. Bonum, quod operaris, non certò scis, an sit bonum. Quocunque in statu degas, certò compertum non habes, utrum degas in statu bono. Ad hoc, ut actio quævis sit bona, necesse est, illam procedere ex bona intentione. Hanc autem quis cognoscit? Plures descendunt in Ægyptum, credentes se ascendere Jerosolymam. Plures obnoxii sunt illusionibus, credentes se versari in contemplatione. O quàm dolosum est cor humanum! Solus Deus illud potest intimè perscrutari. Non oportet ergo tibi nimium adulari, neque falsa tibi de teipso persuadere.

Quis deinceps eris? Num securus es de perseverentia? Poterisne spondere constantiam voluntatis tuæ? Heu! quoties illa te decepit! Nunc securitatem tibi præstat voluntas Dei? Vult quidem ille efficaciter te salvare. Sed te oportet ejus auxiliis cooperari. Obligaturne Deus, tibi elargiri omnis generis gratias? Debétne ille privilegiis cumulare arrogantis, & præfidentis animi homines? Peccata modica disponunt ad grandia. Salus quandoque pendet à minimis rebus. Quamdiu vivimus super terram, possumus ad cælum conscendere. Sed quamdiu non versamur in Cælo, possumus prolabi in infernum. Nullam invenio securitatem, nisi in humilitate, & obedientiâ. Lapsus magnorum me reddet parvum in oculis meis. Ruina superbiorum humilem me efficiet.

O De-



O Deus meus , Spes mea ! Ne , quæso ,  
me tradas spiritui arrogantiae. Omnia tolle  
à me , non multum moror ; dummodo humi-  
litem mihi relinquas. Subtrahe mihi valenta  
tua , quæ non peto ; dummodo possideam  
charitatem. Si me intuear , non reperio nisi  
causas timendi. Si te considerem , copiosa  
habeo argumenta sperandi. Heu ! ego deci-  
pio meipsum : Sed tu non me poteris unquam  
decipere. Ego sæpè mihi malum expeto.  
At tu semper desideras bonum meum. Salus  
mea tutior est in manibus tuis , quàm in meis.  
Semper itaque mihi ipsi diffidam. Ac semper  
deinceps in te confidam. Quisquis vivit sive  
diffidentiâ sui , graviter se decipit , si securum  
de salute se esse credit.

### Verba S. Scripturæ.

*Nescit homo , utrùm amore , an odio dignus  
sit. Eccli. 9. 1.*

*Pravum est cor omnium , & inscrutabile ;  
quis cognoscet illud ? Jer. 17. 9.*

*Nihil mihi conscius sum , sed non in hoc iusti-  
ficatus sum. 1. Cor. 4. 4.*

*Fide stas ? Noli altum sapere , sed time.  
Rom. 11. 20.*

*Humiliamini igitur sub potenti manu Dei.  
1. Pet. 5. 6.*



## MEDITATIO XXXV.

*De bono usu Temporis.*

**T**Empus est pretiosum. Tempus est breve. Tempus est irreparabile. Pretiosum est; quia omnia ejus momenta valent æternitatem. Breve est; quia non durat diutius, quàm vita nostra. Irreparabile est; quia, quod transiit, nunquam redit.

Quid proderit tibi, vixisse in deliciis, si moriturus sis in peccato? Quid proderit tibi, transegisse tempus voluptuosè vivendo, si infelix sis futurus in omnem æternitatem? Tempus concessum tibi est, ut curam geras salutis tuæ. Neque tibi superest nisi modicum temporis. Ecce mors appropinquat. Ecce æternitas accelerat gradum. Ecce vita dilabitur. Ecce sanitas deficit. Ecce judicium tuum imminet. Stulte! hac nocte animam tuam repetent à te, & quæ parâsti, cujus erunt? Cui bonus erit, qui sibi ipsi nequam est? Tu desiderabis post mortem vel unicum momentum temporis, cujus magnam partem vanis oblectationibus dissipas. Dolebis post mortem maximè jacturam temporis, quod modò inutiliter prodigis.

Age itaque, tempus omne utiliter transige. Fructuosè impende pretiosa momenta. Redime tempus malè deperditum. Præsenti sanctè utere. Dispone sapienter de futuro. Curam habe salutis tuæ. Salva animam tuam.

An-



Angelus juravit per viventem in sæcula sæculorum, quia tempus non erit amplius.

O mi Deus! dona mihi adhuc modicum temporis, & ego plenè tibi satisfaciam. Heul mereor equidem privari tempore, quo tam diu turpiter abusus fui. Deinceps autem rectus temporis usus summæ mihi curæ erit. De nulla re magis ero sollicitus, quàm de salute mea. Reparabo tempus amissum, & bene impendam, quod mihi est reliquum.

### Verba S. Scripturæ.

*Sublati sunt ante tempus.* Job. 22. 16.

*Ne impiè agas multum, & noli esse stultus, ut non moriaris in tempore non tuo.* Eccli. 7. 18.

*Tempus breve est.* 1. Cor. 7. 29.

*Redimentes tempus.* Ephes. 5. 16.

*Juravit per viventem in sæcula sæculorum, quia tempus non erit amplius.* Apoc. 10. 6.

*Ergo, dum tempus habemus, operemur bonum.* Gal. 6. 10.

## MEDITATIO XXXVI.

### De persecutionibus.

**N**Um boni te persequuntur? Examina te, an non causam dederis. Num mali te persequuntur? Gaude, quòd moribus ab illis discrepes. Nemo potest placere Deo, & hominibus. Nemo potest amari à bonis, & malis,  
Si



Si cupiam hominibus placere, displicebo JESU Christo. Si ab impiis odio habear, amicus ero JESU Christi.

Persecutio intentata ab impiis nos promovet ad Cælum. Avellit nos à creaturis. Continet nos in officio. Impedit, ut non nimium nos effundamus in exteriora. Juvat internam animi collectionem. Purgat nos à vitiis. Virtutes, si quas habemus, roborat. Tædium affert præsentis vitæ. Accendit mortis desiderium. An DEO adhæreres, si mundus te amâset? An Deum exquisivisses ex toto corde tuo, si mundus te non repulisset? Deus est, qui legem ponit creaturis. Ille prohibet ipsis, ne tibi blandiantur. Ille mandat, ut te reiciant. Ille imperat, ut te repellant.

Deus totum mundum armat contra te, ut te compellat ad auxilium ab ipso petendum. Ille terram spinis operit, ne tu in terrâ quietem captes. Ille quidem non potest velle peccatum; vult tamen effectum peccati. Odio habet persecutorem; sed amat illum, qui persecutionibus impetitur.

O mi Deus! quam admirabilis est sapientia tua! quam amabilis est Providentia tua! Si me nunquam vulnerâsses, nunquam fuisset sanatus. Si spinis me non undique circumdedisses, longè à te fugitivus discessissem. Non essem jam tuus, si mundus me blanditiis suis allexisset. Essem jam contra te, si mundus non fuisset contra me. O quantum obstrictus sum odio mundi! O quantum obligatus sum tuo amori! O quam fuisti mihi suavis



viter severus! O quàm amanter me fuisti persecutus!

## Verba S. Scripturæ.

*Imple facies eorum ignominia & quarent  
Nomen tuum Domine* Ps. 82. 17.

*Domine in angustia requisierunt te.* II. 26.  
16.

*Sepiam viam tuam spinis.* Os. 2. 6.

*Eritis odio omnibus gentibus propter No-  
men meum.* Matth. 24. 9.

*Beati, qui persecutionem patiuntur propter  
justitiam.* Matth. 5. 10.

## MEDITATIO XXXVII.

*De necessitate Afflictionum & persecutionum.*

**N**ulla salus est sine cruce. Nullum meri-  
tum sine patientia. Nulla victoria sine  
certamine. Nulla virtus sine exercitio.

Aqua stagnans corrumpitur. Caro sine  
sale putrescit. Ferrum sine usu rubiginem  
contrahit. Equus sine calcaribus subsistit im-  
motus.

Quàm miserabilis es, si nullâ affigaris mi-  
seriâ! Quomodo martyr eris, si tyrannum  
non habeas? Quomodo Christianus eris, si  
nullam persecutionem patiaris? Quomodo  
salvus eris, si nullam sustineas tribulationem?

JESUS odio fuit habitus ab impijs, & tu  
vis amari? JESUS acriter fuit exagitatus, &



tu vis in delicijs haberi? JESUS fuit ludibrio habitus à mundo, & tu vis honoribus cumulari? Oportet te aut Martyrem esse, aut tyrannum; aut persecutorem, aut persecutionibus impetitum.

O JESU! Tu solus mecum sis, & totus mundus sit contra me. Plus amo odium, quàm amicitiam impiorum. Plus amo persecutionem, quàm blandimenta illorum. Nolo placere illis, qui tibi adversantur. Gaudeo me displicere illis, quibus neque tu potes placere.

Cum tolero persecutiones, habeo signum prædestinationis meæ. Cum tyranni me oppugnant, in censum martyrum venio. Cum impij me persequuntur, incipio esse è numero justorum.

### Verba S. Scripturæ.

*Per multas tribulationes oportet nos intrare in Regnum Dei, Act. 14. 21.*

*Si quid patimini propter justitiam, beati. 1. Pet. 3. 14.*

*Communicantes Christi passionibus, gaudete, ut in revelatione gloriæ ejus gaudeatis exultantes. 1. Pet. 4. 13.*

*Omnes, qui piè volunt vivere in Christo JESU, persecutionem patientur. 2. Tim. 3. 12.*



## MEDITATIO XXXVIII.

*De respectu Humano.*

**D**isplicere Deo, ex metu displicendi hominibus. Omittere bonum ex timore perverforum. Credere in JESUM Christum, & erubescere Evangelium ejus. Dissimulare Fidem, quando eam oportet profiteri. Est esse apostatam, & infidelem. Est esse Christianum nomine, & opere infidelem.

Sunt quidam Apostatæ corde. Alij Apostatæ ore. Alij Apostatæ opere & actione. Tu non es apostata corde: Sed es apostata ore. Tu non es apostata verbo? sed es apostata opere. Et hoc sufficit ad tuam damnationem.

Non sufficit ad salutem, Fidem habere in corde. Oportet eam etiam verbis testari. Non sufficit eam verbis profiteri sed necesse etiam est, eam operibus comprobare. Dissimulare Fidem, ubi occasio est eam profitemdi, est renunciare suæ Religioni.

Si confitearis JESUM coram hominibus, confitebitur te coram Patre suo. Si renunties illi coram hominibus, renuntiabit tibi coram Patre suo. Si erubescas esse illius discipulus, erubescet ille esse Magister tuus. Si eum agnoscas, ut tuum Dominum, ille te cognoscet, ut suum servum.

O JESU, Domine mi! Jam multo tempore Christianus sum nomine, & Paganus actione. Habeo Fidem Christiani, & vitam  
Pa-



Pagani ducō. Renuntio Religioni meæ ex vano timore dīcteriorum. Timeo nempe solenne illud: Quid homines de te sentient, quid de te dicent? Magis times jocularēs cavillationes impiorum, quā Martyres formidārint crudelitatem tyrannorum. Heu! tu me confessus es coram Patre tuo, & ego tibi renuntio coram hominibus. Tu non erubescis me in Cælo, & ego frequenter te erubesco super terram.

O quantum abominor ignavam animi mei remissionem! detestor dissimulationem meam! Ostendam deinceps, me esse Christianum. Profitebor Religionem meam, corde, ore, & opere.

### Verba S. Scripturæ.

*Qui timet hominem, citò corruet.* Prov. 29. 25.

*Dico vobis amicis meis, ne terreamini ab iis, qui occidunt corpus, & post hæc non habent ampliùs, quid faciant.* Luc. 12. 4.

*Omnis, quicumque confessus fuerit me coram hominibus, & Filius hominis confitebitur illum coram Angelis Dei: qui autem negaverit me coram hominibus, negabitur coram Angelis DEI.* Luc. 12. 8.

*Qui me erubuerit, & meos sermones, hunc Filius hominis erubescet, cū venerit in Majestate suā, & Patris, & sanctorum Angelorum.* Luc. 9. 26.



## MEDITATIO XXXIX.

*De Detractione.*

**V**Ebum detractorium facilè dicitur, sed damnum inde illatum non ita facilè reparatur. Leviter dicitur: sed crudeliter vulnerat. Transfigit cor Dei, qui prohibet detractionem. Transfigit cor proximi, qui patitur detractionem. Transfigit cor amici, qui audit detractionem. Transfigit cor illius, qui est author detractionis.

Detractio est vipera virulenta, quæ veneno inficit omnia corda. Est culter acutus, qui dissecat membra JESU Christi. Detractoris lingua crudelis est, quæ Christi cor transverberat. Est rapina boni omnium maximi. Est cædes vitæ omnium nobilissimæ. Est vulnus animæ. Est malum sine remedio. Sperari non potest venia, nisi fiat restitutio. Non dimittitur peccatum, nisi restituatur ablatum. Non facilè reparatur honor, aliquando ablatum. Vulnus detractionis est incurabile. Cicatrix semper remanet.

O mi Deus! quot commisi latrocinia! Quot cædes patravi! Lingua mea est penna leviter scribens; & tamen conscribit sententiam, quæ aliquando in judicio contra me pronuntiabitur. Lingua mea me absolveret à crimine. Lingua mea me condemnabit.

Heu! quis ergo salvus erit! Quis dicere potest: Ego nunquam aliis detraxi? Quis dicere



cere verè potest: Reparavi malum, quod detrahendo aliis intuli?

Fuge detractores. Sathan est in lingua eorum, quando tibi loquuntur. Sathan est in auribus tuis, quando detrahentes libenter audis. Tolerà detractiones: sed noli illis ansam dare. Damnum, è tuis detractionibus ortum, repara meliori modo, quo potes. Veritas, quam non suggerit charitas, expers est charitatis.

## Verba S. Scripturæ.

*Detrahentem secretò proximo suo hunc persequabar.* Psal. 100. 5.

*Nolite detrahere alterutrum, fratres mei: qui detrahit fratri, aut qui judicat fratrem suum, detrahit legi, & judicat legem.* Jac. 4. 11.

*Qui detrahit alicui rei, ipse se in futurum obligat.* Prov. 13. 13.

*Non rapaces, nec maledici regnum DEI possidebunt.* 1. Cor. 6. 10.

*Ex verbis tuis justificaberis, & ex verbis tuis condemnaberis.* Matth. 12. 37.

## MEDITATIO XL.

### De Tristitia.

**Q**Uæ est causa tristitiæ tuæ? Absque dubio, quia cor tuum est ægrum. Quia est mancipium alicujus cupiditatis. Quia stultè



deperis aliquam creaturam. Quia flagras aliquo desiderio. Quia conscientia tua est inquinata. Quia crimen aliquod perpetrasti.

Quia appetis aliquid, quod obtinere non potes. Quia non potes id, quod cupis. Quia non vis, quod Deus vult. Quia vis, quod Deus non vult.

Quia nihil adversi vis tolerare. Quia nimis arctè adhæres sensibus tuis. Quia mundum nimium formidas. Quia ardentius desideras vanissimas vitæ licentioris delicias. Quia plùs æquò diligis temetipsum.

O quàm beatus est, qui non desiderat, nisi Deum! O quàm jucundus est, qui non timet nisi Deum! O quàm securus est, qui nihil habet, quod perdat! O quàm felix est, qui bene & sanctè vivit.

Nihil æstima, nisi Deum, & nihil te affiget. Crede amissa omnia, quæ potes amittere. Noli diligere bonum, quod eripi tibi potest. Nulli rei perituræ cor affige. Quidquid perdas, conserva pacem tuam. Vive semper bene, & nunquam tristaberis. Committe te totum Deo, & semper gaudebis.

### Verba S. Scripturæ.

*Tristitiam longè repelle à te. Eccli. 30.*

24.

*Lætamini in Domino, & exultate iusti. Psal. 31. 11.*

*Exultate iusti in Domino, rectos decet collaudatio. Psal. 32. 1.*



*Gaudete in Domino semper ; iterum dico ,  
gaudete. Philip. 4. 4.*

*Quasi tristes , semper autem gaudentes. 2.  
Cor. 6. 10.*

## MEDITATIO XLI.

*De malis Effectibus Tristitiæ.*

**H**Omo tristis ignominiâ Deum afficit. Pa-  
lâm facit, se non credere ejus Providen-  
tiam. Accusat Deum ignorantia. Tacite il-  
lum arguit injustitiâ. Ego sum, ait Deus,  
qui tibi hæc bona aufero. Ego sum, qui  
hanc persecutionem permitto. Ego sum,  
qui te hoc morbo affligo. Et tu audes mur-  
murare? Et tu audes conqueri? Potéstne  
quis tristari, quin murmure? Si non blas-  
phemas ore, blasphemias tamen corde. Af-  
firmas, quòd non sit Deus, aut quòd is non  
intelligat modum gubernandi mundum.

Homo tristis, ac tetricus offendit proxi-  
mum. Virtutem illi odiosam reddit. Aver-  
tit illum ab obsequio Dei, utpote cui servi-  
re durum sit, ac injucundum. Perturbat  
familias. Facile excandescit. Oneri est su-  
perioribus suis. Molestus est suis æqualibus.  
Intolerabilis est suis subditis. Bilem aliis mo-  
vet. Conversationem amaram efficit. Tol-  
lit inde omnem suavitatem. Mœret, cùm  
alii rident. Indignatur, cùm alii plorant.  
Ægrè accipit, si quis ei appropinquet. Neg-  
ligi se queritur, si quis ab eo recedat.

E s

Non



Non est sana mens, cui dominatur tristitia. Non est ratio, ubi cura, & molesta sollicitudo animum lancinat.

Homo tristis seipsum perdit. Consumit se melancholiâ. Abrumpit sibi vitam corporis. Occidit animam suam. Cor ejus simile est inferno. Dæmon jus habet, in eo commorandi. Agit eum in desperationem. Inducit eum in omnis generis vitia. Proponit illi delectationes carnis, in defectum deliciarum mentis.

O morbum expavescendum, qui tali remedio opus habet! O Jesu, qui nunquam fuisti tetricus, aut morosus, cum tamen semper haberes causas tristandi! Ne, obsecro, tradas me huic perturbationi. Ne me demergas in hunc infernum. Semper deinceps æquo ero animo, semper contentus; quia tu omnia disponis in bonum meum. Verebor tuam Providentiam. Proximis bono exemplo prælucebo. Inchoabo beatitudinem meam in hac vitâ, semper deinceps eâdem fruiturus post mortem. Servus morosus ac querulus injuriam facit Domino suo. Servus DEI nunquam debet tristari.

### Verba Sacræ Scripturæ.

*Non erit tristis, neque turbulentus.* Isaïæ 42. 4.

*Quare vultus tuus tristis est?* 2. Esd. 2. 2.

*Quasi tristes, semper autem gaudentes.* 2. Cor. 6. 10.

*Cor pravum dabit tristitiam.* Eccli. 36. 22.

No.



*De Remediis contra Tristitiam.* 75  
*Nolite fieri sicut hypocritæ, tristes.* Matth.  
6. 15.

## MEDITATIO XLII.

*De remediis contra Tristitiam.*

**C**ur affligis te metipsum? Quod malum existimas, non est malum. Miseriæ tuæ sunt misericordiæ. Calamitates tuæ sunt beneficia Dei. Avellunt te à mundo. Uniunt te Deo Domino nostro. Revocant te intra te metipsum. Tædium vitæ hujus tibi ingenerant. Dolorem de peccatis tuis in te excitant. Sunt tessera salutis tuæ. Sunt pignora prædestinationis tuæ. An non Deus amavit Filium suum? Et quis hominum plùs illo fuit afflictus?

Malum tuum non est formidandum. Si modicum sit, facilè poterit tolerari. Si violentum, non poterit diu durare. Grande malum non potest esse diuturnum. Si non aliunde pellatur, necessariò tandem sibi ipsi succumbet. Aut vitam tollit, aut sensum.

Non nisi in inferno malum immortale. Tempus, etiam te non cogitante, lenit ærumnas tuas. Dolor tuus, non potest durare diutius, quàm vita tua. Et quid est vita tua, si comparetur æternitati?

Cogitâsne, vivere in hoc mundo sine afflictione? Quomodo eris membrum JESU Christi? Quomodo poteris regnare cum ipso, nisi affligaris cum illo?

Osten-



Ostende mihi hominem sine cruce. Et ego te cruce tuâ exonerabo. Estne æquum, ut pro nihilo habeas, quod tanto pretio emerunt Sancti? Quem gradum obtinebis in cœlo? Quem locum ibi occupabis?

Omnes Sancti plagis sunt onerati. Tu solus ibi sine vulnera deges?

Cælum cogita, & tristitia tua dissipabitur. Spes magni boni producit magnum gaudium. Omnis cruciatus est modicus, quo æterna gaudia comparantur.

Lenis est dolor, qui nos liberat ab æternitate poenarum. Corpus leviter sentit dolorem, quando animus versatur in cœlo. Nescis, quod paradiscus sit hæreditas afflictorum? Quod sit regnum crucifixorum? Quod sit portio animorum, adversa fortiter sustinentium?

Si velis liber esse à tristitia, ejice peccatum ex anima tuâ. Hoc enim contristat damnatos. Hoc illos inferni cruciatibus torquet. Si peccato carerent, etiam tristitiâ carerent. Quod gaudium habere potest, qui Deum ejecit è corde suo? Quâ quiete furetur, qui venenum fovet in sinu suo? Si nulli rei adhæreas, nullâ re affligeris. Tantum patimur, quantum amamus. Desideria nostra sunt carnifices nostri. Non deseritur sine dolore, quod cum amore possidetur.

Tûne desideras nunquam tristari? pone spem tuam in Deo. Illi expone afflictiones tuas. Ab illo solatium pete. Persevera in oratione. Submitte te decretis ejus. Permite te totum Providentiæ ejus. Conformata te cum



voluntate ejus. Et statim invenies, quod quæris.

Desiderásne liber ab omni mœrore vivere? Rationis ductum sequere. Corrige phantasiam tuam. Nemo miser est, nisi qui sibi imaginatur, se esse miserum. Dolor levis est, quando opinio illum non auget. Opinio est, quæ efficit omnia mala. Nemo infelix esset, si nemo sibi imaginaretur, se infelicem esse. vitam tuam conforma principiis Fidei. Non dīctaminibus sensuum. Consule rationem, & non opinionem.

Metuisne malum, quod tibi intentatur? Hoc est affligi sine ratione, affligi, antequam causa afflictionis præsens te urgeat. Deplo-ras malum præteritum? Lacrimæ tuæ non te inde liberabunt. Cur non facis ex necessitate virtutem? Cur non proficis ex jacturâ, quam passus es? Quid prodest tibi, mente revolvere ærumnam, quæ jam transiit? Cur te iterum reddis miserum, postquam jam antè fuisti miser? Dedecus est homini sapienti, non desinere tristari, nisi cū jam plorando est fatigatus. Satiùs est, dolorem repellere, quàm expectare, donec ipse nos deserat. Præteritum noli ultrà respicere. Futurum ne ante tempus prospicias. Præsens non est, nisi momentum. Cur ultrò tormentum tuum vis protrahere? Oportet se accomodare æ-rumnis suis, si quis non possit se illis libera-re. Tristitia auget jacturam, non illam repa-rat. Solum peccatum mœrore destruitur. Unde non oportet mœrere, nisi propter peccatum.

O quàm



O quàm essemus felices, si corrigeremus imaginationes nostras! O quàm lætam vitam duceremus, si nihil desideraremus in terra! O quantum supplicium est, ardens desiderium! Homo iustus semper beatus vivit, semper habet, quod vult, quia vult quod habet. Rerum creaturarum mutationes Iustum non mutant, quia innititur Immobili.

### Verba S. Scripturæ.

*Anna, cur fles?* 1. Reg. 1. 8.

*Quare tristis es anima mea, & quare conturbas me?* Pl. 41. 12.

*Dixit illi: noli flere.* Luc. 7. 13.

*Eratres mei gaudete in Domino.* Philip. 3. 1.

*Letetur cor quærentium Dominum* Psalm.

104. 3.

*Tristatur aliquis vestrum?* oret. Jac. 5. 13.

## MEDITATIO XLIII.

### De Superbia.

**M**agna misericordia est Deus humiliatus. Magna miseria est homo superbus. Superbia est fons omnium vitiorum, sicut humilitas est mater omnium virtutum. Irasceris, quia superbus es. Tristaris, quia superbus es. Impatiens es, quia superbus es. Divitias concupiscis, quia superbus es. Invides proximo, quia superbus es. Impudicus es, quia superbus es. Deus humiliat men-



mentem per corpus. Tradit superbos fædis & pudendis concupiscentiis. Bestiarum pel-  
libus vestit illos, qui ad Divinitatem aspirant.

Superbia est peccatum dæmonis, qui pri-  
mus illam commisit. Cælum est locus nativi-  
tatis ejus. Infernus est locus supplicii ejus.

Cætera peccata fugiunt à Deo. Superbia  
audet cum Deo congredi. Deus superbos  
capitali odio veluti hostes suos infectatur.  
Dat gratiam humilibus; superbis autem resi-  
stit. Deprimit illos corpore. Deprimit illos  
animo. Despiciit illos in tempore. Despiciit  
illos in æternitate. O grande malum, quod  
Deum habet inimicum!

Mi Deus! Unam à te peto gratiam, ad tu-  
am gloriam, & meam salutem. Ut cogno-  
scam te, ut cognoscam me. Ut cognoscam Ma-  
jestatem tuam. Ut cognoscam vilitatem me-  
am. Ut cognoscam beneficia tua. Ut cog-  
noscam ingratiuitudines meas. Ut cognoscam  
bonitatem tuam. Ut cognoscam malitiam  
meam. Ut cognoscam id, quod ex te habeo,  
ad laudandum te. Ut cognoscam id, quod ex  
me habeo, ad despiciendum me.

O Nihilum pretiosum, in quo reperio om-  
nia! O Nihilum illustre, in quo video omnia.  
O Nihilum delitiosum, in quo gusto omnia!  
In quiete dego, cum in Nihilo versor, quia  
sum in loco mihi proprio. Nullâ quiete fru-  
or, quando extra Nihilum moror; quia non  
sum amplius in centro meo. O Deus meus,  
& omnia! Quando tandem ero penitus eva-  
cuatus ab omni eo, quod ego sum, ut im-  
plear omni eo, quod tu es, fiatque cor me-  
um Deo plenum?

Ver-



## Verba S. Scripturæ.

*Abominatio Domini est omnis arrogans.*

*Prov. 16. 5.*

*Juravit Dominus Deus in animâ suâ, detestor ego superbiam Jacob. Amos. 6. 8.*

*Qui se humiliat, exaltabitur, & qui se exaltat, humiliabitur. Luc. 14. 11.*

*Amen dico vobis, nisi conversi fueritis, & efficiamini sicut parvuli, non intrabitis in regnum cælorum. Matth. 18. 3.*

*Deus superbis resistit, humilibus autem dat gratiam. Jac. 4. 6.*

## MEDITATIO XLIV.

*De remissione Injuriarum.*

**D**Eus hanc tibi imperat, & non obtemperabis? Remitteres injuriam in gratiam Regis tui, id imperantis. Quis habet plenum jus imperandi, nisi Deus? Tunc ergo agere nihil vis, nisi, quod tibi lubet? Commodum servi debet cedere auctoritati Domini sui.

Quod Deus tibi prohibet, prohibet toti mundo. Quod Deus tibi imperat, imperat toti mundo. Sicut tibi prohibet, ne odio persequaris inimicum tuum, ita pariter prohibet inimico tuo, ne te odio habeat. Sicut tibi præcipit, ut ames omnes homines, ita præcipit omnibus, ut te ament. Estne aliquid æquius, quàm hoc mandatum?

Deus



DEUS hoc tibi præcipit tanquam Rex. Idem à te rogat tanquam Pater. Hoc te docet tanquam Magister, mansuetudine suâ, & patientiâ suâ; verbo & exemplo suo. Quid non à te Deus tolerat? Quantâ patientiâ te sustinet? Tenet unâ manu ultionem, & alterâ patientiam. Una est illi necessaria, sed altera est ei perquàm chara. Deserit ultionem, ut conservet patientiam. Ignoscit cum gaudio. Punit cum dolore. Ignoscit ex inclinatione. Punit ex necessitate. Si subditi sumus, obediamus Regi nostro. Si filii sumus, facimus voluntatem Patris nostri. Si discipuli sumus, sequamur exemplum Magistri nostri.

Cur odio habes fratrem tuum? an non homo est, sicut tu? An non Christianus est, sicut tu? si eum odisti, quia peccator est, debes odisse omnes homines. Erásne justus, quando JESUS te amavit? Ubi modò esses, si JESUS non amâisset peccatores? Injuria, quæ tibi fuit illata, levis est, si comparetur cum injuriis, quas tu Deo inferis.

Contemneris; sed nunquid meruisti contemptum? Potéstne satis contemni damnatus? Auferuntur tibi bona tua? an non Deus illa tibi est elargitus? An non jus habet ea à te repetendi, quandocunque illi placet, & per quemcunque illi placet? Ne hostem appelles illum, qui tibi occasionem præbet cælum lucrandi. Si te offendit, utique punietur. Damnatio ejus est inevitabilis, nisi tibi satisfaciat. Tûne potes odium tuum protrudere ultra æternitatem! Committe DEO



vindictam; jus enim ulciscendi est ipsi proprium. Tu verò conserva patientiam, malumque tibi illatum libens accipe, ut poenam, iniquitatibus tuis debitam.

DEUS est tibi norma misericordiæ. Tu es Deo norma justitiæ. Si tu non exhibeas misericordiam proximo, sicut ipse, vindictam de te sumet, sicut tu. Si ames, amabit te. Si odio habeas, te quoque odio habebit. Si proximum excuses, te quoque excusabit. Si condemnes, te quoque condemnabit. Si veniam indulgeas, tibi pariter veniam dabit. Si punias, & te puniet.

O JESU! quando te video morientem in Cruce, non retineo ultrà fel odii in corde meo. Quando te audio orantem pro inimicis tuis, viscera misericordiæ exhibeo hostibus meis. Pater mi! ignosce illis, qui me offenderunt; non enim sciebant, quid facerent: feceruntque ea, quæ ego plurimis titulis fui promeritus.

### Verba S. Scripturæ.

*Dimittite, & dimittemini.* Luc. 6. 37.

*Diligite inimicos vestros, benefacite his, qui oderunt vos.* Luc. 6. 27.

*Si autem non dimiseritis hominibus, nec Pater vester dimittet vobis peccata vestra.* Matth. 6. 15.



## MEDITATIO XLV.

*De Judicijs hominum contemnendis.*

**E**Risne semper mancipium hominum? An nunquam contemnes respectus humanos? Cur non palam declaras, te solius Dei partes tenere? Cur non renuncias vanitatibus his? Cur non frequentas Sacramenta? Cur non deseris hos socios tibi noxios?

Mundus te ludibrio habebit? Tu potiores causas habes, mundum ludibrio habendi. Mundus est maximus hostis Dei. Est Tyrannus Fidei. Est persecutor innocentiae. Renuntiasti amicitiae ejus, quando fuisti baptizatus. Nisi velis renuntiare mundo, oportebit te renuntiare Jesu Christo.

Quanta mentis ignavia, reddere se mancipium hominum? Quanta infidelitas, profugum deserere signa Jesu Christi? Quanta perfidia, jungere se inimicis ejus? Quanta impietas, erubescere Evangelium ejus?

Homines tibi illudunt? Hoc est testimonium meritorum tuorum. Despectum te crederem, si aestimareris, ac laudareris ab illis, qui non approbant, nisi vituperanda. Judicium impiorum non est regula bonorum.

An oportet te desinere esse sapientem, ex metu stultis displicendi? Quale jus habent impii, legem tibi praescribendi? Quis te subditum eorum constituit? An times diffama-



ri ab infamibus? An formidas honore spoliari ab iis, qui ipsi sunt sine honore?

Impii te condemnant? Sententia nulla est, & sine auctoritate, cùm ille, qui condemnat, ipse meretur condemnari. Estne admiratione dignum, quòd ille malè loquatur de aliis, qui ipse non novit bene agere? Si impii habeant unam linguam, quâ te acculent, aut tibi insultent, tu duas manus habes, quibus ipsis respondeas. Despectio ab impijs profecta, est elogium virtutis. Non potest quis esse Christianus, nisi contemnat, & contemnatur.

O JESU Domine mi! quàm paucos in terra servos habes! Video equidem tyrannos; sed nullos invenio Martyres. Unicum hoc: Quid dicent homines? plures efficit Apostatas, quàm fecerint omnes Nerones. Heu! quomodo sustinerent ictus flagellorum, qui pati non possunt aculeum linguæ? Quomodo foret Martyr Fidei, qui formidat esse Martyr charitatis? Ego sanè nunquam erubescam Evangelium tuum. Palàm profitebor Religionem tuam. Non cupio placere illis, qui tibi displicent. Exhorresco placere illis, quibus tu non places, nec placere potes.

### Verba S. Scripturæ.

*Noli erubescere testimonium Domini Nostrum.* 2. Tim. 1. 8.

*Si adhuc hominibus placerem, Christi servus non essem.* Gal. 1. 10.



*Ne pro his omnibus confundaris, & ne accipias personam, ut delinquas. Eccli. 42. 1.*

*Mibi autem pro minimo est, ut à vobis judicer, aut ab humano die. 1. Cor. 4. 3.*

## MEDITATIO XLVI.

### *De Avaritia.*

**S**I desideres bona terrena, amittes bona cælestia. Avarus Fidem perdit. Sensus habet contrarios Evangelio. Beatos æstimat, quos IESUS miseros appellat. Miseros æstimat, quos IESUS beatos appellat. Fides oppugnat concupiscentiam ejus, & concupiscentia ejus fidem oppugnat. Non potest conservare hanc, & illam. Si ergo velit conservare fidem, necessarium est, ut renunciet concupiscentiæ suæ.

Avarus perdit spem: Quis enim sperare potest, quod non credit? Avarus contemnit bona æterna. Non æstimat, nisi temporalia. Nihil agit, quo cælum lucretur. Non laborat, nisi pro terra. Nunquam Deum orat. Nullum bonum ab illo expectat. Nemini eleemosynam elargitur. Desiderium habet insatiabile. Est idololatra pecuniæ. Huic sacrificat cogitationes suas. Hanc sibi præfigit pro ultimo fine. Hanc extollit supra Deum. Hanc adorat, tanquam principium felicitatis suæ. In hac omnem spem suam defigit.



Avarus perdit Charitatem. Cor ejus est, ubi est thesaurus ejus. Nemo potest duobus Dominis servire. Nemo potest Deum amare, & opes. Avaritia occupat totum cor. Non patitur divisionem. Oportet committere grandes iniquitates, ut grande lucrum reportetur. Qui se ditare cupit, rapit omnia, quæ potest rapere. Natura paucis contenta est: sed concupiscentia non habet terminos. Rapit, & corradit sine mensurâ, quisquis concupiscit sine moderatione. Lucra legitima, sunt lenta, sequuntur cursum naturæ. Lucra grandia sunt furta grandia. Magnæ divitiæ plerumque sunt magnæ injustitiæ.

Quomodo salvari potest avarus? Non agnoscit peccatum suum. Non agit pœnitentiam. Nunquam restituet bona injustè parata. Quod facillè rapitur, difficillimè restituitur. Aquæ furtivæ sunt dulciores, quàm publico omnium usu permissæ. Omnes animi motiones immoderatae conferunt ad furtum. Omnes pugnant pro ejus defensione.

O mi Deus! nunquam excrucier ob bona terrena! Tu scis, ubi sit thesaurus meus. Heu! expeditne æternum damnari propter opes necessario deferendas?

Nihil intulimus in hunc mundum. Certum est, quòd nihil etiam inde simus ablaturi. Beatus ille, qui Deo contentus vivit, omnemque suam fiduciam in ipso figit. Aurum, & argentum sunt Dii gentilium. Sed Deus cæli est Deus meus.



## Verba S. Scripturæ.

*Noli laborare, ut diteris, sed prudentiæ tuæ pone modum.* Prov. 23. 4.

*Nolite sperare in iniquitate & rapinas nolite concupiscere: divitiæ si affluant, nolite cor apponere.* Plal. 61. 11.

*Qui festinat ditari, non erit innocens.* Prov. 28. 20.

*Avaro nihil scelestius, hic enim & animam suam venalem habet.* Eccli. 10. 9. & 10.

*Quàm difficile, qui pecunias habent, in regnum Dei intrabunt: facilius est enim Camelum per foramen acûs transire, quàm divitem intrare in regnum Dei.* Luc. 18. 25.

*Qui volunt divites fieri, incidunt in temptationem, & in laqueum Diaboli, & desideria multa inutilia, & nociva, quæ mergunt homines in interitum & perditionem.* 1. Tim. 6. 9.

## MEDITATIO XLVII.

*De iteratâ Prolapsione in Peccatum.*

**Q**UANTO frequentius peccatum est remissum, tantò minus est veniâ dignum. Quantum crescit numero, tantum augetur malitiâ.

Iterati lapsus sunt periculosi. Vulnera inveterata sunt incurabilia. Actus transeunt in habitus. Habitus degenerant in necessitatem.



rem. Peccata evadunt graviora. Habitus magis invalescunt. Gratiae sunt debiliores. Cooperatio magis remissa. Mens magis caeca. Voluntas magis infirma. Cupiditates vehementius insurgentes. Remedia lentiora. Dæmones potentiores. Eorum possessio magis tyrannica. Quanta ingratitude, post tot beneficia? Quantus contemptus, post tot illustrationes? Quanda perfidia, post tot promissa? Quanta malitia, post tot gratias?

Itâne ludibrio habes Deum? Itâne turpiter deficis à promissis? Itâne ludis ejus Patientiam? Itâne abuteris ejus Bonitate. Itâne contemnitis ejus Justitiam? Itâne praeferis de ejus Misericordia? Itâne insultas ejus Mansuetudini? Itâne prodigis ejus gratias? Itâne extinguis ejus spiritum? Itâne illum expellis ex corde tuo? Itâne illi Luciferum praeferes?

Abundantiam sequitur paupertas, Gratias poena. Patientiam furor. Contemptum vindicta.

O mi Deus! non audeo porrò comparere coram te, post tantum contemptum, & ingratitude. Post tantam perfidiam, & infidelitatem. Peccata mea propè immutaverunt naturam. Erant priùs ex fragilitate commissa. Jam verò sunt indurata fronte perpetrata. Erant errores veniâ digni. Jam sunt crimina nullo titulo excusanda. Numerus eorum est infinitus. Poenus intolerabile. Malitia irremissibilis. Curatio propè desperata.

Verùm, tamen si grandia sint peccata mea, longè major est misericordia tua. Peccata  
mea



mea sunt finita. Misericordia tua est infinita. Possum ad cælum contendere, quam diu nondum sum in inferno. Possum me ad Deum convertere, quamdiu spiritum traho. Omnino seriò cupio salvari: tædet me malè vivere. Mi Deus! tolle mihi vitam, si nolim in melius mutare vitam. Eripe me quantocyùs ex hoc mundo, si nolim me sponte avellere ab amore mundi.

Verba S. Scripturæ.

*Si, quæ destruxi, iterum hæc reedifico, prævaricatorem me constituo. Gal. 2. 18.*

*Ecce sanus factus es, jam noli peccare, ne deterius tibi aliquid contingat. Joan. 5. 14.*

*Fiunt novissima hominis illius pejora prioribus. Luc. 11. 26.*

*Impossibile est, eos, qui semel sunt illuminati, gustaverunt etiam donum cæleste, & participes facti sunt Spiritûs sancti & prolapsi sunt; rursus renovari ad pænitentiam, rursus crucifigentes sibimetipsis Filium Dei, & ostentui habentes. Heb. 6. 4. & 6.*

MEDITATIO XLVIII.

De Consuetudine Peccandi.

**G**Rande malum est, assuescere malo. Consuetudo peccandi est catena iniquitatis. Quæ captivam tenet animam, eamque reddit mancipium peccati. Imminuit cognitionem.



nem. Indurat cor. Sopit conscientiam. Tollit pudorem. Quò crebriùs quis peccat, eò minùs erubescit peccare. Committitur initio scelus cum horrore. Reiteratur cum timore. Cognoscitur cum delectatione. Perseveratur in eo cum contemptu.

Ecce gradus iniquitatis ! Ecce quò deducit consuetudo peccandi !

Corpus nunquam magis ægrotat, quàm cùm ægritudinem suam non sentit. Peccator inveteratus, est propè desperatus. Non agnoscit suam miseriam. Non potest illam odisse. Delectationem in eâ reperit. Non vult inde liberari. Desideria ejus sunt sine effectu. Conatus ejus sine perseverentiâ. Vicia ejus transeunt in naturam ? Et consuetudo ejus in necessitatem.

Quando pondus consuetudinis jam contrarietati premit inclinationem naturæ, tunc impetus cupiditatis nihil ampliùs habet obstaculi, quo retineatur.

Est torrens, qui abripit omnia. Est tyrannus, qui pessumdat omnia. Est Lex iniquitatis, quæ despoticè dominatur voluntati. Est altera quædam concupiscentia magis tyrannica, quàm fuerit sub primum ejus exortum. Est altera natura magis corrupta, quàm prima. Gratia sine fructu aggreditur cor, quod peccat ex consuetudine. Hoc enim insensibile est ad gratiæ motus. Impenetrabile est ejus sagittis. Faciliùs Æthiops dealbabitur, quàm emendetur malum inveteratum. Levio-  
re conatu annosa quercus eradicabitur,  
quàm



quàm evelli possit peccatum, longo jam usu veluti innatum.

In quo statu versaris modò? An peccas ex ignorantia? An ex vehementia cupiditatis? An ex fragilitate? An ex consuetudine? An sine remorsu? An sine dolore? An cum delectatione? An cum contemptu? Non erubescis ampliùs de peccato? An committis illud cum magna protervia? An gloriaris de peccato commisso, An non times post scelus patratum?

Profectò es mancipium vitiorum. Peccata tua transiére in naturam. Ecce duriciem cordis tui! Ecce insensibilitatem mentis tuæ! Ah! si sentiret ægritudinem tuam, spes vitæ etiamnum affulgeret. Pete humiliter à Deo medelam animæ tuæ. Vires exere, quibus rumpas catenas tuas, & vincula. Resiste minutis tentationibus, & victoriam obtinebis de grandioribus. Exequere res faciliores, & Deus perficiet difficiliores. Assiste proximo tuo, & Deus assistet tibi. Exhibe illi misericordiam, quam tibi quoque Deus præstabit. Sine miraculo non sanaberis. Sine charitate gratiam non obtinebis.

### Verba S. Scripturæ.

*Non ergo regnet peccatum in vestro mortali corpore, ut obediatis concupiscentiis ejus.*  
Rom. 6. 12.

*Si mutare potest Æthiops pellem suam: & vos poteritis benefacere, cùm didiceritis malum.* Jer. 13. 33.



*Putruerunt, & corruptæ sunt cicatrices meæ à facie insipientiæ meæ Ps. 37. 6.*

*Iniquitates meæ supergressæ sunt caput meum; & sicut onus grave gravatæ sunt super me. Ps. 37. 5.*

*Adolescens juxta viam suam, etiam cùm senuerit, non recedet ab eâ. Prov. 22. 6.*

## MEDITATIO XLIX.

### *De Preparatione ad Mortem.*

**A**N paratus es mori? An bene ordinâsti negotia tua? Majúsne habes negotium, quàm salutis tuæ? Putásne, quòd evasurus sis mortem? Quod aliquando debebit evenire, an non poterit hodie accidere? Non es sollicitus, nisi de vitâ, cùm tamen de morte potius te sollicitum esse, oporteret. Non laboras, nisi pro tempore, cùm potius laborare deberes pro æternitate. Parva cura impendenda est parvis negotiis, maxima cura rebus maximis. Serò nimis sollicitus es de morte, cùm tempus est moriendi. Sapiens nihil magni momenti aggreditur, quod non seriò prius expenderit. Omnes homines discunt artem, quam tractare volunt. Negotium omnium hominum est, salutem suam in tuto ponere. Nullo studio opus est, ut discas mori. Magno studio opus est, ut discas bene mori. Nunquam bene agitur, quod non nisi semel agitur. Ut discas bene mori, oportet sæpiùs mori.



Semel tantum moriendum est. Error, qui in morte committitur, irreparabilis error est. Actor in theatro malè agit personam suam, si non frequentius se antè exercuit. Advocatus malè agit causam, cui evincendæ se non priùs paravit. Difficile est bene mori, cum quis non didicit, nisi vivere. An longus nimis est vitæ cursus, quo te disponas ad mortem? An prolixum nimis est tempus, quo te præpares æternitati? Quomodo moriturus produces amoris actus, quando nunquam didicisti amare?

Vigila, aut ex improvise opprimèris. Præpara te ad mortem, aut imparatus morieris. Qui non vigilat, ex improvise obruetur. Obrutus ex improvise damnabitur. Disce bene gerere negotium, quod semel necessario gerendum est. Quanti interest bene facere, quod semel tantum faciendum est! Heu! quam periculosum est errare, quando error est sine remedio, & poena consequens nullum habebit finem. Ne fidas temporis, cujus infida est promissio. Plurimos jam decipit. Si temporis fidas, certò te decipiet.

O mi Deus! gratias tibi ago, quòd tempus mihi induleris, me ad mortem comparandi. Ubi modò essem, si me ex improvise vitâ privâsses? Vigilem deinceps mei curam geram, ut bene moriar aliquando. Moriar quotidie, moriar frequenter, ut semel tandem bene moriar.



## Verba S. Scripturæ.

*Memor esto, quia mors non tardat. Eccli.*  
14. 12.

*Vigilate, quia nescitis diem, neque horam,*  
Matth. 25. 13.

*Vigilate omni tempore. Luc. 21. 36.*

*Si non vigilaveris, veniam ad te, tanquam*  
*fur. Apoc. 3. 3.*

*Ideo & vos estote parati, quia quâ horâ*  
*non putatis, Filius hominis veniet. Matth.*  
24. 44.

## MEDITATIO L.

*De Morte promptè, & libenter acceptanda.*

**Q**uid times, anima Christiana? Cur mortem formidas? Num pati non potes, quod patitur infans? Num agere non potes, quod agit formica?

Omnia animalia noverunt mori, & tu ignoras hanc scientiam? Ad quid tibi data est vita, si nunquam velis eam Authori reddere? An non Deus vitam tibi dedit? Nunquid jus habet de eâ disponendi? Usus tantum vitæ tibi donavit. Sibi autem jus proprietatis reservavit. Vita hæc depositum est, quod seriùs aut citiùs Deo restituendum est, sed virtutum splendore exornatum.

Quid juvat te multum tergiversari? Necessarium omnino est, per mortem hinc transire.



fire. Stultitia est, nimium timere, quod evitari non potest. Dubii tantum eventus timentur, certi verò expectantur. Oportebat nunquam nasci, si mori recuses.

Tunc melioris conditionis es, quam Reges? Majusne privilegium habes, quam JESUS Christus? Ego, si immortalis essem, gratiæ loco peterem, posse mori, sicut ipse.

An non multorum criminum reus es; An non condemnatus ad mortem? Decretum mortis jam dudum fuit pronuntiatum contra Adamum, ubi primum pecavit. O quam favens hæc est sententia! O quantum bonum nobis comparat! Mors jam non poena est, sed beneficium inæstimabile. Gratiæ loco debemus mortem expetere, si Deus nos ad illam non condemnasset.

Judicia Dei sunt terribilia. Sed & misericordiæ ejus sunt infinitæ. Bonum est timere, sed melius est sperare. Qui sperat in Deo, non confunderetur. Qui se totum Deo committit, nunquam derelinquetur.

An melior erit conditio tua, si longiori adhuc vivas tempore. Augebis potius debita tua, quam imminues. Agam, inquis, poenitentiam, quam tamen nondum inchoasti. Poenitentia maximi meriti est, mortem promptè acceptare in poenam suorum criminum.

Nullam actionem adeò nobilem Deo offerre possumus, quæ æquivalet sacrificio propriæ vitæ.

O mi DEUS! quam felicem me æstimo, quòd mori possim propter te. Non possum equidem esse Martyr Fidei, volo tamen esse Martyr Charitatis. Non est res magna, mori,



ri; sed magna res est, bene mori. Mi DEUS! ex amore tibi ultro dono, quod mors violenter mihi auferet. Dono tibi ex charitate, quod non possum subtrahere necessitati.

## Verba S. Scripturæ.

*Melior est mors, quàm vita amara, & requies æterna, quàm languor perseverans. Eccli. 36. 17.*

*O mors! bonum est iudicium tuum homini indigenti, & qui minoratur viribus, defecto ætate. Eccli. 41. 3. & 4.*

*Noli metuere iudicium mortis: memento, quæ ante te fuerunt, & quæ superventura sunt tibi: hoc iudicium à Domino omni carni. Eccli. 41. 5.*

*Scimus, quoniam si terrestris domus nostra hujus habitationis dissolvatur, quòd ædificationem à Deo habemus, domum non manu factam, sed æternam in cælis. 2. Cor. 5. 1.*

*Infelix ego homo! quis me liberabit de corpore mortis hujus. Rom. 7. 24.*

## MEDITATIO LI.

*Affectus animæ Justæ, Morte appropinquante, utiliter prelegendi in ultimo morbo.*

**N**untiatur mihi est, quòd propediem sim moriturus. O dulcia, & acceptissima nova! Vado deserere terram, ut ad cælum properem. Vado exire ex hoc ærumnoso car.



carcere, ut intrem in libertatem filiorum Dei. Vado liberandus ab hoc exilio, rediturus in charissimam mihi patriam. Vado, ut transeam à tempore ad æternitatem, à figurâ ad veritatem, à mutatione variabili ad immutabilitatem, à morte ad immortalitatem, à miseria ad felicitatem.

Vado, ut possideam Deum. Vado, ut fruor Deo. Vado, ut quiescam in Deo. Vado, ut transformer in Deum. Vado, ut mens mea repleatur plenitudine luminis. Vado, ut voluntas mea repleatur plenitudine pacis. Vado, ut memoria mea repleatur plenitudine bonorum. Vado, ut sensus mei repleantur plenitudine deliciarum. Ibi reperiam omnia, quæ desidero; & nihil repetiam, quod timeo. Ibi nullum mihi eveniet malum. Ibi nullum mihi deficiet bonum. Deus erit mihi omnia in omnibus, & erit mihi omnia in omnem æternitatem.

Nuntiatum mihi est, quòd propediem sim moriturus. O dulcia, & acceptissima nova! Non ero deinceps cumulatus miseriis. Non tolerabo amplius ulla incommoda. Non ero afflictus morbis. Non ero obnoxius peccatis. Non versabor in periculis æternæ damnationis. Nihil erit ultrâ, quod me cruciabit. Videbo Deum. Amabo Deum. Benedicam Deum.

Hæ erunt occupationes meæ, quibus æternum beatus ero.

O quanta felicitas? Vado mori. Vado ad locum quietis meæ. Vado ad terram viventium. Vado ad regnum pacis. Vado ad



palatium gloriæ. Vado ad nuptias Agni. Vado ad convivium, à Deo mihi præparatum. Vado manducare Panem Angelorum. Vado videre, quæ oculus non vidit. Vado audire, quæ auris non audivit. Vado possidere, quod cor non comprehendit.

Nuntiatum mihi est, quod propediem sim moriturus. O dulcia, & acceptissima nova! Eamus, anima mea! deferamus miseram hanc vitam. Egrediamur ex misero hoc corpore. Quid mori times? JESUS est pro te mortuus. Ille satisfecit pro peccatis tuis? Ille solvit debita tua. Ille cautionem pro te præstitit. Ille vadem se pro te dedit. Ille tibi paradisum suum promisit. Ille te hæredem suum declaravit. Ille omnia sua merita in te transtulit. Ille Corpus suum tibi in pignus dedit. Ille beneficia infinita in te contulit. Ille te ab infinitis periculis præservavit. Si perdere te cuperet, an pro te fuisset mortuus? An vitam tibi tanto tempore conservasset? An tantâ patientiâ te expectasset? An tempus poenitentiae tibi concessisset. An tot luminibus te illustrasset. An tam amanter te vocasset? An tam potenter te attraxisset? An tot gratiis te prævenisset? An tot sancta desideria tibi inspirasset. An in morbo tuo te visitasset? An te Sacramentorum perceptione recreasset. An te signo prædestinatorum insignisset? Si seriò ingemiskas, salvus eris. Si ex animo te convertas, remittentur tibi peccata tua. Unico suspirio opus habes, quo calum lucreris. Poenitentia vera nunquam est nimis sera. Semper maturè satis



te convertes, quodocunque ex intimo cordis sinu ad Deum offensum te convertes. Ecce! JESUS te vocat. Ecce! JESUS brachia, quibus te amplectatur, expandit. Ecce! Orat pro te in Cruce. Ecce! quàm potenti voce pro te perorat: Pater mi! Ignosce illi, non enim sciebat, quid faceret. Caput inclinatur ad figendum tibi osculum. Brachia extendit ad te amplexandum. Cor apertum habet ad te excipiendum. Vitam suam posuit ad te salvandum.

Nuntiatum mihi est, quòd propediem sim moriturus. O beata, O felicia Nova! Eamus, libens iter æternitatis ingredior. Vitæ meæ libentissimè renuntio, eamque reddo Deo, qui illam mihi dono dedit. Remitto Spiritum in manus ejus, ipsi commendo corpus meum, & animam meam. Doleo, quòd Deum summè Bonum offenderim. Mortem libens accepto, in satisfactionem omnium meorum criminum. Credo omnia, quæ revelavit. Spero omnia, quæ promisit. Dono illi omnia, quæ possideo. Mori cupio pro ejus gloriâ. Mori cupio ejus amore. Mori cupio in testimonium debiti mei obsequii. Mori cupio propter Justitiam. Morior, quia ipse est mortuus. Moriar propter illum, sicut ille mortuus est propter me. Moriar, ut ipsum videam. Moriar, ut ipsum amem. Moriar, ut ipsum benedicam, & cantem ei canticum laudis in omnem æternitatem.

O Pater misericordiarum! Ecce! filium prodigum; qui dissipavit omnia bona tua, qui



qui consumpsit vitam suam vivendo luxuriosè; qui redit modò ad domum paternam, & humillimè veniam à te efflagitat. Heu! vixi sine ratione, jam inde, ex quo adeptus fui usum rationis. Non feci nisi mala, jam inde, ex quo capi cognoscere bonum. Pater mi! peccavi in cælum, & coram te, jam non sum dignus vocari filius tuus. Non sum dignus, qui intrem in domum tuam. Sed nunquid tu Pater esse desisti, quia ego cessavi esse filius tuus? An perdidisti bonitatem tuam, quia ego perdidici innocentiam meam? An non es Pater misericordiæ, quia ego factus sum filius miseriæ? O mi pater! O Patrum optime! miserere miserrimi filiorum tuorum. Perditus eram, & ecce! me inventum. Mortuus eram, & ecce! me resuscitatum. Longè à te recesseram, & ecce! paratissimum ad comparandum coram te. O Pater mi! obviàm progredere filio tuo, da mihi osculum pacis. Ignosce, obsecro, peccata mea. Indue me denuò veste nuptiali. Recipe me in domum tuam. Admitte me ad convivium tuum.

O JESU! medice pauperum ægrotorum! Consolator pauperum afflictorum! Redemptor pauperum captivorum! Spes pauperum peccatorum! En! me coram te sine viribus. En! me sine motu. En! me sine voce. Verùm cor meum interiùs tibi loquitur, quòd ardeat desiderio videndi te, & agrè accipiat, mortem differri. Veni, O JESU! Veni quantocyùs! Libera animam meam ex hoc carcere! Eripe me ab hoc exilio! Deduc me

in-



in patriam mihi charissimam! En! justi me expectant. En! amici mei brachia mihi porrigunt. O quàm pulchra sunt tabernacula tua! O quàm admirabile est palatium tuum! O quantis gaudiis abundabo in cælo! O quàm felix ero in societate tuâ! Morior præ desiderio moriendi. Veni Divine Salvator! Nec patere me porrò languere.

Sancta Maria Mater Dei, quæ vidisti in Cruce morientem JESUM Filium tuum. Ecce! filius tuus infirmatur. Ne, obsecro, illum deferas in extremâ hac luctâ. Veni, recipe spiritum meum, & defende me ab inimicis meis.

Angeli cæli, descendite in terram, & mihi succurrite. Cingite me undique fidissimâ vestrâ custodia. Pellite hinc infernalem Leonem. Conservate me usque ad mortem. Postquam me salvastis è tam crebris naufragiis, ne quæso permittite me perire in portu.

Progrediamur ad cælum. Properemus in Paradisum. Paratum cor meum Deus! Paratum cor meum! Paratum morari in terra! Paratum hinc exire! Paratum vivere! Paratum mori! Fiat, Domine, sanctissima voluntas tua, in omnibus & per omnia, nunc, & in æternum. In manus tuas, Domine, commendo Spiritum meum.

### Verba S. Scripturæ.

*Lætatus sum in his, quæ dicta sunt mihi,  
in domum Domini ibimus. Psal. 121. 1.*



*Beati mortui, qui in Domino moriuntur.*  
Apoc. 14. 13.

*Beati, qui ad cœnam nuptiarum Agni vocati sunt.* Apoc. 19. 9.

*In te, Domine, speravi, non confundar in æternum.* Ps. 30. 2.

*Quid mihi est in cælo, & à te quid volui super terram? defecit caro mea, & cor meum: Deus cordis mei, & pars mea Deus in æternum.* Ps. 72. 25.

*Coarctor è duobus: desiderium habens dissolvi, & esse cum Christo, multò magis melius.*  
Phil. 1. 23.

*Unam petii à Domino, hanc requiram, ut inhabitem in domo Domini omnibus diebus vitæ meæ.* Psal. 26. 4.

*Quàm dilecta tabernacula tua, Domine Virtutum! concupiscit, & deficit anima mea in atria Domini.* Ps. 83. 2. & 3.

*Beati, qui habitant in domo tuâ, Domine: in sæcula sæculorum laudabunt te.* Ps. 83. 5.  
Totus hic Psalmus plenus est suavis cogitationibus ad accendendum in ægro desiderium Paradisi.

*Si iniquitates observaveris Domine, Domine, quis sustinebit.* 129. 3.

*Apud Dominum misericordia, & copiosa apud eum redemptio.* 129. 7.



MEDITATIO LII.

*Paraphrasis Orationis Dominicæ, in solatium ægrorum.*

PATER NOSTER, QUI ES IN CÆLIS.

**C**Redo, mi Deus! quòd tu sis Pater meus, qui dedisti mihi vitam animæ, & corporis, ut tibi servirem, & te amarem, quam etiam reparasti per mortem Filii tui, postquam eam peccatis meis miserè perdideram. Tu es Pater omnium hominum, & miseri mi hujus inter omnes homines, quem vides in hoc lecto prostratum.

O quàm gaudeo, quòd Patrem habeam tam bonum, tam sapientem, tam sanctum, & tam potentem! spero quòd, cum vitam mihi largitus sis temporalem, æternam quoque liberaliter mihi sis donaturus.

O Pater mi! restituo tibi vitam, quam dedisti mihi. Doleo, quòd tam malè eam impenderim, eaque in tui offensam impiè fuerim abusus.

Pater mi! Peccavi in cælum, & coram te; jam non sum dignus vocari filius tuus: sed recipe me, obsecro, in numerum servorum tuorum.

Pater mi! An possibile est, ut hic calix mortis, & passionis transeat ab ore meo, eumque necdum hauriam? Verumtamen fiat voluntas tua, & non mea.



Pater mi ! glorifica filium tuum, ut filius tuus glorificet te. Et quoniam te non honoravi in terrâ, fac, ut æternùm te laudem in cælo.

### QUI ES IN CÆLIS.

**A**H ! tu es in Cælo, & ego adhuc moror in terrâ. Tu es in loco pacis, & ego sum in loco certaminis. Tu es in cælo, ut mihi præmia retribuas. Et ego sum in terrâ, ut honorem tibi exhibeam.

Spero, mi Deus ! quòd paulò pòst tecum futurus sim in cælo. Spero in meritis pretiosi sanguinis ; à Filio tuo pro me effusi.

O quando veniet dies hæc ! Tædet me porro vivere exulem à tuâ præsentia. Heu ! quàm sordet mihi terra, cum Cælum aspicio ! O Paradisus ! O Paradisus ! quid non agendum est, ut comparis ? Quid non patendum est, ut obtinearis ? Quid quid patior, nihil est in comparatione præmii, quod spero.

### SANCTIFICETUR NOMEN TUUM.

**A**Dorandum Nomen DEI mei ! Veni in hunc mundum, ut te sanctificarem, & tamen vix aliud egi, quàm ut te profanarem. Veni in terram, ut darem tibi gloriam ; & aliud non egi, quàm ut te injuriis afficerem. Glorificavi nomen meum, cum glorificare debuissem Nomen tuum. Illustravi nomen meum,  
cum



cùm illustrare debuisssem Nomen tuum. Veniam à te supplex efflagito, Deus Gloriæ & Majestatis! & quoniam te non honoravi in vitâ, cuplo te vel maximè honorare in morte.

Morior propter Gloriam tuam, & ut humillimè venerer Immortalitatem tuæ Essentiæ, per destructionem vitæ meæ. Cuperem per mortem meam tantum gloriæ tibi tribuere, quantum dilectus Filius tuus per suam mortem tibi tribuit. O utinam jam nunc possem efficere, ut honorareris ab omnibus mentibus, ut amareris ab omnibus còrdibus, ut laudareris ab omnibus linguis! O sanctissimum Nomen JESU! Tu es omnis Spes mea. Quicumque te invocaverit, salvus erit.

Invoco te cum amore & reverentiâ. Ne itaque permittas me damnari.

ADVENIAT REGNUM TUUM.

**M**I DEUS! Quando tandem hoc tempus adveniet? Quando plenè regnabis in corde meo? Quando ego quietè regnabo in corde tuo? Heu! non permisi hactenus te regnare in terrâ. Contestatus sum totâ vitâ meâ, quòd non haberem alium Regem nisi Cæsarem. Transcripsi cor meum, quod est regnum tuum, potestati dæmonis. Permissi in eo regnare omnes hostes tuos.

Sed mi Deus! per tuam gratiam agnosco errorem meum, & perfidiam meam. Fateor, quòd mortem merear. Accepto illam ex te.



to corde meo in satisfactionem peccatorum meorum. Spero, quòd mihi daturus sis ingressum in Regnum tuum, quamvis te rejecerim ex Regno cordis mei. O quàm beati, mi Deus! sunt, qui habitant in domo tua: in sæcula sæculorum laudabunt te. Beati, qui tibi serviunt super terram, quia tecum regnabunt in Cælo.

Anima mea! solatium cape. Ecce Regnum DEI appropinquat. Non nisi unicum momentum tribulationis tibi restat.

Quid non faciendum est, ut corona obtineatur? Quid non patiendum est, ut paradus comparetur?

FIAT VOLUNTAS TUA, SICUT IN CÆLO  
ET IN TERRA.

**M**I DEUS! sentio immensos dolores, corpus meum cruciatibus opprimitur. Mors undique me impetit. Non possum ultra resistere insultibus ejus. Propinat mihi hauriendum calicem perquàm amarum: An nullus superest modus, removendi illum ab ore meo? Verum tamen tua voluntas fiat, non mea.

Mi DEUS! intuere animam meam in agoniâ. Mens mea turbatur morte appropinquante. Timet periculosum hunc transitum; ægrè deserit corpus suum, optaret diutius morari super terram, ad redimendum tempus præteritum, & reparandas jacturas, quas passa est. Oportétne bibere hunc calicem?

An



An non potest obtineri remissio? Mi DEUS! fiat voluntas tua, non mea. Utinam eam integrè adimpleam moriendo, quoniam sæpè illam transgressus sum vivendo.

O mi DEUS! Si possem non mori, mortem tamen à te peterem gratiæ loco, ut sacrificare tibi possem, quod charissimum mihi est in mundo. Ut possem imitari Filium tuum, & gratum me sistere amorì ejus, ac bibere ejus calicem.

Volo equidem consumi in hoc lecto dolorum, & in altari Crucis meæ, ut victima Majestatis tuæ, ut victima justitiæ tuæ, ut victima amoris tui, ut victima Gratiæ tuæ, ut victima Gloriæ tuæ.

PANEM NOSTRUM QUOTIDIANUM DA  
[NOBIS HODIE.

**B**Eatus ille, qui manducabit panem in Regno DEI. Gratias tibi ago, amantissime Pater, de omnibus bonis corporalibus, & spiritualibus, quæ mihi in hac vitâ liberaliter es elargitus, & super omnia de Pane Angelorum, quem toties manducavi, sed pro dolor! ex mea culpa, cum tam modico fructu. O Panis vitæ! non timeo ultrà mortem, quia te suscepi in ultimo morbo meo. Ambulabo in fortitudine Panis hujus usque ad montem Oreb, qui est clara visio DEI.

Tu promissisti, & jurasti. O Veritas æterna! quòd, qui manducabit Corpus tuum, & biber tuum sanguinem, sit victurus æternum.



nùm. Ecce in quo fundetur spes mea ! Ecce unde dissipentur timores mei ! Quoniam uniti fuimus in hâc vitâ , spero , neque in alterâ nos dividendos.

O JESU ! dona mihi hodie panem meum , confirma me in gratiâ tuâ , ut bene peragam hoc iter æternitatis , & constans perseverem usque ad finem. Sine hoc pane deliquium patiar , & viribus deficiam , nec unquam poterò ad cælum pertingere.

ET DIMITTE NOBIS DEBITA NOSTRA SICUT ET NOS DIMITTIMUS DEBITORIBUS NOSTRIS.

**D**omine ! numerus peccatorum meorum est infinitus. Si tu rationes ineas iniquitatum nostrarum , heu ! quis poterit subsistere ? Exspecto salutem meam à purâ tuâ Gratiâ , & non à tuâ Justitiâ.

Non possum amplius poenitentiam agere ; non enim jam sum eo in statu , in quo orare possum , aut jejunare. Quid igitur agam , ut mitigem justitiam tuam , & salutem meam in tuto ponam ?

Tu promisisti , dimittere illi , qui dimittet , gratiam facere illi , qui & ipse aliis gratiam faciet. Mi Deus ! ignosco ex toto corde meo omnibus , qui me offenderunt. Roge te , ut veniam illis largiaris , nec illis imputes malum , quod mihi intulêre. Ah ! Nesciebant ! quid facerent. Veniam mihi largire , mi Deus ! sicut & ego omnibus veniam imperior. Obliviscere malorum , quæ tibi intuli , sicut



sicut & ego obliviscor eorum, quæ ab alijs mihi fuerunt illata.

ET NE NOS INDUCAS IN TENTATIO-  
NEM,

**N**unc, mi Deus! vel maximè opus habeo protectione, & auxilio tuo. Ecce omnes inimici mei circumdant me undique! Ecce Leo rugiens egressus est de inferno, ut me devoret: at si tu mecum sis, quid habeo, quod timeam? si ambulavero in medio umbræ mortis, non timebo mala, quoniam tu mecum es. Si consistent adversum me castra, non timebit cor meum: Si omnes dæmones inferni me impugnent, non timebo, quoniam tu mecum es, & spondes mihi auxilium tuum.

Exurge itaque, Domine, Deus Exercituum! ad adjuvandum me festina. Mitte S. Michaëlem Archangelum cum militia Cælesti in auxilium meum. Nôsti infirmitatem meam, quâ major non est in mundo. Præserva me itaque mi Deus! à tentatione, vel saltem non permitte me tentationi succumbere.

SED LIBERA NOS A MALO.

**A** Malo corporis, quòd meritò patior. A malo animæ, quod mihi imminet, libera me à maximo malorum omnium, à malo æterno. Ecce unicum malum, quod timeo! Accepto reliqua omnia, quæcunque



volueris mihi immittere. Paratus sum luere in Purgatorio, ut satisfaciam Justitiæ tuæ, sed, ô Deus Misericordiarum! obsecro te per pretiosum sanguinem Filii tui JESU Christi, & per amorem, quo illum complexa est sancta Mater ejus Maria, ne me detrudas in infernum, ubi nemo te laudat, nemo te amat. Voca me ad Cælum, ubi te videbo, ubi te amabo, ubi te laudabo in omnem æternitatem. Amen.

*Possunt etiam prælegi ægro meditationes de ultimis verbis JESU Christi in Cruce, quæ habentur in tertia Parte.*







# SECUNDA PARS

## MEDITATIONUM

PRO VIA ILLUMINATIVA.

### MEDITATIO LIII.

*De Curâ Propriæ Perfectionis.*

**P**erfecti estote, sicut Pater vester Cælestis perfectus est. Filius debet consimilis esse Patri suo. Imago primæ ideæ suæ. Effectus causæ suæ. Discipulus Magistro suo. Qui non proficit in Schola JESU Christi, non meretur ejus esse discipulus.

Non progredi, est regredi, non proficere, est deficere. Non se emendare, est deterio-rem fieri. Non lucrari, est perdere. Non potest quis firmus persistere in fluvio rapaci, quin ascendat aut descendat. Si moraris, descendis. Si quiescis, relaberis. Si dicis: satis est, te ipsum perdis.

Multum oportet laborare, ut perfectus evadas. Deus possidet felicitatem suam absque



que motu. Angelus eam acquirit levi motu. Homo eam consequitur magno motu. Omnia desunt illi, qui credit, sibi nihil deesse.

Gratia non vult esse sterilis. Amor non potest esse otiosus. Ignis est, qui nunquam dicit: sufficit. Aut ardet, aut extinguitur. Aut crescit, aut diminuitur. Talentum auferitur ab illo, qui nihil lucri inde colligit. Arbor excinditur, quæ nullum fructum profert.

O mi Deus! quantum temporis sine fructu perdidisti? Quot gratias prodigè dissipavi? Quàm exiguum apparatus virtutum comparavi? Quàm nihil hætenus profeci? Totus mundus proficit. Solus ego deficio. Quivis Artifex proficit in arte suâ, ego non addisco scientiam salutis. Discipulus evadit doctior, ego semper ignarus remaneo. Quilibet nititur esse perfectus, solus ego pergo esse imperfectus.

O Divine Magister! ignosce mihi præterita; studiosè enim deinceps me emendabo. Heu! nondum seriò incepti. O quanta mihi restat via emetienda.

O quàm metuo, ne à nocte obruar! Curramus, ut feramus operæ pretium. Progre diamur, ne repenti à morte obruamur.

### Verba S. Scripturæ.

*Estote ergo vos perfecti, sicut & Pater vester Cælestis perfectus est. Matth. 5. 48.*

*Nescitis, quod ij, qui in stadio currunt, omnes quidem currunt, sed unus accipit præmium:*



*vium : sic currite , ut comprehendatis. 1. Cor. 9. 24.*

*Ego igitur sic curro , non quasi in incertum : sic pugno , non quasi aërem verberans , sed castigo corpus meum & in servitutem redigo : ne forte , cū alijs prædicaverim , ipse reprobus efficiar. 1. Cor. 9. 26. & 27.*

*Dixi , nunc cæpi , hæc mutatio Dextra Excelsi. Ps. 76. 11.*

## MEDITATIO LIV.

*De Oratione & difficultatibus in eâ occurrentibus.*

**C**ur oportet nos orare ? Ut honoremus Majestatem Dei. Ut homagium præstamus Magnitudini ejus. Ut grati agnoscamus Providentiam ejus. Ut testemur subjectionem , & indigentiam nostram. Ut Deum moveamus ad bona nobis præstanda. Ut nos dignos reddamus ad beneficia ab eo recipienda. Ut dilatemus cor nostrum , illudque capax efficiamus gratiarum.

Oratio nos Deo unit , & conjungit. Admōvet nos divinis ejus uberibus. Exprimit inde lac gratiæ. Ditat nos bonis ejus. Subvenit necessitatibus nostris. Sublevat indigentias nostras. Efficat nos potentes , sicut est Deus. Facit , ut triumphemus de ipso Deo. Corpus , quod non respirat , est mortuum. Anima , quæ non orat , est mortua.



Unde accidit , ut nihil à Deo obtineam ?  
 Quia petis res pessimas , & tibi noxias.  
 Quia petis animo culpis inquinato. Quia  
 petis ineptè. Quia petis sine attentione.  
 Quia petis sine devotione. Quia petis sine  
 humilitate. Quia petis sine fiduciâ. Quia  
 petis sine perseverantia.

Oratio penetrat Cælos. Impetrat , quid-  
 quid petit. Deus nihil illi potest negare.  
 Sicut Dei natura non est , nisi Bonitas , ita  
 nil magis desiderat , quàm se diffundere. Est  
 nutrix , quæ lacte abundat. Quærit cor va-  
 cuum , quod repleat bonis suis. Fidem suam  
 obligavit. Filius ejus orat in nobis. Dedit  
 nobis Spiritum suum. Transtulit in nos me-  
 rita sua.

Quid non obtinere possumus , si offeramus  
 Deo merita Filii ejus ?

Unde oriuntur distractiones meæ ? Proveniunt à dæmone , qui Orationem tibi vult odiosam reddere. Proveniunt à tuâ imaginatione , quæ levis est & inconstans. Proveniunt à mente tuâ , quæ occupatur rebus vanis. Proveniunt à corde tuo , quod creaturis adhæret. Quod eò evolat , ubi est thesaurus ejus. Quod conservatur cum illis , quæ amat. Quod nullam habet in Deo delectationem , quia Deum non diligit. Proveniunt frequenter à corpore , quod Spiritum gravat , & deprimit. Oriuntur ex mortifica cura , quam habes de tua perfectione. Oriuntur ex corpore tuo , & negligentia. Oriuntur ex infidelitate tua. Sola mortificatio accendit ignem Orationis.



Unde oritur, quòd nullas sentiam consolationes? Quia nullam habes afflictionem. Quia delicias Spiritûs nimis avidè concupiscis. Quia frequenter quæris solatia ex creaturis. Ut deprimatur superbia tua. Ut continearis in humilitate. Ut meliùs cognoscas temetipsum. Ut experimento discas infirmitatem tuam. Ut excitetur desiderium tuum. Ut puniatur negligentia tua. Ut extimuletur ignavia tua. Ut exerceatur patientia tua. Ut augeatur meritum tuum. Ut abstraharis à sensibus. Ut vivas secundum Spiritum. Ut stabiliaris in Fide. Ut firmetur spes tua. Ut purificetur amor tuus. Ut exploretur fidelitas tua; Ut efficiaris homo spiritualis. Ut discas gratiam æstimare, desiderare, conservare, recuperare, ejusque necessitatem agnoscere. Ut modus imponatur fervori tuo. Ut consulatur sanitati tuæ. Ut promerearis bona à Deo tibi destinata. Ut præparetur cor tuum ad recipiendum insignem aliquem à Deo favorem. Ut abstraharis à meditatione, & transferaris ad unionem.

O mi Deus! veniam supplex à te peto, quòd ab Oratione destiterim. Heu! credebam ego, te mihi infensum, quando tene-riorem erga me affectum testificaberis. Ero deinceps magis fidelis. Humiliabo me in paupertate, & indigentia meâ. Visitationem tuam exspectabo patienter. Æquò animò perferam quascunque derelictiones meas. Tolerabo libens omnia tædia mea. Nimius mihi honor est, versari in præsentia tuâ. An



non hoc est in paradiso degere , semper cum Deo commorati ?

### Verba S. Scripturæ.

*Quid oremus , sicut oportet , nescimus , sed ipse spiritus postulat pro nobis gemitibus innarrabilibus. Rom. 8. 26.*

*Sine intermissione orate , in omnibus gratias agite. 1. Thess. 5. 16.*

*Petite , & dabitur vobis : quærite , & invenietis , pulsate , & aperietur vobis Matth. 7. 7.*

*Spiritus est Deus , & eos qui adorant eum , in spiritu , & veritate oportet orare. Joan. 4. 24.*

*Petitis , & non accipitis , eò quòd malè petatis. Jacob. 4. 3.*

*Oratio mea in sinu meo convertetur. Pl. 34. 13.*

*Et erunt , ut complaceant eloquia oris mei : & meditatio cordis mei in conspectu tuo semper. Pl. 18. 15.*

## MEDITATIO LV.

### De Fide.

**E**SSe sine Fide , est esse sine ratione. Qui Christianus non est , neque homo dici meretur. Fides transcendit rationem : sed ratio nobis dictat , quòd homo non sit rationalis , qui rationi suæ subjicere velit principium rationis. Quòd homo sit sine intel-



tellectu, qui ratione suâ vult comprehendere id, quod multum excedit ejus intelligentiam.

Fides non est evidens: sed ratio evidenter demonstrat, quod habeamus veram Fidem. Antiquitas Religionis nostræ. Constitutio Religionis nostræ. Prædicatio Religionis nostræ. Diuturnitas invariabilis Religionis nostræ. Miracula Religionis nostræ. Amplitudo Religionis nostræ. Sanctitas Religionis nostræ. Majestas Religionis nostræ. Doctores Religionis nostræ. Testes & Martyres Religionis nostræ, certò persuadent cuilibet intellectui sano, quod vel nulla Religio sit in mundo, vel quod nostra sit vera Religio.

Si Ecclesia me fallit, Deus me fallit. Si Ecclesia me in errorem ducit, Deus me in errorem ducit. Non crederem Evangelio, nisi Ecclesia mihi diceret, fidem illi adhibendam esse. Non reciperem vel unicum sensum Scripturæ, nisi Ecclesia mihi diceret, illum recipiendum esse. Nihil credit, qui non omnia credit.

Ut sis Catholicus, oportet credere universaliter. Oportet credere humiliter. Oportet credere efficaciter.

O Veritas Deus meus! in sole posuisti tabernaculum tuum. Ecclesia tua solis instar refulget. Illuminat totum mundum sicut sol. Vitam tribuit toti mundo, sicut sol.

Volo vivere, & mori Filius Ecclesiæ tuæ. Sum una de ovibus tuis. Non possum vivere sine Pastore. Renuntio propriis meis dictaminibus. Submitto me penitus effatis Fidei. Religio mea non esset Divina, nisi transcenderet



deret rationem meam. Tu non esses Deus meus, nisi esses incomprehensibilis. Cor meum non posset te adorare, si mens mea te posset comprehendere. Cor meum submittere se debet legi tuæ. Mens mea subijcere se debet Fidei tuæ.

## Verba S. Scripturæ.

*Ecce! qui incredulus est, non erit recta anima ejus in semetipso, justus autem in fide sua vivet. Hab. 2. 4.*

*Fides est sperandarum substantia rerum, argumentum non apparentium. Hebr. 11. 1.*

*In captivitatem redigentes omnem intellectum in obsequium Fidei. 2. Cor. 10. 5.*

*Si non credideritis, non permanebitis. Isa. 7. 9. juxta 70.*

*Habemus firmiorem Propheticum sermonem: cui bene facitis attendentes, quasi lucernæ lucenti in caliginoso loco. 2. Petr. 1. 19.*

## MEDITATIO LVI.

### De Fidei Directione.

**R**atio est lumen hominis. Fides est lumen Christiani. Ut sis homo, oportet te esse rationalem. Ut sis Christianus, oportet te esse fidelem.

Deus honorari debet tam ab intellectu, quam à voluntate meâ. Honoro Deum voluntate mea, quando obedio legi ejus. Honor



noro Deum Intellectu meo, quando fidem præsto revelationi ejus. Voluntas mea integrè se submittit, quando facit, quod ipsi non placet. Intellectus meus se perfectè submittit, quando credit, quod non intelligit.

Fides consecrat intellectum hominis. Efficit illum Religiosum. Subjicit illum Auctoritati Dei. Sacrificat illum gloriæ Dei. Unit illum sapientiæ Dei. Replet illum veritate Dei. Efficit illum rectum, certum, & falli nescium, sicut est Deus.

Fides nobis manifestat mysteria Religionis nostræ. Deducit nos ad finem nostrum. Conservat nos in unitate. Retinet nos in humilitate. Sustinet spem nostram. Animat charitatem nostram. Disponit nos ad gratiam. Efficit, ut promereamur gloriam.

Sine Fide mens nostra profana est, æquo solutior, & sine Religione. Errat in cognitionibus suis. Hallucinatur in ratiocinationibus suis. Non attolit se super terram. Nulum meretur cœleste præmium. Non se subijcit suo principio. Non obedit supremo Domino suo. Nunquam intuebitur primam Veritatem.

O quàm Fides est ingens Dei donum! O quàm cæcus est homo, qui Fidem non habet! O quàm rationabile, est mentem suam Deo subijcere!

Mi Deus! Credo quod non intelligo. Ope-  
ror, quod mihi non placet. Adoro te, sub-  
mittendo tibi cogitationes meas, Amo te sub-  
mittendo tibi desideria mea. Ut obediam legi  
tuæ, oportet renuntiare propriæ voluntati



mea. Ut obediam Fidei tuæ, oportet me renuntiare propriis dictaminibus meis. Nemo tibi verè subjectus est, qui non vult agere, nisi quæ ipsi libent. Nemo Discipulus tuus est, qui non vult credere, nisi quæ ipse intelligit. Ut sim subditus tuus, necesse est, ut transcendam propensionem meam. Ut sim Discipulus tuus, necesse est, ut transcendam rationem meam.

### Verba S. Scripturæ.

*Per Fidem ambulamus, & non per speciem.*  
2. Cor. 5. 7.

*Sponsabo te mihi in fide: & scies, quia ego Dominus.* Os. 2. 20.

*Credidit Abraham Deo, & reputatum est illi ad justitiam.* Rom. 4. 3.

*Exiit nesciens, quò iret.* Heb. 11. 8.

*In columna nubis loquebatur ad eos.* Psal. 98. 7.

*Nónne Deo subiecta erit anima mea?* Psal. 61. 2.

## MEDITATIO LVII.

### De Spe, & Fiduciâ in Deum.

**S**pes est Virtus Divina, quæ innitur dilecto suo. Honorat ejus bonitatem. Reddit homagium ejus magnitudini. Agnoscit ejus Providentiam. Ex hominibus nos Deos efficit. Ex infirmis nos omnipotentes reddit. Ex pauperibus nos divites facit.

Nun.



Nunquam magis oportet sperare, quàm cum omnia videntur desperata. Nunquam minus oportet timere, quàm cum omnia videntur esse metuenda. Nunquam oportet se Deo magis committere, quàm, cum quis credit, se penitus esse derelictum.

Deus communicat suam subsistentiam illi, qui propriâ se exspoliât. Deus communicat suam omnipotentiam illi, qui agnoscit infirmitatem suam. Deus communicat suos thesauros illi, qui agnoscit indigentiam suam.

Abundantia quærit egestatem. Debilis innititur forti. Fortis sibi complacet in infirmo. Deus sustentat humanitatem, quæ non innititur, nisi ejus Divinitati.

Nulli fulcro innitere, & Deus te sustentabit. Ne habeas subsistentiam humanam, & habebis Divinam. Non fidas tuis dictaminibus, & habebis sapientiam Dei. Non fidas tuis viribus, & habebis potentiam Dei. Non fidas tuis virtutibus, & habebis sanctitatem Dei.

Ah mi Deus! Quis sum ego, & quis es tu? Tu es meum esse, & ego non sum, nisi nihilum. Tu es meum robur, & ego non sum, nisi infirmitas. Tu es mea sanctitas, & ego non sum, nisi malitia. O Deus meus, spes mea! Totum me tibi committo. In te quiesco. Tibi soli innitor. Si deviem, tu causa eris erroris mei. Si cadam, tu causa eris lapsus mei. Si ma perdam, tu eris causa ruinæ meæ; quia omnem spem & fiduciam meam in te figo. Tu non potes me perdere, & in



errorem inducere. Nihil itaque timeo, quia me tibi ex integro committo.

Cognoscere Deum, & non cognoscere propriam miseriam, est causa nimiae præfidentiae. Cognoscere suam miseriam, & non cognoscere Deum, est causa desperationis. Jesus non solum est Deus, sed Deus Mediator. Jesus non est amplius Jesus, si illi auferas misericordiam. Non est amplius Salvator, si non misereatur peccatoris.

### Verba S. Scripturæ.

*Quæ est ista, quæ ascendit de deserto, innixa super dilectum suum. Cant. 8. 5.*

*Qui sperant in Domino, mutabunt fortitudinem, assument pennas sicut aquilæ, current, & non laborabunt, ambulabunt & non deficient. Isa. 40. 31.*

*Multa flagella peccatoris, sperantem autem in Domino, misericordia circumdabit. Psal. 13. 10.*

*Dixit Dominus ad Gedeon: multus tecum est populus, nec tradetur Madian in manus ejus: ne gloriatur contra me Israël, & dicat: meis viribus liberatus sum. Judic. 7. 2.*

*Divitibus hujus sæculi præcipe, non sublime sapere, neque sperare in incerto divitiarum, sed in Deo vivo, qui præstat nobis omnia abunde ad fruendum. 1. Tim. 6. 17.*



## MEDITATIO LVIII.

*De Charitate.*

**C**haritas est thesaurus meritorum, qui nos locupletat. Est thesaurus gratiarum, qui nos sanctificat. Est thesaurus sanctitatis, qui nos reddit perfectos. Est thesaurus Pacis, qui nos beatos efficit.

Charitas delet omnia peccata. Sedat omnes cupiditates. Producit omnes virtutes. Mitigat omnes ærumnas. Reddit nos similes Deo. Unit nos intimè Deo. Transformat nos aliquo modo in Deum. Facit, ut Deus sit totus noster, & nos toti simus Dei.

Charitas non quærit semetipsam. Amat, ut amet. Amor ejus est delectatio ejus. Amor ejus est merces ejus. Charitas est humilis. Patiens. Benigna. Benefaciens. Non est aspera. Non inflatur. Non indignatur. Nemini invidet. Credit omnia. Sperat omnia. Sustinet omnia. Ignoscit omnia.

O Charitas Deus meus! cur imperas mihi, ut te amem? An non prohibere potius id mihi deberes? Potestne mihi obtingere majus bonum, quàm te amare? Potestne evenire mihi majus malum, quàm te non amare? Potestne mihi minari majorem miseriam, quàm prohibere mihi amorem tui? Quàm fieri potest, ut non amemus Deum infinitè bonum? Deum, qui nos infinitè amat? Deum, qui nobis bona confert infinita? Deum, qui intimè nobis conjunctus est titulis infinitis?

In-



Interim tamen te non amo, Deus bonitatis! In corde meo non habeo, nisi phantasma charitatis. Superbus sum. Impatiens. Asper. Iracundus. Operor malum. Sum invidus. Nihil sustineo. Nemini ignosco. Heu! quomodo salvabor, cum nihil habeam charitatis!

O quam serò te amavi, Bonitas semper antiqua! semper nova! Nunquam deinceps desinam te benedicere, te laudare, & te amare.

### Verba S. Scripturæ.

*Diliges Dominum Deum tuum ex toto corde tuo, & in totâ animâ tuâ, & in totâ mente tuâ. Hoc est maximum & primum mandatum. Matth. 22. 37.*

*Finis præcepti charitas, de corde puro, de conscientia bonâ, & de fide non fictâ. 1. Tim. 1. 5.*

*Charitas operit multitudinem peccatorum. 1. Pet. 4. 8.*

*Remittuntur ei peccata multa, quoniam dilexit multum. Luc. 7. 47.*

*Deus Charitas est, & qui manet in Charitate, in Deo manet, & Deus in eo. 1. Joan. 4. 16.*

*Hæc est Charitas Dei, ut mandata ejus custodiamus. 1. Joan. 5. 3.*

*Qui habet mandata mea, & servat ea, ille est, qui diligit me. Joan. 14. 21.*



## MEDITATIO LIX.

*De Puritate Intentionis.*

**T**otus es Dei. Totus es propter Deum. Omnia à Deo habes. Ergo nihil operari debes, nisi propter Deum.

Talis est actio tua, qualis est finis tuus. Si finis tuus sit bonus, actio quoque tua bona erit. Si verò finis, quem intendis, malus sit, actio quoque mala erit. Si eundem tibi finem præfigas, quem Deus habet, actio tua sancta erit, sicut actio Dei.

Deus non operatur, nisi propter se, & tu non operaris nisi propter te. Deus non quærit, nisi gloriam suam, & tu non quæris nisi gloriam tuam. Deus te cupit salvare, & tu sponte ruis in interitum. Si nihil opereris propter ipsum, quid potes expectare ab ipso? Si nequam sis tibi ipsi, cui bonus eris?

Deus non respicit manum, sed cor. Non considerat donum, sed affectum donantis. Tantum operaris, quantum vis operari. Tantum donas, quantum vis donare. Tantum lucraris, quantum vis lucrari. Intentio sola quandoque prodest sine actione: sed actio nunquam prodest sine intentione. Places Deo, si vis illi placere. Amas Deum, si vis illum amare. An non meritò solatium hinc capies?

Ah! nolo deinceps laborare propter mundum. Omnino volo deinceps soli Deo servire. Quoniam tibi placet, mi Deus! quisquis



quis desiderat tibi placere. Quoniam te amat, quisquis vult te amare. Tu melior es Dominis quibuscunque. Nil ultrà deinceps curabo, quàm ut tibi placeam, & te amem.

### verba S. Scripturæ.

*Omnes, quæ sua sunt, quærunt.* Phil. 2. 21.  
*Nunquid est cor tuum rectum; sicut cor meum.*

4. Reg. 10. 15.

*An quæro hominibus placere?* Gal. 1. 10.

*Si adhuc hominibus placerem, Christi servus non essem.* Ibid.

*Sive manducatis, sive bibitis, sive aliud quid facitis, omnia in gloriam Dei facite.* 1. Cor. 10. 31.

## MEDITATIO LX.

*Quæ sit Intentio nobilissima.*

**N**ihil unquam amittitur, cùm Deo servitur. Tantò plus lucri comparatur, quantò minùs concupiscitur. Potest quidem Deo præstari obsequium, ut lucrum inde capiatur: sed hoc obsequium non est magni lucri.

Verus amor se ipso contentus est. Id quod diligit, mercedis loco habet. Suspectus est amor, qui quærit aliquid cum Deo. Mercenarius est amor, qui exspectat aliud bonum, quàm Deum. Infirmus est amor, cui aliud placet, quàm Deus. Perfectus est amor, qui Deo contentus est.



Operari, ut aliquid lucrer, est obsequium spectans proprium commodum. Operari, ut sim perfectus, est amor nondum usquequaque purus. Operari, ut Deo placeam, est amor nascens. Operari, quia Deus mihi placet, est amor consummatus.

Mi Deus! vires non habeo, usque adeo evolandi in altum. Cor meum terræ nimis affixum hæret. Neque ita facile attollere se potest super cælos. Serviam, antequam diligam. Osculabor manum tuam, antequam osculer os tuum. Amabo remunerationem tuam, ut nihil aliud obtineam, quàm amorem tuum.

O quàm dives ero, quando non operabor, nisi propter te. O quàm perfectus ero, quando non alteri desiderabo placere, nisi tibi. O quàm beatus ero, quando nihil amabo, præter te.

### Verba S. Scripturæ.

*Inclinavi cor meum ad faciendas justificationes tuas in æternum, propter retributionem.*  
Ps. 118. 112.

*Quid mihi est in cælo, & à te quid volui super terram? Deus cordis mei, & pars mea Deus in æternum.* Psal. 72. 25. & 26.

*Nemo, quod suum est, quærat.* 1. Cor. 10. 24.

*Tibi soli.* Ps. 50. 6.

*Non quasi hominibus placentes, sed Deo, qui probat corda nostra.* 1. Thess. 2. 4.



## MEDITATIO LXI.

*De Signis Puræ Intentionis.*

**S**I operer sine turbatione. Si operer, sine sollicitâ festinatione. Si operer sine teste. Si operer, ac si non nisi Deus & ego essemus in mundo. Si gratum mihi accidat, quòd alii operentur, sicut ego. Si gaudeam, quando alii operantur plus, quàm ego. Si non ægrè feram, quando opus meum ab alio interrumpitur. Si æquo animo accipiam, quando opus meum felicem successum non habet.

Si æque amem malum operis successum ac bonum: Si æquè amem, quietem, ac occupationem. Si æquè amem nihil agere, quando Deus ita vult, ac multum agere. Si amem contemptum, sicut gloriam. Si post rem bene gestam non mihi vanè complaceam. Signum est, quòd habeam puram intentionem.

O mi Deus! Quàm multum hætenus laboravi, & nihil lucratus sum! Multum sollicitudinis impendi, nec quidquam fructûs collegi. Festinanter ambulavi, & nullum progressum feci. Laboravi pro terrâ, nihil egi pro Cælo? Laboravi pro corpore, nihil egi pro animâ. Laboravi pro tempore, nihil egi pro æternitate. Laboravi pro me ipso, nihil egi pro te.

O Domine! Quoniam non sum creatus, nisi propter te, nolo vivere nisi propter te.  
Quo-



Quoniam non subsisto, nisi per te, nolo operari nisi propter te. Unica deinceps obsequii mei merces erit, tibi serviisse. Merces amoris mei erit, te amasse. Quando non quæram nisi te, in te, & tecum inveniam omnia.

## Verba S. Scripturæ.

*Nonne cor tuum rectum?* 4. Reg. 10. 15.

*Quem quæritis?* Joan. 18. 4.

*Mulier, quid ploras?* Joan. 20. 13.

*Martha, Martha sollicita es, & turbaris erga plurima: porro unum est necessarium.* Luc. 10. 41.

*Regi sæculorum immortalis, & invisibili, soli Deo honor & gloria in sæcula sæculorum. Amen.* 1. Tim. 1. 17.

*Quæ placita sunt ei, facio semper.* Joan. 8. 29.

## MEDITATIO LXII.

### *De Humilitate.*

Quis es tu, mi Deus! & quis sum ego? Tu es omnia, & ego nihil. Tu scis omnia, & ego nihil. Tu potes omnia, & ego nihil. Tu non es nisi lumen, & ego non sum nisi tenebræ. Tu es fortitudo, & ego infirmitas. Tu es sanctitas, & ego malitia. Tu es Sanctus Sanctorum, & ego sum peccator peccatorum. Tu es Rex Regum, & ego mancipium mancipiorum. O quàm tecum fortis sum! O quàm sine te infirmus sum.



Anima mea ! humilia te , aut Deus te humiliabit. Quid habes , quod non accepisti ? Quid habes , quod ex te ipso possis conservare ? Quid habes , quo possis bene uti ? Virtutes tuæ , sine humilitate non te salvabunt. Vicia tua cum humilitate non te damnabunt. Humilitas enim expellit omnia vitia , eorumque loco introducit charitatem. Etiam si fuisses æquè impius ac Achab , si te humilies , Deus non te punit. Deus enim superbis resistit , humilibus autem dat gratiam.

Poterisne deinceps dicere , salutem tuam esse impossibilem ? Viam ad cælum esse nimis arduam ? Non potest unusquisque se extollere ; sed quis est , qui se non possit deprimere ? Totus mundus non potest ascendere , sed quis est , qui non possit descendere ?

Omnia possum facere , si me possum humiliare. Non possum jejunare : sed possum me humiliare. Non possum plorare : sed possum me humiliare. Non possum orare : sed possum me humiliare. Virtus humilitatis supplet defectum Charitatis. Peccator securus est intra brachia humilitatis. Cor contritum , & humiliatum Deus non despiciet.

O Anima mea ! Toleremus contemptum. Despiciamus contemptum. Amemus contemptum. Desideremus contemptum. Queramus contemptum.

Abcondamus thesauros nostros , ne quis nobis eos eripiat. Deprimamus nos , ut Deus nos extollat. Æstimemus errores inculpabiles , qui nobis accersunt confusionem.

Ame.



Amemus omnia, quæ nos continent in abjectione.

Esse bonum, & apparere bonum, est res periculosa. Apparere bonum, & non esse bonum, est hypocrisis vitiosa. Esse bonum, & non apparere bonum, est conditio beata.

### Verba S. Scripturæ.

*Humilia valde spiritum tuum, quia vindicta carnis impii ignis. Eccli. 7. 19.*

*Venite ad me omnes, qui laboratis, & onerati estis, & ego reficiam vos. Tollite jugum meum super vos, & discite à me, quia mitis sum, & humilis corde, & inveniatis requiem animabus vestris. Matth. 11. 28 & 29.*

*Quicumque voluerit inter vos major fieri, sit vester minister, & qui voluerit inter vos primus esse, sit vester servus. Marc. 10. 43. & 44.*

*Qui se exaltat, humiliabitur, & qui se humiliat, exaltabitur. Luc. 14. 11.*

## MEDITATIO LXIII.

### De Patientia.

**Q**uidquid patior, nihil est, in comparatione pœnæ, quam promerui. In comparatione gloriæ, quæ mihi est præparata. In comparatione mali, quod commisi. In comparatione boni, quod omisi. In comparatione cæli, quod mihi promissum est.



Si absque cruce vivam , non sum Discipulus JESU. Si non bajulem crucem meam, non regnabo cum JESU. Necessarium est pati, sive in tempore , sive in æternitate.

Non transitur à deliciis ad delicias : sed à deliciis ad supplicia. Non transitur ac felicitatem : sed à felicitate ad infelicitatem.

Quando adversa patienter sustineo , JESUS mecum patitur. JESUS regnat in me. Sum Victima amoris ejus. Sum Thronus gratiæ ejus. Sum Trophæum gloriæ ejus. Satisfacio omnibus debitis meis. Congrego ingentes thesauros. Exerceo omnes virtutes. Habeo signum prædestinatorum. Prævenio penas purgatorii. Securus sum de Paradiso.

O JESU Salvator mi ! Reverenter excipiam omnes ærumnas meas , quia tu eas consecrasti. Non sentio amplius crucem meam , quando cogito crucem tuam. Omnis consolatio mea est , meditari Crucem & Passionem tuam. Tormenta tua dulces efficiunt afflictiones meas. Morerer præ dolore , si viverem absque dolore.

### Verba S. Scripturæ.

*Non sunt condignæ passiones huius temporis, ad futuram gloriam, quæ revelabitur in nobis.*  
Rom. 8. 18.

*Per multas tribulationes oportet nos intrare in regnum Dei.* Act. 14. 21.

*Patientia vobis necessaria est , ut voluntatem Dei facientes , reportetis promissionem.* Hebr. 10. 36.



*Si quis vult post me venire, abneget semetipsum, & tollat crucem suam, & sequatur me.*  
Matth. 16. 24.

## MEDITATIO LXIV.

### *De Exercitio Patientiæ.*

**Q**Uoniam patiendum est in hoc mundo, ne perdamus fructum tolerantia, patiamur propter JESUM. Patiamur cum JESU. Patiamur à JESU. Patiamur, sicut JESUS.

Patiamur sine querelâ, & sine murmuratione. Patiamur cum resignatione & indiffereutiâ. Patiamur fortiter, & constanter. Patiamur cum gaudio & amore.

Patiamur omnia adversa. Patiamur à toto mundo. Patiamur in omni tempore. Patiamur omnibus modis.

Toleremus Crucem. Adoremus Crucem. Amemus Crucem. Quæramus Crucem.

O sancta Crux! Adoro te. Amplector te, quia Christianus sum, & filius Crucis. Volo vivere, & mori in Cruce. Tu es arbor vitæ, & salus mundi. Tu es asylum peccatorum, & solatium afflictorum. Ah! Maxima deinceps crux mihi erit, vivere sine cruce.

### Verba S. Scripturæ.

*Væ his, qui perdiderunt sustinentiam. Eccli.*  
2. 16.



*Hæc est gratia Dei, si propter Dei conscientiam sustinet quis tristitias patiens injuste, 1. Pet. 2. 19.*

*Omne, quod tibi applicitum fuerit, accipe: & in dolore sustine, & in humilitate tua patientiam habe. Eccli. 2. 4.*

*Gloriamur in tribulationibus, scientes, quod tribulatio patientiam operatur, patientia autem probationem, probatio verò spem. Rom. 5. 3. & 4.*

*Patientes estote ad omnes. 1. Thess. 5. 14.*

*Christus passus est pro nobis, vobis relinquens exemplum, ut sequamini vestigia ejus. 1. Petr. 2. 21.*

## MEDITATIO LXV.

*De Cruce, seu varijs Motivis Patiendi.*

**T**olle Crucem tuam, anima Christiana. Non reperies aliam, quæ magis tibi sit propria, quàm tua. Si hanc deseras, ut aliam arripas, plus damni, quàm lucri accipis. Crux ubique plantata est. Reperitur in omni loco, tam in Palatijs, quàm Claustris. Deus, qui vult omnes homines salvos fieri, omnibus prospexit de Cruce: quia nemo salvari potest sine cruce.

Cruz fructus profert admirabiles. Avellit nos à Creaturis. Tædium affert hujus vitæ. Accendit in nobis desiderium mortis. Satisfacit pro nostris peccatis. Facit nos sentire nostrorum criminum pœnas. Incurit horrorem sceleris. Destruit pravos habitus. Efficit nos similes JESU Christo. Porrigit nobis hauriendum ejus calicem.

Nihil



Nihil gloriosius est, quàm pati. Nihil suavius est, quàm pati. Nihil salubrius est, quàm pati. Nihil magis necessarium, quàm pari.

Quantus honor est, crucifigi cum Jesu? Tractari, sicut unum ex membris ejus? Conscendere Regium ejus Thronum? Portare sceptrum ejus, & Diadema ejus? Consummare opus Redemptionis ejus? Adimplere ea, quæ desunt Passioni ejus? Exprimere figuram Jesu patientis? Continuare sacrificium ejus? Participem fieri dolorum ejus? Adjuvare eum in cruce portanda. Esse victimam amoris, sicut ipse! Esse Martyrem, sicut ipse? Persecutionem pati, sicut ipse? Immolari, sicut ipse? Adoro tormenta, veluti Sacramenta. Revereor hominem afflictum, sicut Jesum crucifixum. Malo pati cum Jesu, quàm regnare cum Jesu.

Deus castigat, quos amat. Non parcit virgæ filiis infligendæ. Si non castiger, non diligor. Si non sim Filius Dei, non salvabor. Nunquam Deus magis irascitur, quàm cum non irascitur. Nunquam magis abundo solatiis, quàm, cum me video calamitatibus cumulatam.

Qui me punit in tempore, parcet mihi in æternitate. Deus semper visitat per suam gratiam, quos visitat per afflictionem. Gratia est fructus Crucis. Oportet itaque Crucem conscendere, ut fructum inde colligas. Nunquam eris sine gratia, quamdiu hærebis in cruce.

Nulla est virtus sine Cruce. Nullum est meritum sine patientia. Tolle Crucem charitati, non erit amplius tenera. Tolle Crucem



spei, non erit ampliùs firma. Tolle Crucem humilitati, non erit nisi vanitas. Tolle Crucem fortitudini, non erit nisi infirmitas. Moneta nullius valoris est, nisi impressam habeat effigiem Principis. Hæc autem per tunctiones, & pressuras auro imprimitur, eique valorem tribuit. Si vulnera non habeas, si tunctionibus non premaris, nullius pretii eris. Aurum tuum non habebit valorem, nisi Crux illi sit impressa, aut insculpta.

O quàm perfectus est homo patiens! Omnes virtutes ejus sunt Heroicæ. Credit se amari, quando affligitur. Credit se à Deo in delictis haberi, quando flagellis plectitur. Sperat contra omnem spem. Tranquillus est in quibuscunque eventibus. Immobilis est in sua ruina. Indefessus est in suis laboribus.

Amat Deum etiam sine solatiis. Osculatur virgas, quibus castigatur. Indignum se credit omnibus bonis. Dignum se æstimat omnibus malis. Totum se committit Divinæ Providentiæ. Obedientiæ ductum in omnibus sequitur. Adorat omnes cruces, veluti sacras Reliquias veræ Crucis Jesu Christi.

Deus sapiens est, novit optimè, quid agat. Bonus est, non vult, nisi quæ mihi conducantia novit. Immensus est & ubique præsens, videt quæcunque patior. Potens est, potest me liberare. Dives est, potest mihi assistere. Justus est, cur ergo contra ipsum querar? Est amans mei, cur ergo desperem? Patiens est, an non ergo imitari me illum par est? Rex est, an non ergo pro suo arbitrio, me potest regere? Supremus Dominus est, an non ergo plenum jus habet, mihi quidlibet imperandi, & imponendi? Quan-



Quantum est solatium, hærere in Cruce cum Jesu crucifixo ? Ille tecum est in tua Cruce Tu cum ipso es in Cruce ejus. Unitus est tibi per tolerantiam. Tu ipsi uniris per patientiam. An non beatum est, hac ratione illi unitum vivere ; Unio in coelo solatiis cumulat. Unio in terra dolores infligit.

Deus mundum creavit, agendo. Sed reparavit illum, patiendo. Operatur ut Deus cum operantibus, patitur ut homo cum patientibus. O anima mea ! quod majus est gaudium, quàm esse cum Jesu in Cruce ? Non es Christianus, nisi per crucem. Nec perseveras esse Christianus, si vivas sine cruce. Afflictiones nimirum timere, est renuntiare Religioni suæ.

Particeps eris gaudiorum JESU, si particeps sis dolorum ejus. Socius illi eris in gloria, si societatem illi præstes in Passione. Regnabis cum illo, si patiaris cum illo. Certandum tibi est, ut coroneris. Patiendum tibi est, ut salveris. Homo perditus fuit per delectationem, unde & salvari non potest, nisi per afflictionem.

JESUS vixit in dolore, & tu vivere cupis in delectatione ? Innocens fuit castigatus, & multorum criminum reus vult sibi parci ? Filius coronatus est spinis, & mancipium rosis vult coronari ? Justus cruci fuit affixus, & impius vult conscendere thronum ?

Nulla Crux gravior est, quàm abhorrere à Cruce. Multi plus patiuntur, ut damnentur, quàm patiantur, ut salventur. Impius patitur sine delectatione. Nullum habet solatium in ærumnis suis. Crux impii non habet unctionem. Est Crux perditionis. Nec suavi-



tatem habet, nec meritum. Nemo illi auxilio est in Cruce bajulandâ. Est Crux desperationum.

Honoremus Crucem Jesu. Bajulemus Crucem Jesu. Amemus Crucem Jesu. Crux est mystica scala Jacob. Crux est Thronus Sapientiæ. Crux est Cathedra hominis Dei. Crux est Trophæum salutis nostræ. Crux est vexillum Religionis nostræ. Crux est signum Prædestinationis. Crux est Principium gratiæ. Crux est fundamentum Gloriæ.

O sancta Crux! adoro te. O chara Sponsa Filii Dei! Exosculor te, amplector te. Ne quæso, dedignare servum, quæ portasti Dominum. Ne dedignare reum, quæ portasti Innocentem. Ne dedignare hominem, quæ portasti Deum. O sancta Crux! Tu speciali titulo mihi deberis. Sancti nullum in te jus habent. Tu es debita hominibus in hac lacrimarum valle exulantibus. Tu es hæreditas peccatorum. Tu es portio Christianorum. Mihi itaque destinata es.

Veni sancta Crux intra brachia mea. Permite, ut requiescam intra brachia tua. Desponsavi te mihi in Baptismo. Oportet Conubium hoc nostrum esse indissolubile. O utinam nihil unquam me separet à te! O utinam nihil unquam te separet à me! O solium gratiæ & misericordiæ! Extolle me à terrâ, sicut exaltasti Salvatorem meum. Si moriar intra brachia tua, Salvator ero, & salvus ero. Deo animas lucrabor, & meam non perdam.



**Verba S. Scripturæ.**

*Benedictum est lignum, per quod sit justitia.*  
Sap. 14. 17.

*Tunc JESUS dixit discipulis suis: si quis vult post me venire, abneget semetipsum, & tollat Crucem suam, & sequatur me.* Matth. 16. 24.

*Verbum Crucis pereuntibus quidem stultitia est, iis autem, qui salvi fiunt, id est nobis, Dei virtus est.* 1. Cor. 1. 18.

*Gaudeo in Passionibus pro vobis, & impleo ea, quæ defunt Passionum Christi, in carne meâ, pro corpore ejus, quod est Ecclesia.* Col. 1. 24.

*Mibi autem absit gloriari, nisi in Cruce Domini nostri JESU Christi.* Gal. 6. 14.

*Exacerbavit Dominum peccator, secundum multitudinem iræ suæ non quæret.* Pl. 10. 4.

**MEDITATIO LXVI.**

*De Conformitate Voluntatis nostræ cum Divinâ.*

**J**udicare sicut judicat Deus, est esse sapientem sicut Deus. Velle id, quod vult Deus, est esse Sanctum sicut Deus. Judicium ejus est Regula judicii nostri. Voluntas ejus est Regula voluntatis nostræ.

Solus Deus habet jus faciendi, quod vult. Soli Deo fas est, propriam exequi voluntatem. Anima mea! Tunc recusas obedire Deo? Semperne



pérne illi bellum movebis? Vísne luctari cum Omnipotente? Num brachium habes sicut Deus? Elne sapientior Deo? An modum illi præscribes gubernandi mundum? Si nolis exequi voluntatem ejus, conaris illi rapere coronam ejus, paras conscendere Thronum ejus, appetis nulli subiectus esse, sicut ille. Æquiúsne est, ut Deus faciat, quod tibi libet, an ut tu impleas beneplacitum ejus?

O quàm felix esses, si non velles, nisi quod Deus vult! O quàm viveres in profundâ pace! O quàm diversam negotia tua induerent formam! O quot curis, & inquietudinibus liber esses!

Deus promovet negotia illorum, qui ipsius negotia exequentur. Curam gerit illorum, qui confidunt in ipso. Obedit illis, qui ipsi obediunt, Amat illos, qui ipsum amant. Implet desideria eorum, qui ipsius implent.

An non hoc est, in Paradiso degere, velle omnia, quæ Deus vult? An non hoc est, infernum incolere, nihil velle eorum, quæ Deus vult? Homo semper facit suam voluntatem, quando nullam habet propriam voluntatem. Homo nunquam facit, quod vult, quando non facit id, quod Deus vult.

Voluntas Dei semper impletur, sive hoc, sive illo modo. Si illi repugnem, repugnet & ille mihi. Si illum affligam, affliget me. Si illum interpellem, ipse quoque consilia mea perturbabit. Si illi serviam, & mihi serviet.



O mi Deus ! Nulla sanè est delectatio , tibi displicere , nullum est commodum , te offendere. Quando tecum non bene convenio , neque mecum ipso satis convenio. Postquam tibi bellum movi , nunquam potui invenire pacem. Constitue de me , quidquid tibi placet , si nolim facere , quod à me fieri cupis. Fac ut serviam tibi , nisi velim amare te. Compelle me , si recusem tibi obedire. Trahe me vel invitum , si non sponte tibi velim obsequi.

**Verba S. Scripturæ.**

*Bona & mala , vita & mors , paupertas & honestas à Deo sunt. Eccli. 11. 14.*

*Inveni virum secundum cor meum , qui faciet omnes voluntates meas. Act. 13. 22.*

*Non contristabit justum , quidquid ei acciderit Prov. 12. 21.*

*Quicumque fecerit voluntatem Patris mei , qui in cælis est , ipse meus frater , & soror , & mater est. Matth. 12. 50.*

*Non sicut ego , sed sicut tu. Matth. 26. 63.*

**MEDITATIO LXVII.**

*De Amore Proximi.*

**P**roximus est homo , sicut ego. Est formatus ad imaginem Dei , sicut ego. Est redemptus ejus sanguine , sicut ego. Est membrum corporis ejus , sicut ego. Est filius Ecclesie



clesiæ ejus, sicut ego. Est nutritus iisdem Sacramentis, quibus ego. Est prædestinatus ad eandem gloriam, ad quam ego.

Deus mihi imperat, ut proximum diligam, sicut meipsum. JESUS orat hoc à me, & mandat. Sibi ipsi præstitum censet, quod proximo exhibetur, beneficium. Sui loco illum substituit. In eum transtulit omne suum jus. Vult, ut proximo præstem, quidquid ipsi debeo.

Non sum Christi Discipulus, nisi proximum meum amem. Non sum Christianus, nisi illi opem feram. Si ipsum contemnam, Deus me contemnet. Si ipsum odio habeam, Deus me odio habebit. Si illum affligam, Deus me affliget. Si illum excusem, Deus me excusabit. Si illum tolerem, Deus me tolerabit. Si ei ignoscam, & mihi Deus ignoscet. Deus mecum aget, sicut ego egi cum proximo. Pro mensura charitatis Deus me judicabit.

Amabo itaque proximum, ut amer. Juva-  
bo eum, ut juver. Tolerabo eum, ut tole-  
rer. Salvabo eum, ut salver.

Amabo eum tenerè. Amabo eum univer-  
saliter. Amabo eum generosè. Amabo eum  
constanter.

### Verba S. Scripturæ.

*Diliges proximum tuum, sicut te ipsum*  
Matth. 19. 19.

*Diligere proximum tanquam seipsum, majus  
est omnibus holocaustis, & sacrificiis.*  
Marc. 12. 33.

Al.



*De Obligat. Parentum erga liberos. 143*

*Alter alterius onera portate, & sic adimplebitis Legem Christi. Gal. 6. 2.*

*Ante omnia mutuam in vobis metipsis charitatem continuam habentes, quia charitas operit multitudinem peccatorum. 1. Pet. 4. 8.*

*In hoc cognoscent omnes, quia discipuli mei estis, si dilectionem habueritis ad invicem. Joan. 13. 35.*

## MEDITATIO LXVIII.

*De Obligatione Parentum erga Liberos, & Dominorum erga servos.*

**P**ater debet Liberis nutrimentum corporis & animæ. Non debet liberos generare, quos in infernum ableget. Cur vis esse Pater, si non velis esse moderator? Quid prodest tibi corpus nutrire, si nullum animæ curam habeas?

Prima vita Liberorum non est, nisi bestiarum. Non agunt vitam hominum, nisi post aliquem temporis decursum. Prudens institutio efficit, ut ratio illustretur. Sancta educatio, est nova quædam nativitas. Est instrumentum Fidei. Est principium salutis. Est Fundamentum virtutis. Salus & damnatio frequenter dependet ab educatione. Infelices sunt Liberi, quibus Parentes nunquam parcunt. Sed infeliciores sunt illi, quibus Parentes indulgent omnia.



Bona Educatio debet esse suaviter severa. Parentes oportet imitari Deum, qui gerit officium Patris, & matris. Patris per severitatem, matris per teneritudinem & indulgentiam. Non oportet semper punire; sed nec oportet semper parcere. Non oportet semper tacere; nec oportet semper loqui. Nunquam castiga filium, quando irâ effervesces. Medicus, qui ægrotat, seipsum primò debet curare. Pater iracundiâ nimium exarscens, debet ipse prius corrigi. Poena, & Correctio est medicina, applicanda tempore convenienti. Poena iusta, & moderata mentem emendat & erigit. Quando verò nimis frequenter, nec satis consultò infligitur, generat contemptum.

Ut bene educes filios tuos, oportet eos æqualiter amare. Inæqualis partitio affectionum, est causa omnium discordiarum. Cur differentiam inter Liberos statuis, ubi nullam natura constituit? Cur violas jus, quod illa tam sapienter stabilivit? Rami ejusdem arboris, nunquid debent ejusdem generis foliis vestiri? Natura operatur ex ingenita propensione. Qui autem amant verâ charitate, plus boni conferunt in illos, à quibus sentiunt majorem aversionem. Imitare Deum in suâ gubernatione. Nónne Deus erga Prædestinatos majori afficitur teneritudine, quàm erga reprobos? Abscondit tamen illam in hac vitâ. Unde impii bonis non invident. Sæpè plus amicitia exhibet illis, à quibus magis offenditur.



Instructiones modicùm conferunt, nisi animentur exemplis. Destruis actionibus tuis, quod ædificas verbis tuis. Manus plus efficit, quàm lingua. Exempla plus possunt, quàm verba. Filius plus credit oculis suis, quàm credat auribus suis. Credit se habere jus faciendi, quæ videt à parentibus suis fieri. Gloriam suam constituit in parentum imitatione, & se perfectum existimat, si Parentibus similis evadat? Omnia peccata tua sunt scandala, quæ inficiunt Liberos tuos. Sunt hæreditas iniquitatis, quæ transeunt ad posteritatem tuam.

Patres, si Liberi vobis sint, singulari curâ illos instruite. Corrigite illos moderatè. Amate omnes æqualiter. Non obedite inclinationibus vestris. Non obsecundate aversionibus vestris. Non connivete ad flagitia illorum. Ne blandiamini eorum concupiscentiis. Non fovete eorum vitia. Non sustinete eorum dissensiones. Parcite illis, quando parcendum est. Sed castigate illos, quando sunt castigandi.

Domini, tractate servos vestros, veluti si essent filii vestri. Non sunt quidem filii titulo generationis: sunt autem specie quâdam adoptionis. Deus vobis committit curam eos nutriendi, & educandi. Vos illis debetis, sicut Liberis vestris, Instructionem, Correctionem, & exemplum. Filii vestri, & servi vestri in die Judicii erunt Judices vestri, adversarii vestri, testes & accusatores vestri.



## Verba S. Scripturæ.

*Filii tibi sunt? erudi illos, & curva illos à pueritia illorum. Eccl. 7. 25.*

*Patres nolite ad iracundiam provocare filios vestros, ut non pusillo animo fiant. Col. 3. 21.*

*Qui parcit virgæ, odit filium suum, qui autem diligit illum, instanter erudit. Prov. 13. 24.*

*Qui scandalizaverit unum ex pusillis istis, qui in me credunt, expedit ei, ut suspendatur mola asinaria in collo ejus & demergatur in profundum maris. Matth. 18. 6.*

*Si quis suorum, & maxime domesticorum curam non habet, fidem negavit, & est infideli deterior. 1. Tim. 5. 8.*

## MEDITATIO LXIX.

*De Mansuetudine & Irâ.*

**Q**Uàm beatus est homo mitis! Quàm miser est iracundus! Quàm sapiens est homo mitis! Quàm stultus est iracundus! Quàm dignus amore est homo mitis! Quàm dignus odio est iracundus! Quàm sanctus est homo mitis! Quàm scelestus iracundus!

Esse mitem, est esse hominem. Esse iracundum, est esse bestiam. Esse mitem, est esse Regem. Esse iracundum, est esse mancipium. Esse mitem, est esse Christianum. Esse iracundum, est esse Ethnicum. Esse

mi-



mitem, est signum Prædestinatorum. Esse iracundum est signum reprobatorum.

Homo mitis est similis Deo. Est absoluta imago JESU Christi. Est Dominus suarum cupiditatum. Revertitur in statum innocentia. Gaudet profundâ pace. Semper est sibi similis. Spiritus sanctus requiescit in corde ejus. Gratia in eo stabile sibi figit imperium. Deus clementer cum eo agit. Veniam peccatorum ei indulget. Tolerat ejus defectus. Cumulat eum suis gratiis.

Homo iracundus est similis Dæmoni. Semper est furiosus, ut Dæmon. Est mancipium suarum cupiditatum. Est proscriptus ex commercio hominum. Nunquam est in quiete. Nunquam sui ipsius est Dominus. Turbat regnum gratiæ. Expellit e corde suo Spiritum sanctum. Pandit ingressum dæmoni. Nec Deo parcit, nec hominibus. Unde nec ipsi Deus parcit. Tractat eum cum rigore. Castigat eum cum furore. Punit eum sine remissione.

O JESU mitissime inter omnes homines! Miserere mei ferocissimi inter omnes dæmones! mansuetissime Agne! qui permisisti te pelle exui, & jugulari sine ulla contradictione: effice me mitem, & patientem inter adversa. O bone Pastor! qui lupos arces ab ovili tuo! quomodo me toleras in domo tuâ? Quomodo me sustines inter oves tuas? Aut interime crudelem hanc bestiam, aut converte eum in mitem oviculam.



## Verba S. Scripturæ.

*Ne sis velox ad irascendum, quia ira in sinu stulti requiescit. Eccl. 7. 10.*

*Diriget mansuetos in iudicio: docebit mites vias suas. Pl. 24. 9.*

*Semper jurgia quærit malus, Angelus autem crudelis mittetur contra eum. Prov. 17. 11.*

*Mansueti autem hæreditabunt terram, & delectabuntur in multitudine pacis. 36. 11.*

*Omnis, qui irascitur fratri suo, reus erit iudicio. Matth. 5. 22.*

*Beati mites, quoniam ipsi possidebunt terram. Matth. 5. 4.*

## MEDITATIO LXX.

## De Remediis Iræ.

**U**T sis mansuetus, oportet te esse humilem. Ira oritur ex superbiâ. Ut sis mansuetus, oportet odisse te ipsum. Ira oritur ex amore proprio. Ut sis mansuetus, oportet cor esse liberum à cupiditate rerum terrenarum: Ira oritur ex amore bonorum creatorum. Qui sibi ipsis nimium sunt mites, plerumque severiores sunt erga alios. Qui mites sunt erga alios, plerumque severi sunt erga seipsos.

Quid commodi obtines, cum irasceris? Destruis sanitatem tuam. Tollis vitam animæ tuæ. Repellis ex eâ Spiritum sanctum. Ingressum dæmoni pandis. Non promoves negotia tua. Non mederis malis tuis. Perturbas



bas familiam tuam. Domum tuam inferno similem efficis. An unum malum sanatur ab altero?

O si te irâ succensum posses intueri, videres sanè te transformatum in bestiam. Ululas, instar lupi. Spumas instar apri. Mordes, instar canis. Crudelis es, instar tigris. Furiosus es, instar leonis. Dentibus strides, instar damnati in inferno. Vultum sædè contorques, instar energumeni. Hæccine est imago hominis? Hæccine est imago Christiani: Hæccine est imago Prædestinati?

Quæ causa est, cur irâ exardescas? An Deus nihil à te tolerat? An tu non aliis quoque uberem patiendi materiam præbes? An non inferni suppliciis dignum te effecisti? Nunquid flammis ejus ardere commeruisti? Cur ergo excandescis, quando quis vel minimum adversatur voluntati tuæ?

Quæ injuria tibi fuit illata? An non bona tua ad Deum pertinent? An non illa pro libitu potest recipere? An non illa jure à te potest repetere, quodcumque, & quacunque ex causa ipsi placet? Quis potest à te tollere capillum capitis tui, si Deus non velit? Quam misericordiam obtinebis à Deo; si non misereatis proximi tui?

O mi Deus! fateor equidem, quòd iniquè irascat, cùm nemo tanta mala inferre mihi possit, quanta fui promeritus. Meritò offendor ab aliis, cùm toties te offenderim. O quàm æquum est, ut alii adversentur voluntati meæ, cùm toties restiterim voluntati tuæ! O quàm jure mereor contemni, cùm toties te



contemptui habuerim. An conqueri possum de afflictione meâ, cum toties sceleribus meis te affixerim?

O mitissime JESU! largire mihi gratiam, ut possim imitari mansuetudinem & patientiam tuam. Propono firmiter arctum custodire silentium, quotiescunque ad iram me sensero commoveri. Nec unquam loqui, quando iracundia me inflammabit.

### Verba S. Scripturæ.

*Ad quem respiciam, dicit Dominus, nisi ad mansuetum, & contritum spiritu, & tremmentem sermones meos? II. 66. 2.*

*Beati mites, quoniam ipsi possidebunt terram. Matth. 5. 4.*

*Discite à me, quia mitis sum, & humilis corde. Matth. 11. 29.*

*Quare iratus es? & cur concidit facies tua? Gen. 4. 6.*

## MEDITATIO LXXI.

### *De Actionibus bene Peragendis.*

**D**Eus à me vult honorari per hanc actionem. Expectat, ut ei obsequium præstem in hac actione. Gratiam suam affixit huic actioni. Agnoscet, utrum ipsum amem, ex hac actione.

Gloria Dei dependet ex hac actione. Sapientia Dei disposuit hanc actionem. Majestas Dei



Dei pretium fecit huic actioni. Sanctitas Dei consecrat hanc actionem. Voluntas Dei imperat hanc actionem. Providentia Dei dirigit hanc actionem. Magnitudo Dei illustrat hanc actionem. Amor Dei exposcit hanc actionem.

Pax mea continetur in hac actione. Meritum meum oritur ex hac actione. Perfectio mea affixa est huic actioni. Deus offendetur, si deficiam in hac actione. Non obtinebo gratias, quæ consequentur hanc actionem. Fortè salus mea dependet ex hac actione.

Omni ergo curâ allaborabo, ut bene peragam hanc actionem.

### Verba S. Scripturæ.

*Iustè, quod justum est, persequeris.* Deut. 16. 20.

*In omnibus operibus tuis præcellens esto.* Eccl. 33. 23.

*Maledictus, qui facit opus Dei fraudulenter.* Jer. 48. 10.

*Reddet unicuique juxta opera ejus.* Matth. 16. 27.

*Bene omnia fecit.* Marc. 7. 37.

### MEDITATIO LXXII.

*De fidelitate in rebus minimis.*

**M**agna flumina nascuntur ex parva origine.  
Magnæ arbores ex modico semine.  
Magna incendia ex parvâ scintillâ. Magni lap-



lapsus ex parvo peccato. Magnæ perturbationes ex levi infidelitate. Magna dependent à parvis. Parva deducunt ad magna. Qui amat, æstimat omnia. Qui timet, nihil negligit. Magnæ actiones satisfaciunt hominibus. Minimæ actiones delectant Deum. Qui infidelis est in minimo, nec in majoribus fidelis erit. Qui fidelis est in minimo, & in majoribus fidelis erit.

Nihil parvum est, ex quo salus dependet. Omne, quod æstinatur à Deo, magnum est. Homines considerant manus; Deus autem intuetur cor. Fidelitas est virtus, magna faciens omnia, quæ animat. Fac, quod nōstr; & Deus te docebit quod ignoras. Fac, quod potes, & Deus te adjuvabit ad faciendum, quod non potes.

O mi Deus! quoniam non possum tibi præstare obsequia grandia, minima saltem fideliter tibi præstabo. Quoniam horreo aggredi ardua, exequar saltem omnia, quæ mihi erunt facilia.

### *Verba Sacræ Scripturæ.*

*Qui spernit modica, paulatim decidet. Eccli.*

19. 1.

*Qui timet Deum, nihil negligit. Eccli. 7.*

19.

*Qui fidelis est in minimo, & in majori fidelis est, & qui in modico iniquus est, in majori iniquus est. Luc. 16. 10.*

*Et si rem grandem tibi dixisset Propheta, certè facere debueras, quantò magis, quia nunc dixit*



*dixit tibi : Lavare & mundaberis. 4. Reg. 5. 13.*

*Virum fidelem quis inveniet? Prov. 20. 6.*

## MEDITATIO LXXIII.

### *De bonis Operibus.*

**C**hristianus sine operibus, est arbor sine fructu. Lampas sine oleo. Terra sine messe. Fides ejus sterilis est. Fides ejus infirma est. Fides ejus morituriens est. Fides ejus mortua est. Qui nihil operatur, nihil credit. Qui credit, & nihil operatur, judicabitur per fidem suam.

Quantò plus cognoscis, tantò magis es culpabilis. Parum repetitur ab illo, qui parum recepit. Nihil boni agere, est malè agere. Sterilitas est species iniquitatis. Ficus fructibus carens in ignem projicitur. Talentum aufertur ab eo, qui illud sine lucro in terrâ defodit.

Fides nos salvat, aut damnat. Pejores, aut meliores nos efficit. Credere bonum, & facere malum, est judicatum esse ante Judicium. Est condemnatum esse ante accusationem. Qui non facit, quod credit, citò omittit credere. quod non facit. Fides non diu vivit post mortem charitatis.

Fac itaque bona opera. Fac illa abundanter. Fac illa in gratiâ. Fac illa ex bono fine. Fac illa sine dilatione. Fac tot bona, quot antè fecisti mala. Fac quidquid boni



potes. Et tamen crede, te nihil agere. Operare bonum, dum tempus habes, quia paulò post tempus operandi non erit amplius.

### Verba S. Scripturæ.

*Filius hominis venturus est in gloria Patris, & tunc reddet unicuique secundum opera ejus. Matth. 16. 27.*

*Ecce venio citò, & merces mea mecum est, reddere unicuique secundum opera sua. Apoc. 22. 12.*

*Vide, quoniam ex operibus justificatur homo, & non ex fide tantum. Jac. 2. 24.*

*Sicut corpus sine spiritu mortuum est, ita & fides sine operibus mortua est. Jac. 2. 26.*

*Succide illam, ut quid etiam terram occupat? Luc. 13. 7.*

*Terra venientem super se bibens imbrem, proferens autem spinas ac tribulos reproba est, & maledicto proxima. Hebr. 6. 7. & 8.*

*Ergo, dum tempus habemus, operemur bonum. Gal. 6. 10.*

## MEDITATIO LXXIV.

### De Eleemosynâ.

**D**ives pendet à paupere. Et pauper pendet à divite. Dives magis indiget paupere, quàm pauper indigeat divite. Pauper vitam corporis à divite recipit. Dives à paupere recipit vitam animæ. Pauper pendet à divite pro



pro tempore. Dives pendet à paupere pro æternitate. Sine divite pauper morietur corpore. Sine paupere dives morietur animo. Dives, est Judex pauperis in terrâ. Pauper, erit Judex divitis in cælo.

Gratiæ, & poenæ sunt in manu pauperis. Quando pauper petit misericordiam, Deus eam indulget diviti. Quando pauper petit justitiam, Deus illam exercet in divitem. Actum est de Salute divitis, qaando non habet favorem pauperum. Nemo potest coram Deo defendere illum, quem famas pauperum accusat. Diem malam experietur, quisquis pauperes non habuerit patronos in novissimo die.

Benefac pauperi, quia homo est, sicut tu, & tu es miser, sicut ille. Ille indiget te, & tu indiges illo. JESUS recipiet eleemosynam tuam. Ille est constitutus in necessitate. Ille esurit in persona pauperis. Ille reconditus est sub formâ egeni. Ille ibi latet veluti in Sacramento. Pauperem suo loco substituit. In illum omne suum jus transtulit. Rationem accuratam exiget charitatis tuæ. Gratum se tibi exhibebit in fine mundi. Tûne JESUM ablegabis in stabulum? Tûne illi negabis vestem, quâ se contegat? Tûne recusabis ei porrigere frustillum panis, quo se nutriat?

Quamdiu opitularis pauperi, tamdiu non est, quòd paupertatem timeas. Nihil unquam tibi deerit, quamdiu non fines aliquid deesse pauperibus. Tu aurum seminas, quando pecunias tuas elargiris. Manus pauperum ager est, qui centuplum fructum reddit.

JE-



JESUS se constituit debitorem tuum ? Ille spondet pro paupere. Obligat se per contractum. Promittit tibi bona temporalia. Pollicetur tibi bona æterna. An tu Deo non fidas ? An opes tuas illi concreditas , censes malè elocatas ? An illi deest modus , tibi liberaliter retribuendi ?

O JESU ! quàm tenerè diligis pauperes , quia eorum conditionem assumpsisti. Quia pauper fuisti in terrâ , & quia pauper esse vis etiam in cælo. Tu sanè dives es in cælo : sed pauper etiam es in terrâ , quia lates in persona pauperum , & ipse cum illis eleemosynam rogas. Beatus dives , qui Christo JESU eleemosynam præbet. Maledictus dives , qui Christo JESU eleemosynam negat. Dives avarus eleemosynam in morte petet à Deo , quæ ipsi non concedetur. Petet gratiam in die Judicii , quæ illi negabitur.

### Verba S. Scripturæ.

*Peccata tua eleemosynis redime , & iniquitates tuas misericordiis pauperum.* Dan. 4. 24.

*Qui viderit fratrem suum necessitatem habere , & clauferit viscera sua ab eo , quomodo Charitas Dei manet in illo ?* 1. Joan. 3. 17.

*Ego præcipio tibi , ut aperias manum fratri tuo egeno , & pauperi.* Deut. 15. 11.

*Date , & dabitur vobis.* Luc. 6. 38.

*Beatus , qui intelligit super egenum & pauperem : in die malâ liberabit eum Dominus.* Ps. 40. 2.

*Venite*



*Venite benedicti Patris mei, possidete paratum vobis Regnum à constitutione mundi. Esurivi enim, & dedistis mihi manducare, sitivi & dedistis mihi bibere, &c. Matth. 25. 34. 35. & 36.*

## MEDITATIO LXXV.

*De Viâ rectâ, per quam Deus Iustum deducit.*

**V**iæ Dei sunt admirabiles. Sunt pulchræ. Sunt æquæ. Sunt rectæ. Sunt securæ. Sunt viæ gratiæ, quas natura non novit. Sunt viæ sapientiæ. Incomprehensibiles à ratione. Sunt viæ pacis, quæ mentes tranquillas reddunt. Sunt viæ amoris, quæ corda gaudio complent.

Deus laborat pro nobis, quando videtur esse contra nos. Appropinquat nobis, quando videtur à nobis recedere. Nostra gerit negotia, quando videtur ea evertere. Divites nos efficit, quando videtur nos exspoliare. Vitam nobis tribuit, quando videtur eam nobis eripere.

Ad pacem nos ducit per bellum. Ad perfectionem per imperfectionem. Ad gloriam per ignominiam. Ad thronum per carceres. Ad terram promissionis per desertum. Ad cælum per longum purgatorium.

O mi Deus! nescio, quam arripiam viam, quâ ad te perveniam. Quæ mihi videtur bona, potest esse mala. Dum arbitror, me cælum



lum conscendere , fortè descendo ad infernum. An per prosperitatem , an per adversitatem ? An per pacem , an per bellum ? An per gloriam , an per ignominiam ? An per abundantiam , an per indigentiam ? An per sanitatem , an per morbum potero ad te pervenire , & salutem meam consequi ?

Nemo est , nisi tu , qui hoc noveris. Non itaque volo , nisi quod tu vis. Totum me permitto Providentiæ tuæ. Rata habeo , quæcunque de me statueris. Progrediar , quocunque me duxeris. Acceptabo libens , quidquid mihi immiseris. Plenè conquiescam , quocunque in loco aut statu me collocaveris. Nunquam inde recedam , nisi tu me indè retraxeris.

Abstinebo deinceps ab omni liberâ electione , & propriam penitè exuam voluntatem , quia non novi , quid mihi prosit , aut oblit. Nihil deinceps ampliùs expetam. Nihil recusabo. Deduc me , & dirige me , mi Deus ! Totum me tibi permitto. Curam habe de me , quia in te unicè quiesco. Tu Pastor meus es , & ego sum ovis tua. Si te sequar , nunquam perturbabor. Si me tibi committam , nunquam damnabor.

### Verba S. Scripturæ.

*Iustum deduxit Dominus per vias rectas.*  
Sap. 10. 10.

*Via ejus viæ pulchræ , & omnes semitæ illius pacificæ.* Prov. 3. 17.



*Est via, quæ videtur homini justa: novissima autem ejus deducunt ad mortem. Prov. 14. 12.*

*Dominus mortificat, & vivificat, deducit ad inferos, & reducit. 1. Reg. 2. 6.*

*Exiit, nesciens quò iret. Hebr. 11. 8.*

*Notam fac mihi viam, in qua ambulem. Ps. 142. 8.*

*Sicut exaltantur cæli à terrâ, sic exaltatæ sunt viæ meæ, à viis vestris, & cogitationes meæ à cogitationibus vestris. Is. 55. 9.*

## MEDITATIO LXXVI.

*De Felicitate eorum, qui se Dei Directioni permittunt.*

**A**udi Deum sine ratiocinatione. Obedi Deo sine murmuratione. Sequere Deum sine deviatione. Permitte Deum operari, absque ullâ tuâ resistentiâ. Quiesce in Deo, absque perturbatione. Permitte te Deo, sine ullius rei desiderio.

Si eum audias, loquetur tibi. Si ei obedias, solatio te perfundet. Si eum sequaris, deducet te. Si eum operari sinas, omnia tibi prosperè succedent. Si in illo confidas, conservabit te. Si te illi ex integro committas, salvabit te.

O Veritas, Deus meus! Sapientia mea, & benedictio mea! ne permittas me sensui meo, & propriæ directioni meæ. Si te deseram, heu! sum perditus. Non sum, securus nisi tecum sim. Si ambulem, dirige me. Si  
aber-



aberrem, revoca me. Si in via hæream, stimula me. Si cadam, subleva me. Si lassescam, roboram me. Si infirmer, porta me. Si ab hostibus oppugner, defende me. Si perditus sim, quære me.

Sino me plenè dirigi à sapientiâ tuâ. Conquiesco in Bonitate tuâ. Innitor Fortitudini tuæ. Confido in Misericordiâ tuâ. Arctè inhæreo voluntati tuæ. Devoveo me obsequio tuo. Me totum committo Providentiæ tuæ nunc, & in æternum.

### Verba S. Scripturæ.

*Deduc me Domine in viâ tuâ.* Psal. 85. 11.

*Sub umbra alarum tuarum protege me.* Psal. 16. 8.

*Erravi sicut ovis, quæ periit : quære servum tuum.* Ps. 118. 176.

*Deduxit illos in via mirabili.* Sap. 10. 17.

## MEDITATIO LXXVII.

*De Infelicitate eorum, qui se subtrahunt Directioni Dei.*

**Q**ui recedit à semitâ bonitatis, intrat semitam justitiæ. Qui se avertit à via mansuetudinis, ingreditur viam rigoris. Qui non habet Deum amicum, habet illum inimicum. Qui fugit voluntatem bene facientis, incidit in voluntatem punientis.



Si illic sim, ubi Deus me esse vult, ero in quiete, & securitate. Sapientia ejus deducet me. Potentia ejus proteget me. Bonitas ejus solabitur me. Gratia ejus sanctificabit me. Benedictio ejus comitabitur me. Misericordia ejus circumdabit me.

Si non sim, ubi Deus me esse vult, omnes passus mei errores erunt. Omnes viæ meæ præcipitia erunt. Omnia consilia mea illusiones erunt. Omnes labores mei vanæ occupationes erunt. Omnes deliciae meæ miseriae erunt. Omnes prosperitates meæ castigationes erunt. Omnes adversitates meæ, causæ desperationis erunt.

Non habeo quietem in mente mea. Neque pacem in corde meo. Neque benedictionem in Laboribus meis. Neque consolationem in ærumnis meis. Præda sum concupiscentiis meis. Exercebor temptationibus. Destituar protectione tuâ. Percutiar maledictione tuâ. Vitam agam sceleribus infamem. Mortem expectare debeo pessimam. Vivam in perturbatione, & moriar in desperatione.

An eo jam in loco sum, in quo Deus me esse vult? An respondi vocationi meæ? An Deus hanc occupationem mihi injunxit? An sponte me ingessi in hoc officium? An Deus vult, ut in hoc statu & conditione sim? An ita obeo munus meum, sicut ipse vult?

O mi Deus! quàm timeo, ne aberrem à viis tuis. Quàm volupe mihi est, me totum permittere Providentiæ tuæ! An non hoc est morari in cælo, semper tecum versa-



ri? An non hoc est infernum incolere, à te semper exulare. An malè cum illo agitur, qui est, ubi tu eum vis esse? An bene cum illo agitur, qui non est, ubi tu eum vis esse? Non permitte mi Deus, ut me avertam à directione tua. Reduc me in viam rectam, si ab ea aberravi. Compelle me redire in viam veritatis tuæ, per rigidum mandatum justitiæ tuæ. Da, ut reparem per patientiam errorem actionis meæ. Da, ut recuperem innocentiam meam per rigores poenitentiae.

### *Verba S. Scripturæ.*

*Nunquid non istud factum est tibi, quia reliquisti Dominum Deum tuum eo tempore, quoducebat te per viam? Jer. 2. 17.*

*Quid tibi vis in via Ægypti, ut bibas aquam turbidam? Jer. 2. 18.*

*Arguet te malitia tua, & aversio tua increpabit te. Jerem. 2. 19.*

*Scito, & vide, quia malum & amarum est, reliquissè te Dominum Deum tuum. Jer. 2. 19.*

*Vide, si via iniquitatis in me est, & deduc me in viam æternam. Ps. 138. 24.*



## MEDITATIO LXXVIII.

*De Siccitatibus & Ariditatibus.*

**C**redo, quod video. Spero, quod tango,  
Amo, quod placet. Credo in lumine,  
spero in affectu sensibili. Amo in consolatio-  
ne. Ecce vitam sensuum!

Credo, quod non video. Spero, quod  
non attingo. Amo, quod displicet. Credo  
in tenebris. Spero in derelictione. Amo  
in desolatione. Ecce vitam spiritûs!

O mi Deus! quàm sensualis est devotio mea.  
Non te hactenus adoravi in spiritu. O felix  
status! ubi anima videt Deum sine lumine.  
Ubi sperat in Deo sine fulcro. Ubi amat De-  
um sine solatio sensibili. Hoc est videre De-  
um sine specie. Hoc est uniri Deo sine me-  
dio. Hoc est pati divina. Hoc est non am-  
plius habere substantiam propriam. Hoc est  
vitam agere supernaturalem. Hoc est regnum  
Jesu Christi.

### Verba S. Scripturæ.

*In tenebris stravi lectulum meum. Job. 17.*  
13.

*Non est Regnum DEI esca & potus, sed ju-  
stitia & pax, & gaudium in Spiritu sancto.*  
Rom. 14. 17.

*Ipsi dispergentur ad manducandum: si verò  
non fuerint saturati, murmurabunt. Ps. 58. 16.*



*Expedit vobis, ut ego vadam, si enim non abiero, Paraclitus non veniet ad vos. Joan.*

16. 7.

*Spiritus est Deus, & eos, qui adorant eum, in spiritu & veritate oportet adorare. Joan.*  
4. 24.

## MEDITATIO LXXIX.

### De Silentio.

**P**ulchra sanè sapientia est, nōsse bene loqui. Hanc nunquam addisces, nisi scias tacere. Bene loqui, & multum loqui, nunquam rectè conveniunt. Omnes discunt loqui, pauci discunt tacere. Interim tamen prima scientiarum est, nōsse tacere.

Exiguus subest sensus, ubi multa sunt verba. Homo sapiens parū loquitur, quia timet, ne malè loquatur. Longo tempore sibi ipsi loquitur, antequam loquatur aliis. Stultus semper garrit, quia nil cogitat, nisi de confabulatione. Totum se ad exteriora diffundit, quia non potest secum ipso morari. Deus ab omni æternitate servavit silentium, neque unquam hominibus locutus est, nisi ut illos instrueret, & salvaret.

Observa silentium, sicut Deus. Non loquere, nisi necessitas urgeat. Anima Deo plena non novit ampliùs homines alloqui. Qui multum loquitur cum hominibus, apertè monstrat, quòd Deo sit vacuus. Ut citò perfectus evadas, discce tacere. Qui Dominus

Est



est linguæ suæ, Dominus est cupiditatum suarum. Solitudo & silentium sunt geminæ scholæ virtutum. In solitudine & silentio Deus se cognoscendum præbet, & loquitur nobis ad cor.

Silentium promovet Orationem, & Oratione promovet silentium. Postquam Moyses locutus est Deo, non potuit ultrà loqui hominibus. Qui solatia quærit extra se, modicum consolationis invenit intra se. Spiritus sanctus amat silentium. Vox ejus est instar suavis zephyri, quæ nequit audiri, si vel levis tumultus exoriatur. Nunquam desere silentium, nisi propter aliquid melius. Non potes bene loqui sine gratiâ. Poterisne autem sperare à Deo gratiam, si loquaris eo tempore, quo Deus tibi prohibet loqui? Quilibet loquitur de re, quam amat. Lingua est interpretis cordis. Qui mundum amat, libenter loquitur de mundo. Qui Deum amat, libenter loquitur de Deo. Ex linguâ cognoscitur homo. Et per linguam judicabitur homo.

Mi Deus! largire mihi amorem tuum, ut libenter de te loquar. Reple me spiritu tuo, ut amem silentium. Nunquam ero Orationi deditus, quamdiu amabo confabulationes.

Loquere parùm. Loquere demissè. Loquere cum ratione. Loquere sine commotione. Non loquere, nisi ex necessitate. Non loquere unquam contra charitatem. Loquere cum sinceritate. Loquere cum simplicitate. Loquere sine affectatione. Loquere sine



vanitate. Loquere, quando loquendum est.  
Sile, quando silendum est.

## Verba S. Scripturæ.

*Si quis in verbo non offendit, hic perfectus est vir.* Jac. 3. 2.

*Si quis putat, se Religiosum esse, non refrænans linguam suam, hujus vana est Religio.* Jac. 1. 26.

*Ex quo locutus es ad servum tuum, impeditioris, & tardioris linguæ sum.* Exod. 4. 10.

*Ubi verba sunt plurima, ibi frequenter egestas.* Prov. 4. 23.

*In ore fatuorum cor illorum, & in corde sapientum os illorum.* Eccli. 2. 29.

*Sit omnis homo velox ad audiendum, tardus autem ad loquendum.* Iac. 1. 19.

## MEDITATIO LXXX.

### *De Morbis.*

**D**EUS morbos nobis immittit, vel ut inde educat suam gloriam, sicut cæco nato. Vel ut puniat nostra peccata, sicut Paralytico. Vel ut nos præbet, sicut Jobo. Vel ut nos contineat in humilitate, sicut Paulo & Timotheo.

Nihil in morbo possum agere: sed possum pati. Multum possum agere, si multum possum pati. Alii propter me laborant: ego autem



tem patior pro aliis. Illi Deum honorant per suas actiones: ego illum honoro per meam patientiam.

Bene meritus sum, quod patior. Multum promereor patiando. Satisfacio pro præteritis. Congrego in futurum. Deus tollit à me sanitatem, ut det mihi sanctitatem. Ille mecum est, & ego patior cum illo. Ego porto Crucem ejus, & ille portat meam.

O quàm validus est spiritus meus, quando corpus meum infirmum est. O quàm infirmus est spiritus meus, quando corpus meum validum est. Morbus vitæ hujus tedium mihi affert, unde cor meum non nisi ad cælum aspirat. Caro mea! tibi non minùs; quàm spiritui poena est subeunda, & purgatorium tolerandum. Quòd si purgatorium non patiaris in terra, patieris illud in inferno: nihil enim coinquinatum intrabit in Cælum. Non est alius locus, nisi terra, & infernus, in quo corpus purgari possit. Gaude anima mea! hostis tuus depressus jacet, jam non est eo in statu, in quo tibi possit nocere.

O mi Deus! mereor equidem morbis obui, quia toties sanitate meâ abusus sum. O quantum tibi sum obligatus, quod mihi hunc morbum immiseris! quia si mihi non parces in tempore, parces mihi in æternitate. Quia me castigas in vitâ, propitius mihi eris in morte. O quàm gaudeo, quòd corpus meum tibi consecrare possim in victimam amoris, & patientiæ! Nullum est sacrificium ma-



gis acceptabile oculis tuis, quàm sacrifici-  
um amoris patientis, & patientiæ amantis.

## Verba S. Scripturæ.

*Infirmitas hæc non est ad mortem: sed per  
gloriam Dei, ut glorificetur Filius Dei per eam*  
Joan. 11. 4.

*Ecce sanus factus es: jam noli peccare, ne  
deterius tibi aliquid contingat.* Joan. 5. 14.

*Cùm infirmor, tunc potens sum.* 2. Cor.  
12. 10.

*Fili! in tua infirmitate, ne despicias te-  
ipsum, sed ora Dominum, & ipse curabit te.*  
Eccli. 38. 9.

## MEDITATIO LXXXI.

### *De Modestiâ.*

**E**X vultu cognoscitur homo. Anima co-  
gnoscitur per corpus, quod est, veluti  
speculum, animam repræsentans, in quo  
ipsa ad vivum exprimitur. Corpus leve in-  
dicat animam levem. Corpus modestum in-  
dicat animam modestam. Corpus non ope-  
ratur nisi per animam, nec facit quidquam,  
nisi quod anima in ipso operatur. Quando  
corpus est dissolutum, judicatur, quod  
mens quoque sit dissoluta. Quam speciem  
habebit anima, quæ deformem adeò figu-  
ram tribuit corpori immodesto?



Decens morum compositio & modestia exterior est signum animæ perfectæ. Animæ tendentis ad unionem cum Deo. Animæ perturbationibus liberæ. Deus habitat in mente tranquillâ, quæ nunquam turbatur. Deus non moratur nisi in pace. Componit omnia per suam præsentiam. Imprimit suam modestiam animæ, quam amat. Quòd si illam non imprimat, rectè arguitur, quòd anima illi non promptè obediat.

Quando video corpus modestum, exclamo: Ecce hîc est domus Dei! Ecce templum Domini; Omnia hîc sicut in pace, & bene ordinata. Modestia hujus animæ resplendet ex ejus corpore. Sanctitas interior per rectam morum compositionem se prodit exterius.

Modestia affectata non potest diu perdurare. Quando anima est bene composita, corpus semper est modestum. Gestus corporis parùm compositi oriuntur ex immoderatione animæ. Ejusmodi anima agitur cupiditatibus. Cedit tentationibus. Succumbit suis sollicitudinibus. Permittit se abripi suis desideriis, minùs ordinatis. Qui Deum intra se habet, non quærit eum alibi extra se. Ferrum est in quiete, cùm magneti adhæret. Anima, quæ Deo intimè conjuncta est, quæta permanet absque commotione.

O mi Deus! Quàm tranquillus est spiritus tuus, & quàm meus est miserè perturbatus! Quàm gravis est spiritus tuus, quàm levis est meus! Quàm modestus est spiritus tuus, quàm effrænîs est meus. Si tu esses Dominus



cordis mei, utique & corporis mei Dominus fores. Si morum curam non habeam, dæmon facile mentem expugnabit. Volo itaque ad Modestiae leges oculos, aures, linguam, manus, gressus, & omnia exteriora mea componere, ut tibi legitimo Domino integrum conservem cordis mei imperium.

### Verba S. Scripturæ.

*Ex visu cognoscitur vir & ab occurſu faciei cognoscitur ſenſatus: amictus corporis, & riſus dentium, & ingreſſus hominis enuntiant de illo. Eccli. 19. 26. & 27.*

*Modestia veſtra nota ſit omnibus hominibus. Phil. 4. 5.*

*Quæ deſurſum eſt, ſapientia pacifica eſt, & modeſta. Jac. 3. 17.*

*Qui abſconditus eſt cordis homo, in incorruptibilitate quieti, & modeſti ſpiritus, qui eſt in conſpectu Dei locuples. 1. Petr. 3. 4.*

*Obſecro vos per manſuetudinem & modeſtiam Chriſti. 2. Cor. 10. 1.*

*Induite vos, ſicut electi Dei, humilitatem, modeſtiam, patientiam. Col. 3. 12.*

## MEDITATIO LXXXII.

### De Inspirationibus Divinis.

**D**EUS tacet, poſtquam fuit locutus. Contemnit, poſtquam fuit contemptus. Abſcondit ſe, poſtquam quæſivit. Recedit, poſt-



postquam vocavit. Punit, postquam diu sustinuit.

Inspiratio est vox Dei. Est spiritus oris ejus. Est radius sapientiæ ejus. Est impressio amoris ejus. Est semen æternitatis. Est principium salutis. Est pretium sanguinis Jesu. Est gratia, vitæ ejus dispendio nobis comparata.

Suffocas vocem Dei, quando negligis ejus inspirationem. Imitaris Herodem, qui decollari jussit sanctum Joannem. Imitaris Saulum, qui interfecit Sacerdotes. Imitaris Judæos, qui occiderunt Jesum, & Prophetas.

Resistis Spiritui sancto. Peccas sine ignorantia. Peccas per obstinationem. Peccas per malitiam. Desodis talenta Dei, Abuteris ejus donis. Filium ejus pedibus conculcas. Spiritum ejus injuriâ afficis. Profanas pretiosum ejus sanguinem. Veritatem captivam detines. Abrumpis filum, ac seriem gratiarum ejus. Salutem tuam periculo exponis.

Justitia Dei fulminat contra te. Auffertur à te talentum, tibi commissum. Aliò transferetur Regnum gratiæ. Deus nunquam tibi ultrà loquetur. Spiritus sanctus nunquam te ampliùs afflabit. Verbum Dei nunquam tibi ultrà insonabit. Conscientia non te monebit. Spes non te animabit. Charitas te non inflammabit. Timor te non retinebit. Remedia tibi non proderunt ampliùs. Abuteris gratiis extraordinariis, quarum copiam deinceps non habebis.



O mi Deus! Confiteor, quòd sim prodigius, quia dissipavit omnia bona tua. Quòd sim Herodes, quia obmutescere feci vocem tuam. Ah! nolo deinceps expectationem tuam frustrare. Nolo ultrà resistere gratiæ tuæ. Nimis longo jam tempore pulsas portam cordis mei. Hodie adhuc omnem tibi aditum pandam.

Vis, ut deferam hæc, aut illa peccata? Deferam. Vis, ut mutem in melius vitam meam? Mutabo. Vis, ut renunciem lusui? Renunciabo. Vis, ut benignè alloquar inimicum meum? Benignè alloquar. Vis, ut frequentem Sacramenta? frequentabo, Vis, ut te unicè amem? Amabo te nunc, & in æternum? Amen.

### Verba S. Scripturæ.

*Væ! qui spernis: nōne & ipse sperneris?*  
II. 33. 1.

*Vocavi, & renuistis, extendi manum meam, & non fuit, qui aspiceret. Despexistis omne consilium meum, & increpationes meas neglexistis, & ego in interitu vestro ridebo, & subsannabo, cum vobis id, quod timebatis, advenerit.* Prov. 1. 24. 25. & 26.

*Ego vado, & quæretis me, & in peccato vestro moriemini.* Joan. 8. 21.

*Spiritum nolite extinguere.* 1. Theff. 5. 19.  
*Hodie si vocem ejus audieritis, nolite obdurare corda vestra.* Plal. 94. 8.



**MEDITATIO LXXXIII.***De Verbo DEI.*

**D**EUS verbo suo mundum condidit. Non vult salvare mundum, nisi per Verbum suum. Redemit mundum per suum Verbum incarnatum. Nec salvabit mundum, nisi per verbum suum Annuntiatum. Spiritus sanctus productus est in mente Dei per interius Verbum suum. Spiritus sanctus non producit in corde hominis, nisi per Verbum exterius. Non es ovis Jesu Christi, nisi audias vocem ejus. Cor tuum non producet nisi spinas, si non recipiat semen Verbi Divini.

JESUS loquitur per os Concionatoris. Ille tonat in ejus lingua. Ille procedit indutus sono vocis ejus, sicut prodiit indutus corpore carnis nostræ. Verbum Dei scriptum in libris, est Sacramentum salutis. Litera est species. Jesus est sensus. Verbum Increatum unit se verbo Creato, ut se insinuet in cor nostrum, atque illud sanctificet. Quanta impietas, contemnere hoc Sacramentum! Quantum scelus, conculcare pedibus Filium Dei!

Heu! quoties tantam impietatem commisi? Permitto Dei Verbum in terram decidere. Suffoco illud in corde meo. Vescor hoc pane cælesti, nec ullum inde fructum capio. Audio Verbum Divinum, neque illi mores meos conformo. Nisi verbum DEI me con-

ver.



vertat, certò me pervertet. Nisi me bonum reddat, malum me efficiet. Nisi vitam mihi tribuat, mortem mihi afferet. Nisi me salvet, condemnabit me.

## Verba S. Scripturæ.

*Beatus venter, qui te portavit &c. quin imò beati, qui audiunt Verbum Dei, & custodiunt illud. Luc. 11. 28.*

*Qui declinat aures suas, ne audiat legem, oratio ejus est execrabilis. Prov. 28. 9.*

*Non in solo pane vivit homo, sed in omni Verbo, quod procedit de ore Dei. Matth. 4. 4.*

*Videte, ne recussetis loquentem. Hebr. 12. 25.*

*Semen est Verbum DEI. Luc. 8. 11.*

## MEDITATIO LXXXIV.

### De Felicitate Statûs Religiosi.

**R**eligio est paradisus, ubi semper Deus videtur. Ubi semper auditur ejus vox. Ubi semper vivitur in ejus præsentia. Ubi semper frui licet ejus familiari consortio. Ubi semper adimpletur ejus voluntas. Ubi semper ejus laudes concinnuntur. Ubi rarò caditur. Leviter peccatur. Promptè resurgitur. Merita indefinenter cumulantur. Mors est suavior. Salus securior.

O quàm grave est jugum mundi! O quàm molestæ sunt cruces ejus! O quàm amarus est



est calix ejus ! O quàm pungentes sunt spinæ ejus ! O quàm pestifera sunt exempla. O quàm periculosa est ejus conversatio ! O quàm tyrannicæ sunt leges ejus. O quàm perniciosæ sunt doctrinæ ejus ! O quàm foedæ sunt delectationes ejus ! O quàm falsa, & imaginaria sunt bona ejus ! O infelices Ægypti cepæ ! Vos lacrimas elicitis ex oculis illorum, qui vos manducant. Plorare facitis illos, qui vos amant.

### Verba S. Scripturæ.

*Abstulit, sicut oves populum suum, & perduxit eos tanquam gregem in deserto. Psalm. 77. 52.*

*Non sunt recordati manûs ejus, die, quâ redemit eos de manu tribulantis. Psal. 77. 42.*

*Quâm dilecta Tabernacula tua, Domine virtutum ! concupiscit, & deficit anima mea in atria Domini. Psalm. 83. 2. & 3.*

*Elegi abjectus esse in Domo DEI magis, quàm habitare in tabernaculis peccatorum. Ps. 83. 11.*

*Melior est dies una in atriis suis super milia. Ibid.*

*Omnis, qui reliquerit domum, vel fratres, aut sorores, aut Patrem, aut Matrem, aut uxorem, aut filios, aut agros propter Nomen meum, centuplum accipiet & vitam æternam possidebit. Matth. 19. 29.*

*Amen dico vobis : Nemo est, qui reliquerit domum, aut fratres, aut sorores, aut Patrem, aut Matrem, aut filios, aut agros propter me,*  
E



*Et propter Evangelium, qui non accipiat centies, tantum nunc in tempore hoc cum persecutionibus, Et in sæculo futuro vitam æternam. Marc. 10. 29. & 30.*

*Amen dico vobis: Nemo est, qui reliquerit domum, aut parentes, aut fratres, propter Regnum DEI, Et non accipiat multò plura in hoc tempore, Et in sæculo venturo vitam æternam. Luc. 18. 29. & 30.*

## MEDITATIO LXXXV.

### *De Paupertate.*

**P**AUPER spiritu nulli rei creatæ adhæret. Pauper corde nihil desiderat. Contentus est necessariis. Quin & necessariis quandoque carere appetit. Pauperi contento parùm deest. Diviti avaro desunt plurima. Modicum sufficit necessitati. Nihil sufficit cupiditati.

O quàm dives est, qui Deum possidet! O quàm pauper est, qui Deum perdidit! Quàm beatus est, qui non quærit, nisi Deum! Quàm avarus est, qui Deo contentus non est! Deus replet cor vacuum. Universum hoc stabilitur in nihilo. Habebis omnia, si nihil desideres. Reperies omnia, si nihil habueris.

O mi Salvator! Quàm dives hæreditas est Paupertas! Quàm liberalis es in illos, qui omnia deseruere? Potestne quis nasci pauperior, quàm tu sis natus? Potestne quis vivere



vere pauperior, quàm tu vixeris? Potestne quis mori pauperior, quàm tu sis mortuus? Tu dives eras, & omnium egenus factus es. Ego pauper sum, & appeto ditari. Tu habes omnia, & voluisti tibi deesse omnia. Ego nihil habeo, & nolo mihi quidquam deesse. Iniquissimum sanè est, ut mancipium commodius vivat & pluribus abundet, quàm Dominus.

## Verba S. Scripturæ.

*Noli timere, fili mi! pauperem quidem vitam gerimus, sed multa bona habebimus, si timuerimus Deum. Tob. 4. 23.*

*Beati pauperes spiritu, quoniam ipsorum est Regnum cælorum. Matth. 5. 3.*

*Si vis perfectus esse, vade, vende omnia, quæ habes, & da pauperibus, & habebis thesaurum in cælo. Matth. 19. 21.*

*Nihil intulimus in hunc mundum: haud dubium, quòd nec auferre quid possumus. 1. Tim. 6. 7.*

## MEDITATIO LXXXVI.

### De Castitate.

**J**ESUS amat Virgines. JESUS elegit Matrem Virginem. JESUS tenerè amavit Discipulum Virginem. JESUM in cælo sequuntur Virgines.

M

Plus



Plus sum quàm Angelus, si Virgo sim. Deo  
 confimilis sum, si Virgo sim. Sponsa sum  
 Jesu Christi, si Virgo sim. Aureolâ corona-  
 bor in cælo, si Virgo sim. Potius præ aliis  
 jus habeo resurgendi à mortuis, si Virgo sim.

Virginitas est pretiosus thesaurus, sed con-  
 servatu difficilis. Humilem te oportet esse,  
 ut castus sis. Deus humiliat superbos. Labi  
 eos permittit in peccata infamia. Spiritum  
 punit per carnem. Opprobrio & confusione  
 operit illos, qui non habent sanctam animi  
 demissionem.

Non potest imperare, qui non novit obe-  
 dire. Non potest esse Dominus, qui non di-  
 dicit esse servus. Caro obedit spiritui obedi-  
 enti. Caro se submittit spiritui sancto. Ca-  
 ro rebellat contra spiritum rebellem. Qui  
 non obedit suo superiori, perdit imperium,  
 quod habet in suum subditum. Qui non in  
 officio cohibet sensus suos, evadit mancipi-  
 um corporis sui. Vigila super te ipsum, &  
 ora. Fuge occasiones, aut peribis.

O mi Deus! Quàm timeo superbiam, quia  
 demergit in cœnum luxuriæ. Quam amo  
 humilitatem, quia conservat innocentiam.  
 Humilis ero, ut sim castus. Obediam supe-  
 rioribus meis, ut & mihi obediant sensus  
 mei, & appetitus subjiciatur Rationi. Per-  
 mitte me potius Castissime JESU, præcipi-  
 tari in infernum, quàm labi in obsecrinitatem.



## Verba S. Scripturæ.

*Discipulus . quem diligebat JESUS. Joan.*  
13. 23.

*Hi sunt , qui cum mulieribus non sunt coinquinati , Virgines enim sunt : Hi sequuntur Agnum , quocunque ierit. Apoc. 14. 4.*

*Incorruptio facit esse proximum Deo. Sap.*  
6. 20.

*In resurrectione neque nubent , neque nubentur , sederunt sicut Angeli Dei in Cælo. Matth.*  
22. 30.

*Propter quod tradidit illos Deus in desideria cordis illorum , in immunditiam , ut contumeliis afficiant corpora sua in semetipsis. Rom.*  
1. 24.

*Propterea tradidit illos Deus in passionem ignominie. Ibid. 26.*

## MEDITATIO LXXXVII.

## De Obedientia.

**Q**Uàm beatus est homo obediens ! Exequitur semper , quod Deus vult. Est quodammodo impeccabilis. Possidet omnes virtutes. Triumphat de omnibus vitiis.

Heu ! quàm miser est , subditus rebellis ! Quàm impius est , & vitiosus. Multum laborat , & nihil lucratur. Tentatur fortiter , & tentationi succumbit. Impugnat Dei voluntatem , & Deus oppugnat voluntatem ejus.



Avertit se à directione Bonitatis Divinæ, atque incidit in potestatem justitiæ Divinæ. Non vult flecti, & Deus frangit ejus obstinationem. Non vult obedire Deo, & Deus se opponit inclinationi ejus. Perdit imperium, quod habebat in corpus suum, quia recusat Deo subijcere mentem suam. Non præstatur illi obedientia à suis subditis, quia ipse non obedit superioribus suis.

O anima Christiana, & Religiosa! agnosce, & adora JESUM in omnibus suis imaginibus, sive ligneis, sive testaceis, sive aureis, sive argenteis. Accipe cum reverentia mandata Dei, sive ea intelligas ex Amos, sive ex Isaiâ, sive ex ore Rustici, sive ex ore Aulici. Obedi Superioribus tuis. Obedi in omnibus, ubi non est peccatum. Obedi ex toto corde. Obedi ex tota mente. Obedi libenter, ac celeriter. Obedi simpliciter. Obedi humiliter, fortiter, constanter, hilariter. Obedi denique cæco modo. Imitare JESUM obedientem usque ad mortem crucis. Illius exemplo potius vitam perde, quàm obedientiam.

### Verba S. Scripturæ.

*Nunquid vult Dominus holocausta & victimas, & non potius, ut obediatur ei? Melior est obedientia, quàm victima. 1. Reg. 15. 22.*

*Quasi peccatum ariolandi est, repugnare, & quasi scelus idololatriæ, nolle acquiescere. 1. Reg. 15. 23.*

*Vir obediens loquetur victorias. Prov. 21.*



*Qui resistit potestati, Dei ordinationi resistit. Rom. 13. 2.*

*Obedite Præpositis vestris, & subjacete eis: ipsi enim pervigilant quasi rationem pro animabus vestris reddituri, ut cum gaudio hoc faciant, & non gementes. Hebr. 13. 17.*

## MEDITATIO LXXXVIII.

### *De Disciplinâ Religiosâ.*

**S**I Religio est ædificium, Regulæ sunt fundamentum. Si Religio est corpus, Regulæ sunt nervi. Si Religio est Arx, Regulæ sunt muri. Si Religio est locus sanctus, Regulæ sunt claustra.

Neutiquam es Religiosus, nisi Regulas observes. Quas, si dimidiâ tantum ex parte observes, Religiosus tantum dimidiatus es. Quin potius nullo modo Religiosus es. Sicut non potest esse verus Christianus, qui non in omnibus est fidelis. Nisi Regulas observes, nunquam perfectus eris. Sanguis in membra defluit per venas, & gratiæ Divinæ in nos derivantur per Regulas. Quot violas regulas, tot perdis gratias. Non possunt canales hi sanctioris vitæ truncari, sine mortis periculo. Absque Regulis religionis, nemo potest pertingere ad perfectionem. Observa leges Naturæ, & eris perfectus homo. Observa Leges Gratiae, & eris perfectus Christianus. Observa Leges tui Ordinis, & eris perfectus Religiosus. Nulla Regula tam est minuta,



quæ non habeat gratias salutis. Quæ non habeat omnem authoritatem Dei. Quæ non habeat directionem sapientiæ Divinæ. Quæ non habeat assistentiam Potentiæ Divinæ. Quæ non habeat sigillum bonitatis Divinæ. Quæ non habeat characterem sanctitatis Divinæ.

Si Regulas non observes, Virtutes tuæ sunt illusiones. Pietatis tuæ exercitia à Regula deflectentia sunt magni passus à rectâ semitâ deerrantes. Quibus à perfectione recedis potius, quàm ut illi appropinques. Spiritus singularitatis est principium hæresum. Est pestis Religionis. Est inimicus humilitatis. Est ruina communitalis. Illius pietas est schismatica. Divisio est Hæretica. Sensus illius sunt arrogantes. Ejus Exempla sunt plena offensionis.

Qui non vivit ex præscripto Ordinis, malè tractatur à Principe Ordinis. Qui se à communitate sejungit, perdit gratias communitatis. Si non sis membrum corporis, neque partem habebis de vitâ corporis. Membra uniuntur per Regulas. Si abrumpas hæc gratiarum vincula, inter mortuos es reputandus.

Nisi vitam instituas juxta leges Ordinis, nunquam vives in pace, Regulæ tuæ sunt munimenta & propugnacula exteriora, quæ te contegant, & defendant. Hæc propugnacula si deseras, periculum incurris, te perdendi. Sine gratia vocationis nemo potest vivere in Religione. Hæc autem gratia est affixa Regulis, per quas, veluti per canales  
ad



ad nos derivatur. Quisquis tollit hoc commercium, accersit sibi infinitatem malorum.

Regula, quam violas, videtur modica: sed damnum inde emergens, immensum est. Leves ejusmodi infidelitates disponunt te ad graves. Qui in modico infidelis est, nec in majori fidelis erit. Quomodo adimplebis res difficiles, si faciliores non exequaris? Labes, quantumvis modica, rumpit clausuram Religiosam. Effrænatio hæc modica producet majorem. Causa erit, ut nascantur gravissimæ tentationes. Ingressum aperiet dæmoni. Vulpes parvulæ demoliantur vineam.

Regula hæc, inquis, est minima. Ergo facilius est observatu. Iniquè ergò agis, si illam violas. Stetit illa multis lacrymis Fundatori, qui eam legem sancivit. Magni æstimaanda est gratia, quæ carò stetit illi, qui eam largitur. Parva sæpè scintilla contempta, magnum excitavit incendium. Per ruinam modicam Arx expugnatur. Parva sæpè rima causa est, ut maxima quæque navigia submergantur.

In Dei obsequio omnia sunt magna. Dei voluntas pondus addit omnibus, quæ præcipit. Deus has Regulas dictavit. Deus has Leges tibi præscribit. Omnes sunt munitæ authoritate Divinâ. Deus omnia dirigit ad suum finem. Omnes Creaturas inclinat ad centrum illis præfixum. Inanimatas per innatum pondus, aut levitatem. Rationabiles per suas Leges. Si custodias Ordinem, custodiet te. Si perturbes, perturbabit te. Si destruas, destruet te.



O Anima Christiana, & Religiosa! Ne turbes pacem Fratrum tuorum. Ne suffodias fundamenta Ordinis tui. Ne destruas fulcimenta Religionis tuæ. Ne perdas gratiam Vocationis tuæ. Ne discerpas viscera matris tuæ. Ne affligas cor Patris tui. Spiritus ejus est in Regulis ejus, quas si violes, ipsum offendis. Quas si negligas, ipsum contemnis. Æstimas illum, ut imprudentem, quia reijcis ejus gubernationem. Videris illum habere, ut tyrannum, quasi imperet tibi, quæ observari non possint.

An ideo Religioni te mancipasti, ut viveres sine Ordine & sine Religione? Per Leges conservantur status. Regulæ tuentur Communitatem. Violare Regulam per contemptum, est peccatum consequentiæ. Potestne quis sæpè, ac liberè Regulam transgredi, quin eam contemnat? Potestne quis ardentè desiderare perfectionem, qui non vult evitare etiam minimam imperfectionem?

O mi Deus! Quantopere reus sum, qui in terrâ Sanctorum iniqua gessi? circumfero habitum Religiosi, sed spiritum Religionis non habeo. Versor in loco sacro, cum corde, & spiritu profano. Sum pestis mei Ordinis. Sum opprobrium meæ Religionis. Offendiculo sum Fratribus meis. Afflictio sum matris meæ. Gravis sum Fundatori meo. Transfuga sum legum ejus. Homo sum sine disciplinâ. Religiosus sum sine Religione.

O bone Pastor! Insequere me. Reduc ovem tuam errabundam ad ovile tuum. Si

Lu-



Lupus eam seorsim vagantem reperiat, heu !  
devorabit eam. Ah ! volo deinceps sequi te.  
Volo obedire Legibus tuis. Volo satisfacere  
omnibus obligationibus meis. Volo deinceps  
in Ordine, & secundum Ordinem vivere. Ha-  
bere Regulas, & eas non observare, est ap-  
parere Religiosum, & non esse.

### Verba S. Scripturæ.

*Custodi legem, atque consilium, & erit vi-  
ta animæ tuæ. Proverb. 3. 21. & 22.*

*Si diligitis me, mandata mea servate. Jo-  
an. 14. 15.*

*Qui fidelis est in minimo, & in majori fi-  
delis est, & qui in modico iniquus est, & in  
majori iniquus est. Luc. 16. 10.*

*Qui spernit modica, paulatim decidet. Ec-  
cli. 19. 1.*

*Afflixerunt spiritum Sancti ejus. II. 63. 10.*

*Omnibus odiosus, ut refuga legum, & exe-  
crabilis, ut Patriæ, & civium hostis. 2. Ma-  
chab. 5. 8.*

*Magna sunt Judicia tua Domine, & ine-  
narrabilia verba tua: Propter hoc indiscipli-  
natæ animæ erraverunt. Sap. 17. 1.*







# TERTIA PARS MEDITATIONUM.

De præcipuis Myſteriis, Vitæ ac  
Mortis Filii DEI & ſanctiſſimæ Matris  
ejus.

## MEDITATIO LXXXIX.

*De Imitatione JESU Chriſti.*

**Q**UOD JESUS dixit oportet credere.  
Ergo pariter, quod Jeſus fecit, oportet facere. Doctrina Chriſti eſt Regula Fidei noſtræ. Exemplum Chriſti eſt Regula vitæ noſtræ. Infallibilis eſt in verbis ſuis. Impeccabilis eſt in actionibus ſuis. Hæreticus ſum intellectu, niſi credam, quæ ipſe dixit. Hæreticus ſum voluntate, niſi faciam, quæ ipſe fecit.

Perfectus ero, ſi Chriſto evadam ſimilis.  
Deo in amoribus ero, ſi Chriſto evadam ſimilis.



milis. Amabo Deum, si Christo me similem efficiam. Salvus ero, si Christo evadam similis.

O quantus honor, esse similem Deo. Vivere sicut Deus. Loqui sicut Deus. Agere, pati, & mori, sicut Deus!

Inspice vitam tuam & quære ex te ipso: Itane locutus est Jesus? Itane operatus est Jesus? Itane passus est Jesus?

Fratres mei! induimini Dominum nostrum Jesum Christum, qui sit, veluti habitus, corpus & animam vestiens.

## Verba S. Scripturæ.

*Inspice, & fac secundum exemplar, quod tibi in monte monstratum est. Exod. 25. 40.*

*Quos prædestinavit conformes fieri imagini Filii sui. Rom. 8. 29.*

*Qui dicit, se in ipso manere, debet, sicut ille ambulavit, & ipse ambulare. 1. Joan. 2. 6.*

*Exemplum dedi vobis, ut, quemadmodum ego feci, ita & vos faciatis. Joan. 13. 15*

## MEDITATIO XC.

*De Virtutibus JESU, comparatis cum vitiis nostris.*

JESUS pauper erat, & ego sum dives. Jesus humilis erat, & ego sum superbus. Jesus mitis erat, & ego sum iracundus. Jesus



sus patiens erat, & ego adversi nihil volo sustinere.

Jesus veniam dedit inimicis, & ego ultionem spiro. Jesus obedivit, & ego imperare volo. Jesus fuit odio habitus, & ego ab omnibus amari desidero. Jesus fuit ludibrio habitus, & ego ab omnibus appeto honorari. Jesus fuit absconditus, & ego amo publicos plausus, & acclamationes. Jesus cælum conscendit per dolores, & ego cælum consequi volo per delicias. An æquum est, ut mancipium mitius habeatur, quàm Filius? Reus, quàm Innocens?

O quàm justè timeo, ne sim inter reprobos, cùm adeò sim dissimilis Capiti Prædestinatorum.

### Verba S. Scripturæ.

*Nunquid est cor tuum rectum sicut cor meum, 4. Reg. 10. 15.*

*Non est Discipulus super Magistrum, nec servus super Dominum suum. Matth. 10. 24.*

*Factus est nobis sapientia à Deo, & justitia, & sanctificatio, & redemptio. 1. Cor. 1. 30.*

*Ego sum via, veritas, & vita. Joan. 14. 6.*



## MEDITATIO XCI.

### *De Nativitate JESU Christi.*

**N**unquam Deum se majorem exhibuit, quam, cum factus est parvus. Nunquam potentior apparuit, quam cum factus est infirmus. Nunquam amabilior visus est, quam cum se reddidit miserabilem.

Quando Deum video factum esse Filium hominis, agnosco, quod homo possit evadere filius Dei. Quando Deum video abjectum in stabulo, agnosco, quod necessarium sit, se humiliare. Quando Deum video in paleis, agnosco, quod omnis mundi magnificentia non sit, nisi fimus, & lutum. Quando Deum video plorantem, agnosco necessitatem mihi incumbere patiendi.

Omnis Sapiencia Dei conclusa est in hoc Parvulo. Omnes ejus actiones sunt Regulae sapientiae. Omnes ejus vagitus sunt lectiones sapientiae. Omnes ejus lacrymae sunt declarationes sapientiae. Stabulum ejus est schola sapientiae. Praesepe ejus est thronus sapientiae. Silentium ejus est vox sapientiae. Somnus ejus est extasis sapientiae.

Aut JESU errat, aut mundus fallitur. An huic, an illi fidem tribues? Nativitas JESU est reprobatio mundi. JESUS damnavit omnia, quae in Nativitate sua rejecit. Nisi similis evadam huic Parvulo, nunquam salvus ero.



## Verba S. Scripturæ.

*Evangelizo vobis gaudium magnum, quod erit omni populo, quia natus est vobis hodie Salvator mundi. Luc. 2. 10.*

*Pannis eum involvit, & reclinavit eum in præsepio. Luc. 2. 7.*

*Puer natus est nobis, & Filius datus est nobis. Il. 9. 6.*

*Transeamus usque Bethleem, & videamus hoc Verbum, quod factum est. Luc. 2. 15.*

*Verbum Caro factum est, & habitavit in nobis. Joan. 1. 14.*

## MEDITATIO XCII.

*Affectus teneri erga Puerum JESUM.*

**O** DEUS Sapientiæ! Qui elegisti stabulum in palatium Majestatis tuæ. Qui elegisti præsepe in thronum gloriæ tuæ. Ubi me abscondam in tuâ præsentia? An non meritò erubescat superbus, si videat Deum in fimeto? Quanta est insolentia, terræ vermiculum etiamnum velle in altum extolli? An tu mi JESU erras? An fallitur mundus? Sapientia DEI num potest decipi?

O Deus bonitatis! quantum abscondisti majestatem tuam! At quantum fecisti elucere misericordiam tuam! Nunquam magis te reddidisti amabilem, quam cum te exhibuisti miserabilem. Nunquam clariùs resplenduit bonitas tua, quam cum annihilata vide-

ba-



batur Majestas tua. Timebam te ante hac, ut Deum; jam verò cogor te amare, ut hominem. Quis enim posset timere hunc parvulum? Quem non amore succendant calentes Jesuli lacrimæ? Ploratus tui ad compassionem me movent, & non timore concutunt. Ad spem me animant, & non ad diffidentiam impellunt. Si potuisti te facere filium hominis, an non me potes efficere filium Dei? Si potuisti, te reddere miserabilem, an non poteris me beatum efficere?

O Divine Parvule! O Amor omnium sæculorum! O Desiderium Paradisi! quando te audio gementem ac suspirantem, non possum non tui amore colliquescere. Restiti, heu! nimis diu potentiae tuæ. At nunc cedo infirmitati tuæ. Contempsisti Majestatem tuam; At nunc me subicio humilitati tuæ. Oppugnavi te, ut Deum; Jam verò ut homo triumphas de corde meo. Opposui me furori tuo? jam verò non possum resistere amorì tuo.

O Rex maxime, & potentissime! quàm attonitum me reddit Majestas tua? Sed in quantam admirationem me rapit humilitas tua? Quàm admirabilis es, ut Deus? Sed quàm amabilis es, ut homo? Majori stupore abripior, cum video te humiliatum, quàm cum te video exaltatum. Cum audio te plorantem, quàm cum te audio tonantem, & fulminantem. Unica solum à te profusa lacrimula majus in corde meo accendit amoris incendium, quàm flammæ omnes montis Sinai. Postquam assumpsisti mala mea, spero quòd largiturus mihi sis bona tua. Postquam descendisti in

ter-



terram, spero quòd me sis sublevaturus in cælum.

O charissime Fili Mariæ! Veni intra brachia mea. Requiesce supra cor meum. Irriga me lacrimis tuis. Inflamma me amore tuo. Benedic mihi parvulis manibus tuis. Osculare me suavissimis labellis tuis. Obliviscor jam mei, quia tu videris oblitus tui. Si debitam tibi reverentiam non exhibeam, adscribes id amoris tuo. Redde te minùs amabilem, si non vis tenerè amari. Quando te videbo sedentem in throno, sacro horrore consternabor. Sed quando te contemplabor in præsepi vagientem, amabo te ex toto corde meo. Appropinquabo tibi sine ullo timore. Amabo te sine diffidentia. Serviam tibi sine tædio. Totum me tibi donabo sine exceptione. Benedicam te sine remissione. Laudabo te sine intermissione. Gratias tibi agam nunc & in æternum, Amen.

## MEDITATIO XCIII.

### *De Paupertate JESU Christi.*

**J**ESUS factus est pauper, ut nos ditaret. **J**E-  
sus natus est nudus, ut nos vestiret. **J**E-  
sus descendit in fimetum, ut nos sublevaret  
in thronum. **J**ESUS contempsit divitias, ut  
nos doceret eas contemnere.

Comparete, O mundani! domus vestras  
cum ejus stabulo. Lectos vestros cum ejus  
præsepi. Plumas vestras cum ejus stramine.

Ve-



Vestres vestras cum laceris ejus panniculis.  
Luxum vestrum cum ejus nuditate.

Jesus pauper est, & vos abundatis divitiis.  
Jesus moratur in stabulo, & vos habitatis in  
palatiis. Jesus recumbit in paleis, & vos  
stertitis in plumis. Jesus nudus alget præ  
frigore, & vos commodè, ac splendide estis  
vestiti. Jesus caret omnibus commodis, &  
vobis affluunt omnia.

O Divine Infans! quantum Nativitas tua  
me recreat? sed quantum paupertas tua me  
affligit? Quantum Infantia tua me solatur?  
sed quantum præsepe tuum terrorem mihi in-  
cutit? Amabo pauperes, quoniam non pos-  
sum amare paupertatem. Solabor pauperes,  
ut sublevem necessitatem tuam. Vestiam  
pauperes, ut contegam nuditatem tuam.

Non salvabor, nisi tibi evadam similis. O-  
portet ut egenus sim, sicut tu, aut ut tu lo-  
cuples sis, sicut ego. Ego recusò egenus es-  
se, sicut tu. Oportet ergo, ut te locuple-  
tem efficiam, sicut sum ego.

Tibi bona præstantur, quæ pauperibus ex-  
hibentur. Tibi ergo auxilium præstabo in  
personâ pauperum. Te nutriam in persona  
pauperum. Te vestiam, & hospitio excipiam  
in persona pauperum. O quam felicem me  
reputo, quod reddere tibi valeam, quæ mi-  
hi donâsti. Quòd possim necessitati tuæ suc-  
currere, quòd possim te vestire, nutrire, &  
hospitio excipere!



## Verba S. Scripturæ.

*Vulpes foveas habent, & volucres cæli nidus: Filius autem hominis non habet, ubi caput reclinet. Matth. 8. 20.*

*In propria venit, & sui eum non receperunt Joan. 1. 11.*

*Amen dico vobis: Quamdiu fecistis uni ex his fratribus meis minimis, mihi fecistis. 25. 40.*

*Egenus factus est, cum esset dives, ut illius inopiâ vos divites essetis. 2. Cor. 8. 9.*

## MEDITATIO XCIV.

## De Humilitate Pueri JESU.

**D**EUS se annihilavit, uniendo se nihilo. Humiliavit omnem Magnitudinem suam. Tam parvum se effecit. quàm magnus erat. Tantùm se demisit, quantum erat exaltatus. Humiliatio ejus est infinita. Humiliatio ejus est substantialis. Humiliatio ejus erit æterna. Quamdiu conservabit humanitatem suam, tamdiu conservabit signa humilitatis suæ.

Cur homo factus est? Cur passibilem, & mortalem naturam assumpsit? Cur carnem nostram induit? Cur infans jacuit in præsepio? Cur natus est ex muliere? Cur incoluit stabulum? Ut domaret nostram superbiam. Ut doceret nos humilitatem. Ut corda nostra sibi devinciret. Ut similior nobis evaderet.



O Divine infans ! Quàm magnus es in cælo, sed quàm parvus es super terram ? Quàm honoratus es ab Angelis, sed quàm contemptus ab hominibus ? O quàm reverenter te adoro in formâ Dei ! O quàm ardentè te amo in formâ hominis ! Admiracione dignissimum est, videre Deum se ad ima demittere. Sed multò magis est admirandum, videre hominem se in altum extollere ! & quantum confundor ob superbiam meam, videndo Deum mei amore humiliatum !

verba S. Scripturæ.

*Quicumque humiliaverit se sicut parvulus iste, hic est major in Regno cælorum. Matth. 18. 4.*

*Ecce Deus, Salvator meus, fiducialiter agam, & non timebo. II. 12. 2.*

*Semetipsum exinanivit, formam servi accipiens. Phil. 2. 7.*

MEDITATIO XCV.

*De Humilitate DEI in Myslerio Incarnationis.*

**V**erbum erat DEUS, & factum est homo.

Verbum erat beatum, & factum est miserabile. Verbum erat sanctum, & induit formam peccatoris.

Factum est homo, ut nobis communicaret Divinitatem suam. Factum est miserabile,



ut nobis communicaret felicitatem suam. Peccatoris formam induit, ut nobis communicaret sanctitatem suam.

O Jesu annihilate sub forma hominis! O Jesu annihilate sub formâ peccatoris! O Jesu annihilate sub forma creaturæ miserabilis! O Maxime & Minime! O Prime, & novissime! O sublimissime, & abjectissime!

An superbies deinceps anima mea, cum Deum tuum videas annihilatum? An sanctus videri desiderabis, cum Deum tuum videas sub schemate peccatoris? An vivere cupies in deliciis, cum Deum tuum videas afflictum miseriis?

O nihilum! An non tandem te annihilabis? An nunquam te in abyssum nihili tui dejicies? Quid boni unquam fecisti? Quid mali non perpetrâsti? Unde venisti? Aut quò eundum tibi erit? Intoleranda superbia est, quòd homo audeat se extollere, cum videat Deum suum humiliatum.

### *Verba Sacræ Scripturæ.*

*Verbum caro factum est. Joan. 1. 14.*

*Exinanivit semetipsum, formam servi accipiens. Phil. 2. 7.*

*Deus Filium suum mittens in similitudinem carnis peccati. Rom. 8. 4.*

*Eum, qui non noverat peccatum, pro nobis peccatum fecit, ut nos efficiamur iustitia Dei in ipso. 2. Cor. 5. 21.*



## MEDITATIO XCVI.

### *De SS. Nomine JESU.*

**J**ESUS est Nomen Majestatis. JESUS est Nomen Suavitatis. JESUS est Nomen Potestatis. Est Nomen Majestatis, quod significat Deum hominum. Est Nomen suavitatis, quod significat Patrem hominum. Est Nomen Potestatis, quod significat Salvatorem hominum. Majestas ejus facit, ut adoretur in Cælo. Suavitas ejus facit, ut ametur in terrâ. Potestas ejus facit, ut timeatur ab inferis.

Quando pronuntio Nomen JESU, represento mihi Maximum inter Reges. Amantissimum inter Patres. Fortissimum inter Bellatores. Humillimum inter homines. Fidelissimum inter amicos. Mitissimum inter Dominos. Potentissimum ad rapienda omnium corda. Amantissimum inter omnes sponsores.

Quando JESUM pronuntio, tristitia mea dissipatur. Animus meus erigitur. Cor meum dilatatur. Spiritus meus evigilat. Passiones meæ quiescunt. Desideria mea sedantur. Anima mea redundat gaudio. Omnes inimici mei aguntur in fugam.

Si JESUS est salvator meus, an non potest me salvare? An non debet me salvare? Onus sibi imposuit procurandæ salutis meæ. Sponte accepit eam curam, voluitque hoc unum esse suum negotium. Nulli labori par-



cet, ut salutem mihi procuret. Quin & vitam suam mei amore ponet. Quid formidare deinceps possim, cum habeam Salvatorem? Quid sperare non debeam, cum tantum habeam Salvatorem?

O Jesu! Pater pauperum. Consolator afflictorum. Anima mea coram te est sine voce. Cor meum dicit tibi, quod tu sis omne bonum suum. Sis mihi Jesus in vitâ. Sis mihi Jesus in morte. Si quid commisi, unde damnari possim, tu non perdidisti, unde me salvare possis.

O Jesu! Pone te ut signaculum super cor meum. Ut signaculum super os meum? Ut signaculum super brachium meum. Ut non cogitem, nisi de te. Ut non loquar nisi de te. Ut non laborem, nisi propter te.

O Jesu! Adoro te, ut Nomen Majestatis. Amo te, ut Nomen suavitatis. Invoco te, ut Nomen Potestatis. Opto sanguinem profundere, ut salvus fiam; quoniam tu sanguinem tuum dedisti, ut Salvator esses. Desidero vulneribus lauciari, sicut tu, ut tecum fiam Salvator hominum.

### **Verba S. Scripturæ.**

*Tu autem in nobis es Domine, & Nomen sanctum tuum invocatum est super nos, ne derelinquas nos. Jer. 14. 9.*

*Omnis, qui invocaverit Nomen Domini, salvus erit. Joël. 2. 32.*

*Nec enim aliud Nomen est sub Cælo datum hominibus, in quo oporteat nos salvos fieri. Act. 4. 12.*



## MEDITATIO XCVII.

## De Regno DEI.

**D**EUS regnat in corde hominum. Homo regnat in corde Dei. DEus regnat, cùm homo voluntatem ejus exequitur. Homo regnat, cùm Deus voluntatem illius exequitur. Deus adimplet voluntatem hominis, cùm homo adimplet voluntatem Dei. DEus obedit homini, cùm homo obedit Deo. Deus regnat per suam Providentiam, & homo per suam obedientiam. Servire Deo, regnare est. Obedere Deo, imperare est.

O mi Deus! quàm justum est, ut tibi subiectus sim! Sed an justum est, ut tu mihi sis subditus? Quàm æquum est, ut ego adimpleam voluntatem tuam! Sed an æquum est, ut tu meam adimpleas? Interim tamen tu promittis exsequi voluntatem eorum, qui executuri sunt tuam.

Ah mi Deus! Tu semper eris Thesaurus meus, quoniam cor meum æstimas ut Thesaurum tuum. O benignum Dominum, qui exequitur voluntatem servorum suorum! O impium servum, qui excusat exequi voluntatem Domini tam benigni!

## Verba S. Scripturæ.

*Voluntatem timentium se faciet. Psal. 144.*



*Ego in medio vestrum sum, sicut qui ministrat. Luc. 22. 27.*

*Adveniat Regnum tuum. Matth. 6. 10.*

*Regnum Dei intra vos est. Luc. 17. 21.*

## MEDITATIO XCVIII.

*De Regno Jesu Christi, & Sathana.*

**N**on potest quis nulli subesse Domino. Nec potest quis servire, nisi uni Domino. Oportet servire aut Christo, aut Sathanæ. Illius servus es, cujus voluntatem exequeris.

Jesus est clementior omnibus Regibus. Sathan est crudelior omnibus tyrannis. Jesus nos amat, quantum potest amare. Sathan nos odit, quantum potest odisse. JESUS regnat in pace. Sathan regnat in perturbatione. Jesus nos deducit ad cælum. Sathan nos præcipitat in infernum.

Jesus nequaquam Rex noster est, nisi mandata ejus custodiamus. Jesus regnat in mentibus nostris per Fidem. Regnat in cordibus nostris per Charitatem. Regnat in desideriis nostris per Spem. Regnat in anima nostra per pacem. Regnat in corpore nostro per Patientiam. Gubernat nos per suam Sapientiam. Sustentat nos per suam Potentiam. Sanctificat nos per suum Amorem. Sapientia ejus nos gubernat, cum renunciamus propriis judiciis nostris. Patientia ejus nos sustentat, cum renunciamus propriis viribus nostris.

Amor



Amor ejus nos sanctificat, cū renunciamus propriis desideriis nostris.

Agere, quod Deus vult. Pati, quod ipse immittit. Conservare se in ejus gratia. Possidere cor suum in pace. Nihil operari ex indomita cupiditate. Obedire Divinæ inspirationi. Promptum esse ad facienda omnia. Paratum esse ad omittenda omnia. Non desiderare prospera. Non formidare adverſa. Divinæ dispositioni semper acquiescere. Vivere & mori in cruce. Hoc est Regnum JESU Christi. In hoc fundatur ejus imperium.

O JESU Rex meus! Ecce ego servus tuus, & filius Ancillæ tuæ. Heu! quomodo ingredi potes cor meum, è quo toties te ejeci? Multo jam tempore non vivis intra me, quia perdidisti gratiam tuam. Multo jam tempore non negnat in me, quia pacem violavi. Revertere Domine in Regnum tuum, neque deinceps unquam ex illo recede. Defende te intra me contra hostes Coronæ tuæ. Sathan ait, sibi jus dominii in me competere. Mundus affirmat, suis me mancipatum esse obsequiis. Superbia asserit, suo me imperio esse subjectum. Sensualitas sibi me servum vendicat. Et ego profiteor, me omni jure esse servum JESU Christi. Me redemptum esse JESU sanguine. Me alium Regem non habere, quàm JESUM. Mori me exoptare in obsequio JESU. Nullâ vi me separandum à JESU.



## Verba S. Scripturæ.

*Ecce Rex vester.* Joan. 9. 4.

*Regnum meum non est de hoc mundo.* Joan.  
18. 36.

*Dominare nostri tu , & filius tuus.* Judic.  
8. 22.

*Non ergo regnet peccatum in vestro mortali corpore.* Rom. 6. 12

*Rex Regum , & Dominus Dominantium.*  
Apoc. 19. 6.

## MEDITATIO XCIX.

*De Passione JEſu Christi in genere.*

**J**Eſus est verus Filius Dei. Est sapientissimus omnium hominum. Est maximus omnium Regum. Est optimus omnium amicorum. Qui neminem læſit unquam. Qui copioſa toti mundo beneficia contulit. Et totus mundus mala illi retribuit. Sicut paſſus est pro omnibus hominibus , ita paſſus est ab omnibus hominibus. Omnis ſexûs & conditionis homines conſpirârunt in Paſſionem ejus : Judæi, Gentiles , Sacerdotes & Reges. Omnes allaborârunt, ut ageretur in Crucem.

JEſus paſſus est omnis generis pœnas in corpore , & anima. In mente , & in corde. In memoria , & in imaginatione. In honore & bonis. In cognatis & amicis. In omnibus ſenſibus & membris ſuis. JEſus est vir dolorum , & ego volo eſſe vir deliciarum?

JE-



JESUS est victima omnium temporum. Est Victima omnium hominum. Est victima omnium justorum. Est victima omnium impiorum. Sicut in se suscepit omnia nostra crimina expianda, ita effectus fuit omnibus suppliciis, nostræ malitiæ debitis. Sicut nullus est, quem non amavit, ita nullus est, pro quo non sit passus. Præcipue tamen pro me passus est. Et ego nihil patiar propter ipsum?

Quis illum compulit, ut mortem subiret pro ingratis? Qua de causa miseras nostras induit? Mortem subiit, ut vitam nobis redderet. Miseras nostras induit, ut nos beatos efficeret. Semetipsum tradidit inimicis suis. A sententiâ Pilati non provocavit ad aliud sublimius tribunal. Nullum patravit miraculum, quo se liberaret à Cruce. Totâ vitâ suâ fuit crucifixus. Cor ejus fuit crucifixum ante corpus. Moriebatur præ desiderio moriendi. Maxima ipsi crux erat, non posse atrociora pati.

O dulcissime JESU! Utique adimpletum est desiderium tuum. Saturatus enim es opprobriis. Non potes plura pati, quàm passus sis. Non potes mortem crudeliorem subire, quàm subleris. Et ego vivere cupiam in deliciis?

Ubi inveniam exempla tantæ Bonitatis tuæ?  
Ubi inveniam exempla tantæ malitiæ meæ?  
Ubi inveniam exempla tanti amoris tui? Ubi  
inveniam exempla tantæ ingratitude meæ?  
Quanta in sacratissima Passione tua luculenter  
apparent.



## Verba S. Scripturæ.

*In ipso inhabitat omnis plenitudo Divinitatis corporaliter. Col. 2. 9.*

*Unxit eum Deus Spiritu Sancto, & virtute; qui pertransiit benefaciendo, & sanando omnes oppressos à diabolo, quoniam Deus erat cum illo. Act. 10. 38.*

*Pro omnibus mortuus est. 2. Cor. 5. 15.*

*Qui dilexit me, & tradidit semetipsum pro me. Gal. 2. 20.*

*Baptismo habeo baptizari, & quomodo coarctor, usque dum perficiatur? Luc. 12. 15.*

*A plantâ pedis usque ad verticem non est in eo sanitas. II. 1. 6.*

## MEDITATIO C.

*De Tristitiâ Filii Dei in Horto Olivarum.*

**J**esus tristis est usque ad mortem, ex consideratione suorum tormentorum. Ex consideratione meorum peccatorum. Ex consideratione ingratitude meæ. Ex consideratione miseriarum mearum.

Timore concuti voluit, palàm facturus, quòd sit homo, sicut ego. Quòd sit infirmus, sicut ego. Quòd exspoliatus sit fortitudine suâ. Quòd induerit infirmitatem meam. Quòd mihi communicaverit generositatem suam. Quòd assumpserit timiditatem meam.

Con-



Contremiscit, ut me securum efficiat. Timet, ut me ad ardua animosum reddat. Cadit, ut me subleuet.

Voluptas, & dolor producunt omnia peccata hominum. Desiderium, & timor accendunt omnes cupiditates hominum. JESUS vicit geminos hos inimicos, nobisque robur addidit, ad illos expugnandos. Abstinent ab omnibus voluptatibus. Sustinuit omnes dolores. Renunciavit omnibus desideriis. Superavit omnes terrores. Sudavit sanguinem, & aquam. Certavit usque ad mortem.

O Divine Salvator! Quàm crudele fuit primum certamen tuum? Quàm sanguinolenta fuit prima pugna tua? Heu! ego eram in corde tuo, ut te affligerem. Ego eram in brachiis Judæorum, ut cruciarem te. Peccata mea erant in mundo ante me, quia illa te cruciarent, & crucifixerunt.

O Divine Magister! Quàm eximia nobis præbes exempla! Sed nemo te vult imitari. Quàm doctas nobis prælegis lectiones! sed nemo eas cupit addiscere. Tu primus ad pugnam progredieris: sed nemo tuis insistit vestigiis. Discipuli tui dereliquerunt te. Dormiunt, dum tu agonizas. Affligunt te, cum deberent te solari. Perfide produnt te, cum deberent tibi auxilium ferre.

Heu! quanta confusio operit faciem meam! Succumbo tentationi unius hominis, cum sustenter à fortitudine Dei. Et JESUS superat omnes tentationes dæmonum, cum induerit infirmitates omnium hominum.



O Sanguis pretiose ! Qui irrigas terram ingratam. Irriga, & inflamma cor meum. O Redemptor mi ! Imitabor deinceps generositatem tuam. Resistam usque ad sanguinem. Triumphabo de Carne. Certabo fortiter usque ad mortem. Libens bibam Calicem tuum, quia tu meum exhaurire dignatus es.

### Verba S. Scripturæ.

*Cæpit pavere, & tædere. Marc. 14. 33.*

*Ait illis : Tristis est anima mea usque ad mortem. Sustinete hîc & vigilate Marc. 14.*

*34.*

*Factus est sudor ejus, sicut guttæ sanguinis decurrentis in terram. Luc. 22. 44.*

*Verè languores nostros ipse tulit, & dolores nostros ipse portavit. II. 53. 4.*

## MEDITATIO CI.

### *De Oratione Christi in horto.*

**J**ESUS recedit à Discipulis suis, & lethali absorptus tristitiâ, preces ad Patrem fundit. Orat cum reverentiâ. Orat cum perseverantiâ. Orat cum resignatione. Orat, & non exauditur. Docet nos orare. Docet nos plenam in paternum Dei beneplacitum resignationem.

Bonus JESUS non voluit exaudiri, ut nos exaudiremur. Non obtinuit pro se gratiam; quam tamen pro me obtinuit.

Si



Si affligaris, ad preces recurre. Ora seorsim. Ora cum humilitate. Ora cum constantiâ. Ora cum resignatione. Ora cum conformitate. Nec unquam ab oratione remitte. Dic Deo inter omnes timores tuos: Pater sanctissime, & amantissime! Ecce calicem confusionis, quem inimici mei bibendum mihi offerunt. Tolle illum à me, si ita tibi placeat. Verumtamen fiat voluntas tua, non mea!

Pater misericordiarum! Ecce calicem doloris perquam amarum! Transeat is ab ore meo, si ita tibi placeat. Verumtamen fiat voluntas tua, non mea.

Pater pauperum! Ecce bona mea, quia violenter mihi eripiuntur! Ecce calicem egestatis, qui mihi hauriendus offertur! An non possum ab eo liber evadere? Fiat voluntas tua, non mea.

Pari ratione percurre cætera, quæ tibi molesta possent accidere. Repræsentâ ea suaviter Deo, tui amantissimo, & te penitus cum sanctissima ejus Voluntate conforma.

### *verba S. Scripturæ.*

*Progressus pusillum, procidit in faciem suam, orans. Matth. 26. 39.*

*Pater mi, si possibile est, transeat à me calix iste: veruntamen non sicut ego volo sed sicut tu. Matth. 26. 39.*

*Pater mi, si non potest hic calix transire, nō bibam illum, fiat voluntas tua. Matth. 26.*

42.



*Deus meus, clamabo per diem, & non exaudies. Pl. 21. 3.*

## MEDITATIO CII.

*De Injuriis à Christo Jesu toleratis in domo  
Annæ, & Caiphæ.*

**A** Lapam infligere Deo? Faciem ejus con-  
spuere? Tractare, ut falsum Prophetam?  
Proclamare illum blasphemum? Judicare illum  
dignum morte? Condemnare illum, ut sce-  
leratum? O impietas abominanda! O cri-  
men detestandum!

Hæc ipsa perpetras, cum Deum offendis.  
Hæc ipsa iteras, cum proximum affligis. JE-  
sum cædis, cum cædis membra ejus. Jesum  
injuriâ afficis, cum membris ejus injuriam in-  
fers.

Tolera sicut Jesus convitia, quibus per-  
stringeris. Tolera cum Jesu injurias, quibus  
impeteris. An tu nobilior es, quàm Jesus?  
An tu innocentior illo? Pejúsne tractaris,  
quàm ille? Jesus atrocissima quæque patitur,  
& tu nihil vis sustinere? Jesus ultionem non  
cogitat, & tu vindictam spiras?

O Jesu! mereor equidem contemni, qui  
toties te contempsisti. Mereor recipere alapas,  
quas toties tibi inflixisti. Tu reus proclamaris,  
& ego innotens haberi desidero. Tu ad mor-  
tem iniquè condemnaris, & ego horreo vi-  
tam ponere. Moriar, ah! moriar pro te,  
quía tu mortuus es pro me. Patiar pro te,  
quia tu passus es pro me.



Occlude mihi os, cum voluero in querelas erumpere. Liga mihi linguam, cum loqui voluero. Si iracundiæ meæ frænum laxem, non potero illam coërcere. Jam nunc ergo firmiter statuo, nunquam loqui, cum turbulenta mentis commotio me invaserit.

## Verba S. Scripturæ.

*Unus assistens ministrorum dedit alapam JE-  
SU. Joan. 18. 22.*

*Blasphemavit: quid adhuc egemus testibus?  
quid vobis videtur? At illi respondentes dixe-  
runt: reus est mortis. Matth. 26. 65.*

*Expuerunt in faciem ejus, & colaphis eum  
cecidērunt. Matth. 26. 67.*

*Faciem meam non averti ab increpantibus,  
& conspuentibus in me. Is. 50. v. 6.*

*Dabit percutienti se maxillam, saturabitur  
opprobriis. Thren. 3. 3.*

*Quid me cædis? Joan. 18. 23.*

*Turbatus sum, & non sum locutus, Psal.  
76. 5.*

## MEDITATIO CIII.

*De Herode contempto à Jesu Christo, & de  
Jesu Christo spreto ab Herode.*

**H**erodes desiderat videre Jesum, & Jesus  
eum non respicit. Herodes interrogat  
Jesum, & Jesus ei non respondet. Herodes  
miracula petit à Jesu, & Jesus nullum patrat.  
O He-



Herodes spernit Jesum, & Jesus nihil inde movetur. Sapientia Dei stulticia reputatur ab omnibus mundi affeclis. Humilitas Jesu ludibrio est magnatibus, & sapientibus hujus mundi.

Jesus non loquitur superbis. Non se manifestat curiosis. Non favet impudicis. Horret adulteros. Ingratis subtrahit gratias suas. Contemnit illos, à quibus ipse contemnitur. Tacet postquam locutus est. Silet, postquam vocavit. Abscondit se, postquam quæsit.

Tu, impie Herodes! occidisti sanctum Joannem. Suffocasti vocem Jesu. Contempsisti consilia ejus. Sacrificasti illum cupiditati tuæ. Jesus tibi obmutescit. Tu sustulisti vocem ejus. Ne mirare, si tibi porrò non loquatur.

O mi Deus! quàm terribile est silentium tuum. Quàm timeo, ut mihi quoque deinceps non loquaris. Heu! quoties occidi Prophetas tuos? Quoties jugulavi Præcursores tuos? Quoties extinxi inspirationes tuas? Quoties rejeci gratias tuas? Audio verba tua; quibus tamen non obedio. Lego libros optimos, & nihil inde proficio. Volo deinceps tibi promptè obedire. Volo adhuc hodie, ubi vocem tuam audiero, me seriò ad te convertere.

### Verba S. Scripturæ.

*Herodes erat cupiens ex multo tempore videre eum, eò quòd audierat multa de eo, & sperabat signum aliquod videre ab eo fieri. Luc. 23.*



*De JESU Christo Barrabæ postposito. 211*

*Interrogabat eum multis sermonibus: at ipse nihil illi respondebat. Luc. 23. 9.*

*Sprevit illum Herodes cum exercitu suo. Luc. 23. 11.*

*Quod stultum est Dei, sapientius est hominibus, & quod infirmum est Dei fortius est hominibus. 1. Cor. 1. 25.*

*Ad te Domine clamabo: Deus, ne fileas à me; ne quando taceas à me, & assimilabor descendentibus in lacum. Ps. 27. 1.*

*Tempus tacendi, & tempus loquendi. Eccle. 3. 7.*

## MEDITATIO. CIV.

*De JESU Christo Barrabæ postposito.*

**I**nnocens comparatur scelesto. Justus latroni. Rex mancipio. Deus sanctitatis, peccatori.

Injuriam hanc minùs sentit Christus quàm illam, quæ à Christiano ipsi infertur, quando illum comparat creaturæ. Quando illi præfert Luciferum. Quoties peccas, toties ejusmodi comparationem instituis, & turpiter JESUM contemnis.

O JESU! Maxime, & minime. Prime & Novissime! Quando te video prostratum ad pedes Judæ, non reperio ampliùs locum, quem occupem. Quando te video Barrabæ postpositum, non video, nisi infernum, in quo me possim abscondere. An æquum est, ut eminare velim supra te? En te despectissimum in-



ter homines ! Si me præferam vel uni soli homini, necesse est, ut me etiam præferam tibi.

O Anima mea ! patere contemptus, quære humiliactiones. Ne inideas sublimi aliorum dignitati. Ama potius abjectiones tuas. Si te humiles, Deus te exaltabit. Si te exaltes, Deus te humiliabit.

### Verba S. Scripturæ.

*Quem vultis dimittam vobis : Barrabbam an Jesum ?* Matth. 27. 17.

*Cui comparastis me, & fecistis similem ?* Il. 46. 5.

*Clamaverunt omnes dicentes : non hunc, sed Barrabam.* Joan. 18. 40.

*Filios enutrivì, & exaltavi : ipsi autem spreverunt me.* Il. 1. 2.

### MEDITATIO. CV.

#### *De Flagellatione Jesu Christi.*

**J**esus flagellis cæsus est instar Mancipii. Undique perfusus suo sanguine. Corpus ejus non est nisi unica plaga. Ossa ejus conspiciuntur per vulnera. Ecce Agnum pelle suâ exutum, qui in cruce est immolandus !

Anima Christiana ! Manibus arripe hæc flagella. Tu teipsum plecte. Dic : ego sum, qui peccavi. Ego mereor castigari. An æquum est, ut vivam sine vulnere, cum videam Regem meum plagis undique sædè conscissum ?

Quo-



Quomodo corpus meum glorificabitur, nisi purgatum fuerit per tolerantiam? Qui puniti non fuerint cum hominibus, punientur cum demonibus.

O sanctissime Agne! Quod crimen commisti, ut tanta perferres supplicia, & tantam confusionem subires? Heu! in carne tua plectis delectationes scelestas carnis nostræ. Ut expiares peccata corporis nostri, corpus tuum tam atrociter fuit laceratum.

O Caro virginea! quàm crudeliter te laniarunt infames hominum voluptates! Acriter deinceps castigabo corpus meum, ut illud corpori tuo simile efficiam.

Mi Deus! confiteor ignaviam meam, non habeo animum me seriò castigandi. Tu ergo flagella arripe. Ne parcas debitis pœnis mihi infligendis. Paratus sum ad omnia, quæ tibi placuerint. Castiga me, si ita sit necessarium. Sed castiga me, ut Pater, non ut Judex. Castiga me ex amore, & non ex furore. Castiga me in tempore, & non in æternitate.

### Verba S. Scripturæ.

*Tunc apprehendit Pilatus Jesum, & flagellavit.* Joan. 19. 1.

*Tradidit Jesum flagellis cæsum.* Marc. 15. 15.

*Multa flagella peccatoris.* Pl. 31. 10.

*Ego in flagella paratus sum, & dolor meus in conspectu meo semper.* Psal. 37. 18.

*In labore hominum non sunt, & cum hominibus non flagellabuntur.* Pl. 72. 5.



*Quos amat Dominus, castigat, flagellat autem omnem filium, quem recipit. Hebr. 12. 6.*

## MEDITATIO CVI.

*De Christo Jesu spinis coronato.*

**J**ESUS coronatus est spinis. Coronatus est doloribus. Coronatus est ignominiiis. Coronâ hâc redimiri voluit, ut caput ejus cruciaretur. Ut expiaret delectationes cogitationum nostrarum. Ut puniret ambitionem nostram. Ut emundaret imaginationem nostram. Ut palâm faceret, quodnam esset Regnum suum. Ut declararet, quinam essent subditi sui. Judæi eum salutant Regem suum, & tamen postulant eum crucifigi.

Christiane! Ecce Rex tuus. An illum amas cum hoc diademate? Si Filius Dei es, sicut ille, oportet te cum ipso crucifigi. Si auro coronari cupis in cælo, oportet te spinis coronari in terra. Num decet sub capite doloribus coronato, membrum vivere delicatum? Coronæ mundi auro gemmisque fulgurant. Coronæ Jesu spinis sentibusque horrent.

Filiæ Jerusalem egredimini, & videte Regem Salomonem in diademate, quo coronavit eum Mater sua. Heu! Synagoga non est mater, sed crudelis noverca. Illa coronavit se rosis, & Deum suum coronavit spinis. Christiane! quoties delectaris cogitationibus obscænis, aut ambitiosis, toties renovas hæc hæc Christi tormenta. Spinis crudelibus ca-  
put



put ejus configis. Affligis mentem ejus. Coronas illum ignominiiis.

Filiæ Jerusalem! Ecce Homo, qui vos salvavit! Ecce Homo, quem egistis in Crucem! Ecce Homo, qui vos tam ardentem amavit! Ecce Homo, quem atrociter persequi non cessatis!

O pulcherrime inter homines! O maxime inter Reges! Nunquam deinceps te offendam. Nunquam à te deficiam. Judæi recusant tibi obedire. Mundi clientes cupiunt obedire Cæsari. Divites colunt Deum divitiarum. Sensuales adorant Deum voluptatis. Ego autem eligo Regem doloris. Adoro Regem pauperem, & contemptum. Nolo alium venerari Regem, quàm Jesum. Opto spinis coronari, sicut Jesus.

## Verba S. Scripturæ.

*Milites plectentes coronam de spinis, imposuerunt capiti ejus, & veste purpurea circumdederunt eum.* Joan. 19. 2.

*Exiit Jesus, portans coronam spineam, & purpureum vestimentum.* Joan. 19. 5.

*Ecce Homo.* Joan. 19. 5.

*Ecce Rex vester.* Joan. 19. 14.

*Coronans coronabit te tribulatione.* II. 22.

88. *Non habemus Regem, nisi Cæsarem.* Joan. 19. 15.

19. *Jesus Nazarenus Rex Judæorum.* Joan. 19.

19. *Rex meus, & Deus meus.* Pl. 5. 3.



## MEDITATIO CVII.

*De Via Iesu Christi, Crucem bajulantis.*

**J**esus bajulat Crucem suam humeris suis. Succumbit sub gravissimo onere. Substituunt ei vilem hominem, qui crucem pro ipso ferat, qui Crucem post ipsum ferat. Cogunt ad Crucem tollendam, & sequendum Jesum.

Quæ causa est, cur Iesus admittat hoc solatium? Cur non patrat miraculum, quo possit crucem suam portare? Voluit auxilio sibi esse Simonem Cyrenensem, ut doceret homines, quòd crux hæc ipsis esset debita. Quòd ipsorum amore illâ voluerit onerari. Quòd nos cum adjuvemus in Cruce portanda, nostram Crucem patienter ferendo. Quòd oporteat nos tollere crucem nostram si cupiamus esse Discipuli ejus. Quod ipse Iesus Crucem nostram nobiscum ferat. Et quòd nos cum ipso debeamus bajulare Crucem ejus.

O beatum Simonem, qui portavit Crucem Iesu! Penes te est, mi Christiane, eandem cum Simone felicitatem consequi. Omnes nostræ cruces sunt particulæ Crucis Christi, quæ attigerunt animam aut corpus ejus. Ille primus bibit calicem nostrum. Ille sustinuit omnia, quæ nos sustinemus. Ille suscepit omnes dolores nostros, quorum nullus est, qui non intimè penetraverit cor illius.

O Iesu Domine mi! sequar te, quocunque jêris. Et quoniam Cruce onustus progredieris, tecum pariter Crucem bajulabo. Hæc est tro-

phæ.



phæum salutis meæ. Hæc est vexillum Religionis meæ. Hæc est sigillum prædestinationis meæ. Nolo itaque eam deferere. Nolo eam invitus trahere, sed alacriter eam volo portare, & te comitari, ac præeuntem sequi.

O sancta Crux! quæ consecrata fuisti sanguine Dei, recipe me intra brachia tua. Permitte me requiescere in sinu tuo. Dona te totam mihi, sicut ego me totum tibi dono. Porta me, obsecro, ut ego quoque te portem. Tam arctè me brachiis tuis constringe, ut nihil me possit à te avellere.

## Verba S. Scripturæ.

*Bajulans sibi Crucem, exiit in eum, qui dicitur Calvariæ, locum. Joan. 19. 17.*

*Veni, sequere me. Marc. 10. 21.*

*Tunc JESUS dixit discipulis suis: si quis vult post me venire, abneget semetipsum, & tollat Crucem suam, & sequatur me. Matth. 16. 24.*

*Sequar te, quocunque ieris. Luc. 9. 57.*

*Omnes nos quasi oves erravimus, & posuit Dominus in eo iniquitatem omnium nostrum. Is. 53. 6.*

## MEDITATIO CVIII.

### *De JESU Crucifixo.*

**J**esus extenditur in Cruce, manus ejus, & pedes clavis perforantur. Affigitur cum violentia. Attollitur cum ingenti cruciatus. To-  
O 5 ta



ta corporis moles manuum pedumque plagis innititur. Scaturiunt inde quatuor sanguinis flumina, quæ irrigant agrum Ecclesiæ, & eluunt omnia peccata mundi.

Offertur illi vinum amarum, quod sopire non nihil potuisset dolorem ejus. Degustat illud supremis labiis, ut amaritudinem sentiat, non tamen illud liberalius haurit, ne fortè tormenta ei dulcescant. Blasphematur, maledicatur, invitatur, ut de Cruce descendat, in qua tamen ille perseverat usque ad mortem.

O Jesu! adoro te in hoc Throno doloris, & ignominia. O Divine Salvator! Conjicio me intra brachia tua, quæ extendisti ad me amplexandum. O sacra amoris Victimam undequeque ardens, & consumpta doloribus! O magne Sacerdos novæ legis! quid agis in hac Cruce? descende, & totus mundus credet in te.

Ah! non descende. Si filius Dei es, moriendum tibi est in cruce. Si inde descendas, nemo credet in te. Nemo volet sequi te. Omnes fugient crucem suam. Omnes mori recusabunt.

O Crux mihi charissima! exosculor te, amplexor te, mori cupio intra brachia tua, desponsavi te mihi in Baptismo meo. Connubium hoc est indissolubile, quod non nisi mors poterit separare. Ne mihi porrò mundus molestus sit, quia stigmata Domini mei Jesu Christi in corpore meo porto. Cum ipso sum crucifixus. Cum illo desidero mori.

Anima mea! respice Salvatorem tuum in Cruce. Peccata tua illum egerunt in Crucem. Semel crucifixus fuit in monte Cal-



variæ, at quoties tu illum crucifixisti in corde tuo? Quoties illum offendis, toties illum crucifigis. Oportet crucifigere JESUM, aut crucifigere concupiscentias tuas.

O JESU! fac me mori, ne sim causa mortis tuæ. Crucifige corpus meum, ne crucifigam Spiritum tuum.

*Verba S. Scripturæ.*

*Crucifixerunt eum, & cum eo alios duos hinc, & hinc, medium autem JESUM. Joan. 19. 18.*

*Dederunt ei vinum bibere cum felle mistum, & cum gustasset, noluit bibere. Matth. 27. 34.*

*Totâ die expandi manus meas ad populum non credentem, & contradicentem. Rom. 10. 21.*

*Christo confixus sum cruci. Gal. 2. 19.*

*Qui Christi sunt, carnem suam crucifixerunt cum vitiis, & concupiscentiis. Gal. 5. 24.*

*Mibi autem absit gloriari, nisi in Cruce Domini nostri JESU Christi, per quem mihi mundus crucifixus est, & ego mundo. Gal. 6. 14.*

*Rursum crucifigentes sibi met ipsis Filium Dei, & ostentui habentes. Hebr. 6. 6.*



## MEDITATIO CIX.

*De primo Verbo Christi in Cruce.*

**J**esus diu pendet in cruce, ne verbulo quidem prolato. Profundum observat silentium, nec queritur de doloribus suis. Sanguis ejus non poscit vindictam, sed potius gratiam, pro iis, qui illum effundunt. Orat pro illis, inter acerbissimos cruciatus. Et dum illi insultant ejus miserijs, excusat illorum peccatum. Minuit ejus malitiam. Advocatum agit illorum, quorum est Judex. Obliviscitur propriorum malorum suorum, ut medelam afferat malis hostium suorum. Magis ipsum affligit illorum interitus, quam mors, ab illis ei illata.

Observa silentium, anima Christiana! quando Crucem feres. Noli conqueri de ærumnis tuis, ne perdas fructum calamitatum tuarum. Absconde te in sinu humilitatis, & requiesce in patientiâ tuâ. Ora pro inimicis tuis. Obliviscere injuriarum, quas tibi intulêre. Excusa saltem intentionem illorum, si non possis excusare actionem. Indignus es gratiâ, si veniam neges inimicis tuis.

O JESU! veniam impertior inimicis meis, ignosco illis, qui me crucifigant. Ah! non sciunt, quid faciant. Credunt se mihi malum inferre, cùm plurimum boni mihi procurent. Credunt, se sibi benefacere cùm plurimum sibi mali accersant. Persequendo  
me,



me, plus boni mihi præstant, quàm ego ipse mihi possim procurare. Sibi ipsis plus mali inferunt, quàm ego ipsis possim optare.

Domine! ignosce illis, non enim sciunt, quid faciant. Ego pecco per malitiam, ipsi peccant per ignorantiam. Si tot haberent gratias, quot ego, non essent ita impii, ut ego. Si adeò vehementer tentaret, ac ipsi, pejor fortè forem, quàm ipsi.

### Verba S. Scripturæ.

*Pater! dimitte illis, non enim sciunt quid faciunt.* Luc. 23. 34.

*Relinque proximo tuo nocenti te, & tunc deprecanti tibi peccata solventur,* Eccli. 28. 2.

*Diligite inimicos vestros, orate pro persequentibus, & calumniantibus vos.* Matth. 5. 45.

*Mibi vindictam, & ego retribuam, dicit Dominus.* Rom. 12. 19.

## MEDITATIO CX.

*De Pænitentia boni Latronis, & Impænitentia mali.*

**L** Atro unus confitetur JESUM Christum.  
Alter eum execratur. Unus eum adorat.  
Alter eum blasphemat. Unus per Crucem suam Cælum conscendit. Alter de Cruce sua ad infernum descendit. Unus salvatur, Lateri Christi proximus. Alter damnatur, late-



lateri Christi proximus. Iesus Redemptor est utriusque, at non nisi unus Redemptionis fructum participat. Iesus vitam suam ponit pro utroque. Et alter moritur in sua pervicacia obstinatus.

O Judicia Dei, quàm estis inscrutabilia!  
O Bonitas Dei, quàm es amabilis! O Justitia Dei, quàm es terribilis! O Providentia Dei, quàm es mirabilis! Quis non timebit, se periturum? Quis non sperabit, se salvandum? Damnari quis potest in omni loco, cum latronum alter lateri Dei proximus damnetur. Salvari quis potest in omni tempore, cum latronum alter in ultimo vitæ termino salvetur.

O verba ægris ac moribundis, dulcia, & solatio plena! Hodie mecum eris in Paradiso. Domine memento mei modò, cum sis in Regno tuo. Bene equidem mereor crucem, quam patior: Sed tu quod crimen commisisti, propter quod in Crucem es actus? O Domine! Utinam! audiam te mihi acclamantem! Hodie mecum eris in Paradiso.

### Verba S. Scripturæ.

*Unus de duobus latronibus blasphemabat, dicens: salvum fac te metipsum, & nos. Luc. 23. 39.*

*Alter increpabat eum dicens: Neque tu times Deum. Ibidem.*

*Nos quidem justè, nam digna factis recipimus: Hic verò nihil mali gessit. Ibidem.*



*Domine memento mei, cum veneris in Regnum tuum. Ibidem.*

*Erunt duo in lecto uno; unus assumetur, & alter relinquetur. Luc. 17. 34.*

## MEDITATIO CXI.

*De Passione B. Virg. MARIAE.*

**O** Bone JESU! cur indulges Matri tuæ, ut sequatur te ad Calvariæ montem? Quomodo sustinere potes, ut te videat morientem? An non immunem eam servare deberes à dolore usque adeò acerbo. Quod crimen in te commisit, in cujus poenam assistere debeat tuo supplicio?

Deus vult MARIAM stare ad pedem Crucis, ut cooperetur nostræ Redemptioni. Ut Offerat Deo grande hoc sacrificium. Ut reparet errorem Evæ. Ut concipiat omnes Prædestinatos. Ut Electorum Mater declaretur. Ut augeat dolores Filii sui. Ut particeps fiat Passionis ejus. Ut de calice ejus bibat. Ut evadat Regina Martyrum. Ut coronetur spinis ejus.

Martyres patiebantur pro JESU Christo. MARIA patiebatur cum JESU Christo. Martyres patiebantur in corpore. Maria patiebatur in animâ. Martyres cruciabantur in carne sua, peccatis inquinata. Maria cruciabatur in carne innocente Filii sui. Martyres desiderabant mortem. Maria non poterat desiderare mortem Filii sui. Cor Martyrum  
re-



redundabat gaudio. Cor Mariæ obruebatur mœstitiâ. Amor leniebat tormenta Martyrum. Amor acuebat dolores Mariæ.

JESUS duplici modo fuit crucifixus. In suo corpore, pendens in Cruce. In suo spiritu, in corde Matris suæ. Maria duplici modo fuit crucifixa. Spiritualiter in animâ suâ. Corporaliter in carne Filii sui. Amor infligebat cordi Matris vulnera, quibus sanciabatur Corpus Filii. Quæ lethalia non erant Filio, Matri erant lethalia. Lancea, quæ aperuit cor mortuum JESU, perfodit cor vivum Mariæ. Sicut nulla Mater vehementius dilexit, ita nulla Mater acrius fuit afflicta.

O Filia Sion! cui comparabo te? Dolor tuus est sine exemplo. Imminusus est, vult mare. Profunditas ejus est infinita. Latitudo ejus est immensa. Non est, nisi dolor Filii tui, qui tuo possit comparari, & qui excedat dolorem tuum. Ipse est Rex Martyrum, & tu es Regina. Ipse est Vir dolorum, & tu es Mulier dolorum.

O anima Christiana! Conscende cum Maria Calvariæ montem, roga illam, ut te recipiat in filium suum. Participem te reddet dolorum ejus. Misce lacrimas tuas Mariæ lacrimis. Noli augere ejus afflictionem. Noli renovare ejus Passionem. Quandocunque peccas mortaliter, denuo crucifigis, Filium ejus O quàm mors hæc illi accidit acerba! O quantum affligit sacrum cor ejus! Consensit illa in mortem corporalem Filii sui: Sed consentire non potest in mortem ejus spiritua-  
lem. Prior vitam nobis reddidit. Altera mor-



mortem nobis affert. Sustine, sicut illa, subtractionem omnis solatii. Persevera, sicut illa, constans in omnibus ærumnis tuis. Non eris Filius Mariæ, nisi cum illâ perseveres ad pedem Crucis. Mulier ecce Filius tuus! Fili ecce Mater tua!

O sancta Virgo! O Mater dolorum! O Regina Martyrum! O Sponsa Crucis! Eligo te in Matrem meam. Recipe me in numerum filiorum tuorum. Imprime cordi meo plagas Filii tui. Congie me fortiter Cruci ejus. Fac me participem dolorum ejus. Si reus sim, æquum est, ut patiar. Si innocens sim, æquum est, ut patiar. Si innocens sim, æquum est, ut te imiter. Perfode cor meum illo doloris gladio, qui cor tuum transfixit. Da mihi bibere calicem fells, quo tu fuisti inebriata. Denique Maternâ tuâ ope assiste mihi morienti, sicut adstitisti morienti Filio tuo. Recipe animam meam in manus tuas, eamque infer Paradiso.

### Verba S. Scripturæ.

*Mulierem fortem quis inveniet.* Prov. 31.  
10.

*Stabat juxta Crucem Jesu Mater.* Joan.  
19. 25.

*Dixit Matri suæ: Mulier ecce Filius tuus.*  
Joan. 19. 26.

*Dicit Discipulo: Ecce Mater tua.* Joan.  
19. 27.



*Tuam ipsius animam pertransibit gladius,  
ut revelentur ex multis cordibus cogitationes.*  
Luc. 2. 35.

*Magna est velut mare contritio tua.* Thren.  
2. 13.

## MEDITATIO CXII.

*De Derelictione Christi: Deus meus, Deus  
meus! ut quid dereliquisti me.*

**O** Quàm terribilis est hæc derelictio! Quæ facit ingemiscere Deum. Quæ facit plorare Deum. Quæ fecit clamare Deum. Quæ est unica causa querelæ ab eo prolatae coram inimicis suis, coram immensâ populi multitudine, paulò ante, quàm moreretur. Quæ audientibus conquestionem ejus, argumentum præbet dubitandi, utrùm sit verus Dei Filius, cum à Patre suo sit derelictus.

JESUS nunquam fuit separatus à gratia. Nunquam fuit separatus à gloria. Nunquam fuit separatus à Divinitate. Semper fuit sanctus. Semper beatus. Semper Deus. Terribilis hæc derelictio non erat, nisi suspensio sensibilis succursûs, quem Divinitas communicabat ejus Humanitati. Umbra erat illius pœnæ, quam sentit peccator, qui in inferno est derelictus à Deo.

Agnosco, mi Deus! quid sit, esse damnum, ex dolore, quem Filius tuus in Cruce sustinuit. Si privatio præsentiæ tuæ sensibilis & consolantis causa fuit, ut ingemisceret Filius



lius tuus tibi substantialiter unitus, quis unquam ferre poterit pondus furoris infiniti? Quis poterit in inferno tolerare separationem æternam, privationem universalem gratiæ tuæ, Amoris tui, Præsentia tuæ, Consolationis tuæ, Gloriæ tuæ, Felicitatis tuæ, auxilii tui protectionis tuæ, omnium, quæ desiderari possunt, omnium quæ amari possunt, cum diluvio malorum omnium in omnem æternitatem?

O mi Deus! ne derelinquas me, quantumvis ego te dereliquerim. Priva me, si necesse sit, solatiis tuis: At non priva me gratiâ tuâ. Si me deseras in vitâ, ne me deseras in morte. Si me deseras in tempore, ne me deseras in æternitate.

O JESU! ego sum, qui peccavi, & tu portasti poenam sceleris mei. Ego debebam ab omnibus esse derelictus, & tu fuisti derelictus pro me. O quàm me terret derelictio tua! O quàm me solatur derelictio tua! Tu fuisti derelictus in morte, ne ego moriens derelinquerer. Ne, quæso Domine derelinquas me, quando totus mundus me derelinquet.

### *Verba S. Scripturæ.*

*Deus meus! Deus meus! ut quid dereliquisti me? Matth. 27. 46.*

*Non derelinquas me Domine Deus meus! ne discesseris à me. Ps. 37. 22.*

*Ne projicias me in tempore senectutis: cum defecerit virtus mea, ne derelinquas me. Ps. 70. 9.*



*Dixerunt inimici mei: Deus dereliquit eum; persequimini, & comprehendite eum, quia non est, qui eripiat. Ps. 70. 11.*

*Non me derelinquas usquequaque. Ps. 118. 8.*

*Ipse dicit: Non te deseram, neque derelinquam. Hebr. 13. 5.*

## MEDITATIO CXIII.

### *De Siti Christi in Cruce.*

**J**ESUS sitit, nec quisquam ei potum porrigit. Pro refocillatione fel, & acetum illi offertur. Voluit sustinere hoc tormentum, ut in se puniret ingluviem nostram, & tolleraret omnes poenas, peccatis nostris debitas. Fuit derelictus in animâ sua, & doloribus consumptus in corpore suo.

Omnes sensus ejus fuerant crucifixi. Oculi ex aspectu crudelium inimicorum suorum. Aures ex illorum blasphemiiis. Odoratus ex infectione loci sœtidi. Tactus ex vulneribus. Gustus ex amaritudine fellis. Memoria ex cognitione nostrorum criminum. Intellectus ex tenebris. Voluntas ex terroribus. Appetitus ex infirmitate, tædio, & tristitia. Nullam habebat corporis partem, immunem à vulnere. Passus est ut purus homo, tanquam nec Deus esset, nec Beatus.

Victima jam pelle suâ fuerat exuta: interiorius verò sana adhuc erat. Flagella pellem discerpserant, non ramen viscera laniarunt. Ut ergo affligeret omnia organa intemperan-



rantia, & ingluviei nostræ, sustinuit crudellem sitim. Effecit, ut intra corpus suum penetraret amaritudo Calicis sui. Fuit nempe tunc liber Divinissimi hujus Agni scriptus intus & foris.

JESUS queritur de siti, probè gnarus, quòd non nisi fel, & acetum sibi esset porrigendum. Cognosci à nobis voluit dolores suos, & ardorem amoris, quo consumebatur. Sitit salutem nostram, Desiderat plura tormenta, plures dolores, quia amor illum cogebat pati & mori.

O JESU Salvator mi! quid facere possum in tuum solatium? Possúmne ego restringere sitim tuam? Absque dubio aliquid à me desideras. Quænam obsecro, est sitis, qua ardes? Novi equidem, quid petas. Desideras, ut ego peccatum hoc deferam. Ut renunciem perversæ huic societati. Ut cruci tuæ appropinquem. Ut dolores tuos considerem. Ut Orationi me impendam. Ut devotioni me dedam. Ut silentium servein, cùm quis me irritat, & offendit. Hæc nempe sunt, quæ à me desideras. Hæc sunt, quibus sitim tuam mihi licebit restringere. Poteróne negare tibi hoc solatium inter dolores tuos atrocissimos? O si & ego arderem tui amore, sicut tu mei amore conflagrasti! O si possem tanta pro te tolerare supplicia, quanta pro me sustinuisti! O quantum languescere me facit amor! O quàm diu jam desidero tui amore mihi & mundo mori, & solvi de carcere mortis hujus!



## Verba S. Scripturæ.

*Ut consummaretur Scriptura, dixit: sitio.*  
Joan. 19. 28.

*O si quis mihi daret aquam de cisternâ Bethleem, quæ est in portâ. 1. Par. 11. 17.*

*Mulier da mihi bibere. Joan. 4. 7.*

*Dederunt in escam fel, & in siti meâ potaverunt me acceto. Ps. 68. 22.*

*Quemadmodum desiderat cervus ad fontes aquarum, ita desiderat anima mea ad te Deus: sitivit anima mea ad te, Deus: sitivit anima mea ad Deum fortem vivum. Ps. 41. 1.*

## MEDITATIO CXIV.

*De sexto Verbo Christi in Cruce.*

## Consummatum est.

**C**Um ergo accepisset Iesus accetum, dixit: *Consummatum est*, quasi diceret. Holocaustum est consummatum. Voluntas Patris expleta est. Evangelium annunciatum. Prophetiæ confirmatæ. Pretium Redemptionis humanæ perfolutum. Ecce peccata hominibus remissa! Captivi liberati. Paradisus apertus. Sacramenta instituta. Dæmones expugnat. Mundus reparatus. Nihil jam mihi superest, quod dicam, quod agam, quod patiar. Nihil mihi superest, nisi ut animam red-



reddam. Ad homines porrò spectabit, bene vivere, & se salvare.

O felix consummatio bonorum! O infelix consummatio impiorum! Consummata sunt omnia, exclamabunt peccatores. Deliciæ nostræ transierunt. Recreationes nostræ abruptæ sunt. Fausti dies nostri defecerunt. Spes nostræ evanescere. Tempus nostrum est elapsum. Vita nostra terminata. Malitia nostra consummata. Inchoanda modò nobis erit perpeffio malorum nunquam finiendorum. Subeunda miseria, nunquam consummanda.

Consummata sunt omnia, dicent Sancti. Infausti dies nostri transierunt. Ærumnæ nostræ terminatæ sunt. Bella nostra finita. Tumultus nostri pacati. Dolores nostri mitigati. Infirmitates nostræ sanatæ. Lacrymæ nostræ exsiccatae. Miseriæ nostræ consummatae. Nulla modò crux nobis superest portanda. Nulla adversa toleranda. Nulla poenitentia subeunda. Properamus ad Regionem Pacis, ubi gaudium nostrum nunquam terminabitur.

Elige, anima Christiana, alterutram ex duabus his consummationibus. Necesse omnino est, dicere aliquando: *Consummatum est.* Dicésne id cum Lazaro in sinu Abrahæ? an cum divite Epulone in inferno? Dicésne id cum Jesu? an cum Pilato Iudice iniquissimo? Quando tempus tuum consummabitur, agnosces, omnia non esse nisi vanitatem.

O Jesu! Author Fidei nostræ, & salutis nostræ Consummator! Utinam pro te vitam meam consumam, ut tuam pro me consumpisti! Utinam adimpleam omnes voluntates



tuas ! Utinam totus consumar ad tuam glori-  
 am ! Utinam ardeam tui amore ! Utinam  
 corpus meum tibi consecrem in victimam !  
 Utinam me indefinenter abnegem ! Utinam  
 omne beneplacitum tuum exequar ! Utinam  
 muneri meo plenè satisfaciam ! Utinam mo-  
 riens verè dicere possim : *Consummatum est.*

### Verba S. Scripturæ.

*Consummatum est.* Joan. 19. 30.

*Hæc unâ oblatione consummavit in sempi-  
 ternum sanctificatos.* Hebr. 10. 14.

*Aspicientes in authorem fidei & consumma-  
 torem Jesum.* Hebr. 12. 2.

*Didicit ex iis , quæ passus est , obedientiam ;  
 & consummatus , factus est omnibus obtem-  
 perantibus sibi causa salutis æternæ.* Hebr.  
 5. 8.

*Si annis multis vixerit homo , & in his o-  
 mnibus lætatus fuerit , meminisse debet tene-  
 brosi temporis , & dierum malorum , qui , cum  
 venerint , vanitatis arguentur præterita.* Ec-  
 cle. 11. 8.





## MEDITATIO CXV.

*De ultimo Verbo Christi in Cruce.*

**Pater!** in manus tuas commendo  
Spiritus meum.

**J**ESUS se tradidit Patri, cum ab ipso fuit derelictus. Docet nos mori, sicut nos docuit vivere. Docet nos fiduciam, postquam docuit nos Patientiam.

Imitemur Jesum viventem. Imitemur Jesum morientem. Quiescamus inter expansa ejus brachia. Commendemus Spiritum nostrum in manus ejus. Ipse Pater noster est, quomodo posset nos deferere? Ipse Salvator noster est, cupiétne nos damnare?

Mori jam proximus, dicam Christo Jesu: Pater mi! commendo tibi Spiritum meum. Egressus hic est à te veluti ex suo principio: ecce revertitur ad te, veluti ad finem suum. Est spiritus oris tui. Est emanatio spiritus tui. Est pretium sanguinis tui. Est Sanctuarium gratiæ tuæ. Commendo illum in manus tuas, quæ pro ipso clavis sunt perforatæ. Commendo illum cordi tuo, quod ejus amore conflagravit. O Domine! curam habe spiritus mei, & quando is reliquerit corpus suum, ne quæso illum derelinquas. Nisi recipiatur in manus tuas, heu! salus ejus est desperata. O Domine! ne sinas perire animam, quam tanto pretio redemisti.



Egredere anima mea , desere corpus tuum. Cur mortem adeò formidas? JESUS pro te mortem suam interponit. Ipse te Patri suo commendavit , quando ipsi commendavit spiritum suum. Qui Deo adhæret , unus cum ipso Spiritus efficitur. Egredere è corpore tuo , anima Christiana ! in Nomine Patris , qui te creavit ; in Nomine Filii , qui te redemit ; in Nomine Spiritûs sancti , qui te sanctificavit. JESUS vocat te ad Paradisum suum. Inclina caput tuum in Signum Obedientiæ. Ne timeas ; segura enim es intra manus JESU Christi.

### Verba S. Scripturæ.

*Clamans voce magnâ , Pater ! in manus tuas commendo Spiritum meum , & hæc dicens expiravit. Luc. 23. 46.*

*Inclinato capite tradidit Spiritum. Joan. 19. 30.*

*Deus , Rex noster ante sæcula , operatus est salutem in medio terræ. Ps. 73. 12.*

*Qui adhæret Domino , unus Spiritus est. 1. Cor. 6. 17.*

*Si Deus pro nobis , quis contra nos ? Rom. 8. 31.*

*Itaque & hi , qui patiuntur secundum voluntatem Dei , fidei Creatori commendent animas suas in benefactis. 1. Pet. 4. 19.*



## MEDITATIO CXVI.

*De Morte Filii DEI.*

**J**ESUS mortuus est , quis mori timebit ? Mortuus est pro nobis ; quis recusabit mori pro illo ? Mortuus est consumptus doloribus ; quis mori optabit consumptus deliciis ? Mortuus est , ut nos redimeret ; quis alteri volet servire Domino , quàm ipsi ? Mortuus est propter peccata nostra , quis audebit , peccando denuo illum crucifigere ?

O bonum Pastorem , qui mortuus est pro ovibus suis. O magnum Sacerdotem , qui immolatus est pro hominibus. O fidelem Amicum , qui dilexit nos usque ad mortem. O Divinum magistrum , qui Cathedram suam erexit in Calvariæ monte !

O Jesu ! cùm tu mortuus sis pro me , æquum est , ut & ego moriar pro te. Quoniam exemplum mihi dedisti sanctæ mortis , æquum est , ut moriar sicut tu. Veniam itaque indulgeo omnibus inimicis meis. Spero Paradisum à te mihi donandum. Commenda me , quæso te , benignissimæ Matri tuæ. dic illi , ut sedulam mei curam gerat. Ah ! Noli me derelinquere mi Deus ! cùm totus mundus me deseret. Robora me gratiâ tuâ , cùm perdidero omnes vires corporis mei. Sitio , desidero videre te. Sitio , desidero sanctè mori. Quando tandem adveniet finis  
vi-



vita meæ? Quando consummabo sacrificium meum?

O Pater mi in manus tuas commendo Spiritum meum. Unio ac conjungo mortem meam cum morte Filii tui. Memento quæso, quòd me redemerit pretioso sanguine suo. Ne perdas, obsecro, animam meam, quæ tanto pretio est redempta.

### Verba S. Scripturæ.

*Inclinato capite tradidit Spiritum.* Joan. 18. 30.

*Iustus perit, & non est, qui recogitet in corde suo.* 11. 57. 1.

*Recogitate eum, qui talem sustinuit à peccatoribus adversus semetipsum contradictionem ut ne fatigemini, animis vestris deficientes.* Hebr. 12. 3.

*Pro impiis mortuus est.* Rom. 5. 6.

*Christus pro nobis mortuus est.* Ibid. 9.

*In hoc Christus mortuus est, & resurrexit, ut & mortuorum, & vivorum dominetur.* Rom. 14. 9.

*Mortui estis, & vita vestra abscondita est cum Christo in Deo.* Ibid. 3. 3.



## MEDITATIO CXVII.

*Oratio circa septem Stationes Filii Dei  
Patientis.*

### STATIO I.

**O** JESU, Salvator mi! qui sudâsti sanguinem & aquam in monte Olivarum, ex consideratione tormentorum, & peccatorum meorum; qui expoliâsti te fortitudine tuâ, ut indueres infirmitates meas. Adoro te, undique perfusum sanguine tuo. Gratias ago sacratissimo Cordi tuo, quod pro me fuerit tam acerbè afflictum. Detestor omnia peccata, quæ causa fuêre tanti mœroris tui. Statuo firmiter, mori potiùs, quàm unquam deinceps te affligere. Largire mihi gratiam, ut possim, sicut tu, concipere dolorem intensissimum de iniquitatibus meis, ut resistam usque ad sanguinem tentationibus dæmonis & carnis, atque ut tuo exemplo animatus, me in rebus omnibus voluntati Patris tui plenè conformem.

### STATIO II.

**O** JESU, Domine mi! qui fuisti alapis percussus, illusus, & pessimè exceptus in domo Annæ & Caiphæ: Gratias tibi ago, quod mei amore tot injurias & opprobria sis perpeffus. Heu! quoties alapis te percussi,  
&



& opprobriis affeci in persona Proximi mei? quia tibi ipsi illatum æstimas omne malum, quod aliis infertur. Rogo humillimè veniam, & firmiter statuo, deinceps tui amore tolerare omnes injurias mihi inferendas, & nunquam ampliùs te offendere in personâ fratrum meorum, nec opere, nec verbis, nec judicio, nec voluntate.

### STATIO III.

**O** JESU, mi Rex; qui fuisti ludibrio habitus ab Herode, & Judæis, quando tibi prætulerunt latronem seditiosum, & homicidam; veniam à te peto, quòd toties tibi prætulerim dæmonem, ac vilissimas creaturas. Promitto, nunquam deinceps ampliùs te despicere. Tu semper eris Rex cordis mei. Moriar potius, quàm ut, quòd hæctenus, pro dolor! sæpiùs egi, te abijciam infra pedes luciferi, Latronis seditiosi, & homicidæ omnium hominum.

### STATIO IV.

**O** JESU purissime, & castissime inter omnes homines! cujus caro innocens lacerta fuit ictibus flagellorum in domo Pilati, ut expiares delectationes scelestas, quas indulsumus carni nostræ. Agnosco, quòd mei amore sustinueris tormenta usque adeò crudelia: doleo, quòd te tot vulneribus consciderim! & toties ea renovârim per delectationes illi-  
citas,



ci-  
n,  
m,  
ra-  
um  
co-  
o,  
ci-  
n,  
m,  
ra-  
um  
co-  
o,  
bi-  
bi  
ci-  
æ-  
as.  
le-  
o-  
rô  
es  
o-  
n-  
a-  
ut  
si-  
o-  
a:  
n'  
li-

ci-  
tas, quæ sensibus meis indulgi. Obsecro  
te per dolores tuos, ut sanctifices corpus  
meum, & animam meam, eamque laves pre-  
tioso tuo sanguine ab omnibus iniquitatibus  
suis, neque unquam permittas, ut caro mea  
sanguine tuo emundata, ullo deinceps pec-  
cato maculetur.

S T A T I O V.

O JESU Regum Maxime! qui fuisti spinis  
coronatus: & humeris tuis portasti si-  
gnum Regale Principatus tui; agnosco, &  
veneror te, ut Regem meum, quantumcun-  
que sis despectus, & deformatus. Et quo-  
niam in toto corpore tuo non est inventa  
sanitas, nolo deinceps ullam voluptatem in-  
dulgere corpori meo: sed vivere cupio in  
dolore, ut sim fidelis servus tuus, & dignum  
membrum Capitis, mei amore spinis coro-  
nati.

S T A T I O VI.

O JESU Redemptor mi! qui pro me fuisti  
Crucifixus, & omnem sanguinem tuum  
profudisti, ut me eriperes de potestate dæ-  
monis, cui mancipatus eram; gratias tibi  
ago de incomparabili hoc amore, quo me di-  
lexisti; de tantis tormentis, quæ pro me su-  
stinuisti: Exosculor cum reverentiâ sacros Pe-  
des tuos, & sacras manus tuas pro me cla-  
vis perforatas. Adoro sacrum tuum Cor,  
quod



quod mei amorē lanceâ fuit apertum, & promitto potius mori, quàm deinceps unquam te intra cor meum crucifigere.

## S T A T I O VII.

**O** JESU, vita mea! qui mortuus es pro me, atque à Patre tuo fuisti derelictus, ne ego in morte derelinquerer. O mitissime Agne, pro salute hominum immolate! Victimam Amoris, & Patientiæ, qui fuisti consumptus atrocitate dolorum! O Sancte Sanctorum! O Rex Regum! Quid agere possum, ut gratum me sistam tantæ Bonitati? Utinam mori possem pro te, sicut tu mortuus es pro me!

Credo, te esse Salvatorem meum: & nisi hoc crederem, penitus desperarem. Spero, benignè à te mihi condonanda omnia peccata mea, & præmia æterna largienda, quoniam vitam tuam mihi donasti. Detestor ex animo immania crimina mea, quæ sunt causa mortis tuæ. vitam potius ponere paratus, quàm ut te unquam interficiam in corde meo, quia mors hæc infinities acerbior tibi est, & ignominiosa, quàm fuerit mors Crucis. Veniam à te supplex rogo pro omnibus, qui me offenderunt. Totum me consecro sanctissimæ Matri tuæ, quam & in meam Matrem eligo, ac mori desidero intra brachia ejus. In manus tuas commendo Spiritum meum, & obtestor te per extremam derelictionem tuam, ne me derelinquas in horâ mortis meæ; sed, ut me recipias in Paradisum tuum, ut ibi te  
vi-



videam, amem, laudem, & benedicam in æternum. Amen.

*Oratio hæc recitari potest tempore Missæ, ante Confessionem & Communionem; præcipue verò cum quis æger decumbit, & quovis per annum die Veneris coram imagine Christi crucifixi. Oportet nonnihil inbæverere cuilibet Stationi, & ex intimo cordis elicere actus, qui ore pronuntiantur.*

## MEDITATIO CXVIII.

*De Sepulturâ IESU Christi.*

**J**ESUS ex Cruce depositus est in sepulchrum. Ecce finem laborum ejus. Ecce locum quietis ejus. Ecce terminum viarum ejus! Discipuli ejus fidem ferè perdidere, quia amiserunt ejus præsentiam. Timidi sunt, & terrore percussi, quia illum non vident, nec audiunt amplius.

Beatus ille, qui recipit intra cor suum JESUM è Cruce depositum! Granum frumenti, ut fructum afferat, debet mori, & in terram abscondi. Brachia Sacerdotis in altari, sunt brachia Crucis. Cor tuum est sepulchrum, in quo Christus optat quiescere.

Beatus ille, qui crucifixus est, qui mortuus, & sepultus est. Qui jacet in terrâ absconditus. Qui pedibus conculcatur. Qui latet hominibus ignotus. Qui quiescit in Deo. Resurget paulò post cum JESU Immortalis, & Impassibilis, sicut ipse.

Q

Bea-



Beatus ille, qui conservat Fidem in morte,  
& caligine sensuum. Qui non perdit spem,  
tamen si amiserit præsidium suum. Qui non  
cessat diligere, tamen si careat omni solatio.

O JESU! Absconde me in sepulchro tuo.  
Involve me sacro Sudario tuo. Utinam de-  
inceps latere possim ignotus omnibus homi-  
nibus! Utinam moriar omnibus sensibus me-  
is! Paratus sum tecum descendere usque ad  
carceres inferni. Si enim tecum sim, nihil  
habeo, quod timeam. Infernus te præsentem  
mihi foret Paradisus. Paradisus, te non præ-  
sentem, mihi foret infernus.

### Verba S. Scripturæ.

*Accepto corpore, Joseph involvit illum in  
sindone mundâ: & posuit illum in monumento  
suo novo, quod exciderat in petrâ. Matth. 27.  
59. & 60.*

*Mulier, quid ploras? Tulerunt Dominum  
meum, & nescio, ubi posuerunt eum. Joan.  
20. 13.*

*Repleta est malis anima mea, & vita mea  
inferno appropinquavit. Pl. 87. 4.*

*Æstimatus sum cum descendentibus in lacum:  
factus sum, sicut homo sine adiutorio, inter  
mortuos liber. Pl. 87. 5.*

*Posuerunt in lacu inferiori in tenebrosis,  
& in umbrâ mortis. Pl. 87. 7.*

*Sicut vulnerati dormientes in sepulchris. Pl.  
87. 6.*



**MEDITATIO CXIX.**

*De Resurrectione IESU Christi Domini nostri.*

**J**ESUS surrexit à mortuis. Vitâ fruitur gloriosâ. Prodiit redivivus è sepulchro. Mortem devicit. De Sathanâ triumphum egit. Confregit portas inferni. Spolia inde abstulit. Perterrefecit sepulchri custodes. Confudit Judæos. De omnibus hostibus suis triumphavit.

Anima mea! noli ultrâ plorare. JESUS recepit novam vitam. Non morietur deinceps in corde tuo, nisi peccatis tuis illum rursus crucifigas.

JESUS resurrexit in animabus nostris. Reversus est in Regnum suum. Dæmones inde ejecit. Triumphavit de peccato. Cupiditates nostras captivas detinet. Moratur intra nos per gratiam suam. Vivit per spiritum suum. Regnat per amorem suum. Quiescit per pacem suam. Tota Ecclesia est resuscitata. Totum ejus corpus est extra sepulchrum. Omnia ejus membra rursus sunt animata. Nullum superest mortuum, nullum ægrum.

Anima mea! noli ultrâ plorare. JESUS recepit novam vitam. Non morietur deinceps in corde tuo, nisi peccatis tuis illum rursus crucifigas.



Mane nobiscum, amantissime Jesu! Ecce nox appropinquat. Ecce dies declinat ad occasum. Ecce dæmones adversus me conjurant. Ecce leones rugiunt. Ecce passiones, & indomiti affectus rebellionem concitant. Ecce mali habitus resuscitantur. Ecce mundus arma contra me stringit. Ecce caro rursus invalescit. Vita tua, mi Jesu! in tuto non est. Infernus contra te conspiravit. Impii conjurârunt in necem tuam. Renovare moliantur Passionem tuam.

Anima mea! noli ultrâ plorare. Jesus recepit novam vitam. Non morietur deinceps in corde tuo, nisi peccatis tuis illum rursus crucifigas.

O insensati Galatæ! Quid machinamini? An non cognoscitis ampliùs Jesum Redemptorem vestrum? Ante biduum plorâstis mortem ejus. Et modo rursus illi necem paratis? Jam flagra arripitis, quibus eum discerpatis? Spinas jam colligitis, quibus eum coronetis? Præparatis Crucem, cui illum de novo affigatis?

Quid, obsecro, mali tibi intulit, ut illum rursus velis crucifigere? An reus est mortis, quia te amavit usque ad mortem? An mortem fuit promeritus, quia te salvavit?

Anima mea! noli ultrâ plorare. Jesus recepit novam vitam. Non morietur deinceps in corde tuo, nisi peccatis tuis illum rursus crucifigas.



**Verba S. Scripturæ.**

*Surrexit Dominus verè, & apparuit Simo-  
ni. Luc. 24. 34.*

*Christus resurgens ex mortuis jam non mo-  
ritur, mors illi ultrà non dominabitur. Rom.  
6. 9.*

*Rursus crucifigentes sibi metipsis Filium Dei,  
& ostentui habentes. Hebr. 6. 6.*

*Igitur, si consurrexistis cum Christo, quæ  
sursum sunt, quærite, ubi Christus est in dex-  
tera Dei sedens: quæ sursum sunt sapite, non  
quæ super terram. Col. 3. 1. & 2.*

**MEDITATIO CXX.**

*De vulneribus IESU Christi.*

**J**ESUS retinet Vulnera, etiam cùm à mor-  
tuis resurrexit. Ne te exterreant vulnera,  
quæ tibi remanent post resurrectionem tuam.  
Nihil mali est, ea sentire. Magni meriti est,  
ea tolerare. Esto impassibilis, ne ulli cupi-  
ditati indulgeas. Esto immobilis, ne ulli  
tentationi consentias.

Vulnera JESU illuminant fidem nostram. Fir-  
mant spem nostram. Inflammant charitatem  
nostram. Non possumus deinceps dubitare  
de ejus erga nos amore. Vidimus cor ejus  
per vulnera. Non debemus ampliùs diffiden-  
tià deijci. JESUS est advocatus noster in cæ-  
lo. Orat pro nobis per tot ora, quot vulnera  
exhibet in suo corpore. Clavi sunt claves,

Q3

qui-



quibus aperta est hæc Arca Redemptionis nostræ. Omnes thesauri in ea reconditi, modò sunt in nostra dispositione.

O Jesu Salvator mi ! Quàm solantur me Vulnera tua ? Quàm securum me reddunt vulnera tua ? Quantum me inflammant vulnera tua ? Promanat inde balsamum, quod sanat omnia Vulnera mea. Quis audebit me accusare, qui noverit, te esse Advocatum meum ? Quis audebit me condemnare, qui noverit, te esse Judicem meum ? Quis audebit mihi adversari, qui noverit, te esse Salvatorem meum ?

O Divine Salvator ! Imprime mihi sacra tua Stigmata. Imprime illa animæ meæ, & corpori meo. Quis vivere possit sine vulnere, videndo te undique vulneribus coopertum ? Non possum amare cor meum, nisi vulneratum sit, sicut tuum. Heu ! Quod solatio perfundet prædestinatos, immane tormentum erit damnatis.

### Verba S. Scripturæ.

*Ostendit eis manus & pedes.* Luc. 24. 40.

*Ostendit eis manus & latus.* Joan. 20. 20.

*Quid sunt plagæ istæ in medio manuum tuarum ?* Zach. 13. 6.

*His plagatus sum in Domo eorum, qui diligebant me.* Ibid.

*Ecce in manibus meis descripsi te.* Is. 49. 16.

*Quem tu percussisti, persecuti sunt, & super dolorem Vulnerum meorum addiderunt.* Psalm. 68. 27.



## MEDITATIO CXXI.

*De IESU bono Pastore.*

**J**ESUS est Pastor bonus. Cognoscit omnes oves suas. Cognoscit illas, sicut ille cognitus est à Patre suo. Vitam illis donat, sicut ipse recipit à Patre suo. Omnes vocat nominatim. Deducit illas per vias rectas. Peculiari providentiâ illas gubernat. Semper ante illas vadit, Pedum Crucis in manu gerens. Restituit illas in viam rectam, si fortè inde aberrent. In aspera dumeta lætus se conijcit, ut perditam oviculam inde eripiat. Inventam sustollit in humeros, eamque ad ovile reportat. Magnum inde testatur gaudium, nec quidquam molesti infert ovi perditæ & recuperatæ.

Jesus est Pastor bonus. Bene nutrit oves sibi charissimas. Ducit illas in pascua pingua. Nutrit illas Verbo suo. Saginat illas Carne sua. Inebriat eas Sanguine suo. Roborat eas gratiâ suâ. Animat eas spiritu suo. Ditat eas meritis suis. Quis Pastor nutrit oves suas carne suâ, & sanguine suo, Sicut Christus?

Jesus est Pastor bonus. Vitam suam ponit pro ovibus suis. Non se nutrit carnibus ovium. Non se vestit lanis, & pellibus ovium. Seipsum exspoliavit, ut eas vestiret. Jejuna- vit, ut eas nutriret. Non laborat, nisi pro illis. Tuetur illas contra lupos, quos arcet,



ne gregi appropinquent. Adjuvat oves, ut  
lupos repellant. Sublevat eas, cùm lapsæ  
sunt. Portat eas, cùm tristes sunt. Solatur  
eas, cùm tristes sunt. Sanateas, cùm agræ  
sunt. Resuscitat illas, cùm mortuæ sunt.

O JESU Quàm verè es Pastor bonus! sed  
quàm perversas habes oves! Subducunt se  
directioni tuæ. Contemnunt pascua tua. No-  
lunt cibum capere de mensâ tuâ. Ultro lu-  
pos undique inquirunt. Ululant, & currunt  
cum lupis, ac cum illis oves devorant.

O Pastor mi Divine! sequar te, quocunque  
ieris. Nunquam me avertam à semitis tuis.  
Tecum montes conscendam. Tecum descen-  
dam in valles. Nunquamde te conquerar.  
Semper directioni tuæ acquiescam.

### Verba S. Scripturæ.

*Ego sum Pastor bonus. Joan. 10. 11.*

*Cognosco oves meas, & cognoscunt me meæ.*

*Joan. 10. 4.*

*Ante eas vadit, & oves illum sequuntur.*

*Joan. 10. 4.*

*Et ego non sum turbatus, te Pastorem se-  
quens. Jerem. 17. 16.*

*Dominus regit me, & nihil mihi deerit,  
in loco pascuæ ibi me collocavit. Psal. 22. 1.*

*Erravi sicut ovis, quæ periit, quære ser-  
vum tuum, Pl. 118. 176.*



## MEDITATIO CXXII.

*De ovibus JESU Christi.*

**Q**ui amat Pastorem suum, sequitur in omnibus directionem ejus. Audit, & agnoscit vocem ejus. Cum ipso secura degit. Perit, cum ab ipso deviat. Bene progreditur, cum ipsum sequitur.

Jesus commisit sancto Petro curam gregis sui. Vox ejus auditur in Ecclesia. Extra Ecclesiam non auditur. Virtutes sine obedientia sunt magni passus extra rectum tramitem. Errat potius quam progreditur, qui sine Superiorum directione vult progredi.

Ovis non ratiocinatur. Vadit, quò ducitur. Nunquam rectius progreditur, quam cum sequitur Pastorem suum. Ipsius ductui se totam committit. In ejus societate nihil timet. Sine judicio est, qui nimium fidit suo judicio. caret directione, qui se non sinit in omnibus dirigi.

Ovis non murmurat. Non erumpit in impatientiam. Non offendit Pastorem suum. Non queritur de ejus directione. Facile tonderi se patitur. Libens ad mortem vadit. Jugulari se sinit. Moritur, & obmutescit. Summâ Patientiâ opus est, ut tolerantur homines impatientes. Volunt hi, ut Deus Patiatur ab ipsis: ipsi autem nihil volunt pati à Deo.



Ovis non est armata dentibus. Non mordet alias oves. Est mitissimum animalium. Nihil habet ferociæ, nihil sævitix. Odit singularitatem. Servat unitatem. Quærit societatem. Complacet sibi in communitate. Signa Ovium JESU Christi, sunt Mansuetudo, & Charitas.

An tu es ovis JESU Christi? An amas Pastorem Ecclesiæ? An sequeris ductum Dei? An te totum permittis ejus Providentiæ? An obedis superioribus tuis? An renunciâs propriis dictaminibus tuis? An non quereris, si quam patiaris jacturam? An non murmurâs in afflictionibus tuis? An diligis proximum tuum? An nullo verbulo illum offendis? An ejus miseriis compateris? An non illi irasceris?

### Verba S. Scripturæ.

*Qui regis Israël, intende. Qui deducis, velut ovem Joseph. Ps. 79. 2.*

*Vestigia ejus secutus est pes meus. Job. 23.*

II.

*Sicut ovis ad occisionem ducetur, & quasi agnus coram tondente se obmutescet, & non aperiet os suum. Il. 53. 7.*

*Obmutui, & non aperui os meum, quoniam tu fecisti. Ps. 38. 10.*

*In hoc cognoscent omnes, quia discipuli mei estis, si dilectionem habueritis ad invicem. Joan. 13. 35.*

*Si invicem mordetis, & comeditis, videte ne ab invicem consumamini. Gal. 5. 15.*



## MEDITATIO CXXIII.

*De Ascensione Jesu Christi.*

**Q**uò progredieris Divine Pastor ? Itáne deseris oves tuas ? Quò progredieris amantiſſime Pater ? Itáne deſeris filios tuos ? Quò progredieris invictiſſime Imperator ? Itáne deſeris milites tuos ? Quid facient miſeræ oviculæ in medio luporum ? Quid facient filii in medio platearum ? Quid facient milites in medio ſuorum hoſtium ?

Abi Dilecte mi ! Deſere terram hanc ingratam , quæ tam crudeliter te excepit . Corpus tuum immortale , non debet morari in regione mortis . Corpus tuum incorruptibile , non debet morari in loco corruptionis . Corpus tuum impaſſibile , non debet morari in loco afflictionis .

Vade Imperator invicte , mundi Domitor . Cælum conſcende , quod ſanguine tuo comparâſti . Accipe poſſeſſionem Regni , tibi ab omni æternitate debiti . Deduc tecum , ad honorandum triumphum tuum , victrices turmas . Noli curſum ſiſtere , donec ſummum Cæli culmen attigeris . Ascende , ut conſideas in Throno Dei . Æquum eſt , ut poſt tantos labores quietem capias . Æquum eſt , ut poſt tantam humiliationem gloriâ & honore coroneris .

Progredere Arca Domini , poſtquam tormentorum procellis diu fuiſti agitata . Progre-



grederet, ut quiescas in summo culmine montium Armeniæ. Exurge, Domine, in Requiem tuam, tu, & Arca sanctificationis tuæ. Confregisti portas inferni. Pande nobis ostia cæli. Intra in palatium gloriæ tuæ. Vade Parare nobis locum. Vade, ut præsentem nos Patri tuo. Vade, ut illi exhibeas Vulneta tua. Vade, ut sis Mediator noster. Vade, ut mittas nobis Spiritum sanctum tuum.

O JESU ! Quoniam in cælo jam regnas gloriosus, nullam reperio consolationem in terrâ. Ubi est thesaurus meus, ibi est & cor meum. Anima mea solvi desiderat vinculis corporis, ut possit frui præsentia tuâ. Quando tandem liber evadam ex hoc exilio? Quando revertar ad Patriam, mihi optatissimam?

O JESU ! Spes animarum derelictarum, Consolatio animarum afflictarum. Tu promissisti, quod velles attrahere omnia ad teipsum, si exaltatus fueris à terrâ. Ecce ! elevatus jam es super omnes cælos, adimple modò promissa tua. Eripe me ex hoc mundo maligno. Avelle me à creaturis. Trahe me fortiter, quia nimis arctè terræ adhæreo. Trahe me celeriter, quia tædet me porro vivere, Heu ! qualis vita ! Heu ! qualis mors !

O chara vita mea ! Da mihi, obsecro, optatam mortem, qua mihi ipsi moriar, tibi-que æternum vivam.



**Verba S. Scripturæ.**

*Et Dominus quidem JESUS, postquam locutus est, assumptus est in cælum, & sedet à dextris Dei. Marc. 16. 19.*

*Ascendens in altum captivam duxit captivitatem: dedit dona hominibus, Ephes. 4. 8.*

*Non turbetur cor vestrum, vado parare vobis locum, accipiam vos ad meipsum, ut, ubi sum ego, & vos sitis. Joan. 14. 1. 2. & 3.*

*Ego, si exaltatus fuero à terrâ, omnia traham ad meipsum. Joan. 12. 32.*

*Trabe me post te. Cant. 1. 3.*

**MEDITATIO CXXIV.**

*De adventu Spiritus sancti.*

**N**ON sumus membra JESU Christi, nisi vivamus spiritu ejus. Spiritus JESU est spiritus vitæ, qui nos animat. Est Spiritus Gratiæ, qui nos sanctificat. Est Spiritus Sapientiæ, qui nos edocet. Est Spiritus Amoris, qui nos arctâ charitatis unionem conglutinat. Est Spiritus Pacis, qui nos pacificat. Est Spiritus Puritatis, qui nos emundat. Est Spiritus libertatis, qui nos à cupiditatum laqueis eximit. Est Spiritus Gaudii, qui nos solatur. Est Spiritus Humilitatis, qui nos humiliat. Est Spiritus Obedientiæ, qui nos efficit obsequentes.



Spiritus Jesu, nos ex hominibus efficit Deos. Ex peccatoribus justos. Ex infirmis fortes. Ex tristibus lätos. Ex frigidis ferventes. Ex iracundis mansuetos. Ex ignorantibus sapientes. Ex timidis animosos.

Spiritus Jesu, non descendit in superbos. Non quiescit in cordibus turbulentis. Detestatur animas inquinatas. Averſatur mentes, vanitati deditas. Non consentit cum carne, cui bellum movet internecinum. Non poterat descendere super Apostolos, quamdiu fruebantur sensibili præſentiâ Jesu Christi.

Spiritus Jesu vivit in nobis per gratiam. Moratur per charitatem. Regnat per amorem. Quiescit per pacem. Affligitur per peccatum veniale. Extinguitur per mortale. Amittitur per amorem mundi. Depellitur per amorem carnis.

O mi Deus! Quàm suavis est Spiritus tuus! Quàm austerus est meus! Quàm sanctus est tuus! Quàm profanus est meus! Quàm humilis est tuus! Quàm superbus est meus!

O sancte Spiritus! Pater pauperum, Consolator afflictorum. Veni & descende super nos. Veni & consolare nos. Illustra nos Lumine tuo. Dirige nos Sapientia tuâ. Anima nos Gratiâ tuâ. Sanctifica nos Amore tuo. Confirma nos fortitudine tuâ. Penetra nos unctione tuâ. Adopta nos Charitate tuâ. Pacifica nos præſentiâ tuâ. Salva nos misericordiâ tuâ.



**Verba S. Scripturæ.**

*Spiritus est, qui vivificat. Joan. 6. 64.*

*Repleti sunt omnes Spiritu sancto. Act. 2. 4.*

*Charitas Dei diffusa est in cordibus nostris  
per Spiritum Sanctum, qui datus est nobis.  
Rom. 5. 5.*

*Si quis Spiritum Christi non habet, hic non  
est ejus. Rom. 8. 9.*

*Quicumque Spiritu Dei aguntur, ii sunt  
Filii Dei. Rom. 8. 14.*

*Si Spiritu vivimus, Spiritu & ambulemus.  
Gal. 5. 25.*

**MEDITATIO CXXV.**

*De Sanctissima Trinitate.*

**T**Ot credit homo Deos, quot diligit creatu-  
ras. Adorat Trinitatem terræ, & con-  
temnit Trinitatem Cæli. Non æstimat, nisi  
splendidos mundi honores. Non quærit, nisi  
terræ divitias. Non desiderat, nisi delecta-  
tiones sensuum. Spernit potentiam Patris.  
Contemnit Sapientiam Filii. Despicit bonita-  
tem Spiritûs sancti.

Estne hoc credere Deum sapientem, si mur-  
mures contra ejus Providentiam? Estne hoc  
credere Deum omnipotentem, si iram ejus  
non timeas? Estne hoc credere Deum sanctum,  
si tot sceleribus eum offendas? Estne hoc cre-  
dere Deum intaminatum, si voluptatibus sen-  
suum



suum totus inhæreas? Estne hoc, credere Deum bonum, si illum non diligas? Estne hoc credere Deum infinitæ Majestatis, si eum non reverenter adores? Estne hoc credere Deum Beneficum, si nullas ei gratias referas:

O sanctissima Trinitas! Benedico te, Adoro te. Amabo te in tempore & æternitate. Gloria sit Patri, qui me creavit. Gloria sit Filio, qui me redemit. Gloria sit Spiritui sancto, qui me sanctificavit. Gloria sit Patri, qui me sustentat per suam Potentiâ. Gloria sit Filio, qui me gubernat per suam Sapien-  
tiam. Gloria sit Spiritui sancto, qui me sancti-  
ficat per suum Amorem. Gloria sit Patri, qui  
conservat meam essentiam. Gloria sit Filio,  
qui intellectum meum illuminat. Gloria sit  
Spiritui sancto, qui consecrat voluntatem me-  
am. O utinam sanctissima Trinitas semper  
sit benedicta ab omnibus Angelis, & homi-  
nibus nunc, & in æternum! Amen.

### Verba S. Scripturæ.

*Euntes ergo docete omnes gentes baptizantes  
eos in Nomine Patris, & Filii, & Spiritus  
sancti. Matth. 28. 19.*

*Tres sunt, qui testimonium dant in celo,  
Pater, Verbum, & Spiritus sanctus, & bi-  
tres unum sunt. 1. Joan. 5. v. 7.*

*Sanctus, Sanctus, Sanctus, Dominus Deus  
exercituum, plena est omnis terra gloria ejus.  
II. 6. 3.*



*De Institutione Sacro-sanctæ Euchar. 257*

Omne, quod est in mundo, concupiscentia  
carnis est, & concupiscentia oculorum, &  
superbia vitæ. 1. Joan. 2. 16.

## MEDITATIO CXXVI.

In Forma Dialogi.

*De Institutione Sanctissimi Sacramenti  
Eucharistiæ.*

Discipulus.

**L**Oquar ad Dominum meum, cum sim pul-  
vis, & cinis. O mi Deus, quàm ad-  
miranda est sapientia tua! Quàm profunda  
sunt mysteria tua! Cur nobiscum moraris in  
terra, cum corpus tuum sit gloriosum? No-  
bilissimum omnium corporum, nunquid ha-  
bitare debet in summo cæli solio? Thronus  
tuus est Firmamentum. Terra est scabellum  
pedum tuorum. Cur non sedem figis in Pa-  
latio Gloriæ tuæ? Cur inhabitas lutosam hanc  
terram?

Magister.

Terram incolo, ut satisfaciam amorî meo.  
Conversor cum hominibus, ut satisfaciam de-  
siderio eorum. Versor cum Discipulis meis,  
ut consoletur eos meâ præsentiâ. Habito inter  
oves meas, ut eas defendam à lupis. Relin-  
quo me Ecclesiæ meæ, ut ei sim loco Victi-  
mæ.

R



mæ. Immolo me super Altare, ut homagium præstem Patri meo. Non haberetis Religionem, nisi haberetis Sacrificium. Antiqua jam sunt abrogata. Solus ego sum, qui possum immolari. Corpus meum est in Cælo, sicut in loco suo naturali. Corpus meum est in terra, sicut in loco Sacramentali. Cùm descendi in terram, cælum non reliqui. Et cùm rursus ascendi in cælum, terram non deserui.

### Discipulus.

Loquar adhuc semel ad Dominum meum, cùm sim pulvis & cinis. Cur in terra nobiscum manens, non te oculis nostris spectabilem exhibes? Cur te abscondis sub speciebus Sacramentalibus, cùm amari à nobis desideres? Omnium corda sanctâ amoris violentiâ ad te raperes, si te oculis nostris manifestares.

### Magister.

Ego sum Deus absconditus, mori te oportet, ut me videas. Abscondi Divinitatem meam sub formâ hominis. Et Humanitatem meam texi velamine Panis.

Vita tua est status fidei, in quo Corpus meum debet esse obvelatum. Vita tua est status meriti, in quo mens tua debet humiliari. Adam non credidit verbo meo, sed credidit verbo serpentis. Cæca fides reparare debet curiositatem ejus. Fides consecrat mentem tuam. Humiliat arrogantiam tuam. At tollit cognitiones tuas. Subjicit te Deo.

Cre-



Credere oportet, ut videas. Fides præcedit gloriam. Et quomodo Fidem habebis, si, quod credis, non sit absconditum?

### Discipulus.

Loquar adhuc semel ad Dominum meum, cum sim pulvis, & cinis. Absque dubio humanitas tua, ut sit objectum fidei nostræ, æquè debet esse abscondita, ac divinitas tuæ? sed cur sub forma panis? Num conveniens est status hic Majestati tuæ? Quantus tibi debetur honor? Quis autem condignè honorare te potest, hâc sub figurâ reconditum?

### Magister.

Sapientia mea non esset infinita, nisi esset incomprehensibilis. Non esset admiranda, nisi creatæ intelligentiæ vim longè transcenderet. Sapientia fugit meridianam diei lucem, & se abdit in tenebris. Bonitas fugit tenebras, & vult palàm splendescere. Sapientia se abscondit, quia vult suscipi. Bonitas se prodit, quia vult amari. Deus sub forma hominis, est mutatio magis obstupescenda, quàm homo sub specie panis, quàm corpus sub forma alimenti. Nunquid manducabatur Agnus Paschalis? Nunquid manducabatur Manna? Nunquid manducabantur sacri Panes Propositionis? Si manducabantur figuræ, an non etiam veritas debebit manducari? Sacramento tibi opus erat ad nutrimentum animæ tuæ. Cum vita tua sit Divina, opus habe-



bas epulo Divino. Cùm constes anima, & corpore, opus habebas animâ meâ, & corpore meo. Nisi manduces carnem meam, non habebis vitam. Omnes homines illâ vesci debent. Necessarium ergo erat ejusmodi alimentum, quo omnes homines frui possent. Gustus hominum multùm inter se differunt; panis tamen omnibus bene sapit. Assumpsi speciem panis omnibus amabilem. Ut sine horrore manducarer. Ut penetrarem intima cordis tui. Ut communicarem tibi spiritum meum. Ut emundarem corpus tuum. Ut mitigarem concupiscentiam tuam. Ut sanarem morbos tuos. Ut communicarem tibi puritatem meam, & dotes meas virgineas. Panis est alimentum, quod declarat effectus hujus Sacramenti. Volo, ut omnes uniti sitis inter vos, & habeatis cor unum, & animam unam, sicut multa tritici grana unum panem constituunt. Cupio vos in me transformare. Ego vivo propter Patrem, & qui manducat me, & ipse vivet propter me.

### Discipulus.

O Divine Magister! quàm admirabilis est sapientia tua? O quàm verè es Deus absconditus. O quis Panis! O quale Convivium! O quæ Mensa! O quantùm tibi sum obligatus, quòd mecum morari digneris! Quòd hanc figuram assumpseris, ut te nobis communicares! Credo, neque cupio intueri, quod credo. Fidelis appellor, & non Philosophus, rationes subtiliter discutiens.

Quid



Quid retribuam tibi pro omnibus, quæ retribuisti mihi? Quoniam mecum versaris, commorabor & ego tecum. Quoniam mei amore te humilias, humiliabo me propter te. Quoniam quotidie moreris propter me, moriar & ego quotidie propter te. Quoniam vivere desideras in me, ego quoque semper in te vivam.

## MEDITATIO CXXVII.

*De Amore Jesu Christi in SS. Eucharistia Sacramento.*

**S**acramentum hoc procedit ex amore. Sacramentum hoc oblectat amorem. Sacramentum hoc generat amorem.

Filius Dei instituit Sacramentum hoc ex amore. Ascendit in cælum ex Justitia, sed in terra commoratus est ex amore. An homines promeriti fuerant tantam gratiam? Quin imò se penitus illâ reddiderant indignos. An commodum aliquod Christo in hoc Sacramento accedit? heu! gravissimos in illo patitur contemptus. Amor triumphavit de Deo. Coëgit cum in terras descendere. Obligat illum ad commorandum nobiscum. Detinet illum, quasi captivum. Sacramentum hoc procedit ex amore. Est itaque Sacramentum amoris.

Amor tendit ad unitatem. Hæc est finis omnium desideriorum ejus. In sacra Communionem obtinet, quidquid exoptat. In hac enim Jesus se unit nobiscum. In hac nos vi-



cissim illi unimur. In hâc illo se transformat in nos, & nos transformamur in ipsum. In hac fit ille idem nobiscum, & nos efficimur idem cum illo. Ex alimento, & eo, qui alitur, non fit nisi una persona. Atque hæc est unio intima, quæ amorem mirè oblectat. Hæc est, quæ Eucharistiam efficit Sacramentum amoris.

Cognitio generat amorem. Præsentia nutrit amorem. Affectio inflammat amorem. Beneficia excitant amorem. Anima in sacra Communionem conspicit Dilectum suum. Gaudet de ejus præsentia. Agnoscit ejus affectionem. Cumulatur ejus gratiis. Cor potest resistere odio; sed non potest resistere amori. Ibi reperit dilectum suum. Ibi reperit delicias suas. Ibi reperit amorem suum. Est itaque Sacramentum amoris.

Quæ igitur causa est, quòd glaciei instar rigescam? Unde oritur, quòd tam exiguus sit amor meus? Cujus complexionis est cor meum? Quomodo se potest defendere contra sacra amoris incendia? Undique circumcingitur amore, & nescit, quid sit amor.

Amor conspiciendum se objicit oculis meis. Amor percipiendum se præbet auribus meis. Amor gustandum se exhibet ori meo. Amor sentiendum se indulget cordi meo. Amor me vocat. Amor me allicit. Amor me accendit. Amor me oppugnat. Amor mihi blanditur. Amor me obligat. Amor tentat omnia, ut me sibi devinciat. Et ego nescio, quid sit amare.



Unde oritur tanta cordis mei durities, & stupor? Aut quòd amem creaturas. Aut quòd ab illis non sim avulsus. Aut quòd cor habeam divisum. Aut quòd non satis edomuerim noxias cupiditates.

Anima mea! Erisne semper ingrata? Nec unquam Dilecto tuo cedes cor tuum? Deus, qui semper tecum est. Deus, qui se totum tibi donat. Deus, qui se propter te exinanivit. Deus, qui ope tua non indiget. Deus, qui beatus est absque te. Deus, qui tam ardentem te diligit. Deus, qui summo amore dignus est. Deus, qui tanta in te contulit beneficia, non poterit sibi devincire cor tuum? Non poterit obtinere affectionem tuam?

Ah! non possum ultrà resistere tanto amor! Non possum ultrà eludere sanctos conatus ejus. Nolo ampliùs ex timore à sacra Communionem me subtrahere. Quin potiùs amore impulsus fidenter appropinquabo. Volo, ah! volo me generosè pervincere, quia vivere non possum absque amore. Volo frequenter communicare, quia vivere non possum absque nutrimento.

### Verba S. Scripturæ.

*Filii Israël dixerunt ad invicem Manbu. Quòd significat, quid est hoc? Ignorabant enim, quid esset. Quibus ait Moyses: Iste est Panis, quem Dominus dedit vobis ad vescendum. Exod. 16. 16.*



*Hic est Panis, qui de Cælo descendit, non sicut manducaverunt Patres vestri manna, & mortui sunt. Qui manducat hunc Panem, vivet in æternum. Joan. 6. 59.*

*Quis det de Carnibus ejus, ut saturemur?*  
Job 31. 31.

*Caro mea verè est cibus, & sanguis meus verè est potus. Qui manducat meam carnem, & bibit meum sanguinem, in me manet, & ego in illo. Joan. 6. v. 57.*

*Cum dilexisset suos, qui erant in mundo, in finem dilexit eos. Joan. 13. v. 2.*

## MEDITATIO CXXVIII.

### *De Sacrà Communione.*

**F**iliæ Jerusalem, nunciate dilectæ meæ, quia diu noctûque illam expecto, ejusque amore languéo.

Cælum deserui, ut venirem in terram, & cor ejus lucrificerem. Formam panis assumpsi, ut faciliùs amarer, & sine horrore manducarer. Alimentum factus fui, ut me arctissimè unirem ingrata huic animæ. Cupio eam nutrire. Cupio eam ditare thesauris gratiarum mearum. Cur illa me contemnit? Cur me fugit?

Filiæ Jerusalem, nunciate dilectæ meæ, quia diu noctûque illam expecto, ejusque amore languéo.



Ego sum Panis, & non venenum. Vitam illi cupio elargiri, & non mortem inferre. Ut amarer, hanc formam assumpsi, non ut timerer. Ut manducarer, sub panis formâ me recondidi, non ut admirationi essem. Ut sanctificarem corpus ejus, carnem meam illi donavi. Ut vivificarem animam ejus, Spiritum meum illi donavi. Ut eam unirem Divinitati meæ, Humanitatem meam illi donavi.

Sapientissimus cùm sim, non scio, quid præstantius illi possim donare. Opulentissimus cùm sim, non habeo, quod excellentius illi possim donare. Potentissimus cùm sim, non possum illi nobilius quid donare. Cur ergo me fugit? Cur ergo me timet?

Filiæ Jerusalem, nunciate Dilectæ meæ, quia diu noctûque illam exspecto, ejusque amo-  
ro langueo.

Ut convivium hoc illi pararem, sumptus profudi infinitos. Nullis impensis peperci, ut desideria illius plenè satiarem. Corpus meum illi propono manducandum. Sanguinem meum illi offero bibendum. Cumulo illam gratiis meis. Dito illam meritis meis. Repleo illam virtutibus meis.

Omnes homines invito ad Convivium meum. Ægros, ut sanentur. Debiles, ut roborentur. Cæcos, ut illuminentur. Tristes, ut solatiis recreentur. Peccatores, ut sanctificentur. Quæ ergo est causa timendi? Non exposco finem hujus Sacramenti, velut medium necessarium ad hoc Sacramentum.



Filiæ Jerusalem, nunciate Dilectæ meæ, quia diu noctûque illam exspecto, ejusque amore langueo.

Nunciate illi, quòd fame sit peritura, nisi Panem hunc manducaverit. Quòd gratiarum donis sit destituenda, nisi Convivio meo acubuerit. Quòd non sit habitura robur. Quòd non sit habitura sanitatem. Quòd non sit habitura vitam. Quòd non sit habitura solatium. Quòd vehementer sit tentanda. Quòd tentationi sit succubitura. Quòd, si recusaverit venire, epulas meas non sit degustatura, nec in vita, nec in morte. Nec in cælo, nec in terra. Quòd in illius locum advocaturus sim cæcos, & claudos. Quòd contemnat me, cùm venerari me deberet. Quòd affligat me, cùm solari me deberet. Quòd offendat me, cùm deberet me oblectare.

O Panis Angelorum, qui de cælo descendisti! Audebône suscipere te intra cor meum? Possúmne te recipere, probè intelligens, quis sim ego? Possúmne te rejicere, probè intelligens, quis sis tu? Possúmne huic Convivio appropinquare, conscius sanctitatis tuæ? possúmne inde recedere, conscius necessitatis meæ?

O divine Amator! qui nos invitas ad nuptias tuas, & qui nos tam amanter invites. Indue veste nuptiali me prodigum poenitentem. Non equidem mereor hunc honorem. Indignus sum hac gratiâ: at agnitio humilitatis meæ supplebit defectum sanctitatis meæ. Tu ita vis. Tu ita desideras. Tu hoc imperas. Tu hoc præcipis. Comminaris mihi  
iram



iram tuam, si nolim te recipere, Satiùs est, amori obsequi, quàm timori. Præstat obedire invitanti, quàm sibi plùs æquo diffidere.

Accedam ergo cum reverentiâ. Recipiam te cum fiduciâ. Amplectar te cum amore. Manducabo te cum lætitiâ. Gratias tibi agam cum teneritudine. Loquar tibi cum libertate. Serviam tibi cum fidelitate. Benedicam te in tempore, & æternitate. Amen.

*Verba S. Scripturæ.*

*Desiderio desideravi hoc Pascha manducare vobiscum, antequam patiar. Luc. 22. 15.*

*Qui manducat meam carnem, & bibit meum sanguinem, in me manet, & ego in illo. Joan. 6. 57.*

*Homo quidam fecit cœnam magnam, & vocavit multos, & cœperunt simul omnes excusare. Luc. 14. 16.*

*Dico vobis, quòd nemo virorum illorum, qui vocati sunt, gustabit cœnam meam. Luc. 14. 24.*

*Pauperes ac debiles, & cæcos & claudos introduc huc. Compelle intrare. Luc. 14. 21.*



## MEDITATIO CXXIX.

Oratio ad Dominum nostrum  
Jesum Christum.

*Qua potest usui esse pro Gratiarum Actione  
post sacram Communionem.*

**A** Nima Jesu sanctifica me. Sanguis Jesu lava me. Passio Jesu conforta me. Vulnera Jesu sanate me. Cor Jesu recipe me. Spiritus Jesu anima me. Bonitas Jesu reconcilia me. Pulchritudo Jesu attrahe me. Humilitas Jesu deprime me. Mansuetudo Jesu mitiga me. Pax Jesu pacifica me. Amor Jesu inflamma me. Regnum Jesu veni in me. Gratia Jesu reple me. Misericordia Jesu salva me. Sanctitas Jesu consecra me. Puritas Jesu emunda me. Crux Jesu sustenta me. Clavi Jesu configite me. Spinæ Jesu coronate me. Fel Jesu inebria me. Os Jesu benedic me, in vita & in morte, in tempore, & in æternitate, Amen.

*Oportet cuilibet Versui inhaerere, & suavis expendere illum, quod magis animus ad pios affectus commovetur.*



## MEDITATIO CXXX.

*De Devotione erga B. Virg. Mariam,*

**U**T sis filius Dei, oportet te esse filium Mariae. Hæc est Mater omnium iustorum. Hæc est Advocata omnium peccatorum, Hæc est Regina omnium Prædestinatorum. Hæc illos genuit in monte Calvariae. Dati sunt ipsi in filios ad pedem Crucis. Ipsa vitam dedit omnibus hominibus, dando vitam Deo homini. Ipsa cooperata est in salutem omnium, consecrando illum Patri suo.

Nemo potest accedere ad Patrem, nisi per Filium. Nemo potest accedere ad Filium, nisi per Matrem. Pater nihil denegat Filio suo. Filius nihil denegat Matri suæ. Non salvabor, nisi per merita Filii. Non salvabor, nisi per intercessionem Matris. Filius est Mediator noster apud Patrem. Mater est Mediatrix nostra apud Filium.

Jesus est Caput Ecclesiae, Maria est Collum. Jesus est fons gratiarum, Maria est concha. Jesus est sol mundi. Maria est luna. Nihil producitur in operibus naturæ, nisi per Solem, & Lunam. Nihil producitur in operibus gratiæ, nisi per Jesum & Mariam. Luna recipit omnia à Sole, & concurrit ad generationem rerum. Maria recipit omnia à Jesu, & confert ad sanctificationem animarum.

O sancta



O sancta Mater Dei! Nunc demum incipio respirare, quoniam à te dependet salus mea. Filius tuus est Salvator meus; sed idem pariter est Judex meus. Bonitas ejus animat me; sed Justitia ejus terret me. Sum equidem multorum criminum Reus, nec audeo coram ipso comparere. At tu, charissima Mater mea, nil habes, quod timorem mihi incutiat. Tu es Mater Gratiae, & non Justitiae. Ideo effecta es Mater, ut gigneret nobis Salvatorem. Mater Dei non esses, si nulli fuissent peccatores. O Mater! volo esse filius tuus, ut sim filius Dei. Volo esse servus tuus, ut sim servus Dei.

### Verba S. Scripturæ.

*Dicit Matri suæ: Mulier ecce Filius tuus: deinde dicit Discipulo: Ecce Mater tua.* Joan. 19. 26. & 27.

*Ex illâ horâ accepit eam Discipulus in sua.* Joan. 19. 27.

*In Jacob inhabita, & in Israël hæreditare, & in electis meis mitte radices.* Eccli. 24. 13.

*Qui me invenerit, inveniet vitam, & habuerit salutem à Domino.* Prov. 8. 35.

### MEDITATIO CXXXI.

*De Conceptione Immaculatâ B. V. MARIE.*

**F**elix est Maria, quòd concepta fuerit sine peccato. Felicior est Maria, quòd nullum unquam peccatum commiserit. Magna no-  
stra



stra est infelicitas, quòd contraxerimus culpam originalem. Sed longè major est nostra infelicitas, quòd commiserimus peccata actualia.

Maria licèt nunquam peccaverit, multa tamen adversa sustinuit. Ego indefinenter pecco, & tamen vel minimum quid pati recuso. Maria erat insons, & tamen tractata fuit, ut rea. Ego sum multorum criminum reus, & cupio tractari ut insons.

Prima gratia Mariæ est fundamentum felicitatis ejus. Cooperata fuit gratiæ fidelitate inviolabili toto vitæ suæ cursu. Sunt quædam gratiæ in hâc vitâ à Deo nobis communicatæ, quæ sunt principium omnis felicitatis nostræ. Sunt quædam peccata in hâc vitâ, quæ sunt principium omnis infelicitatis nostræ.

Cooperare omnibus gratiis. Evita omnia peccata. Magnopere cave illa, quæ aliis esse possunt offendiculo. Hæc sunt peccata pestifera, quæ se diffundunt in alios. Hæc sunt peccata contagiosa, quæ corrumpunt naturam.

O sancta Mater Dei! quàm pulchra es, quàm pura es! Et macula non est in te. Conceptio mea, cùm non sit Immaculata, effice, ut vita mea sit Immaculata. Si contraxi peccatum originale, fac, ut evitem peccatum actuale. O utinam Filius tuus in morte mea intuens animam meam, dicere posset: Tota pulchra es amica mea, & macula non est in te!



## Verba S. Scripturæ.

*Generationem ejus, quis enarrabit ?* II. 53.

8.

*Tota pulchra es amica mea, & macula non est in te.* Cant. 4. 7.

*Dominus possedit me in initio viarum suarum.* Prov. 8. 22.

*Opus grande est : neque enim homini præparatur habitatio, sed Deo.* 2. Paral. 29. 1.

*Domum tuam decet sanctitudo, Domine in longitudinem dierum.* Psalm. 92. 5.

## MEDITATIO CXXXII.

*De Purificatione B. V. Mariæ.*

**M**aria est Mater Dei, & tamen videri vult esse tantum Mater hominis. Quanta humilitas ! Maria est splendida instar solis, & tamen ut purificaretur, venit in templum. Quanta puritas ! Maria non est subiecta legi, & tamen sponte se illi submittit. Quanta obedientia ! Maria non habet nisi unicum Filium, eumque sibi charissimum, & hunc sacrificat Deo in templo. Quanta Charitas !

Imitare has Mariæ virtutes. Esto humilis corde, sicut illa. Esto purus corpore, & animâ, sicut illa. Esto promptè obediens sicut illa. Esto liberalis, sicut illa. Offer Deo, quidquid habes charissimum. Sacrifica illi partus tuos, cogitationes tuas, desideria tua,

om-



omnia opera tua. Dona illi cor tuum, cor unicum, cor primogenitum.

Vade in templum, sicut Simeon. Recipe IESUM non intra brachia tua, sed intra cor tuum ex manibus Sacerdotis. Cane cum illo hoc amoris Canticum: Nunc dimittis servum tuum Domine, secundum verbum tuum in pace: quia viderunt oculi mei salutare tuum, quod parasti ante faciem omnium populorum, lumen ad revelationem gentium, & gloriam plebis tuæ Israël.

In pace vives, si non desideres, nisi IESUM. In pace morieris, si non ames, nisi IESUM. Ora Mariam, ut te suscipiat intra brachia sua, & te offerat Filio suo in fine vitæ tuæ.

Præstabit illa tibi maternum hoc obsequium. Si contendas esse Filius ejus. Si sis humilis, sicut illa. Si sis castus, sicut illa. Si ardeas charitate, sicut illa.

O Mater Dei! ne dedignare esse Mater miseri peccatoris. In manus tuas commendo animam meam. Est illa pretium sanguinis Filii tui, poterisne eam despiciere? Poterisne illam respuere? Quoniam Deo præsentasti Caput, debes illi etiam præsentare membra, quæ nos sumus. Deus non potest recusare donum, quod tu illi offers. Salus mea in tuto est, si concredita sit manibus tuis.

O JESU! Commendo tibi Spiritum meum. Salutem meam manibus tuis committo. Dimitte me ex hoc mundo in pace. Vidi enim omnia, quæ mihi erant videnda. Peccata mea perturbant me. Sed Bonitas tua animat me. O Domine! Ecce ego servus tuus, & filius



ancillæ tuæ? Poterisne damnare filium Matris tuæ? Poterisne odio persequi illum, quem ipsa amavit?

### Verba S. Scripturæ.

*Tulerunt illum in Jerusalem, ut sisterent eum Domino. Luc. 2. 22.*

*Tolle Filium tuum unigenitum, quem diligis Isaac, atque ibi offeres eum in holocaustum. Gen. 22. 2.*

*In simplicitate cordis mei latus obtuli universa. 1. Paral. 29. 17.*

*Nunc dimittis servum tuum Domine. Luc. 2. 29.*

*O Domine! quia ego servus tuus, & filius Ancillæ tuæ. Pl. 115. 16.*

## MEDITATIO CXXXIII.

### De Annuntiatione B. V. MARIÆ.

**M**agna sanè virtus est, parvum esse in Majestate. Rara omnino virtus est, humilem esse inter honores. Maria est Mater Dei, quia fuit ejus Ancilla. Maria Ancillam Domini se vocat, cum ab Angelo Mater Dei salutatur.

Quam beata est, quod conceperit Verbum Divinum in Corpore suo! sed multò beatior est, quod Verbum conceperit in mente sua. Ipsa per Gratiam concepit Divinum Verbum, antequam illud conciperet per Nature.



turam. Concepit illud in corde suo, antequam illud conciperet in utero suo. Conceptio Dei spiritualis magis honorifica illi fuit, quam corporalis. Hac eam effecit Matrem Dei, illa effecit dignam Matrem Dei.

Esto Mater Domini nostri, faciendo voluntatem Patris ejus. Concipe illum per fidem. Genera illum per charitatem, Esto frater ejus, credendo in illum. Esto Mater illius, prædicando illum. Renova in sacrâ Communionem Mysterium Incarnationis. Sis humilis, & obediens, sicut fuit MARIA; & Spiritus sanctus in te descendet. Esto ancilla Domini, & efficeris Mater ejus.

O dignissima Mater Dei! Ne, quæso, dedignare in filium adoptare, quem Filius tuus dignatus est in fratrem adoptare. Quoniam Dei Mater es, oportet, ut pariter sis Mater hominum. Ut esses Mater hominum, facta es Mater Dei. Duo ubera habes lacte plena. Unum præbe filio tuo; sed alterum mihi reserva. Unum porrige justis; sed alterum peccatoribus reserva.

### Verba S. Scripturæ.

*Ecce Ancilla Domini, fiat mihi secundum Verbum tuum.* Luc. 1. 38.

*Quicumque fecerit voluntatem Patris mei, qui in cælis est, ipse meus frater, & soror, & mater est.* Matth. 12. 50.

*Non confunditur, fratres eos vocare.* Hebr. 2. 11.



*Spiritus sanctus superveniet in te, & virtus  
Altissimi obumbrabit tibi. Luc. i. v. 35.*

## MEDITATIO CXXXIV.

*De Humiliatione Filii Dei & Exaltatione  
MARIAE, in Mystério Incarnationis.*

**J**ESUS ex Deo factus est homo. Ex Domino factus est servus. Ex omnipotente factus est infirmus. Ex divite factus est pauper. JESUS homo factus, fecit Mariam Matrem DEI. JESUS formam servi accipiens, fecit Mariam Dominam DEI. JESUS infirmitatem nostram assumens, dedit Mariæ Potentiam DEI. JESUS egestatem passus, commisit Mariæ Thesauros DEI. JESUS profundius se demittere non potuit, quàm se demiserit. Maria altiùs ascendere non potuit, quàm ascenderit. Nihil est, quod sit supra JESUM. Nihil est, nisi DEUS, quod sit supra Mariam. Quidquid DEUS non est, est infra JESUM. Quidquid DEUS non est, est infra Mariam.

Gratulare illi de tantis excellentiis. Elige illam in Matrem tuam. Reverere illam, ut Reginam tuam. Invoca illam, ut Advocatam tuam. Obedi illi, cui Deus obedivit. Honora illam, quam Deus honoravit. Famulare illi, cui DEUS est famulatus. Ama illam, quam DEUS amavit. Saluta illam, quam Angelus salutavit. Dic illi frequenter corde & ore.

Ave



Ave Gratiâ plena, participes nos effice plenitudinis tuæ.

Dominus tecum, ut Pater, ut Filius, ut Sponsus.

Benedicta tu in Mulieribus, Benedictionibus infinitis. Tu sola es Virgo & Mater. Tu sola concepta es sine crimine. Tu sola vixisti sine peccato. Tu sola mortua es sine dolore. Nemo est nisi tu, quæ habeat Deum pro filio & subdito. Nemo est, nisi tu, quæ sit filia Dei, Mater Dei, & Sponsa Dei. Tu es Reparatrix mundi. Tu es Regina Universi. Tu es Porta Paradisi. Tu es dispensatrix gratiarum.

Maria sanctissima & dignissima Mater Dei! Ora pro Justis & peccatoribus, nunc, cum eos vides tantis oppugnatos tentationibus, mancipatos tot vitiis, tantis oppressos miseriis. Sed præcipuè in hora mortis, ubi salus illorum versabitur in majori periculo, & maternum tuum auxilium summè illis erit necessarium.

### Verba S. Scripturæ.

*Verbum Caro factum est.* Joan. 1. 14.

*Scitis gratiam Domini nostri JESU Christi, quoniam propter nos egenus factus est, cum esset dives, ut illius inopiâ vos divites essetis.* 2. Cor. 8. 9.

*Exinanivit semetipsum formam servi accipiens, in similitudinem hominum factus, & habitu inventus ut homo.* Phil. 2. 7.

*Erat subditus illis.* Luc. 2. 51.



*Beatam me dicent omnes Generationes. Luc.*  
I. 48.

## MEDITATIO CXXXV.

*De Visitatione B. V. Mariae.*

**J**ESUS visitat sanctum Joannem. Maria visitat sanctam Elisabetham. Jesus sanctificat Matrem & Filium; sed per os Mariae. Quæ ubi primum locuta est, Joannes Baptista fuit sanctificatus. Vox Mariæ fuit canalis gratiæ. Quæ illuminat cæcum. Liberat captivum. Resuscitat mortuum. Justificat peccatorem.

Maria Majori inter filios hominum, applicat primum fructum nostræ Redemptionis. Concipit spiritualiter hominem, postquam Deum concepit corporaliter. Facta est Mater hominum, postquam facta est Mater Dei. Ipsa est Mater Gratiæ. Ipsa est Mater Misericordiæ. Gratiæ pro Justis. Misericordiæ pro peccatoribus.

O Maria Mater gratiæ! O Mater misericordiæ! Visita nos frequenter cum Filio tuo. Non deest tibi gratia, quia fuisti gratiâ plena. Non deest tibi misericordia, quæ novem mensibus intra viscera tua fuit commorata. Exerce illam erga pauperem cæcum. Erga pauperem captivum. Erga peccatorem, mancipium suarum cupiditatum. Erga defunctum vitâ Gratiæ. Veni, ut me illumines. Ut me liberes. Ut me resuscites. Ut me sanctifices.

Sonet



Sonet vox tua in auribus cordis mei. Vox enim tua dulcis, & pulchritudo tua incomparabilis. Loquere Mater, & exultabit præ gaudio cor meum. Dic Verbum, & sanabitur anima mea. Tu enim habes intra te Verbum Dei, quod dat vitam mundo.

Maria Mater Gratiæ, Mater Misericordiæ, Tu nos ab hoste protege, & horâ mortis suscipe.

Ut honores Virginem, oportet imitari virtutes ejus. Ama solitudinem, sicut illa. Non prodi in publicum, nisi ut beneficia elargiaris. Visita carcere conclusos. Assiste miseris. Libera captivos. Sanctifica peccatores. Esto Mater Gratiæ animabus afflictis. Esto Mater Misericordiæ corporibus afflictis.

### Verba S. Scripturæ.

*Benedictus Dominus Deus Israël, quia visitavit.* Luc. 1. 68.

*Per viscera Misericordiæ Dei nostri, in quibus visitavit nos Oriens ex alto.* Luc. 1. 78.

*Visita nos in salutari tuo.* Psal. 105. 4.

*Visitatio tua custodivit spiritum meum.* Job. 10. 12.

*Ut audivit salutationem Mariæ Elisabeth, repleta est Spiritu sancto.* Luc. 1. 41.

*Surge, prope amica mea, sonet vox tua in auribus meis: vox enim tua dulcis, & facies tua decora.* Cant. 2. 10, & 14.



**MEDITATIO CXXXVI.***De Morte B. V. MARIAE.*

**Q**uid est, quod amarum efficit calicem mortis? Amissio mundi. Separatio à corpore. Ratio supremo Judici reddenda. Sentitur tristitia, cum mundus est deferendus. Sentitur dolor cum corpus est relinquendum. Sentitur timor, cum comparandum est coram Deo Iudice.

Maria mortua est sine timore. Mortua est sine tristitia. Mortua est sine dolore. Mortua est sine timore, quia vixit sine peccato. Mortua est sine tristitia, qui vixit sine adhæsiōe ad creaturas. Mortua est sine dolore, quia vixit sine delectatione.

O utinam moriatur anima mea morte Sanctorum! O utinam mors mea sit similis morti Mariæ! Vive vitâ Sanctorum, & morieris morte Sanctorum. Vive sicut Maria, & morieris sicut Maria. Vive sine peccato, & morieris sine timore. Vive sine adhæsiōe ad creaturas, & morieris sine tristitia. Vive sine delectatione, & morieris sine dolore.

Si vivas vitâ peccatorum, morieris morte peccatorum. Si vivas in perturbatione, morieris in confusione. Si vivas in peccato, morieris cum timore. Si vivas in deliciis, morieris cum dolore. Quod voluptatem tibi affert in vita, supplicium tibi erit in morte. Quod dolorem tibi infert in vita, solatio tibi erit in morte.

O Vir-



O Virgo sancta! non sum sollicitus, quâ morte moriar, dummodo moriar in bono statu. Moriar sine timore, si moriar intra brachia tua. Moriar in gratia, si moriar in tuo obsequio. Tu enim salvas omnes tuis obsequiis mancipatos. Non sinis unquam perire filios tuos. Assisto quæso, mihi morienti, sicut adsticisti Christo Filio tuo in Cruce morienti. Necesse est, ut omnes Prædestinati moriantur intra brachia tua, quoniam tu vidisti morientem Primipilum Prædestinatorum.

Volo mentem à mundo avellere, ut moriar sine tristitia. Volo affligere corpus meum, ut moriar sine dolore. Volo abstinere à peccato, ut moriar sine timore. Volo vivere in dolore, ut moriar cum delectatione. Volo vivere in pœnitentia, ut moriar cum securitate. Volo vivere in charitate, ut moriar in sanctitate. Volo vivere Filius Virginis, ut moriar prædestinatus. Volo vivere in gratiâ, ut moriar in gratiâ. Volo vivere in amore, ut moriar ex amore.

### *Verba S. Scripturæ.*

*Adjuro vos Filie Jerusalem, si inveneritis Dilectum meum, ut nuncietis ei, quia amore langueo. Cant. 5. 8.*

*Fortis est, ut mors, dilectio. Cant. 8. 6.*

*Moriatur anima mea morte Justorum. Num. 23. 10.*

*Mors peccatorum pessima. Psalm. 33. 22.*

*Ridebit in die novissimo. Prov. 31. 25.*

*In manus tuas commendo Spiritum meum. Luc. 23. 46.*



## MEDITATIO CXXXVII.

*De B. V. MARIA à Morte resuscitatâ.*

**M**ARIA resuscitata est à morte, Corpus ejus non jacet amplius in sepulchro. Caro tam munda, debebat eximi à corruptione. Templum tam sanctum non debebat profanari.

MARIA est castissima Virginum. Debebat ergo esse incorruptibilis. Maria est excellentissima inter Matres. Debebat ergo vivere cum Filio suo. Si corpus Jesu per sacram Communionem susceptum jus tribuit ad Resurrectionem, an non resuscitari debebat illa, quæ Christo dedit carnem suam? Si servi sunt cum Domino suo, an non Matrem decet esse cum Filio suo? Si gratia hæc concessa est servis, quis eam Regina audebit negare? Si corpus ejus non fuit resuscitatum, cur illud latet mundo absconditum? Cur non palàm honoratur? Quisque metet, quod seminavit. Qui seminant in carne, metent corruptionem. Qui seminant in spiritu, metent incorruptionem.

MARIA terræ fuit mandata, in quâ tamen non potuit diu morari. Caro ejus concluserat intra se germen vitæ, quod facit eam reviviscere, & resuscitari. Fuit sepulta, ut imitaretur Filium suum. Ut inviseret Purgatorium. Ut sanctificaret terram nostram. Ut certò constaret de morte ejus. Ad vitam

ve-



verò redire debuit, ut testatam faceret resurrectionem nostram. Cælum insigni caret ornamento, si Corpus Mariæ non fuisset eò translatum.

O gloriosa Domina mea! Absit à me ut cogitem, quòd Corpus tuum sanctissimum fuerit putredine corruptum, aut vermibus in pabulum cesserit. Quòd Caro tua immaculata non fuerit resuscitata. Quòd fueris mortis mancipium, quæ destruxisti mortis imperium. Oportebat resuscitari virum, ad confirmandam resurrectionem Virorum. Oportebat ergo pariter resuscitari Mulierem, ad confirmandam resurrectionem Mulierum.

O quàm amabilis est illibata vitæ integritas! O quàm detestabilis est inquinata morum corruptio. Cur tam exquisitè saginando corpus tuum, vermibus pinguius nutrimentum præparas? Cur adoras carnem, paulò post à serpentibus devorandam?

Nisi victima sit sale conspersa, computrescet. Nisi caro affligatur voluntariâ castigatione, corrumpetur.

### Verba S. Scripturæ.

*Non derelinques animam meam in inferno:  
nec dabis Sanctum tuum videre corruptionem.*  
Psal. 15. 10.

*Ego dormivi, & soporatus sum: & exsurrexi,  
quia Dominus suscepit me.* Psal. 3. 6.

*Pater, quos dedisti mihi, volo, ut ubi ego  
sum, & illi sint mecum.* Joan. 17. 24.



*Qui seminat in carne sua, de carne & metet corruptionem: qui autem seminat in spiritu: de spiritu metet vitam æternam. Gal. 6. v. 8.*

*Veni de Libano Sponsa mea, veni coronaberis. Cant. 4. 8.*

## MEDITATIO CXXXVIII.

*De Assumptione B. V. Mariae.*

**Q**Uæ est ista, quæ ascendit in cælum, innixa super dilectum suum? Hæc est Maria Mater DEI. Quæ sicut purior est omnibus creaturis, ita exaltari debuit super omnes cælos. Sicut profundissimè se demiserat, ita debuit in thronum sublimissimum elevari. Sicut præ aliis plures receperat gratias, ita debuit plus gloriæ recipere. Sicut proximè Deum attigerat in terris, ita proximè debuit illi conjungi in cælis. Sicut passa fuerat sine mensura, ita deliciis cumulari debuit sine mensura.

Divinus Salomon Matrem suam locavit in throno suo. Sociam eam sibi adlegit Imperii sui. Constituit eam Reginam universi. Subjecit illi omnes creaturas. Pater coronavit eam Potentiâ. Filius coronavit eam sapientiâ. Spiritus sanctus eam coronavit sanctitate.

Jesus est Mediator noster apud Patrem. Maria est Mediatrix nostra apud Filium. Jesus mitigat iram Patris sui. Maria mitigat iram



iram Filii sui. JESUS Patri suo exhibet vñnera sua. Maria Filio suo exhibet ubera sua. Quis jam desperet de salute sua, cùm tam potentes habeat apud Deum Intercessores?

Maria diligit peccatores, quia Filius ejus illos diligit. Maria diligit peccatores, quos ut redimeret Dei Filius, in mundum venit, factus Filius Mariæ. Maria diligit peccatores, quia sunt miserabiles. Maria diligit peccatores, quia sine his non esset Mater DEI. Maria diligit peccatores, quia propter illos facta est Mater DEI.

Ascende, sanctissima Mater mea! Ascende, ut colligas fructus laborum tuorum. Ascende Arca Domini, ut requiescas in templo gloriæ. Ibi paratus tibi jam thronus est. Ibi coronaberis à sanctissimâ Trinitate. O quanto defigor stupore! cùm te video in cælum extolli, tantâ cum pompâ, tantâ cum magnificentiâ. Angeli Paradisi aperite portas Matri DEI. Occurrite Reginae Vestrae. Omni veneratione eam colite. Atque ad Thronum usque Filii ejus læti illam deducite.

O Regina Cæli & terræ! O Mater Gratia, & Misericordia! Vita mea, & spes mea post DEum! Saluto te, & veneror te in throno Gloriæ, ad quem Deus te extulit. Video te jam in portu, dum nos etiamnum jactamur procellis. Video te jam in patriâ, dum nos adhuc gemimus in hoc exilio. Video te jam in securitate, dum nos etiamnum variis agitamur periculis. O chara Mater nostra! O potentissima Advocata nostra! illos tuos misericordes oculos ad nos converte miseros filios



lios tuos, qui plorant, & gemunt in haclachrymarum valle. Curam habe salutis nostræ, & gratiam nobis impetra, intuendi post hoc exilium dilectum Filium tuum in cælo, Amen.

## Verba S. Scripturæ.

*Veni de Libano, veni coronaberis.* Cant.

4. 8.

*Quæ est ista, quæ ascendit de deserto delictis affluens, innixa super Dilectum suum?* Cant. 8. 5.

*Signum magnum apparuit in cælo: Mulier amicta Sole, & Luna sub pedibus ejus, & in capite ejus corona stellarum duodecim.* Apoc. 12. 1.

*Ingressa est Regina Saba Jerusalem cum divitiis, aromatibus, & auro infinito nimis.* 3. Reg. 10. & 2. Par. 9.

*Positus est thronus Matri Regis, quæ sedit ad dextram ejus, & dixit ei Rex: Pete Mater mea: neque enim fas est, ut avertam faciem meam.* 3. Reg. 2. 19. & 20.

## MEDITATIO CXXXIX.

*De Nativitate B. Virginis, & Nomine  
M A R I Æ.*

**N**ativitas Mariæ est opus supra naturam, sed in maximum bonum naturæ. Ob nobilitatem est honoranda. Ob beneficia est desi-



desideranda. Ob pulchritudinem est amanda.

Nomen Mariæ, quod illi datum est, recreat Angelos, consolatur homines, exterret dæmones. Post Nomen Jesu nullum dulcius est quàm Nomen Mariæ. Nullum potentius, quàm Nomen Mariæ.

Qui Mariam nominat, Dominam potentem dicit, & Mare amaritudinis. Domina est, quia fuit ancilla. Mare consolationis est, quia fuit Mare amaritudinis. Si imperare desideres, obedire te oportet. Si solatia expetas, pati te oportet.

O sanctissima Virgo! Exopto bibere calicem afflictionis tuæ, ut merear frui calice consolationis tuæ. Obedire sicut tu, ut merear aliquando tecum regnare.

O Regina ter maxima! Gaudeo de Nativitate tua, veluti de principio vitæ & salutis meæ. Saluto te in cunis tuis, velut in throno gratiæ, & innocentiae. Tu non ingressa es hunc mundum peccati vinculis onusta, sicut nos. Sol te conspexit coronatam, ubi primum es nata. Nos autem vidit omnes damnatos, etiam antequam essemus nati.

O Regina Cæli, & terræ! eligo te in Dominam meam, in Matrem meam, & in Advocatam meam. Serviam tibi, ut Dominae meæ. Amabo te, ut Matrem meam. Invo-cabo te, ut Advocatam meam. O sancta Domina mea! Suscipe me in protectionem tuam. O sancta Mater mea! Da mihi benedictionem tuam. O sancta Advocata mea! Adjuva me intercessione tuâ.

Ver-



## Verba S. Scripturæ.

*Tu Gloria Jerusalem, tu lætitia Israël, tu honorificentia populi nostri. Judith. 15. 10.*

*Quæ est ista, quæ progreditur, quasi Aurora consurgens, pulchra ut Luna, electa ut Sol, terribilis, ut castrorum acies ordinata? Cant. 6. 9.*

*Dominare nostri tu, & Filius tuus. Judic. 8. 22.*

*Iste consolabitur nos ab operibus & laboribus manuum nostrarum in terrâ, cui maledixit Dominus. Gen. 5. 29.*

## MEDITATIO CXL.

*De Præsentatione B. V. Mariæ in Templo.*

**M**ARIA obtulit Deo, quidquid habuit. Obtulit se Deo, quamprimùm potuit. Obtulit se Deo plenâ voluntate. Obtulit se Deo in perpetuum. Obtulit se Deo promissione irrevocabili.

Nos Deo non donamus, nisi dimidium cordis nostri. Nos cor nostrum Deo tradimus, quàm tardissimè. Nos Deo cor tradimus inviti. Nos Deo cor donamus pro aliquo solum tempore.

Dona te totum, & omnia tua. Dona quàm citissimè. Dona hilariter. Dona in perpetuum.



O sancta Virgo! Dono me totum tibi absque ulla limitatione. Dono me tibi ex toto corde meo. Doleo, quòd tam serò me tibi donaverim. Dono me tibi in perpetuum, donatione irrevocabili.

Offer, obsecro, cor meum Filio tuo. Dono id illi ex integro. Dono id illi sine ullâ morâ. Dono id illi sine repugnantia. Dono id illi absque omni revocatione. Dono id illi in perpetuum, donatione æternâ.

### Verba S. Scripturæ.

*Bonum est viro, cum portaverit jugum ab adolescentiâ suâ. Sedebit Solitarius & tacebit: quia levavit super se. Thren. 3. 28. & 29.*

*Cum non invenisset, ubi requiesceret pes ejus, reversa est ad eum in Arcam. Gen. 8. 9.*

*In simplicitate cordis mei latus obtuli universa. 1. Paral. 29. 17.*

*Ananias cum Saphira uxore suâ vendidit agrum, & afferens partem quandam ad pedes Apostolorum posuit. Act. 5. 12.*

*Anania! cur tentavit Satanas cor tuum, mentiri te spiritui sancto, & fraudare de pretio agri? Act. 5. 3.*

*Divisum est cor eorum, nunc interibunt. Osee 10. 2.*





*Professio Obsequii nostri erga Beatissimam  
Virginem Mariam.*

**S**ANCTISSIMA Virgo, dignissima Mater DEI !  
ego, licet undecunque indignissimus, ut  
accensear numero servorum, ac filiorum tuo-  
rum; fretus tamen bonitate, & misericordiâ  
tuâ, & impulsus tibi serviendi desiderio, pro-  
fiteor in præsentia DEI, & Curiaë Cælestis uni-  
versæ, quòd te hodie eligam in Reginam me-  
am, Matrem meam, & Advocatam meam. Fir-  
mitérque statuo ac propono, me nunquam te  
derelicturum, neque facturum aut dicturum  
quidquam contra tuum honorem, neque per-  
missurum, ut à meis subditis aliquid contra  
tuum honorem unquam agatur. Obsecro te  
igitur, suscipe me in numerum servorum, &  
filiorum tuorum. Adsis mihi, quæso, in o-  
mnibus actionibus, & necessitatibus meis, nec  
me deseras in horâ mortis meæ, Amen.







# QVARTA PARS MEDITATIONUM.

PRO VIA UNITIVA.

## MEDITATIO CXLI.

*De Amore JESU.*

JESUS est pulcherrimus inter omnes homines. Maximus inter omnes Reges. Amantissimus inter omnes Patres. Fidelissimus inter omnes amicos. Mitissimus inter omnes Dominos. Perfectissimus inter omnes Sponsos.

JESUS factus est homo propter me, & sicut ego. Factus est pauper propter me, & sicut ego. Factus est miserabilis propter me, & sicut ego. Sustinuit mortem propter me, & sicut ego.

JESUS est Pater meus, & Rex meus. Est Frater meus, & Sponsus meus. Est Dominus meus & Pastor meus. Est Caput meum, & Medicus meus. Est Salus mea, & Redemptio mea. Est Spes mea, & Consolatio mea,



JESUS amat me ex toto corde suo. Semper stat, & pulsat ad ostium cordis mei. Rogat à me sibi donari cor meum. Vitam suam mihi donavit, ut obtineret cor meum. Ingratus sum, si denegem ei cor meum. Væ illi, qui cor suum cum alio dividit! Maledictus, qui JESUM non amat ex toto corde suo!

O Amor omnium Amorum! O Cor omnium cordium! Utinam te amem, sicut tu me amas! Utinam te amem, sicut mereris amari! Nihil supra JESUM. Nihil comparabile JESU. Nihil cum JESU. Nihil post JESUM.

### Verba S. Scripturæ.

*Speciosus forma præ Filiis hominum.* Psalm. 44. 3.

*Omnia, & in omnibus Christus.* Col. 3. 11.

*Simon Joannis, diligis me plus his?* Joan. 21. 15.

*Qui habet mandata mea, & servat ea, ille est, qui diligit me.* Joan. 14. 21.

*Si quis non amat Dominum nostrum JESUM Christum, sit anathema.* 1. Cor. 16. 22.

## MEDITATIO CXLII.

### *De unitate Amoris.*

**A**mor ortum trahit ab unitate. Amor tendit ad unitatem. Amor quiescit in unitate. Amor se conservat per unitatem.

Cor



Cor rectum non potest curvari. Cor mundum non potest maculari. Cor liberum non potest in servitutem redigi. Cor simplex non potest dividi. Væ illis, qui sunt duplici corde! Cor Dei illos non posset amare.

Nemo frui potest gemino Paradiso. Nemo potest duobus Dominis servire. Nemo potest conjungi duobus sponſis. Non potest simul amari Deus, & mundus. Non convenit nisi una anima, uni corpori. Unus Sol universo. Unus Rex uni Provinciæ. Unus Gubernator uni Civitati. Unus Pastor uni gregi. Unus Navarchus uni navigio. Unus amor uni cordi. Unus Deus uni creaturæ.

Dono, inquis, Deo dimidium cordis mei. Ergone Deus creavit tantum dimidium cordis tui? Ergone Deus redemit tantum dimidium cordis tui? Ergone Deus salvabit tantum dimidium cordis tui? Ergone Deus tibi donavit tantum dimidium cordis sui? Cur ergo tu illi donabis tantum dimidium cordis tui? Ergone Deus dignus non sit tantillo munere, quale est cor integrum hominis?

O Deus cordis mei! Tu semper fuisti meus. Et ego nunquam tuus. Tot adoravi idola, quot amavi creaturas. Divisi fidem meam, cum divisi charitatem meam. Perdi & fidem, & charitatem, cum illas divisi. Heu! meipsum perdi, quando te non amavi!

Amabo te deinceps, mi Deus, ex toto corde meo. Non dividam deinceps unquam affectiones meas. Totum toti. Unum uni. Solum soli. Ecce epigraphen cordis mei. O



Deus meus , & omnia ! Quoniam donasti mihi cor tuum , quod est tam immensum , æquissimum lanè est , ut meum quoque cor totum tibi consecrem , quod est tam parvum.

## Verba S. Scripturæ.

*Nemo potest duobus Dominis servire. Matth. 6. 24.*

*Dilige Dominum Deum tuum ex toto corde tuo , & in totâ animâ tuâ , & in totâ mente tuâ. Matth. 22. 37.*

*Usquequo claudicatis in duas partes ? Si Dominus est Deus , sequimini illum : si autem Baal , sequimini illum. 3 Reg. 18. 21.*

*Væ duplici corde ! Eccli. 2. 14.*

*Divisum est cor illorum , nunc interibunt. Osee 10. 2.*

## MEDITATIO CXLIII.

### De Præsentia DEI.

**D**EUS est coram me : Deus est mecum. Deus est in me. Est coram me , ut me consideret. Est mecum , ut me gubernet. Est in me , ut me animet. Oportet itaque , & me versari coram Deo , non cogitando , nisi de ipso Cum Deo , non operando , nisi propter ipsum. In Deo , non amando , nisi ipsum.

Nunquam solus sum. Deus semper mecum est. Nunquam solus operor. Deus semper me.



mecum operatur. Nunquam solus patior. Deus semper mecum patitur. An non hoc est in Paradiso degere, semper intueri Deum? An hoc est infernum incolere, nunquam intueri Deum?

O mi Deus! Tu semper cogitas de me. Et ego nunquam cogito de te. Tu semper mecum es, & ego nunquam tecum sum. Tu semper laboras propter me, & ego nunquam laboro propter te. Tu in me es veluti in inferno, ut videas scelera, & audias blasphemias. Deinceps verò in me eris, veluti in Paradiso, ut videas opera mea bona, & audias laudes tuas.

### Verba S. Scripturæ.

*Domine probasti me, & cognovisti me, tu cognovisti sessionem meam, & resurrectionem meam. Ps. 131. 1. & 2.*

*Quò ibo à Spiritu tuo? & quò à facie tuâ fugiam? si ascendero in Cælum, tu illic es: si descendero in infernum, ades. Si sumpsero pennas meas diluculo, & habitavero in extremis maris: etenim illuc manus tua deducet me: & tenebit me dextera tua. Ps. 128. 7. 8. 9. & 10.*

*Tu autem in nobis es, Domine. Jerem. 14. 9.*

*Dominus exercituum, in cujus conspectu sto. 3. Reg. 3. 14.*



## MEDITATIO CXLIV.

*De Solitudine.*

**D**ifficile est conversari simul cum Deo, & cum hominibus. Oportet fugere consortia hominum, si frui velis dilecto tuo. Mundus nimium tumultuatur circa cor tuum, unde non facillè possunt audiri verba dilecti tui. Non videtur Deus nisi in deserto. Et in sopore sensuum. Et in silentio cupiditatum.

Esto solitarius corpore. Esto solitarius mente. Esto solitarius corde. Deus te visitat, quando es solitarius corpore. Deus tibi loquitur, quando es solitarius mente. Deus te totum implet, quando es solitarius corde.

Nisi longe recedas à creaturis, Deus te non visitabit. Nisi imperes silentium creaturis, Deus tibi non loquetur. Nisi te penitus avelas à creaturis, Deus te non amabit. O solitudo corporis! O solitudo mentis! O solitudo cordis! Has qui tolit, videt, audit, & gustat Deum. Eamus in solitudinem, dilecte mi! ibi enim mihi loquêris ad cor.

## Verba S. Scripturæ.

*Ducam eam in solitudinem, & loquar ad cor ejus. Os. 2. 14.*

*Non in commotione Dominus. 3. Reg. 19. 44.*

*Mulier fugit in solitudinem. Apoc. 12. 6.*

*Elon.*



*Elongavi fugiens: & mansi in solitudine.*

*Pl. 54. 8.*

*Sedebit solitarius, & tacebit. Thren. 3. 28.*

*Cum oraveris, intra in cubiculum tuum,  
& clauso ostio ora Patrem tuum in abscondi-  
to. Matth. 6. 6.*

*Per vias, & plateas quæram, quem diligit  
anima mea: quæsiui illum, & non inveni. Cant.  
3. 2.*

## MEDITATIO CXLV.

### *De Derelictione sui ipsius.*

**B**Eatus homo, qui confidit in Deo. Qui se totum permittit Providentiæ ejus. Qui se dirigi sinit à sapientiâ ejus. Qui plenè quiescit in bonitate ejus.

Nihil perturbat animam, quæ se totam Deo commisit. Nihil adversatur desideriis ejus. Omnia ei eveniunt, sicut vult. Omnia sicut, sicut desiderat, quia nihil desiderat, nisi quod vult Deus.

Dormit illa inter sævientes procellas. Tranquilla est inter persecutiones. Laborat sine anxietate. Omnia agit sine inquietudine. Deus illi est Navis, & Navarchus, Currus & Auriga. Pater, & Protector. Tutor, & defensor.

Anima, quæ se totam Deo tradidit, quiescit intra brachia ejus. Ponit cor suum in sinu ejus. Nihil curat nisi ipsi placere. Nihil cogitat, nisi illi satisfacere. Illi commendæ



Spiritum suum, cum sit mortua omnibus timoribus & desideriis suis.

Sed Deus vigilat, cum illa dormit. Laborat, cum illa quiescit. Dirigit eam in itineribus ejus. Portat etiam in infirmitatibus ejus. Exaudit preces ejus. Prævenit omnia desideria ejus. Unicè curat omnia negotia ejus. Bene precatur omnibus consiliis ejus. Providet omnibus necessitatibus ejus. Sanat omnes agitudines ejus. Suaves efficit omnes amaritudines ejus. Mitigat omnes dolores ejus.

Filla mea, ait Dominus, cogita de me, & ego cogitabo de te. Exequere voluntatem meam, & ego exequar tuam. Negotia mea cura, veluti si tua essent: & ego tua perficiam, veluti si mea essent. Persevera in quiete, & nihil desidera. Dona mihi cor tuum, & ego tibi meum, donabo.

### Verba S. Scripturæ.

*Beatus vir, qui sperat in eo. Psal. 33. 9.*

*Nox contristabit justum, quidquid ei acciderit. Prov. 12. 21.*

*In doloribus dormietis. Isa. 50. 11.*

*Qui timet Dominum, nihil trepidabit: & non parebit: quoniam ipse est spes ejus. Eccli. 34. 14. 16.*

*Tibi derelictus est pauper, orphano tu eris Adjutor. Psal. 9. 14.*

*Scio, cui credidi, & certus sum, quia potens est, depositum meum servare in illum diem. 2. Tim. 1. 13.*



## MEDITATIO CXLVI.

*Quomodo oporteat se penitus derelinquere.*

**N**escio, an sim damnandus. Nescio, an sim salvandus. Nescio, an bene operer. Nescio, an male operer. Nescio, an proficiam. Nescio, an deficiam. Nescio, quid dicam, Nescio, quid cogitem, in tanta confusione cogitationum mearum, absque ulla perturbatione dico tibi. Mi DEUS! totum me tibi trado, & Providentiæ tuæ dirigendum committo.

Amici mei perfidè me produnt. Inimici mei persequuntur me. Consumor doloribus. Redactus sum ad extremam necessitatem. Spoliatus sum bonis meis. Denigratus sum calumniis. Nemo est, qui me consoletur. Nulum gustum sentio in exercitiis pietatis. Tentationes meæ augentur. Vires meæ imminuuntur. Lumina mea deficiunt. Nescio, quid de me sit futurum. Dereliquit me cor meum. Destitutus sum omni præsidio. Omnis consolatio mea inter ærumnas meas est, me ipsum penitus derelinquere, & dicere tibi: Mi DEUS! me totum tibi trado, & Providentiæ tuæ dirigendum committo.

An sum in gratia? An sum in peccato? An sum dignus odio? An sum dignus amore? An moriar bene? An male? An salvus ero? An damnandus? An ad cælum ibo? An ad infernum? Omnia hæc mihi sunt incomperta. Sed nihil horum omnium me perturbat. In Deo



Deo pono fiduciam meam. Quiesco in misericordia ejus. Innitor meritis Filii ejus. Commendo illi Spiritum meum. Tranquillus sum, cum illi dico : mi Deus ! totum me tibi trado, & Providentiæ tuæ dirigendum committo.

Sive moriar, sive vivam, sive citò moriar, sive diu vivam. Sive sim sanus, sive sim æger. Sive sim dives, sive sim pauper. Sive solatiis abundem, sive afflictionibus premar. Sive pace fruar, sive bello urgear. Perinde mihi est. Tuum beneplacitum, est etiam meum. Voluntas tua me recreat. Nil desidero, nisi tibi placere, & te amare. Tu es spes mea, & omnia mea. Mi Deus ! totum me tibi trado, & Providentiæ tuæ dirigendum committo.

### Verba S. Scripturæ.

*In manus tuas commendo Spiritum meum : redemisti me Domine, Deus veritatis. Pl. 30. 6.*

*In pace in idipsum dormiam, & requiescam. Psalm. 4. 9.*

*Ego mendicus sum & pauper : Dominus sollicitus est mei, Psalm. 39. 18.*

*Factus sum tanquam vas perditum. Psalm. 30. 14.*

*Ipse dixit : non te deseram, neque derelinquam. Hebr. 13. 5.*



## MEDITATIO CLXVII.

*De Annihilatione.*

**E**ſſe, fecit nos exire à Deo. Non eſſe, facit nos redire ad Deum. Donec anima repererit nihilum ſuum, non poterit reperire Deum. Latet iſ ſub creaturis, tanquam ſub velamentis, & ſpeciebus. Cùm quis interiora penetrat, Deum apertè videt.

Ut ſcias omnia, oportet nihil ſcire. Ut guſtes omnia, oportet nihil guſtare. Ut habeas omnia, oportet nihil habere. Ut ſis omnia, oportet eſſe nihil.

O mi Deus! Tu es mihi omnia, & ego nihil ſum. Tu es lux mea, ego nihil ſcio. Tu es fortitudo mea, ego nihil poſſum. Tu es virtus mea, ego nihil operor. Loquere Domine, quia audit ſervus tuus. Os meum coram te eſt ſine voce: ſed tu nōſti, quid loquatur tibi cor meum.

O felix anima, quæ audit Deum in ſilentio omnium meditationum ſuarum! Tacete cogitationes humanæ & carnales. Sileat omnis caro in Dei præſentiâ.

## Verba S. Scripturæ.

*Sileat omnis caro à facie Domini. Zach. 2.*

13.

*Redactus ſum in nihilum: abſtulisti quaſi ventus deſiderium meum. Job. 30. 15.*

*Sub.*



*Substantia mea tanquam nihilum ante te. Ps.  
38. 8.*

*Paululum cū pertransissem eos, inveni,  
quem diligit anima mea. Cant. 3. 4.*

*Affer mihi adhuc vas. 4. Reg. 4. 6.*

## MEDITATIO CXLVIII.

*De quinque Gradibus Perfectionis.*

**O**portet te, ut Viatorem, peregrinari super terram. Oportet te crucifigi. Oportet te mori in Cruce. Oportet te sepeliri. Oportet te descendere usque ad inferos.

Viator nulli rei adhæret. Crucifixus nihil operatur. Mortuus nihil sentit. Corpus in terra tumulatum pedibus calcatur. Nulla consolatio est in inferno.

O sacrum nihilum! Ubi anima perdit suum esse, ut transformetur in Deum. O sepulchra viventia! Ubi sapientes ædificant sibi solitudines! O Ager Evangelicus! Ubi thesaurus gratiæ latet absconditus. O terra ventum! ubi granum frumenti moritur, ut resuscitetur.

O DEUS solus! quàm es amabilis! Præoptarem tecum esse in inferno, quàm sine te esse in Paradiso. O utinam sim ex his mortuis viventibus, qui sunt vulnerati charitate! O utinam dormiam cum illis in sepulchro sensuum & cupiditatum!

O mi Deus! Utinam moriar, ut tu vivas in me! Utinam deinceps mihi nihil sim, ut totus



tus tuus sim. Ut tu sis totus in me, totus meus, & si ausim dicere, totus ego.

## Verba S. Scripturæ.

*Charissimi, obsecro vos, tanquam advenas, & peregrinos, abstinere vos à carnalibus desideriis. 1. Pet. 2. 11.*

*Christo confixus sum Cruci, vivo autem jam non ego: vivit verò in me Christus. Gal. 2. 19.*

*Mortui estis, & vita vestra est abscondita cum Christo in Deo. Col. 3. 3.*

*Consepulti sumus cum illo per Baptismum in mortem. Rom. 6. 4.*

*Dolores inferni circumdederunt me. Psalm. 17. 6.*

*Eduxisti ab inferno animam meam. Psalm. 29. 4.*

## MEDITATIO CXLIX.

### *De Perfectionibus Divinis.*

**Q**uid est Deus? Nescio. Deus essem, si id possem declarare. Deus esses, si id pos-  
ses comprehendere.

Quid est Deus! Est ille, qui est. Est ille, à quo sunt omnia. Est ille, propter quem sunt omnia. Est ille, in quo sunt omnia. Est ille, sine quo nihil esse potest. Est principium, finis, centrum, & fundamentum omnis esse.

Quip



Quid est Deus? Est voluntas omnipotens. Est Bonitas amabilis super omnia. Est felicitas suprema. Est Lumen æternum. Est Ratio falli nescia. Est Potentia insuperabilis. Est Justitia. inviolabilis. Est omne id, quod video. Nihil est eorum, quæ video. Est pulchrum, per quod sunt omnia pulchra. Est bonum, per quod sunt omnia bona. Est ille, qui me illuminat in sole. Qui me calefacit in igne. Qui me refrigerat in aquâ. Qui me nutrit in pane. Qui me recreat in floribus. Qui me sustentat in terrâ.

Quid est Deus? Vidistisne illum oculi mei? Non, quia non habet colorem. Audistisne illum aures meæ? Non, quia non habet sonum. Gustastisne illum lingua mea? Non, quia non habet saporem. Attigistisne illum manus meæ? Non, quia non habet corpus.

Quid igitur est Deus? Est essentia coloris. Est fragor soni. Est principium saporis. Est fundamentum omnis substantiæ. Est lumen super omne lumen, quod oculus non videt. Est vox super omnem vocem, quam auris non audit. Est odor super omnem odorem, quem odoratus non sentit. Est dulcedo super omnem dulcedinem, quam gustus non percipit. Est substantia super omnem substantiam, quam manus non tangit. Est esse incomprehensibile, quod comprehendit omnia. Invisibile, quod videt omnia. Indivisibile, quod unit omnia. Inaccessibile, quod est in omnibus. Æternum, quod producit omnia. Immobile, quod movet omnia. Immutabile, quod mutat omnia.

Quid



Quid est Deus? Est Spiritus, qui habitat in semetipso. Qui felix est per seipsum. Qui sufficiens est sibi metipso. Qui continet omnia in semetipso. Qui magnus est sine quantitate. Qui bonus est sine qualitate. Qui infinitus est sine numero. Qui immensus est sine extensione. Qui æternus est sine duratione. Qui pulcher est sine figurâ.

Quid est Deus? Est Spiritus, qui est per omnia, & non est divisus. Qui est in omnibus, & non est inclusus. Qui est extra omnia, & non est exclusus. Qui est super omnia, & non est elevatus. Qui est infra omnia, & non est depressus.

Quid est Deus? Est Spiritus, cujus natura non est, nisi bonitas. Cujus magnitudo non est, nisi Majestas. Cujus vita non est, nisi Fecunditas. Cujus intellectus non est, nisi Sapientia. Cuius voluntas non est, nisi Sanctitas. Cujus cogitatio non est, nisi Lumen. Cujus virtus non est, nisi Potentia. Cujus inclinatio non est, nisi Amor. Cujus actiones non sunt, nisi Miracula. Cujus motus non est, nisi Quies. Cujus duratio non est, nisi Æternitas. Cujus locus non est, nisi immensitas.

Quid est Deus? Est Spiritus semper præsens, & semper absconditus. Semper agens, & semper quietus. Semper colligens, & nihil lucrificiens. Semper effundens, & nunquam exhaustus. Semper amans, & nunquam inquietus. Semper conquirens, & nunquam exiens è centro beatitudinis suæ.

O magne Deus! O magne Spiritus! quàm terribilis es cogitationibus nostris; sed quàm



amabilis es voluntatibus nostris. O Sancte Sanctorum! Omnia ossa mea, quantumvis sint insensibilia, sensibilia tamen sunt ad tuam præsentiam. Clamant nocte & die: Domine! quis similis tibi?

O Anima mea! Quid quæris semper terram? Bonitatem? Hæc est in Deo sine malitia. Pulchritudinem? Hæc est in Deo sine macula. Perfectionem? Hæc est in Deo sine defectu. Scientiam? Hæc est in Deo sine errore. Fortitudinem? Hæc est in DEO sine infirmitate. Pacem? Hæc est in Deo sine perturbatione. Delectationem? Hæc est in Deo sine dolore. Abundantiam! Hæc est in Deo sine indigentia. Felicitatem? Hæc est in Deo sine miseriâ.

O mi Deus! amabo te ex toto corde meo, quoniam tu es gaudium meum, & summa felicitas mea. Nihil deinceps quæram extra te, quia omne, quod quæro, invenio in te. O quàm gaudeo, dum cogito, quòd te plùs possim amare, quàm te possim cognoscere! Non possum te comprehendere mente meâ. At possum te continere corde meo. Et quare cor meum non est totum tuum, cùm tu sis totus illius?

O Pulchritudo admiranda! O Bonitas infinita! Quando tandem te videbo? Quando tandem te amabo? Quia mori necesse est, ut te videam, æquum est, ut amore tanti Boni infinities moriar.



## Verba S. Scripturæ.

*Ego sum qui sum. Exod. 3. 14.*

*Ego sum α. & ω. Principium, & Finis, dicit Dominus Deus, qui est, qui erat, & qui venturus est Omnipotens. Apoc. 1. v. 8.*

*Quis similis tui in fortibus, Domine? Quis similis tui? Magnus in sanctitate, terribilis, atque laudabilis, faciens mirabilia. Exod. 15. 11.*

*Ex ipso, & per ipsum, & in ipso sunt omnia, ipsi Gloria in sæcula, Amen Rom. 15. 35.*

## MEDITATIO CL.

### De Amabilitate DEI.

**Q**uàm immensus est DEUS, qui creavit tam grandia! Quàm pulcher est DEUS, qui creavit tam pulchra! Quàm bonus est Deus, qui creavit tam bona? Quanta mihi Deus præstitit beneficia! A quantis me defendit periculis? A quantis me liberavit malis? Quanta mihi promittit bona?

Quis potiori jure meretur cor meum, quàm ipse? Quis pro corde meo obtinendo majus mihi pretium offert, quàm ille? Cui id donabo, nisi illi, qui suum mihi cor donavit? Cui id vendam, nisi illi, qui pretio sanguinis sui illud emit? Itane cor impium æqui-



valeat Sanguini Dei? Æquivalet vitæ Dei?  
 Æquivalet cordi Dei? Æquivalet Regno Dei?

O mi DEUS! Non mereor vivere, si vivere velim propter aliud, quàm propter te. Non mereor habere cor, si quid aliud velim amare, præter te. O quàm serò nimis te amavi. Pulchritudo semper nova, & semper antiqua! Heu! quàm præmaturè te offendi, Bonitas semper amanda, & semper adoranda. Agnosco tenebras meas. Horreo ingratitude meas. Semper te amabo, Deus Bonitatis! Nunquam te offendam, Deus Majestatis!

### Verba S. Scripturæ.

*Diliges Dominum Deum tuum ex toto corde tuo, & ex tota anima tuâ, & ex omnibus viribus tuis* Luc. 10. 27.

*In hoc apparuit Charitas Dei, quoniam Filium suum unigenitum misit Deus in mundum, ut vivamus per eum.* 1. Joan. 4. 9.

*Nos ergo diligamus Deum, quoniam ipse prior dilexit nos.* 1. Joan. 4. 19.

*Diligam te Domine, fortitudo mea; Dominus firmamentum meum, & refugium meum, & liberator meus. Deus meus adjutor meus.* Eccl. Pl. 17. 2. & 3.



## MEDITATIO CLI.

*De Amore DEI erga homines, & hominum  
erga Deum.*

**A** Memus DEUM, quia ipse nos amat.  
Amemus Deum, sicut ipse nos amat.

Amor Dei antiquissimus est. Amavit nos ab omni æternitate. Semper fuimus præsentēs in mente ejus. Semper fuimus præsentēs in eorde ejus. Amor illius tam antiquus est, quàm ipse Deus. Nunquam fuit, quin nos amaret. Sicut ergo semper fuit, ita semper nos amavit. Vult nos etiam deinceps amare in æternum.

Amor Dei est purus, & nullius lucri cupidus. Amat nos, opis nostræ non indigus. Amat nos, nec quidquam commodi à nobis expectat. Amat nos absque ullo nostro merito. Amat nos absque ullâ suâ obligatione. Amat nos, ut vicissim à nobis ametur, & per sui amorem beatos nos efficiat.

Amor DEI est tener. Est amor suavitatis. Est suavitas amoris. Est amor patris. Est amor Matris. Est amor Nutricis.

Amor Dei est fortis, Triumphat de omnibus obstaculis. Beneficia confert ingratis. Beneficia confert rebellibus. Beneficia confert inimicis suis.

Amor Dei est infinitus. Amat nos eo amore, quo semetipsum amat. Bona nobis contulit infinita. Mala pro nobis sustinuit infi-



nita. Sanguinem suum nobis dedit, qui est pretii infiniti. Gratiā suā nobis communicat, quæ est thesaurus infinitus. Gloriā suā nobis præparat, quæ est bonum infinitum.

Amor Dei est universalis. Complectitur omnes homines. Nemo est, quem non amet. Nemo est, quem non visitet. Nemo est, cui non ferat auxilium. Nemo est, cui non tribuerit Custodem Angelum. Nemo est, quem non redemerit. Nemo est, quem non velit salvari.

O Amator incomparabilis! Ubi reperiam amicum tam fidelem, tam antiquum, quàm te? O anima mea! potēsne non amare illum, qui tantopere te amavit? Potēsne denegare cor tuum illi, qui cor suum tibi donavit? Compara unum cum altero. Metire magnitudinem unius, & alterius.

O Deus meus, Amor meus! Fuitne unquam ingratitude æquiparabilis meæ? Tu me amas, ex quo es, & ego te offendo, ex quo sum. Tu me amas ab omni æternitate, & ego non velim te amare in tempore?

Amabo te deinceps, mi Deus! sicut tu me amāsti. Amabo constanter. Amabo purè. Amabo tenerè. Amabo fortiter. Amabo æternum. Amabo universaliter. In omni loco. In omni tempore. In omni statu & conditione. In omni genere personarum, & in exactissimā adimpletione omnis beneplaciti tui.



*Verba S. Scripturæ.*

*In Charitate perpetuâ dilexi te. Jerem. 31.*

3.

*Ipse Pater amat vos. Joan. 16. 27.*

*Sicut pater unicum amat filium suum, ita ego te diligebam, 2. Reg. 1. 26.*

*Omnes homines vult salvos fieri, & ad agnitionem veritatis venire. 1. Tim. 2. 4.*

*Cum dilexisset suos, qui erant in mundo, in finem dilexit eos. Joan. 13. 1.*

*Nunquid voluntatis meæ est mors impii, dicit Dominus Deus, & non ut convertatur à viis suis, & vivat? Exech. 18. 23.*

**MEDITATIO CLII.**

*De Incomprehensibilitate Dei.*

**O**Mnia tempora non possunt metiri Divinam Essentiam. Omnia locorum spatia non possunt eam includere. Omnes intellectus non possunt eam comprehendere. Omnia corda non possunt eam satîs amare.

Deus nihil est eorum, quæ video. Nihil est eorum, quæ tango. Nihil est eorum, quæ sentio. Nihil est eorum, quæ intelligo. Nihil est eorum, quæ cognosco. Nihil est eorum, quæ mihi imaginor. Est Essentia invisibilis, spiritualis, & incomprehensibilis.

O mi Deus! Quàm dives sum, si nihil habeam, nisi te? Quàm illuminatus sum, si ni-



hil videam nisi te? Quàm intelligens sum, si nihil cognoscam nisi te? Quàm beatus sum, si nihil gustem, nisi te.

Video omnia, quando nihil ampliùs video. Gusto omnia, cùm nihil ampliùs gusto. Intelligo omnia, cùm nihil ampliùs telligo. Possideo omnia, cùm nihil ampliùs possideo. Sum omnia, cùm nihil sum ampliùs.

Veneror omnipotentiam Dei, per Sacrificium mearum virium. Veneror Majestatem Dei, per Sacrificium meæ gloriæ. Veneror Bonitatem Dei, per Sacrificium desideriorum meorum. Veneror Incomprehensibilitatem Dei per sacrificium mearum cogitationum.

Evacua memoriã tuam imaginibus suis, & Deus eam replebit Essentiã suã. Exacua cor tuum affectionibus suis, & Deus illud replebit bonis suis. Evacua mentem tuam conceptibus suis, & Deus illam replebit lumine Sapientiæ suæ.

### Verba S. Scripturæ.

*Magnus consilio, & incomprehensibilis cogitatu. Jerem. 32. 19.*

*Cui comparastis me, & fecistis similem? Is. 46. 4.*

*Renuit consolari anima mea: memor fui Dei, & delectatus sum. Pl. 76. 4.*

*Omnia ossa mea dicent: Domine quis similis tibi. Plal. 34. 10.*

*Exinanite, exinanite usque ad fundamentum in ea. Psalm. 136. 7.*



## MEDITATIO CLIII.

*De Simplicitate.*

**E**Sto simplex mente. Esto simplex corde.

Mens simplex non habet nisi unicam cogitationem. Cor simplex non habet, nisi unicum desiderium. Sine gemina hac simplicitate nunquam pervenies ad unitatem.

Deus est purus actus. Nihil est simplicius, quam ejus essentia. Non potest se multiplicare. Non potest pati duplicitatem. Ab æterno non habet, nisi unam cogitationem, & unum amorem. Omnia dicit uno Verbo; & hoc verbum non est nisi veritas. Si cupias uniri Deo, oportet te imitari hanc simplicitatem.

Cui bono sunt tot cogitationes? Ad quid serviunt tot rationcinationes? An non convictus es à veritate? Cur quæris, quod jam peperisti? Fac, quod scis, & gusta, quod vides. Deus est magnum Verbum. Est magnum argumentum orationis. Projice te in hunc Oceanum. Merge te in hanc abyssum. In Deo reperies omnia. Extra Deum nihi reperies.

Martha nimis sollicita es, & turbaris erga plurima. Curæ tuæ sunt inutiles. Nimis multa paras alimenta Verbo, quod vis pascere. Ad quid conducunt tot curæ? Unum tantum est necessarium. Imitare Magdalenam sororem tuam. Meliorem illa partem elegit.



Auscultat, & non loquitur. Quiescit absque ulla sollicitudine. Summo abundat solatio, quod morari possit in præsentia Dilecti sui. Fuge multipliciter. Ama unitatem. Ecce unicum necessarium, nec est, nisi unicum, quod te possit plenè satiare.

Ut habeas unicam tantum cogitationem, oportet non habere, nisi unicum desiderium. Ut liber evadas à cogitationibus tuis, cura, ut liber sis à desideriis tuis. Sine cordis simplicitate nunquam habebis simplicitatem mentis. Millenas res diligis, & tamen de nullâ cogitationem vis admittere? Morem geris cupiditatibus tuis, & quereris contra mentis evagationes? Querelæ tuæ non sunt rationi conformes. Duplicitas occupat cor tuum. Evolat cor ad thesaurum suum. Delectatur in illo, quod diligit. Quoniam ergo non delectatur in Deo, Deum non unice diligit.

Non es Dominus mentis tuæ. An autem non es Dominus cordis tui? Non potes carere omni cogitatione. Sed an non potes liber esse ab omnibus desideriis? Non habebis cogitationes malas, si non habueris mala desideria. Include te intra cor tuum, ibi enim reperies, quod ames. Quidquid obstrepat mens tua, cave ne portam illi aperias. Fræna ejus levitatem. Comprime ejus curiositatem. Quod si eam coërcere non possis, permitte cursum menti vagabundæ. At cave, ne illam sequaris. Permane constans in quiete tua. Contentus esto inopia tuâ. Quid quæris, si Deum præsentem habeas? An fides non magis certa est, quàm sensus? *Mo-  
lius*



lius est amare, quàm cogitare. Satiùs est frui, quàm desiderare. Frueris dilecto tuo, quando eum amabis, nihil ultrà desiderando.

O Anima mea! quàm felix esses, si Deo contenta viveres, si non quæreres, nisi illi placere, si nil velles, nisi, quod ipse vult! Cor tuum in Oratione esset, sicut lapis in suo centro. Sicut flamma in sua sphaera. Sicut fluvius in suo oceano. Sicut acus magnetica directè respiciens polum suum. Sicut ferrum magneti suo conjunctum.

O mi Deus! Quid est, quod cupio, & quid est, quod quæro? Quid est quod desidero, quid est, quod exspecto? Ah! quietem inquiri, & semper in motu sum. Cuperem in pace vivere, & semper bellum voveo. Fatigatus tandem sum labore, volo deinceps quiescere. Nimiis abundo cogitationibus. Incipiam modò ardenter amare. Gustemus anima mea! & videamus, quàm suavis sit Dominus.

O Deus vitæ meæ! O pax animæ meæ! Latus obtuli tibi universa in simplicitate cordis mei. Tu nôsti, quid quæram. Tu scis, quid desiderem. Cor meum rectum & simplex est, mi Deus! caret omni duplicitate. Fac ergo illud ingredi in requiem Sanctorum, illudque attrahe ad centrum unitatis.

### Verba S. Scripturæ.

*Cum simplicibus sermocinatio ejus. Proverb.*



*Simplicitas justorum dirigit eos. Proverb.*

II. 3.

*Si oculus tuus simplex fuerit, totum corpus tuum lucidum erit. Matth. 6. 22.*

*Turbaris erga plurima, porro unum est necessarium. Luc. 10. 41.*

*In simplicitate cordis quærite illum. Sap. 1.*

I.

## MEDITATIO CLIV.

### *De Plenitudine Divitiarum Dei.*

**D**eus sufficit sibi ipsi. Non indiget operâ nostrâ. Sufficiens est creaturis suis, quæ non indigent, nisi ipso.

Deus est omnia omnibus hominibus. Est lumen cæcis. Est sanitas ægris. Est consolatio afflictis. Est robur infirmis, Est sanctitas peccatoribus. Est vita mortuis. Est pax vivis.

O dulcia verba! Deus meus & omnia! Quàm suavia sunt animæ, cui Deus est omnia, & cui omnia cætera, præter Deum, nihil sunt.

O Deus meus, & omnia! Desino ego cogitare, inquirere, & ratiocinari. Omnia reperiō in duobus his verbis: Deus meus, & omnia. Omnia, quæ lego, omnia, quæ intelligo, occupant mentem meam. Sed non replent cor meum. Ubique reperiō vacuitatem & indigentiam. In te solo invenio summam votorum meorum. O Deus meus & omnia!



omnia! Duo hæc verba sunt mel ori meo. Sunt fons aquæ vivæ cordi meo, quæ extinguit sitim ejus, & plenè satiat omnia desideria ejus.

Quid desiderare possum præter te? quid me satiare potest præter te? O Deus meus, & omnia! Tu semper mihi eris omnia, & creaturæ omnes mihi nihil erunt.

### *Verba Sacrae Scripturae.*

*Dixi Domino : Deus meus es tu , quoniam bonorum meorum non eges. Psal. 15. 1.*

*Ostendam omne bonum tibi. Exod. 33. 19.*

*Qui replet in bonis desiderium tuum, Psal. 102. 5.*

*Quid mihi est in Cælo , & à te quid volui super terram ? Deus cordis mei , & pars mea Deus in æternum ! Psal. 72. 25. & 26.*

## MEDITATIO CLV.

### *De Paradiso.*

**P**aradisus est Domus DEI. Est terra viventium. Est centrum quietis. Est Oceanus bonorum omnium. Est absentia malorum omnium. Est meta omnium desideriorum. Est fons omnium delectationum. Est thesaurus omnium divitiarum. Est thronus omnium Excellentiarum. Est finis omnium curarum. Est cumulus omnium consolationum.



Ibi videbis, & amabis. Possidebis, & gaudebis. Habebis omnia, quæ desideras. Nihil habebis eorum, quæ times. Ibi erit bonum sine malo. Delectatio sine dolore. Abundantia sine indigentia. Sanitas sine morbo. Vita sine morte. Quies sine inquietudine.

O quantum gaudium! videre omnia, quæ sunt pulchra. Amare omnia, quæ sunt bona. Possidere omnia, quæ sunt magnifica. Gustare omnia, quæ sunt dulcia. Videre primam Veritatem. Amare primam Pulchritudinem. Possidere supremum Bonum. Gustare summam suavitatem.

Quàm dilecta Tabernacula tua, Domine virtutum! Concupiscit & deficit anima mea in atria Domini. O quàm miser sum in hoc exilio! O quàm beatus ero in illa Patriâ! Anima mea, si diligas bona hujus sæculi, perdas bona æternitatis. Si terræ deliciis te oblectes, carebis suavissimis Cœli deliciis. Heu! quàm fordet mihi terra, dum Cœlum aspicio!

Mi Deus! Utinam moriar quàm citissimè, ut te videam! quia nemo videre te potest, nisi moriatur.

### Verba S. Scripturæ.

*Ostendam omne bonum tibi.* Exod. 33. 19.

*Replebimur in bonis Domûs tuæ.* Psal. 64. 5.

*Satiabor, cùm apparuerit gloria tua.* Psal. 16. 15.

*Inebriabuntur ab ubertate Domûs tuæ, & torrente voluptatis tuæ potabis eos.* Psal. 35. 9.



*Absterget Deus omnem lachrymam ab oculis eorum: & mors ultra non erit, neque luctus, neque clamor, neque dolor erit ultra. Apoc. 21. 4.*

*Oculus non vidit, nec auris audivit, nec in cor hominis ascendit, quæ præparavit Deus iis, qui diligunt illum. 1. Corinth. 2. 9.*

## MEDITATIO CLVI

### *De Unionē Divinā.*

**U**T perveniatur ad unionem, opus est magnâ mortificatione. Opus est magnâ animi collectione. Oportet se totum permittere divinæ Providentiæ. Oportet se sinere plenè dirigi ab obedientiâ. Oportet renuntiare iudicio suo. Oportet abnegare voluntatem suam. Oportet expugnare cupiditates suas. Oportet obsequi divinis inspirationibus.

Non potes simul agere cum Deo, & cum hominibus. Non potes abesse à te ipso, & præsens esse tibi ipsi. Conversari cum aliis & manere collectus. Cor habere ligatum, & mentem liberam. Amare omnia, & nulla de re cogitare. Mori spiritualiter, & vivere sensualiter.

Actio præcedit contemplationem. Labor ducit ad quietem. Timor sustentat amorem. Poenitentia disponit ad gaudium. Ratio adjuvat fidem. Humanitas JESU ducit ad ejus Divinitatem.



Homo sapiens , & discretus disponit gradus in corde suo. Primus est versùs cor. Secundus est in corde. Tertius est cordi. Quartus est supra cor. In primo timemus Dominum. In secundo audimus Magistrum. In tertio desideramus Sponsam. In quarto fruimur Deo. Timemus ad radicem montis Sinai. Videmus prodigia in medio. Excæcatur in vertice montis. Invenimus Deum in tenebris. Moyses , antequam vocaretur à Deo , non ausus est ingredi illam caliginem.

Gratia visitationis non fundat statum. Gratiæ quædam sunt excitantes. Aliæ sunt gratiæ remunerantes. Excitantes præcedunt meritum. Remunerantes coronant meritum. Excitantes sunt pro tempore. Remunerantes sunt pro æternitate. Non potes tibi securitatem spondere , quòd semel JESUM videris transfiguratum. Non debes te Sponsam credere , quòd semel præsens fueris nuptiis. Novitius potest frui Deo , ut tamen non sit in statu possessionis. Insolens præfidentia est , velle Sponsam esse , antequam fueris Ancilla.

Pœnitens potest quidem interdum cantare : sed propria ejus occupatio est plorare. Anima vulneribus saucia , non indiget Sponso , sed Medico. Debet quærere medelam vulnerum , & non petere amoris oscula. Cùm osculatus fueris pedes Dilecti tui , manus quoque ejus poteris exosculari. Cùm feceris bona opera , poteris etiam ori ejus oscula figere. O Domine , quis ausit petere hanc gratiam ; sed quis possit illam non desiderare ?

Ani-



Anima per meditationem instruitur. Per affectionem avellitur. Facit erui per se sua suspiria. Deinde moritur omnibus suis desideriis. Perdit usum vocis. Non scit amplius, quid loquatur Deo. Fit silentium in corde ejus, quo in admirationem rapitur, & stupore opprimitur. Terribilis caligo omnia lumina illi eripit. Imaginatio ejus est sine imagine. Appetitus ejus sine motu. Mens ejus sine ratiocinatione. Memoria ejus sine specie. Cupiditates ejus sine tumultu. Omnia nocturnis tenebris sunt involuta.

Quando Deus ex fundo caliginis, quâ mons Sinai est coopertus, animam vocat ad suum palatium, debet ipsa sine mora illud ingredi. Ignis, & tonitrua, fulgura, & præcipitia terrore illam complebunt. At ubi ingressa fuerit, Deus inscribet cordi ejus legem amoris, & gratiæ, teneritudinis & suavitatis. Coronabit illam claritate, & faciet resplendere faciem ejus radiis Divinitatis.

Mediâ nocte clausis portis Sponsus ingreditur cor. Ibi celebrantur nuptiæ Agni. Non audiuntur, nisi cantica gaudiorum. Ipsi etiam sensus in partem lætitiæ veniunt. Mens sola moratur attonita, cum se videt exclusam ab his nuptiis, & nescit, quâ viâ Sponsus ingressus sit. Solum cor experienciâ id didicit, sed effari non potest.

Beati, qui vocati sunt ad Nuptias Agni hujus Divini! Beati mortui in JESU Christo! Mortui ratiocinationibus naturæ. Mortui suis curis, & sollicitudinibus. Mortui suis moribus, & delectationibus. Mortui suis ti-



moribus, & desideriiis. Transibunt à poenitentia ad statum gaudii, & plenæ possessionis Dei. Videbunt labores suos coronatos pace, suavitatem, quietem, deliciis infinitis.

## Verba S. Scripturæ.

*Scribe: Beati mortui, qui in Domino moriuntur. Apoc. 14. 13.*

*Amodo dicit Spiritus, ut requiescant à laboribus suis, opera enim illorum sequuntur illos. Apoc. 14. 13.*

*Posuit tenebras latibulum suum: in circuitu ejus Tabernaculum ejus, tenebrosa aqua in nubibus aëris. Ps. 17. 12.*

*Cùm ascendisset Moyses, operuit nubes montem, & habitavit gloria Domini super Sinai, tegens illum nube sex diebus, septimo autem die vocavit eum de medio caliginis. Exod. 24. 15. & 16.*

*Ecce Sponsus venit. Matth. 25. 6.*

*Quæ paratæ erant, intraverunt cum eo ad nuptias, & clausa est janua. Matth. 25. 10.*

## Oratio ad SS. Trinitatem, pro impetrandâ Gratiâ Unionis.


**S**APIENTIA DEI mei governa me. POTENTIA DEI mei sustenta me. BONITAS DEI mei salva me. SPIRITUS DEI mei vivifica me. AMOR DEI mei inflamma me. VOLUNTAS DEI mei dispone de me.




Sanctitas DEI mei sanctifica me. Charitas DEI mei solare me. Majestas DEI mei regna in me. Immensitas DEI mei reple me. Lux DEI mei illumina me. Misericordia DEI mei complectere me.

Pulchritudo DEI mei attraha me. Dulcedo DEI mei penetra me. Magnitudo DEI mei annihila me. Pax DEI mei pacifica me. Justitia DEI mei dirige me. Sanctissima Trinitas, benedic me nunc & in æternum, Amen.

*Inhærendum erit cuilibet Versui, & ille præ cæteris degustandus, qui animum suavius commovebit.*







# CANTICA SPIRITUALIA,

Pro animabus Sanctis.

## CANTICUM I.

**D**EUS est in me, & ego sum in Deo. Deus est meus, & ego sum Dei. Deus est propter me, & ego sum propter Deum. Deus cogitat de me, & ego cogito de Deo. Deus quiescit in me, & ego quiesco in Deo. DEUS operatur propter me, & ego operor propter Deum.

O Deus meus, & omnia! quid est, quod quæram, aut desiderem, præter te?

## CANTICUM II.

**N**ihil supra Deum. Nihil sicut Deus. Nihil cum Deo. Nihil præter Deum. Unum uni; solum soli. Totum toti. Cor cordi. Cor, quod amat, nescit dividi. Cor, quod dividitur, nescit, quid sit amare.



O mi Deus! quid est in Cœlo, & in Terra,  
quod sit amabile, sicut tu? Quid est in toto  
Universo, quod tibi possit comparari?

## CANTICUM III.

**O**Mne desiderium meum est, nihil desi-  
derare. Omnis Voluntas mea est, ni-  
hil velle. Omnis cura mea est, de re nullâ  
esse sollicitum. Omne bonum meum est,  
nihil possidere.

Inveni, quem diligit anima mea, tenui  
eum, nec dimittam. Quærebam eum extra  
me, & inveni eum intra me. Quærebam  
eum in tumultu, & reperi eum in pace. Quæ-  
rebam eum in turbâ, & reperi eum in soli-  
tudine. Quærebam eum in mente meâ, &  
inveni eum in corde meo. Quærebam eum  
de die, & inveni eum in nocte.

Non vidi eum; sed cognovi eum. Cor  
meum percepit eum modo insensibili. Sa-  
tiavit me præsentia suâ. Implevit omnia de-  
sideria mea. Sustulit omnes anxietates meas.  
Cumulavit me deliciis. Beati, qui hâc  
quiete fruuntur. Et qui invitati sunt ad nu-  
ptias Agni.

## CANTICUM IV.

**D**'c mihi, obsecro, Dilecte me, ubi pa-  
scas, ubi cubes in meridie?



In corde puro, & ab omnibus creaturis  
avulso. Cor mundum est locus quietis meæ.  
Est paradifus deliciarum mearum.

Nullus clamor in Domo Dei. Silentium  
in Paradiso. Domine! non possum ultrà lo-  
qui, postquam tu mihi locutus es. Plenus  
sum cogitationibus, nec occurrunt amplius  
verba, quæ eloquar.

O cor meum! Custodi diligenter thesau-  
rum, quem possides. Sponsus ingreditur  
portis clausis. Egreditur, cum sunt apertæ.  
Occlude ante omnia portas sensuum tuorum.  
Pax amor, secretum, silentium. Ecce hæc  
animam in tuto ponunt.

## CANTICUM V.

**O**Mnia perdidi, nil ultrà habeo, quod per-  
dam. Omnia inveni, nihil est, quod  
ultrà quæram. Contentus vivo, nil ampli-  
ùs desidero. Totus Dei sum, nil ultrà ti-  
meo.

Omnia reliqui propter Deum. Omnia in  
Deo reperi. Desideria mea inciderunt in il-  
lum, sicut flumina in mare, sine tumultu,  
sine distinctione, sine motu, sine violentia,  
sine arctis aggeribus, quibus intra terræ al-  
veum constringebantur.

Postquam evanuit ex oculis meis, ingres-  
sus sum Oceanum, demersi me in hanc abyssi-  
sum. Perdidi me feliciter. Confudi meum  
esse cum esse Divino. Eram in tempore, &  
cre-



credebam me esse in æternitate. Eram creatura, & sentiebam me unitam Divinitati.

O nox mystica, & fortunata! ubi Verbum se univit menti nostræ, in silentio desideriorum, & cogitationum ejus. O quàm suavis est hæc hora! sed heu! quàm brevis! fileat omnis caro in præsentia Domini.

## CANTICUM VI.

**M**ors mihi minatur. Circumdatus sum tenebris. Agitatus sum procellis. Proximus sum portis inferni. Sed hæc omnia non me exterrēt. Amor est fortior morte. In tenebris sternit lectum suum. Dormit securè in medio procellarum. Coelum invenit in inferno. Paradisum suum secum circumfert, quia intra se habet, quidquid desiderat. Vult omnia, & nihil vult. Possidet omnia, & nihil possidet. Deus est thesaurus ejus, & felicitas. Cui Deus est omnia, totus mundus nihil est.

## CANTICUM VII.

**J**ESUS cogitat de me, & ego cogito de Jesu. JESUS operatur propter me, & ego operor propter Jesum. Cor meum illi sufficit, & ille sufficit cordi meo. Ille sibi complacet in me, & ego mihi complaceo in illo. Ecce amoris Canticum! quod ipsi con-



cino diu noctūque. Curam aliam non habeo, quàm ut nullam curam habeam. Unum bonum, quod desidero, est nihil desiderare. Vivere sine cura, & sine desiderio, est omnis mea delectatio.

## CANTICUM VIII.

**Q**uid est, quod sentio in imo animæ meæ? Quid est, quod agitur in imo cordis mei? Nuptiæ fiunt in Cana. Jesus illic patravit miraculum. Aquam mutavit in vinum. Ingressus est mediâ nocte clausis portis sensum.

Vidi eum, cùm non viderem. Cognovi eum, cùm non cognoscerem. Oculus meus non vidit eum transeuntem. Auris mea non audivit ingredientem. Sensi odorem unguentorum ejus. Gustavi mel dulcedinis ejus.

O mi Deus! In quam Regionem me deducis? An versor in Cœlo, an in terra? An vivo in tempore, an in æternitate? Video te sine imagine. Tango te sine corpore. Sentio te sine organo. Procul dubio jam versor in Paradiso. Si diutius ita frui Dilecto meo concessum fuerit, oportebit me mori.



## CANTICUM IX.

**R**Ecede à me Dilecte mi. Sed non diu me desere. Subtrahe mihi tuam præsentiam, sed non subtrahe mihi tuum amorem. Subtrahe tuas delicias, sed relinque mihi dolores tuos. Exime Paradisum tuum ex animâ meâ, aut rape animam meam in Paradisum tuum. Non possum gaudere, nisi in Cruce. Nisi occasiones aspera patiendi mihi suppedites, mortem mihi acceleras. Liberalis nimis es in solatiis, at parcus nimis es in doloribus.

O Deus meus! amor meus! Omnis delectatio mea est pati. Omne desiderium meum est mori. Anima mea, cane semper pulchrum hoc amoris Canticum.

Fixum mihi est in omnibus exequi beneplacitum DEL. Complacabo mihi in Deo. Complacabit sibi Deus in me, cum mihi complacabo in illo. Contestabor, me in Deo solo plenè conquiescere, cum inter ærumnas meas tranquillus degam. Non quiesco in Deo, si murmurem contra Deum.

## CANTICUM X.

**S**ummæ mihi gloriæ duco, propter te contemni. Omnes divitias meas affimo, nihil possidere præter te. Omnis delectatio mea est, multa aspera pati propter te.

X 5

Vivo




Vivo ego, jam non ego. Sum ego, & non sum idem ego. Tu & ego unum sumus. Omnes voluntates meæ defecerunt. Omnes spes meæ eversæ sunt. Omnia desideria mea extincta sunt. Totum esse meum annihilatum est. Non laboro amplius, nisi propter te. Non respiro, nisi per te. Non subsisto, nisi in te. Tu in me, ego in te. Tu pro me, ego pro te.

Esse, ubi vis. Velle, quod vis. Agere, quod vis. Pati, quod vis, efficit hominem beatum, & perfectum.

*Finis Canticorum Spiritualium.*







# VERBA SACRÆ SCRIPTURÆ.

Castis animabus, Christo  
JESU Dei Filio desponsatis, fre-  
quentiùs expendenda.

1. **D**ilectus meus hihi, & ego illi. *Cant.*  
2. 17.
2. Inveni, quem diligit anima mea: tenui  
eum, nec dimittam. *Cant.* 3. 4.
3. Adjuro vos Filiæ Jerusalem, ne fuscite-  
tis, neque evigilare faciatis dilectam,  
quoadusque ipsa velit. *Cant.* 2. 7.
4. Ego dormio, & cor meum vigilat. *Cant.*  
5. 2.
5. Pone me ut signaculum super cor tuum,  
ut signaculum super brachium tuum:  
quia fortis est ut mors dilectio. *Cant.* 8. 6.
6. Osculetur me osculo oris sui. *Cant.* 1. 1.
7. Sub umbra illius, quem desideraveram,  
sedi. *Cant.* 2. 3.
8. Anima mea liquefacta est, ut dilectus lo-  
cutus est. *Cant.* 5. 6.



9. Quæsiui, & non inveni illum: vocavi, & non respondit mihi. *Cant. 5. 6.*
10. Quid mihi est in Cælo? & à te quid volui suæ terram? *Psal. 72. 25.*
11. Defecit caro mea, & cor meum: Deus cordis mei, & pars mea Deus in æternum. *Psal. 72. 26.*
12. Quæ est expectatio mea, nõnne Dominus? *Psal. 38. 8.*
13. Dixi Domino; Deus meus es tu, quoniam bonorum meorum non eges. *Psal. 15. 1.*
14. Dominus pars hæreditatis meæ, & calicis mei, tu es, qui restitues hæreditatem meam mihi. *Psal. 15. 5.*
15. Tibi dixit cor meum, requisivit te facies mea: faciem tuam Domine requiram. Ne avertas faciem tuam à me: ne declines in ira à servo tuo. *Psal. 26. 8. & 9.*
16. Domine, ante te omne desiderium meum. *Psal. 37. 10.*
17. Fluminis impetus lætificat civitatem Dei, sanctificavit tabernaculum suum Altissimus. Deus in medio ejus, non commovebitur, adjuvabit eam Deus manè diluculo. *Psal. 45. 5. & 6.*
18. Dominus virtutum nobiscum; susceptor noster Deus Jacob. *Psal. 45. 8.*
19. In pace in idipsum dormiam, & requiescam. Quoniam tu Domine singulariter in spe constituisti me. *Psal. 4. 9.*



20. Hæc requies mea in sæculum sæculi : hîc habitabo , quoniam elegi eam. *Psal.* 131.  
14.
21. Posuit tenebras latibulum suum , in circuitu ejus tabernaculum ejus. *Psal.* 17.  
12.
22. Cùm dederit dilectis suis somnum , ecce hæreditas Domini. *Psal.* 126. 3.
23. Tuus sum ego , salvum me fac. *Psal.* 118. 94.
24. Pax multa diligentibus legem tuam. *Psal.* 118. 165.
25. Dominus benedicet populo suo in pace. *Psal.* 28. 11.
26. Converte anima mea in requiem tuam , quia Dominus benefecit tibi. *Psal.* 114. 7.
27. Concaluit cor meum intra me , & in meditatione mea exardescet ignis. *Psal.* 83. 4.
28. Expectans expectavi Dominum , & intendit mihi. *Psal.* 39. 1.
29. Audiam quid loquatur in me Dominus Deus : quoniam loquetur pacem in plebem suam. *Psal.* 84. 9.
30. Nisi Dominus custodierit civitatem , frustra vigilat , qui custodit eam. *Psal.* 126. 1.
31. Oratio mea in sinu meo convertetur. *Psal.* 34. 13.
32. Mihi autem adhærere Deo bonum est , & ponere in Domino Deo spem meam. *Psal.* 72. 11.




33. Ad te levavi oculos meos, qui habitas in  
cœlis. Ecce sicut oculi servorum in ma-  
nibus Dominae suae, ita oculi mei ad  
Dominum meum, donec misereatur no-  
stri. *Psal. 112. 1. & 2.*
34. Servus tuus sum ego, da mihi intellectum  
*Psal. 118. 125.*
35. Si ambulavero in medio umbræ mortis,  
non timebo mala, quoniam tu mecum  
es. *Psal. 22. 4.*
36. Deus cordis mei, & pars mea Deus in  
æternum. *Psal. 72. 26.*
37. In tenebris stravi lectulum meum. *Job.*  
*17. 13.*
38. Nec aspiciet me visus hominis. *Job. 7.*  
*8.*
39. Non in commotione Dominus. *3. Reg.*  
*19. 11.*
40. Ecce Deus Salvator meus, fiducialiter a-  
gam, & non timebo: quia fortitudo mea  
& laus mea Dominus, & factus est mihi  
in salutem. *Isa. 12. 2.*
41. Tu autem in nobis es Domine, & nomen  
tuum invocatum est super nos, ne de-  
relinquas nos. *Jer. 14. 9.*
42. Sileat omnis caro à facie Domini. *Zach.*  
*2. 13.*
43. Modicum laboravi, & inveni mihi mul-  
tam requiem. *Eccli. 51. 36.*
44. In omnibus requiem quæsi, & in hære-  
ditate Domini morabor. *Eccli. 24. 11.*
45. Qui perdiderit animam suam propter me,  
inveniet eam. *Matth. 16. 25.*




46. Spiritus sanctus superveniet in te, & virtus Altissimi obumbrabit tibi. *Luc. 1. 35.*
47. Dominus meus, & Deus meus. *Joan. 20. 28.*
48. Pax vobis: ego sum, nolite timere. *Luc. 24. 36.*
49. Pacem meam do vobis. *Joan. 14. 27.*
50. Ecce Sponsus venit. *Matth. 25. 6.*
51. Quæ paratæ erant, intraverunt cum eo ad nuptias, & clausa est janua. *Matth. 25. 10.*
52. Dominus est. *Joan. 21. 7.*
53. Quid timidi estis, modicæ fidei! Tunc surgens imperavit ventis & mari, & facta est tranquillitas magna. *Matth. 8. 26.*
54. Manete in me, & ego in vobis. *Joan. 15. 4.*
55. Vos similes hominibus expectantibus Dominum suum, quando revertatur à nuptiis, ut cum venerit, & pulsaverit, confestim aperiant ei. *Luc. 12. 36.*
56. Pax Dei, quæ exsuperat omnem sensum, custodiat corda vestra & intelligentias vestras, in Christo Jesu. *Phil. 4. 7.*
57. Ad eum veniemus, & mansionem apud eum faciemus. *Joan. 14. 23.*
58. Discipulus, quem diligebat Jesus, qui recubuit in cœna super pectus ejus. *Joan. 21. 20.*



59. Mortui estis, & vita vestra est abscondita cum Christo in Deo. *Coloss 3. 3.*
60. Ipse est pax nostra. *Ephes. 2. 14.*
61. In ipso vivimus, & movemur, & sumus. *Actor. 17. 28.*
62. Beati mortui, qui in Domino moriuntur. Amodo jam dicit Spiritus, ut requiescant à laboribus suis: opera enim illorum sequuntur illos. *Apoc. 14. 13.*







# VERBA AMORIS,

Excerpta ex Libello de Imitatione  
JESU Christi, in usum Animarum aspi-  
rantium ad unionem.

1. **F**elix, quem veritas per se docet, &  
non per figuras, & voces transeuntes.  
*Lib. 1. c. 3.*
2. Ex uno verbo omnia, & unum loquun-  
tur omnia. *Lib. 1. c. 3.*
3. Cui omnia unum sunt, & omnia ad unum  
trahit, & omnia in uno videt, potest  
stabilis corde esse & in Deo pacificus per-  
manere. *Lib. 1. c. 3.*
4. O veritas, Deus meus! fac me unum te-  
cum. *Lib. 1. c. 3.*
5. Tædet me sapè multa legere, & audire:  
in te est totum, quod volo, & desidero.  
*Lib. 1. c. 3.*
6. Taceant omnes Doctores, sileant univer-  
sæ creaturæ in conspectu tuo, tu mihi  
loquere solus. *Lib. 1. c. 3.*



7. Regnum Dei intra vos est. Regnum Dei est pax & gaudium in Spiritu sancto. *Lib. 2. c. 1.*
8. Cùm Christum habueris, dives es, & sufficit tibi. *Lib. 2. c. 1.*
9. O JESU splendor æternæ gloriæ, solamen peregrinantis animæ; apud te est os meum sine voce, & silentium meum loquitur tibi. *Lib. 3. c. 21.*

*Totum hoc Caput prorsus Divinum est, & peridoneum ad solatium animæ, quæ est in statu desolationis.*

10. Audiam, quid loquatur in me Dominus meus meus. Beata anima, quæ Dominum in se loquentem audit, & de ore ejus consolationis verbum accipit. *Lib. 3. c. 1.*
11. Loquere Domine, quia audit servus tuus. Servus tuus sum ego, da mihi intellectum, ut sciam testimonia tua. *Lib. 3. c. 3.*
12. Hæc dicit dilectus tuus: salus tua ego sum, pax tua, & vita tua. *Lib. 3. c. 1.*
13. Domine Deus meus, omnia bona mea es tu. Memento Domine, quia nihil sum, nihil habeo, nihilque valeo. *Lib. 3. c. 3.*
14. Tu solus bonus, justus & sanctus; tu omnia potes, omnia præstas, omnia imple; solum peccatorem inanem relinquentem. *Lib. 3. c. 3.*



15. Eja Domine Deus amator sancte meus, cum tu veneris in cor meum, exultabunt omnia interiora. *Lib. 3. c. 5.*
16. Tu es gloria, & exultatio cordis mei. Tu spes mea, & refugium meum. *Lib. 3. c. 5.*
17. Da mihi hoc semper desiderare & velle, quod tibi magis acceptum est, & charius placet. *Lib. 3. c. 15.*
18. Tu vera pax cordis, tu sola requies, extra te dura sunt omnia, & inquieta. In hac pace in idipsum, hoc est, in te uno summo æterno bono dormiam & requiescam. *Lib. 3. c. 15.*
19. Hæc mihi sit consolatio, libenter velle carere omni humano solatio. *Lib. 3. c. 16.*
20. Super omnia, & in omnibus, requiescas anima mea in Domino semper, quia ipse Sanctorum æterna requies. *Lib. 3. c. 21.*
21. O quando ad plenum dabitur mihi vacare & videre quàm suavis es Domine Deus meus! Quando ad plenum me recolligam in te, ut præ amore tuo non sentiam me, sed te solum, super omnem sensum & modum, in modo non omnibus noto? *Lib. 3. c. 21.*



*Lege Caput 48. lib. 3. quod est suavissimum,  
& Consolatione abundantissimum.*

22. Fili, quantum à te vales exire, tantum in me poteris transire. Sicut nihil foris concupiscere, internam pacem facit, sic se interiùs relinquere, Deo conjungit, sequere me: Ego sum via, veritas, & vita. *Lib. 3. c. 56.*

23. Domine, quæ est fiducia mea, quam in hac vita habeo? aut quod majus solatium meum, quàm tu Domine Deus meus. Ubi mihi bene fuit, sine te? Aut quando malè esse potuit, præsentem te? *Lib. 3. c. 59.*

24. Malo pauper esse propter te, quàm dives sine te. Eligo potius tecum in terra peregrinari, quàm sine te cælum possidere. Ubi tu, ibi cælum: atque ibi mors & infernus, ubi tu non es. *Lib. 3. c. 59.*

*Lege totum hoc Caput, quod est ultimum Libri tertii, & multum inde solatii capies.*

25. Quis mihi det Domine, & inveniam te solum, & aperiam tibi cor meum, & fruam te, sicut desiderat anima mea; nec ulla creatura me moveat, vel respiciat, sed tu solus mihi loquaris, & ego tibi sicut solet dilectus ad dilectum loqui. *Lib. 4. c. 13.*



26. Ah! Domine Deus, quando ero tecum totus unitus, & absorptus, meique totaliter oblitus? *Lib. 4. c. 13.*
27. Tu in me, & ego in te; & sic nos pariter in unum manere concede. Verè tu es dilectus meus, electus ex millibus, in quo complacuit animæ meæ, habitare omnibus diebus vitæ suæ. *Lib. 4. c. 13.*
28. Verè tu pacificus meus, in quo pax summa & requies vera, extra quem labor & dolor, & infinita miseria. *Lib. 4. c. 13.*
29. Verè tu es Deus absconditus, & consilium tuum non est cum impiis, sed cum humilibus & simplicibus sermo tuus. *Lib. 4. c. 13.*
30. O quàm suavis est Domine Spiritus tuus, qui ut dulcedinem tuam in filios demonstrares, pane suavissimo de cælo descendente, illos reficere dignaris. *Lib. 4. c. 13.*
31. Verè non est Natio tam grandis, quæ habeat Deo appropinquantes sibi, sicut tu Deus noster ades universis fidelibus tuis. *Lib. 4. c. 13.*
32. Magnus clamor in auribus DEI est, ipse ardens affectus animæ, quæ dicit: DEUS meus, amor meus: tu totus meus, & ego totus tuus. *Lib. 3. c. 5.*



*Verba hæc excerpta ex Libro de Imitatione  
JESU Christi, possunt animam suavi-  
ter ac utiliter occupare in Oratione, &  
post sacram Communionem.*







# SCIENTIA SANCTORUM NOSSE MORI

I.  
NECESSARIA OMNIBUS.

Nemo

**I**Ta vivit sceleratè, quin optet Mori bene,  
Desperatissimæ Vitæ est,  
qui Mortis bonæ caret Voto.

Roga, quem voles improbum;  
Talísne mori velit, qualis vivere audet?

Offendes Neminem,

Ita parùm sollicitum fui, cautum futuri:  
Nisi, qui aut Deum neget, aut Inferos ne-

sciat,

aut rideat æternitatem:

Quod itaque adeò est in votis, cur non præ-  
statur factis?

Quod sperant omnes: cur pauci curant?  
ita multis vivitur,

Ut sperari, nisi miraculo, mors bona non possit.



Cur rejicitur

In tempus alienum, quod habet suum?  
Quod, dum negligitur, nunquam tempori  
præstatur.

Cur aliquando facturum statuis,  
quod aliàs, aut non poteris, aut non voles?  
Et jam dum potes, negligis?

Vis dicam, quò *Vivere* differas?

Dum *Mori* cogêris.

Voles scilicet, cùm erit desinendum, incipere,

At, quæso te,

Unde ista bonæ *Mortis* fiducia,  
Cùm nulla præcedat bonæ *Vitæ* cura?  
Nunquid mereberis Vivendo malè, *Mori* benè?  
nunquid,

Qui *Viventem* misericorditer tolerat,  
*Mortuum* justè non judicabit?

*Disce* ergo *Mori*.

Id non discere, id nescire, ac ne scire quidem  
velle, pessima est inertia:

Quæ te, ne occupet, omni industria tua pro-  
vide.

De te agitur: age non segniter.

Negotium istud, negotiorum summum est;  
Lucra in eo damnâque vertuntur æterna.

## II.

### EXPERIENDA SEMEL.

*Momentum est,*

Quo experienda hæc scientia est:  
Adeò quippe *Nosse Mori*, arduum est,  
Ut, cùm illud annis centum didiceris,  
Me-



Momento solum unico experiaris.

*Ad Momentum* ergo istud,  
per omnem te vitam exerce.

Nulla satis diuturna ad id disciplina est,

Nulla sera, nisi cum jam proximum est:

Omnes eodem Spes tuæ ac Timores,

Curæ omnes, Sollicitudines,  
omnes Cogitationes, & affectus spectent;

Ad illud, confluent omnia mala tua;

quæ cum plurima sint, & spontanea,  
unde fiducia reo?

Sapies, si tempori expies;

Ad illud concurrent omnia bona tua,  
quæ si modica sunt, si imperfecta insuper,  
unde solatium judicando?

auge, dum dotes, & perface.

Ad illud comitabuntur te omnes pravæ  
consuetudines tuæ,

Vitiorum tuorum nutriculæ;

quas tu, qua ratione cohibebis tunc,  
cum natura erit infirmior, impetus vehemen-  
tior,

Gratia, quia neglecta, minor?

Exscindes, si melioribus corrigas.

Ad illud sequentur te omnes affectiones tuæ,

Timores, ante alias, & angores:

quod tu, quâ ratione frænabis infirmus,  
cum vincaris, sanus?

oppugna, ut vincas:

Ad illud sistent se omnes tuæ obligationes,

quibus Deo teneris, & Proximo,

non recessuræ, quoad te expediveris.

Id tu poterisne tunc,

cum aut nihil, aut parum poteris?



age ergo, ut nihil cuiquam debeas,  
nisi ut diligas:

Ad illud adrepent omnes pœnæ tuæ,  
tam, quæ ex culpis dimissis sunt relictæ,  
quàm quæ ex novis commissis sunt additæ;  
quando verò, & ubi expiabis?

diluas in tempore, ne luas in æternitate.  
Ad illud properabunt omnes adversarii tui,  
extremum te, & vires tuas experturi:  
qui cum te sæpius victo, animosi sint,  
ac tum, te infirmo potentes,  
quæ spes Victoriæ?

Resiste, dum firmus es, & infirmus non time-  
bis.

Ad illud præstò erit Angelus tuus,  
tot suis, per annos plures, obsequiis,  
de te optimè meritis, à te pessimè habitus;  
quod expectabis ab illo  
Vitæ tuæ Testimonium? quod Salutis Patro-  
cinium?

audi monentem Vivus, & senties juvantem  
Moriens.

Ad illud convenient Patroni tui,  
si tamen

aut elegisti aliquos, aut aliquando coluisti:  
Quod si neglectum est, quis patrocinabitur?

Elige, quos libet, cole, ut decet.  
Ad illud denique aderit Iudex tuus,  
qualis, heu! si offensus?

Et quomodo sustinebis offensum,  
Cujus, ipsis intolerabilior inferis, offensa est:

Quò evades Immensum?

Quomodo resistes Omnipotenti?

Qua ratione falles Sapientissimum?

Ne



Ne Judicem timeas, ut Patrem dilige.

Heu! *momentum*!

Omni *tempore* potius,  
totâque

Si felix est, deprædicandum,

Si infelix, deplorandum  
*æternitate.*

Quod ut terrori non sit, utere *Tempore*;

Usurâ *Temporis*,

Fœnerare *momentum* unicum;

*momento* unico,

*æternitatem.*

### III.

## DISCENDA SEMPER.

Unde verò,

Cùm *Mori*, nisi semel, nulli contingat:  
At *Mortis* nihilominus *Disciplina* est,  
Et discitur *Mori*, & docetur.

## DISCE A VITA.

1. Quæ quantumvis à *Morte* abest longè,  
*Mortis* præludium est;  
Quoque prorogatur diutius, hoc minuitur  
amplius:

Et quos annos numerat transactos,  
Totidem invenit sibi detractos,  
*Morti* adjectos.

2. Quæ die vix toto peracto, in suam  
sensim quietem desinit,  
Somnôque, *Mortis* Fratri, reficienda tra-  
ditur.

3. Quæ



3. Quæ infirmitatibus suis morbisque obnoxia;  
 Cum consistere se credit, diditur,  
 Et cum annos impoſterum plures computat,  
 Mortalitatis ſuæ à *Mortis* prodromis admonetur,
4. Quæ neceſſitatibus ſuis obligata,  
 Niſi paret, cum jubetur,  
 Imperio *Mortis* ſubjicitur:  
 Adeò à cibo, & potu,  
 Quibus *Vita* alitur, *Mori* diſcitur.
5. Quæ periculis ex omni aditu objecta,  
*Mortem* frequenter, ubi non timet,  
 appetit.

## DISCE IN VITA.

Nulla *Mortalibus* ſcientia convenientior,  
 Quàm *moriendi*:  
 Quam qui fuiſſent olim conſecuti, Sapientes  
 ſunt habiti;  
 Quando Sapientia nulla fuit credita ſublimior,  
 Quàm *Noſſe Mori*.  
 Quòd ſi jam *Mori*, eſt deſinere *Vivere*,  
*Mori* bene novit,  
 Qui in *Vita* bene novit deſinere.  
 Ut bene deſinas, bene incipe,  
 Semper proſice, conſtanter perſice.

Id ut diſcas,

## ASSUESCE BONIS.

Vivensque tibi redde familiare,  
 quidquid exercere moriens voles.

non



non aliter infirmitatituã prospexeris melius,  
magna illa in Vita est,  
in morte, multò maxima:  
quando, quidquid usus non reddidit facile,  
usurpatu erit difficile.

## I. COGITANDIS.

Occurret citò, quidquid cogitaveris crebrò:  
ac 1. Ideam tibi aliquam divinæ amabilitatis  
ex infinita honorum ejus copia,  
Et in exhausta Beneficiorum tibi præstitorum  
ubertate forma.

Vide Sapientiam ejus, novos identidem tibi  
benefaciendi modos adinvenientem;  
Omnipotentiam, meris tui beneficiis occupa-  
tam: ut levissimo in te suscitetur monitu,  
ut in Spem erigat,  
ad amorem inflammet.

2. Pertracta frequenter tecum  
Terrenorum vilitatem; ut deserenda non  
crucient;  
Cœlestium dignitatem; ut acquirenda animent,  
aspice præsentis vitæ calamitatem:  
prospice infelicitatem alterius.

### Cogita

Hospitii brevitatem; Patriæ Æternitatem;  
Illius moras, hujus solatiis demulce.  
3. Prævide, quæ Morituro sint eventura?  
ut cogitandi usu familiaria,  
expectentur animosius, sustineantur constan-  
tius, ac totam illam  
decumbentis tui, ac morientis  
seriem evolve.



& quibus tum voles indulgere cogitationibus,  
 usurpa sanus;  
 quos experiri affectus,  
 ad eos te exerce,  
 Eaque, quibus noles tum angi, jam amolire.

## II. AFFECTIBUS ORDINANDIS.

### 1. Timori imprimis:

Ne ita culpam aspiciat,  
 ut veniam non speret.

neque ita pœnam horreat,  
 ut Christi meritis derogat.

Time ut Filius, non ut Servus.

Time ante Mortem, ne timeas in Morte.

Time ad Pœnitentiam, non ad Desperationem.

### 2. \* Spei etiam:

ut firmis nitatur fundamentis,  
 unde nullus deturbet impetus.

quæque speras æternum, provideas tempori:  
 itaque speres,

ut, neque tu Spei, nec spes tibi desit;

Sperare enim velle, & Spei nolle cooperari,  
 non sperare, sed præsumere est.

### 3. Amori deinde,

Ne ita adhærescat ad creaturam,

Ut offendat Creatorem,

Neque ita delectetur Usurâ, ut crucietur jacturâ:

Ama,

Sed illum, qui amantem redamat,

& amando felicem efficit,

quem amare non potes, & miser esse,

### 4. Odio item:

Ut culpam oderis, non personam,

Et



Et illam quidem ita , ut expiare studeas ,  
non vindicare.

Oderis , licet , sed non , quod Deus , amat ,  
ne in divinum sis amorem injurius ;  
sed neque quod tu ipse beatè æternum  
amabis.

Oderis , quod amari nunquam meretur , pec-  
catum :

quod non odisse , est exitium suum amare.

Peccatorem adeò non oderis , ut amare ,  
etiam invitam cogas naturam ;

ne assuetus odisse , desinas in odio ,

Filius iræ æternus.

5. *Gaudio* insuper ,

Ut sit , non fucatum , sed sincerum ;

non de bono , quod mali causa est ;

multò minimè de malo , quod bono inimicum :

infeliciter gaudet , qui in luctu desinit.

Gaude , quod nomen tuum sit scriptum in  
libro vitæ.

6. *Tristitiæ* denique

ut nihil doleat , nisi

aut conscientiam mali , aut jacturam boni ;

Cætera , si affligant , non deiciant ;

mensura doloris , Dei offensa sit ,

cui placando dolere de Volo ; non angere ,

quidquid justo addis dolori ,

Tuam , non Dei causam dolere , convinceris.

### III. BONIS AGENDIS.

Bene agis , quidquid cum Virtute agis ,

Virtus est ,

quid-



quidquid actionis bonæ in bonum finem dirigitur.

nihil ergo mali in bonum finem age,  
nihil boni ab finem malum

Sed nec quod bene suscepisti, male prosequere,  
quicquid autem cœperis malè, fini bene.  
non potes non, quoad vivis, agere aliquid,  
debes autem nihil agere malè :

ut bene agas omnia, attende singulis,  
Et quod voles, vitam bene claudere,  
Bene, in vita exerce,  
Virtutes maximè

Sine quibus vivere, uti hominis non est,  
cujus vitam à pecude Virtutes secernunt,  
ita mori sine iisdem ; non est Christiani;  
utrumque infelicissimum.

Virtutes ut habeas familiares, frequenter  
exerce illo, qui infrà ponetur, aut alio,  
quo libuerit, modo.

#### IV. MALIS TOLERANDIS.

1. Anima nihil malum est præter peccatum,  
molestum est, quicquid contrarium est,  
Illud in te non feres ne momento quidem.  
Hic solum laudis est, impatientem esse.  
in aliis feres, quod corrigas, aut si id non  
potes, condoleas.

Hoc ferre, Virtutis est ; vincere, Felicitatis;  
moderari, cum vitio tuo accidit, Æquitatis ;  
providere, ne accidat, non Naturæ, sed Gratiæ.

2. Corpori quicquid molestum est,  
malum esse putatur.

utrum-



utrumque unde unde eveniat, ferendum est,  
tantò futurum gravius, quantò fertur iniquius;  
tantò levius, quantò toleratur facilius

Disce ferre, quod dolet Vivo, ut feras,  
dolores *mortis*.

patiando *mori* discitur:

Unde eveniat, quod pateris, parùm labora:  
evenisse, conscio Deo, satis est

Ille si quid adversi immiserit; feres æquius,  
quia paterna à manu est;

Si quid permiserit, patere inferentem,  
Suspice permittentem:

Dei tui Vicarius est,

quisquis poenas illi debitas, à te exposcit  
Inimicus certè tuus non est; ad virtutem,  
rem optimam, te exercet:

quam tu disciplinam si recusas, pessimus  
es discipulus:

Tu ipse si tibi molestus es, sustine,  
si culpâ tuâ, quia poena est.

Sin minùs, ultro suscipe, quia meritum est.

## DESUESCE MALIS

### I. COGITANDIS.

Coge ad Examen Cogitationes tuas,  
discerne vitiosas,

Vide, quæ ultro se ingerant, quæ accersantur,  
quæ citiùs præstò sint, quæ frequentius redeant,  
quæ familiariùs, quasi domesticæ sequantur,  
quæ blandiùs, velut amicæ, se insinuent.

Observa, quæ foris occasione, quæ intus  
motu suscitentur,



Cui maximè Virtuti sint contrariæ,  
 an contra Fidem dubiæ, contra Spem infirmæ,  
 contra Charitatem malignæ,  
 an contra Deum blasphemæ, aut impiæ,  
 contra Proximum iniquiæ, de Proximo sinistra,  
 circa teipsum illicitæ.

Et si quas offenderis in consuetudinem ductas,  
 contra eas potissimùm te muni.

Salutares primò, iisque contrarias substitue,  
 occasiones deinde præclude.

habe in promptu, quo te occupes;  
 prævide, quo declines.

Recipe te

modò ad Montem Oliveti, aliàs ad Calvariæ;  
 ibi Sanguinem sudantem, hìc fundentem,  
 vide Deum tuum;

nunc in Vulnere ejus sanctissima te abde,  
 mox in sinum Castissimæ ejus Matris.

ascende nonnunquam ad gaudia Beatorum;  
 aliquando descende ad tormenta damnatorum.

vide iterum, quàm breve sit gaudium  
 Cogitationis, quàm longum supplicium.

## II, APPETENDIS.

Scrutare Appetitiones tuas:

alterum illud est in te malorum seminarium:  
 nullum cuiquam earum vitium indulge,

sed nec dissimula,  
 quidquid senseris

aut inordinate appeti, aut immodicè declinari,  
 ad mediocritatem voca;

vide

qui.



quibus agiteris amoribus, quibus traharis  
desideriis,  
quæ te odia stimulent, quæ iræ inflamment,  
quos alas timores, quas spes nutrias:  
    produnt ipsæ se,  
aut fine, in quem feruntur, aut modo,  
    quo feruntur:  
Et bene ferri possunt, & malè,  
    si malè,

### DESUESCE.

Dum in naturam vitium nondum transit.  
neque adhuc cupiditas, facta est necessitas.  
    Noveris,  
quidquid extra virtutem apertis, vitium esse,  
in Virtute quicquid fugis, Errorem esse,  
ut bene appetas, rectè judica, justè pondera:  
    quod parvi facis, parùm desideras.

### III. AGENDIS.

Cita ad Tribunal Conscientiæ,  
    Omnes tuas actiones:  
à prima, manè, Vigiliâ incipe, in somno  
    define.  
Omnia tua studia, omnes percurrere occupa-  
    tiones  
Vide, quid Dei, quid tuâ, quid proximî  
    gratiâ gas.  
quæ ratione te impendas devotioni, labori,  
    Conversatiõni,  
    quid Corpori tribuas, quid animæ.  
Observa, quid cuique desit; quid redundet.  
Actionis anima, honestas est, & bonitas,  
    Z 2                      Orna-



Ornamenta sunt, solertia, celeritas, assiduitas,  
vigilantia, attentio, Conatus;

Sine honestate, vitam non habet actio,  
manétque cadaver, quamcunque ornes.  
sine Ornamentis, si vitam quidem habet,

Vigorem non habet, nec decorem,  
Quidquid porro, aut mali agis, aut malè,  
quicquid ita agere assuevisti;  
dediscendum est.

Quod si Consuetudo te aut ignarum trahit,  
aut facilem ducit;

habe, quo impetum sequentis tui frangas,  
objice scopulos, ad quos allidas;

Inspice facti turpitudinem, poenam prospice,  
paratam imposterum, à tergo sequacem,

Postquam verò stiteris, urgentem,  
pedum deinde refer, & in contrarium enitere,  
quò ut facilem trahas animum,  
convince rationibus, promissis allice,  
præmiis demulce.

*Consuetudinis porro*

aut obolendæ, aut confirmandæ, ut aliqua sit,  
quam sequaris, via,  
sic procede.

1. Agendum aliquid, aut prætermittendum,  
firmissimè tecum statue:

2. Momenta utriusque, & argumenta in  
promptu habe.

jubet scilicet Lex suprema,  
confirmant Sapientùm Testimonia;

Monstrant Bonorum Exempla;

Suadet salus; Ratio dicat,  
urget periculum;

ne,



ne , cùm velis agere bene , non possis ,  
cùm nolis agere malè , agas tamen ;  
idque tum ,

Cùm ultimum , aut bene , aut malè ages ,

3. Ex his æstima , agendi & prætermittendi ,  
parem necessitatem :

illius utilitatem , hujus perniciem ,  
illius dignitatem , hujus turpitudinem.

4. Quod ut frequenter occurrat animo ,  
Memoriale aliquod tibi statue ,  
aut monitorem etiam aliquem constitue.

5. Adverte ad agendi , aut omittendi difficul-  
tatem

eámque non actionis esse , aut omissionis no-  
veris , sed voluntatis :

quæ si prompta est ,

æquè facilè , aut sistet actio , aut sequetur :  
promptam ratio efficiet & meditatio.

6. Implora & de cælo Gratia subsidium ,  
quo naturæ malè propensæ flectas duritiem.

7. Proficere Deo tuo , te hoc agere , aut pati ,  
illud fugere paratum.

quicquid minùs prompte fiat ,

non arbitrii esse , sed prava inclinationis.

8. Admove piam aliquam ipsi tibi violentiam ,  
& ad pœnam aliquam te Deo tuo obliga ;  
si ad numerum , quem tibi statues ,  
aliquid , aut non agas , aut non omittas.

9. Admitte denique à conscientia tuæ mode-  
ratore.

aliquam ad id obligationem ,  
quam tibi in expiationem peccatorum  
imponat.



10. Designa tibi tempus aliquod, quo hoc tuum  
propositum excutias: & explora, quantum  
aut profeceris, aut defeceris.

## DISCE A MORTE MORI.

1. *Mors separat animam à Corpore.*

Separa & tu à Corpore animam, non morte  
sed *Mortificatione*.

non contineat se angustis Corporis limitibus  
animus tuus:

non adhæreat illi vitioso affectu, cui con-  
junctus

est necessario naturæ nexu.

separa ab illo Cogitationes, abstrahæ affe-  
ctiones,

noli, quæ corporis sunt, amare nimis impensè;  
noli desiderare nimis cupidè,  
noli anxie nimis curare.

2. *Mors à Charis omnibus avellit.*

Præveni & tu mortem mortificatione,

ut non rapiatur inordinate,

non adhærescat vitiosè:

Ama non tuâ, sed Dei tuâ gratiâ;

non quia placet tibi forma Corporis,  
sed quia in anima resplendet Imago Dei.

3. *Mors adimit omnia Fortunæ bona.*

id ne sine questu tuo accidat,

mortem tempori præoccupâ, eâq; præmitte eo  
ubi perpetuâ eorum usurâ es fruiturus.

Divide cum indigentibus;

Expende in usum salutis tuæ, & cultum Dei

néve id cum dolore tuo eveniat,

abstrahæ affectum ab illis, quæ habes;

aut



aut, si non habes, appetitum cohibe.

*4. Mors doloribus discruciat,*

ut feras dolores mortis, assuesce molestiis vitæ  
nec contentus ferre oblatas, accersere ultro.  
morere Corpori, per spontaneas afflictiones.  
morere sensibus, per eorum abnegationes.

Laboribus te exerce, para doloribus.

Mors ferit mitius, quô minus habet, quod  
lædat.

*5. Mors delicias omnes & delectationes  
subtrahit.*

non senties earum jacturam moriens.

si vivus iis carere didiceris;

sed & facile repudiabis Carnis,

si gustaveris oblectationes spiritûs;

non æstimabis caducas,

si respexeris æternas.

*6. Mors angit futurorum ignoracione;  
præteritorum recordacione, præsentium  
horrore.*

Discemori, spem compara, ut non angant  
Futura:

pœnitentiam usurpa, ut non crucient præterita;

Culpas in te dilue, pœnas â te exige.

Præsentibus te para: acquire amicos,

qui non destituant: delige Patronos,

qui succurrant.

*7. Mors vitæ & Gratia tempus claudit:*

tu certa cum velocissimo;

& quod sistere non potes, in cursu intercipe;

usurpa de illo, quidquid concessum est,

nec secuturum aliquid tibi promitte.

Diem omnem transige, ut ultimum,



Horam omnem, ut supremam,  
nec, ut speres, quod incertum est,  
certi aliquid dimitte.

8. *Mors* supremo sistet Judici  
Mortem, præveni; iste illi te quotidie,  
quem semel Judicem habiturus es:  
prælude etiam iudicio illi in vita,  
Erige Tribunal in corde tuo,  
Testem accerse conscientiam,  
cogitata, dicta, facta eodem cita:  
Tu ipse Reus, Judex, Vindex esto,  
neque, quod nolis sustinere post mortem,  
in Vita dissimula.

9. *Mors* aufert è Tempore & transcribit  
Æternitati:

Imitare & tu Mortem vivus,  
ac degens in tempore, considera Æternitatem.  
sed & aufer tempus cogitationibus vanis,  
verbis otiosis, cogitationibus inanibus,  
ac melioribus consecra;  
iis scilicet, quæ egisse in Tempore, gaudebis  
in Æternitate.

10. *Mors* denique, quod in te Vivo non potest,  
in proximo Mortuo tibi exhibet.  
Disce mori, si non in te, qui vivus es,  
saltem in altero,  
quem è vivo tui simili mortuum vides,  
& quod in illo vides certum,  
in te dubium non puta.

## DISCE QUOTIDIE MORI.

Dirige ad mortem dies singulos,  
& manè incipe, procede per diem, tanquam  
vesperi moriturus. ac



ac 1. simul atque experrectus à somno fueris ,  
mortalem te cogita ,  
adeoque certo moriturum , quàm certum est ,  
non fallere Veritatem , non errare Fidem.

Mortuos non vivere :

plures ea nocte mortuos , plures eo die morituros ,

te ad meliorem diei istius frugem superstitute.

2. Pete à Deo , vitæ & mortis Domino ,  
ita diem istum transigere , ut si ultimus esset ,  
atque ut transactum fuisse , in morte voles.

*O Supreme vitæ Mortisque Domine ! scio me  
Mortalem , credo me moriturum : Tu dona  
gratiam , ita vivendi , ut mori non timeam ;  
ita moriendi , ut æternum vivam.*

3. Missæ sacrificium , cogita mortui pro te  
Christi monumentum.

quem dum mortuum credis , moriturum  
te non dubitabis ,  
ac per illius mortem ,

Salutarem moriendi horam rogabis ;  
eoque ante mortem , Corpore refici , quod  
pro te nôsti in ara immolari.

4. Venerare peculiariter Patronos ,  
quos vitæ mortisque singulares tibi ,  
in omnes diei horas elegisti :  
& ut morituro assistant , roga.

nominatim illos , qui & morienti in Cruce  
JESU ,

& in lectulo , Matris ejus Mariæ adstiterunt.

5. Ad horas omnes , renova mortis memoriam ,  
& cogita , tantò te illi esse propinquiorem :



poteris illud ad clausulam salutationis Angelicæ.

6. Si quid molesti accidat , aut operosi,  
præludium mortis cogita;  
& disce mori à mortificatione.
7. Morituris, si ita res tulerit , assiste;  
Et in eis mortalitatem tuam contemplare.
8. Dum corpori vacas curando , Escam te  
vermibus puta saginare: hòc lautiozem ,  
quò curas impensius,
9. Vivus quandoque sepulchrum per cogita-  
tionem ingredi , & qualis illic futurus sis ,  
observa : ac intra cutem tuam ossa , mor-  
taliùm simillima intueri ,
10. A die transacto , cæterorum cape argu-  
mentum, annósque, quos vixisti, ad calculos  
revoca; quære, quot sis deinceps victurus;  
& audi, illud: Stulte! hac nocte, &c.  
Et qua hora, non putas &c.
11. Conscientiam tuam ante somnum inspicere,  
& pensa, eámne offerre morti audeas?  
ac tum rationes ejus ita compone ,  
ut si non esses supervicturus :
22. Cùm cubitum secedis , & ad lectum te  
comparas , aliquem , eo in opere mortis pro-  
cessum cogita , nec aliter te loculo  
atque lectulo imponendum ,  
solo ex omnibus facultatibus tuis linteo  
coopertum  
ac tum , veluti crastinum non habiturus ,  
Testamentum tuum conde :  
Hæredesque tuos JEsu scribe & Mariam ,  
ut verò dormias suaviùs, moriturus securiùs  
inter



inter Jesum & Mariam , Angelum tuum  
& Josephum te colloca :  
quos inter mori optabis.



## V I R T U T E S

Frequenter per vitam usurpandæ ,  
ut morituro sint familiares.  
quando , quicquid in consuetudinem vitæ  
non transiverit , operosum erit , exercere ,  
Has te aut harum similes , si non vacat  
quotidie ,  
singulis minimùm hebdomadis semel  
usurpa.

## F I D E S ,

O Deus veritas ! quanto tuo beneficio inter tot errantes in tenebris Gentium myriades , ego illustratus Fidei Lumine , video & credo !

O veritas ! reverbero in te lumen illud , & Credo , quicquid unquam revelasti , & per Ecclesiam sponsam tuam , Matrem meam , credendum proposuisti.

Submitto tibi captivum intellectum meum , & quicquid de te non capio , per te credo : quicquid non intelligo , humiliter amplector , firmissimèque teneo ;

Tetrinum , esse & Unum ; Deum & Hominem : Creatorem , & Conservatorem ; Redemptorem & Justificatorem ; Testem & Judicem ; Vindicem & Remuneratorem.

In.



Infinîtè sapientem, ut nihil ignores ,  
 Omnipotentem, ut omnia possis.  
 Optimum, ut omnia communices,  
 Misericordem, ut parcas pœnienti.

Justum, ut damnes reum:

Veracem, ut non fallas ; Simplicem, ut non  
 mutes ; authorem boni omnis , quicquid in  
 præsens habeo , & spero impofterum , ac  
 quicquid brevissimo tempore ago boni , æter-  
 nis te præmiis compensaturum : quicquid  
 momento unico ago mali , æternis te suppli-  
 ciis vindicaturum.

Et in hac fide per gratiam tuam opto vivere,  
 spero mori.

Ac contra errores omnes , ab ea alienos pro-  
 testor.

Tu, O Veritas , Lumen hoc in me auge ,  
 in aliis Te ignorantibus accende :

Et da, ut in eo , per semitas Justitiæ una-  
 nimiter omnes , ad felicem ambulemus Æter-  
 nitatem.

### S P E S.

O Deus Fidelitas ! quam iterum tuo bene-  
 ficio , tot inter desperatos , ego promissis  
 Tuis fretus , sperare non desino.

Jaçto in te, quam habeo à te, spem meam:  
 promissisti mihi pœnienti veniam , Supplicanti  
 Gratiam , perseveranti Gloriam , Consilium  
 in dubiis , solatium in adversis , subsidium in  
 periculis.

Ecce amplector toto sinu spei meæ promissa  
 tua , & certus sum , si sperare non desiero pro-  
 missis te non defuturum. Ta-



Tametſi ergo tentet Diabolus, ſtimulet cupiditas, blandiatur Mundus, mors minetur, & omnia in me conjurent Elementa, non timebo mala, quoniam tu mecum es.

Quid enim timeam, quando tu me protegiſ, qui es omnipotens, qui me infinities amplius ſtudes ſervare, quàm omnes mei adverſarii perdere?

Quid contriſter? quantumvis deſtituar viribus Corporis per infirmitates, animi Solatiis per afflictiones, vitæ ſubſidiis per egeſtatem, Hominum adjumentis, per orbitatem, quoad tu me non deſtituiſ, in quo ſolo invenio omnia?

Quid non ſperem ab omnipotentia, cui nihil eſt difficile; à Sapientia, cui nihil incognitum: à Bonitate, cui nihil moleſtum? quæ quicquid vult, poteſt; quicquid promittit, præſtat: & liberaliùs etiam, quàm ego ſperem; cupidiùs, quàm ego deſiderem?

Quid non expectem ab eo, qui dedit non rogatus, illum, quo nihil habuit charius, Filius ſuum.

Qui, ne vacillet ſpes mea; obligavit mihi ſuam divinam Fidelitatem; promiſſa firmavit Sanguine, Corpus ſuum oppignera-  
vit?

O Deus ſpei meæ! quid non ſperet amicus tuus, qui etiam inimicis tuis promittis omnia?

Quem rejicias ad te converſum, qui etiam à te averſum in vitas, ſollicitas, & paſſis brachiis expectas?

Spero



Spero veniam, pro quo interpellat innocens sanguis Filii tui.

Spero vitam, pro quo in mortem author vitæ Filius tuus dedit animam suam.

Spero salutem, pro quo video laborare omnipotentem Filium tuum usque ad mortem.

O Jesu spes mea! tanta est Bonitas tua, ut in ea, etiam pessimus sperem.

Tanta est Beneficentia tua, ut meritò in eam, etiam ingratus sperem:

Tanta est misericordia tua; ut, quò ego sum miserior, hoc ampliùs à te sperem:

Esto ergo, Peccator ego sim; Tu meus Fidejussor es.

Ingratus ego sim: Gratia tua omnem meam excedit Ingratitudinem.

Indignus ego sim; Excellentia tua omnem meam superat Indignitatem:

Miser ego sim; major est misericordia tua.

Merita mea nulla sunt, tua infinita sunt.

Age ergo anima mea! spera in Deo tuo: Eripe te de terrenis, exurge ad cœlestia; Desere caduca, spera æterna: Renuncia hospitio, ad patriam anhela. Tibi conditum est pulcherri-  
mum illud Cœli Palatium: Consortes tui erunt Angeli. Amici tui Beati. Beatitudo tua Deus: Tu beatus æternùm.

## CHARITAS DEI.

O Deus Bonitas! quanto amore meo dignus es; qui, cùm te tot damnati oderint, non ament tot reprobi, amari à me velis, & amore meo me facere beatum!

Amo



Amo itaque te ex toto Corde meo,

In te, amabilissimum, quia Deus es : Cujus natura Bonitas est : Cujus intellectus Sapientia est : Cujus voluntas, Amor est? Cujus Forma Pulchritudo est : Cujus Potestas Omnipotentia est : Cujus Vita Beatitudo est : Cujus locus, Immensitas est : Cujus Tempus Æternitas est.

Amo te ex toto Corde meo,

Extrate, amabilissimum, quia Deus meus es, ubique tui erga me amoris imprimens vestigia : quocunque enim me verto, amorem video : quicquid de te cogito, amantem invenio.

Æternitatem considero ? inde usque è tot reprobis feligis me. Tempus cogito ? è nihilo condis me, & in tempore quidem, quot modis amabilis est ?

Quàm amabilis Creator es, qui solius ductu amoris ad Imaginem tuam creas me ; & totum mundum propter me !

Quàm amabilis Conservator es, qui non minore amore me conservas, & mecum ac propter me cætera omnia !

Quàm amabilis Redemptor es, qui tam admirabili amoris prodigio, perditum me sanguine tuo reparas !

Quàm amabilis Sanctificator es, qui tam gratuito amoris beneficio, vitâ gratiæ me donas !

Quàm amabilis Protector es, cujus Amor è tot periculis, toties me eripuit !

Quàm amabilis Rex es, qui amoris tui divinâ munificentia in partem Regni tui me admittis !

Quàm



Quàm amabilis Dominus es , qui amore servi captus ad solium Gloriæ tuæ me evehis !

Quàm amabilis Pater es , qui degenerem Filium , victus amore , in gratiam toties recipis !

Quàm amabilis Sponsus es , qui amore tuo post tam fœda , toties iterata divortia , me dignaris ?

Quàm amabilis Judex es ! qui Amore tuo mitigatus , tot annis sententiam differens , ad pœnitentiam me expectas.

Toties amabilem , tot modis amantem me , amo ex Corde , ô Deus ! illudque per amorem tuum , cui negare nihil potes , ex amore rogo , ut quæcunque ex amore mei creâsti , sint amoris mei adjumenta : quæcunque in carne pro me assumptâ ex amore fecisti , aut sustinuisti , sint amoris mei fomenta : quæcunque in Cœlis promissisti , sint amoris mei nutrimenta : donésque me amare te super omnia , denique in amore vivere , & ex Amore mori.

## CHARITAS PROXIMI.

O Deus ! non in te solùm , sed in tuis omnibus amabilissime , amare te non possum , & proximum meum , imaginem tuam , odisse ; Sed nec amare perfectè , & proximum , etiam inimicum non amare.

Amo itaque ex corde , omnes , communis conditionis vinculo mihi copulatos : Amicos pariter & inimicos propter te amo , cujus gerunt



runt Imaginem per naturam , similitudinem per Gratiā; in quo solo sunt amabiles; extra quem si amantur, viciosè amantur.

Amo eos, quia & mandato tuo amare præcipis, & exemplo tuo amare doces: Amāsti verò ita ab æterno, ut in tempore creāris ex nihilo: amare etiam æternū paratus es, modo ne amore tuo se præstent indignos.

Amo illos, & quicquid in illis tuum est: detestor verò, quicquid in illis non tuum, sed alienum est, quale solum & unicum peccatum est: quod etsi tuo illos amore indignos reddit, nihilominus reddit obnoxios: quia uti amare culpam non possum, ita odisse personam non debeo.

Amo illos: & semel amatos æternū amare desidero; quo amore ut digni sint, optare ego possum, Tu solus præstare.

Ut verò etiam amare me probem imposte-  
rum, Amorem illum conceptum Corde, testabor Ore! Conciliabo mihi offensos, & offensam, si quæ ab iis venit, excusabo: vitii quicquid notāro, si licet, emendabo; verbulo certè nullo exasperabo: Opere etiam probabo, amoliāque ab iis, quicquid verè malum videro. Conabor verò, quicquid salutare Corpori, Animæque cognōro omni ope, ind striāque mec procurare. Vertam in partem meliorem, quicquid sinistrum occurrerit: non reddam certè, sinistrè judicando deterius.

Cui quidem Amori meo, quicquid mihi aut ab illis contrarium fuerit illatum, aut ab affectu meo mihi suggestum, jam nunc detestor. Et hunc Amoris mei erga omnes, promiscuè,



senlum, uti Te teste profiteor, ita te adiutore, retinebo, speroque, in isto Amore & vitam agere & mortem obire.

### CONTRITIO.

Ecce mi Deus! & advolvor ad thronum Misericordiæ tuæ reus & supplex, rogoque te per omnes tuas miserationes:

Per æternum tuum erga me Amorem, per susceptos in carne nostra pro me Labores.

Per internos, gravissimosque pro peccatis meis animi tui Angores & Dolores.

Per omnes Corporis tui cruciatus, in Passione, Cruce, Morte, toleratos.

Per accepta pro me Vulnera, & fuscum copiosissimè Sanguinem.

Per omnes irrogatas Nomini tuo ignominias.

Per omnia Vitæ, & mortis tuæ merita.

Per merita item Virginis Matris tuæ, Angelimei Tutelaris, Patronorum meorum, & Sanctorum omnium, eorumque & Electorum omnium suffragia.

Respice illis me oculis, quibus Petrum te negantem, Paulum persequentem, Matthæum in telonio sedentem, Magdalenam ad pedes tuos jacentem, Latronem in Cruce pendentem respexisti: & præsta veniam, quam non merui; Gratiā, quam perdidi; misericordiam, quam neglexi.

Doleo de Te offenso, tam amabili Deo meo quem amo ex intimo Corde, & amare æternū desidero, ac

De-te-



Detector omnia peccata mea , Negligentias , Ingratitudines , & imperfectiones & quicquid unquam contra infinitam tuam Maieſtatem , Cogitatione , Verbo , Opere , Omiſſione deliqui.

Eja mi Salvator ! memento nomen tuum , & ſalvame perditum.

Si magna ſunt , quæ commiſi ; major eſt Bonitas tua , cui ſupplico.

Si magna ſunt mea debita ; majora ſunt tua merita.

Quomodo non recipies ad te Converſum , qui à te Averſum , invitâſti ex Amore , quæſiſti cum Dolore ?

Quomodo rejicies Miſerum , qui eſ Filius Pater Miſericordiarum ?

Quomodo deſtitues Deſolatum , qui eſ Deus totius Conſolationis ?

Quomodo non parces Supplici , qui pro Reo mortuus eſ ?

Eja Pater , respice Filium , memento , illum non pro te , ſed pro me , non pro ſuis , ſed pro meis peccatis eſſe mortuum.

Potuiſſe ego plus te offendere , quàm ille te placare.

Quòd ſi inirationes mecum velit Juſtitia tua , ecce offero Theſauros Filii tui , infinities debitis meis majores.

Si minus ille pro me præſtitit , quàm ego contra te peccavi , utere in me jure tuo.

At minus ego poſſum offendere , quàm ille placare ; minus ego mereri , quàm ille ſuſtinit.



Ecce Pater ! in Filio lytrum meum ! Ecce è vulneribus ejus, è manibus, pedibus, latere stillat, quod offero !

Respice Pater Filium unigenitum, & recipe adoptivum.

## RESIGNATIO.

O Supreme rerum omnium Domine ! Non mea, sed tua voluntas, in me & per me fiat, in tempore & æternitate.

Satis meus fui, qui tuus esse debui : satis diu in te injurius, quia in me benignus.

Usurpavi me mihi, qui sum obligatus tibi ; abusus me ipso sum Mancipio tuo : animâ meâ, tui Imaginē ; Intellectu meo veritatis tuæ Speculo : Voluntate, amoris reâ ; Memoriâ, Beneficiæ tuæ teste ; Sensibus denique, obsequii tui Ministris.

Detestor tandem iniquam hanc meam proprietatem, ac ne momento quidem deinceps ullo quidquam, ut meum, retinere statuo :

Sed totus, qui sum, in Jus tuum transeo, meque & omnia mea tibi resigno ; ac divino tuo Beneplacito omnino permitto, offeroque.

Corpus in victimam, Cor in templum, Vitam in holocaustum, Vires omnes & Facultates in Beneplaciti tui obsequium.

Statue de me, quicquid tibi placuerit, cui placere non potest, nisi salus mea.

Uttere me, velut re tua, meis omnibus, Famâ, Vitâ, Fortunis, Corpore, Animâ ! ad arbitrium tuum.

Nun.



Nunquam tua circa me voluntas, ab æterno, nisi optima fuit; nunquam deinceps erit alia.

Nunquam mea hætenus bona fuit, nec esse potest, nisi tuæ conformis.

Quicquid ergo de me decrevisti Æternitate, in Tempore exequere.

Sanum vis? Sanitatem tibi impendam: Vis Ægrum? Ægritudinem; vis Pauperem? Paupertatem: vis Opulentum: Opulentiam; vis Felicem? Felicitatem. Vis Miserum? Miseriam.

Id unicum modò, tuis in me adde beneficiis, ut nihil mihi placeat, quod tibi displices, nihil mihi displiceat, quod placet tibi.

### GRATITUDO.

Heu! ingratitude mea pessima, Optime & Benignissime Deus! æternis tibi Beneficiis sum obligatus; & nullo momento temporis, ubi debui, gratus fui. Tota vita mea, purissimum est donum tuum, omniâque vitæ meæ momenta meritissima beneficia tua; & plena sunt omnia Ingratitudinis meæ.

Benefactorem te agnovi, & non colui: Beneficia non æstimavi, ut debui: non usurpavi: ut potui; non retuli gratias, quas expectabas; non reddidi usuras, quas exigebas.

Utinam! O benefactor meus liceret ad hoc punctum, totam vitam meam revocare; & quicquid neglectum est, compensare!

Utinam liceret Beneficia tua æstimare suo pretio! Gratias referre pro merito: me ipsum reddere pro obsequio:



O Deus ! agnosco Beneficientiam tuam & obligationem meam : Te Benefactorem , & me debitorem . Te Liberalissimum in dando , Me parcissimum in compensando , ingratissimum in usurpando.

Agnosco Te conditorem meum , me figmentum tuum . Te Salvatorem , me perditum : Te Justificatorem , me injustum : Te Protectorem , me infirmum.

Creâsti me ad imaginem & similitudinem tuam , ad Gloriam tuam , & salutem meam.

Conservâsti me hæcenus , tantis universis impensis & propter me omnia.

Redemisti me à morte æternâ , ad vitam æternam , Vitâ & Morte Unigeniti tui.

Illuminâsti me Fide tuâ , ne à te Fine meo aberrarem.

Justificâsti me toties , Gratiâ tuâ indignum , & inamicitiam tuam me restituisti.

Pepercisti mihi toties , damnationis reo , & in spem salutis me vocâsti.

Subduxisti me tot peccandi occasionibus , & in securitatem è tot periculis me asseruisti.

Liberâstime à tot malis , quæ evenire mihi poterant . Suppeditâsti mihi plurima ad salutem media : pro quibus omnibus cum non habeam , quod rependam , nisi unicum Amorem :

Amo Te benefactorem meum ex toto Corde meo , & in compensationem Beneficiorum tuorum , offero tibi omnia Filii tui merita ; unumque illud per eadem humillimè rogo , uti , cui vivo optimè voluisti & fecisti , moriturum



riturum divinâ tuâ beneficentiâ non dedigneris.

## ABNEGATIO SUI, &c.

O Deus! unicum & summum bonum meum, totus ac solus thesaurus meus! in quo omne meum quiescit desiderium, à quo omne votum meum expletur.

Utinam fiat verum in me, illud Veritatis tuæ oraculum! *Ubi est thesaurus tuus, ibi & cor tuum:*

Utinam Affectus meus, per creatas Bonitatis tuæ umbras vagè diffusus, tibi aliquando adhaereat!

Utinam nihil extra te, nisi propter te concupiscat! Ecce mi Deus! abnego meipsum, ut te retineam: renuncio omnibus, ut in te omnia inveniam.

Trado me tibi, ad quem omni jure pertineo: & quidquid à te ad usum habeo, sponte reddo; non usus, nisi ad placitum tuum.

Protestor etiam contra omnes rerum delectabilium fallaces illecebras, contrâque omnes Cupiditatum stimulos, & vitiosas ad creata Inclinationes.

Quæque amare non possum sine cœlestium fastidio, neque usurpare sine offensa tua, te teste repudio.

Et quæ transiturum me ad æternitatem reliquitura sunt, ultro relinquo.

Infirmittatis tamen meæ conscius, peto à te per merita Filii tui, gratiam tuam, ut me eorum usus, quibus carere non possum, non se-



ducat, neque eorum affectus Cor meum à te abstrahat, tum maximè, cùm morti vicinus tibi sistat, terrenis omnibus æternum separandus.

## PATIENTIA.

Patientissime Deus! erubesco meritò impatientiam meam: dum cogito Patientiam tuam, pudet me ignaviæ meæ, qui tot annorum disciplinâ te Magistro ad Patientiam non erudior: qui pati cogor & pati non disco: pati enim jubeor, dum vitam ingredior; pati mereor, dum peccare non desino: vivere non possum, quin pati debeam: salvus non ero, nisi per patientiam.

Quando tandem, tot obligatus ad patiendum debitis, tantis ad illud ipsum invitatus præmiis, tot instructus exemplis, patiar, quæ pati me, non odio, sed amore jubes?

Quando patiar Jubens cum usura, quæ nolens, cum damno meo patior? Heu infelicem me patientem, qui ita patior, ut patiendo amplius pati merear; dum, quæ justè patior, injustè detestor.

Pati ego tot titulis mereor, quot peccatorum me à primæ ætate reum, conscientia mea arguit: pati mereor, non modò quidquid evenire molesti, adversi, iniqui potest in terris; sed ipsos insuper inferos, idque toties, quoties te graviter offendi, quoties autem (heu!) non offendi?

Et talia quidem promeritus, levissimam manus paternæ dedignor correptionem, quæ  
rórque!



rorque ! Heu ! Famem pati æternam dignus sum : & indignor , si quid minus ad appetitum meum temperatum apponitur !

Calumnias mortalium omnium , damnatorum æternas sannas ; rerum à Deo conditarum omnium exprobrationes sum meritis : & verbulum amici jocantis , admonitionem Prælati arguentis non fero.

Egestatem extremam , ac rerum omnium penuriam promerui ; & stomachor , dum re minima carendum est.

Societatem Damnatorum æternam sum meritis : & molestè fero mores fratrum : defectus naturæ inculpabiles.

Pœnas inter Damnatos sempiternas jam pridem sustinere me oportebat , & tam iniquè patior , brevem aliquam corporis afflictionem , aut animi molestiam.

Et quid mihi , æternos dolores promerito , diuturnum in tempore , quantumvis molestum videri possit ?

Tu insuper , Benignissime Deus , ad hæc debita mea addis præmia tua : & liberalissimis patientiam meam promissis sustentas ; lactasque eam ac mulces æternis Cœli gaudiis. Polliceris bona tua omnia , atque adeò Te ipsum illi in præmium , eâ solum lege , ut paululum tolerem ? Et hoc molestum sit ?

Heu ! quanta & quoties , passus non sum , ut vacarem vitiis , indulgerem concupiscentiis , placerem hominibus , potirer desideratis !



Heu ! quid non patiuntur improbi , ut supplicia mereantur æterna ! Et ego pio zelo non feram , quæ mihi Deus meus immiserit !

Ut verò etiam Exempla non desint , quæ ad patiendum me sollicitent ; Tu ipse tot annis toleras me , heu qualem ; quot peccatis , cupiditatibus , vitiis , imperfectionibus plenum , toleras tamen & expectas , dum resipiscam !

Tu Deus meus , in me , & à me sustines , quæ nullus unquam homo , ab homine sustinuit. Et me quidem , quem tantis beneficiis afficis , quem è sordibus extractum , ad tantam dignitatem evehis , quem inter Cœli Hæredes , & Regni tui Confortes admittis.

Et quasi parùm illud esset , Hominem induis , & humana in carne hominum omnium portas dolores. Eaque pateris , quæ cogitare malignitas , quæ infligere inhumanitas potuit ; quæque pati , nisi Deus Homo , non posset.

Sustinet me Angelus meus , & tanta in me tamque indigna : Angelus tanto me nobilior , tam bene de me meritus ; & perseverat tamen mihi benefacere.

Sustinet me Mater mea , & tanta Mater , cujus primogenitus Deus est : sustinent me Beati omnes.

Sustinent quotquot nôrunt , aut vident me , Et tanta in me sterilia sint Exempla ?

Video in super , amoris tui tesseram esse patientiam ; & quò quisque tibi carior est , hoc amplius pati.



Novi denique usuram patientiæ Gratiā esse, dotem ejus Pacem, Cœlum hæreditatem. Et pati adhuc recusē, imò verò pati, patiēda omnia non desiderem?

Ecce mi Deus! paratum me iam tandem aliquando ad plagas tuas: cæde, punge, tunde, crucia, feram per gratiam tuam: meo merito, tuis promissis, tuo, omniūque exemplo doctus. Tu, ô Deus! hic cæde, ut parcas æternū.

# PETITIO.

Benignissime Deus! animat me Veritas tua, ut audeam à te petere, quod non mereor à te impetrare.

Novi enim, teneri te sponsione tua, nihilque negaturum, quidquid petiero.

Experior, urgeri me necessitate mea, cui aliunde, nisi per te satisfieri non potest.

Novi, velle te rogari, quod dare desideras? ne tam impensè, ac crebrò posse me rogare, quin tu cupidius ac frequentius exspectes dare.

Novi, perspectas tibi esse omnes meas necessitates, & infirmitates, misérias omnes, & molestias.

Novi, parata te habere subsidia, id solum deesse, ut rogem.

Eja ergo rogo te per omnes tuas miserationes, da mihi, quod Filius tuus pretio sanguinis sui mihi comparavit: quod dare, tibi facile est, & honorissimum; quod impetrare, mihi necessarium & salutare.

Da,



Da, ut verum concipiam de peccatis meis dolorem, agam pœnitentiam, pœnas expiem.

Da, ut in Fide constans, in Spe firmus, in Charitate fervens perseverem.

Da, ut tuum in me adimpleatur beneplacitum; tua in me beneficia non sint frustranea.

Da, ut patienter feram, quidquid mihi adversi, aut molesti evenit: dignum me omni molestia, humiliter sentiam.

Da denique, ut in te vivam, per Gratiā; de te, per Sacramentum; Tecum, per Gloriam: Moriārque Filius Gratiæ, viatico Corporis tui munitus, hæres salutis, Amen.

## AFFECTUS S. COMMUNIONIS.

Dulcissime JESU! patris viventium, viaticum in Domino morientium, quem in V. Sacramento præsentem confiteor, & Deum meum veneror, sine quo vivere non possum, mori non spero:

Ecce pando tibi sinum cordis mei, & paratum offero totum animi mei habitaculum; dignare ad me venire, & mecum ad finem usque vitæ manere.

Et qui te non roganti offers, ad te anhelantem non despice. Obsecro te, mi JESU! per illum ipsum amorem, quo te mihi in Cibus communicas, & per istud amoris Sacramentum, istam mihi ex hoc Gratiarum Fonte præsta Gratiā, ut illo Corporis tui Sacratissimo cibo,



cibo, dignè reficiar in vita, piè in morte: eoque refectus, fastidiam omnes terræ delicias, & carnis voluptates, tecúmque vivam in tempore, quoad in te vivam æternum.

Ut eodem confortatus, viam ingrediar universæ carnis, sistárque iudicio tuo, non dammandus ad mortem, sed salvandus ad vitam, in qua te summo bono meo, beatè fruar æternum.

O mi JESU! Tu luisti in Corpore tuo, quidquid ego peccavi in me: tu abluisti Sanguine tuo, quidquid ego deliqui in corde meo. Per illud ipsum Corpus, per Sanguinem istum supplico, absterge à me, quidquid reperies in me, quando viatico isto Corporis tui reficies me, transiturum in æternitatem.

Et quod tunc fortassis non potero, jam rogo, per divinum tuum erga me amorem, & per hoc amoris Sacramentum; ut ultimum meum sit suspirium.

Deus abscondite, & Salvator, salva me, ut ultimum meum sit desiderium, in viaticum mortis sumere te: ut ultimum meum sit solatium. Tecum per Sacramentum Corporis tui uniri: ut ultimum meum sit votum:

In manus tuas tradere spiritum meum, ut ultimum vitæ meæ punctum terminetur Amore, Amen.



## DEVOTIO

*In varias supplicationes digesta.*

## I. AD DEUM PATREM.

O Pater Misericordiarum , & Deus totius Consolationis ! indignus quidem ego sum isto te nomine appellare , qui Misericordiam non merui , sed justitiam ; non consolationem , sed castigationem ; dignus tamen es , isto à me nomine honorari : At quæ tua Misericordia , si mea desit miseria ? quomodo tu Consolator , si ego non sim afflictus ?

Eja ergo , mi Pater ! miseria mea est , quæ te facit Misericordem ; afflictio mea te Consolatorem ; agnosco me miserum , ostende te Misericordem ; afflictum me fateor , Consolatorem te testare. Ego quidem ut miser sim à me habeo ? ut sim afflictus , mihi met imputo ; Tu verò , ut miserearis , ut consoleris , non mea te miseria , aut afflictio , sed tua te movet miseratio & dignatio.

Miserere ergo mei , tum , quando in me cum morte , miseriæ simul omnes incumbent ; ac tum solare , cum desolatio me suprema occupabit.

Quo in agone ostende te Patrem , & succurre Filio.



## II. AD FILIUM.

O JESU Misericordissime ! quia Filius Patris Misericordiarum ; qui ut misereri posses promptius , miser factus es ; miseriasque nostras , nascendo suscepisti , vivendo expertus es , moriendo expiasti.

Ego te post Patrem , miseriarum omnium plenissimus , humiliter apello , & demissè supplico per omnes tuas , pro me toleratas misérias , & usurpatas in memiserationes ; ut misérias omnes , peccatorum meorum justissimum debitum , admittas in miseriarum tuarum sanctissimum commercium.

Faciásque , quæ in poenam irrogas , in meritum transire , & ad præmium computari :

Mortem verò , miseriarum mearum in vita præsentè ultimam , quam obire communis jubet necessitas , obire feliciter , tua præster benignitas ; eamque , mihi esse miseriarum omnium terminum , & bonorum omnium principium :

Idque ut sperem , facit infinitum , per quod spero , Mortis tuæ pretium ; quæ uti mortem sempiternam sustulit , ita vitam æternam conferat.

## III. AD EUNDEM CRUCIFIXUM.

O JESU Crucifige ! quàm sublimis in sinu Patris , tam humilis in brachiis Matris , brachiis Crucis , Matris Synagogæ.

Quàm



Quàm gloriosus in Cœlis , tam abjectus in terris,

Quàm à te beatus , tam à me miser.

Quàm splendidus in paludamento Majestatis tuæ , tam sordidus in lacerna Vilitatis nostræ.

Credo te Deum in Humanitate , & Hominem in Deitate , etiam sub spinis faucium , à Vulneribus cruentum.

Spero in te , supra me exaltatum per Deitatem , ad me usque exinanitum per Humanitatem.

Et spero à te , quidquid pretio Sanguinis tui comparâsti pro me.

Amo te amabilem mihi , quia Creatione Imago tua sum : amabiliorem , quia dignatione Imago mea es.

Rogo te in ista Fide , per Spem illam , ex eo Amore , adde istud tuis in me beneficiis.

Ut , quem in Communionem Calicis tui , in Crucis tuæ consortium , in dolorum partem jubes venire , dones etiam venire in partem , & societatem Meritorum : per eaque , ita me pati , ut non succumbam ; ita me sequi , ut non deficiam ; ita certare , ut non cadam ; ita vivere , ut mori non timeam ; ita denique mori , ut mors mea sit initium vitæ illius , in quo æternos Crucis fructus , tecum beatè degustem , & laudes tuas , cum Beatis omnibus æternum decantem.



IV. AD EUNDEM AFFECTUS.  
S. COMMUNIONIS.

*Suprà*

Dulcissime JESU Panis Viventium, &c.

V. AD SPIRITUM SANCTUM.

O sancte Spiritus, O Bonitatis Principium!  
O Deus Amoris, in quo spiro, per quem  
spero; ad quem suspiro; cujus est amare pro-  
prium & consolari.

Ad te, amore licet & consolatione æquè in-  
dignus, supplex advolvor, nihil quidem  
asserens, quod mereatur amorem, plurimum  
tamen, quod desideret consolationem.

Et per Amorem tuum, quo nihil habes cha-  
rius, obtestor, ut & tu miseris meis suc-  
curras;

Illis, quas & alienum primi Parentis vitium  
intulit, & proprium deinde adauxit.

Atque imprimis fordes animæ meæ, amo-  
ris tui obstacula, Fonte gratiæ tuæ abluas:

Mentis meæ cæcitatem, & ignorantiam, lu-  
mine Fidei, & sapientiæ dispellas:

Cordis mei teporem, igne amoris tui inflam-  
mes:

Ariditatem Spiritûs mei, vigore virtutis  
tuæ fecundes.

Quod quidem cum à te obtinuero, & con-  
solatorem laudabo & Amatorem sperabo:



Qualem te utrùm habeam , quando cum Mortis necessitate luctandum ; tantò confido certius , quantò te amavero sincerius :

Ut verò etiam confidam , Amo te ex corde , & amare æternùm desidero.

## VI. AD VIRGINEM MATREM.

O Maria , mea tot titulis , quot ego tibi obligor beneficiis ; tantò mihi benevolentior affectu , quantò propinquior partu ; Mater meas , non conditione Naturæ , sed Gratiz jure , sub Cruce constituta ; quando me genuisti , non ex utero naturalem , sed ex corde Filium spiritualement ; non quidem doloribus parvurientis , certè tamen doloribus morientis ; non tui , sed in te morientis Filii tui , unice dilecti :

Ecce ! jam Mater mea , venit ad te Filius tuus , Primogenito tuo longè dissimilis. Et inter adoptivos tuos , infimus ; Filius tamen tuus , ad te Matrem suam , & supplicat pro salute sua , Sanguine Filii tui partâ , Lacrimis tuis impetratâ , Patrocinio tuo obtinendâ.

Monstra ergo te Matrem , & respice Filium.

Quo nomine si ille indignus est , tu certè materno dignissima : respice ut succurras ; recipe , ut salves : succurras Auxilio , salves Patrocinio :

Respice , & non despiciet Filius ; recipe , & non seducet inimicus.

Et si quid in me offendis , unde displiceam ; in te reperis , unde placeam ; per Te scilicet reconciliato Filio.

Quod



Quod ut à te impetrem vivus, & obtineam mortuus, per illud tibi charissimum, & mihi dulcissimum Nomen Matris supplico.

## VII. AD ANGELUM CUSTODEM.

O Custos Angele, à primo vitæ momento mihi fidelissime, salutis meæ nunquam non studiosissime! agnosco benevolentiam tuam in Officio, liberalitatem tuam in Beneficio, Humilitatem in obsequio.

Cœpisti mihi bene velle, cùm cœpi vivere; benefacere, cùm cœpi mala pati, (pateris enim, & mala pateris, cùm me sustines malum, quem cuperes bonum) Per istum tuum tam constantem in me animum, cui toties vitam, incolumitatem, & salutem debeo. Quoties ea non perdidisti peccando, aut tu perniciem meam avertisti deprecando? Per illum, inquam, tuum in me affectum rogo, dirige porrò vitæ meæ cursum, ut à salutis, virtutis & perfectionis tramite, nec emollicus Carnis illecebris, nec inescatus Mundi pompis, nec captus Diaboli insidiis, unquam deflectat, sed ad metam usque, unde incipit æternitas, decurrat.

Quam tantò ampliùs tibi spero cordi futuram; quantò pluribus illa periculis est obnoxia:

Quæ ut in vita & morte evadam, tu consilium tempori suggere, & manum in necessitate porrigere.



## VIII. AD SANCTOS PATRONOS.

O Sancti, Vitæ, salutisque meæ Patroni, N. N. N. communi omnium, & meâ imprimis veneratione dignissimi! Vos ego amoris ductu singularis, præcipuè colendos & invocandos mihi delegi; vobisque me ac mea, spei vestræ nixus fiduciâ, commisi.

Agnosco vestros in me Favores, & meam erga vos Ingratitudinem, qui tot vestris occupatus beneficiis, non respondi obsequiis; toties sensi in necessitatibus amoris vestri opem, & non retuli honoris mei vicem.

Agnosco intercessionis vestræ patrocinium, & obligationis meæ vinculum; istud ut deinceps mihi à vobis securè pollicear, hanc explere sedulò conabor.

Et vestras ubique Laudes diffundere, Cultum vestrum propagare, Exemplum denique vestrum sectari:

Quod ut præstem, vestra iterum faciet Benevolentia, cui & vitam meam universam offero, ductu vestro transigendam, & mortem commendo, vestro in conspectu, & sub tutela vestrâ obeundam.

Vos ô Sancti N. N. N. de vestra jam salute securi, de me estote solliciti: Et quos in vita Patronos elegi, in morte patrocinantes experiar: victurus deinceps vobiscum beatè, Patrocinii vestri memor æternum.



# PROTESTATIO

*Contra omnes Inimici insidias.*

**S**umme DEus, quem immensum credo, & ubique præsentem confiteor! Mater Virgo, Michaël Archangele, Custos Angele, S. Joseph, Patroni mei reliqui N. N. Sancti omnes, quos in Verbo agnoscere non dubito, quæcunque ego de me constare vobis, ad Gloriam vestram, & salutem meam desidero!

Sisto me coram vobis, & consciis vobis protestor.

1. Detestari me ex animo omne peccatum meum, & quidquid oculis vestris in me displicet:

Nec deinceps admissurum aliquid, quod novero displicere.

2. Protestor, credere me: quidquid Ecclesia Romana, cujus membrum sum, credendum proponis; errorésque omnes ab ejus sensu alienos execrari.

3. Sperare item me peccatorum meorum veniam; per fufum pro me JESU Christi Sanguinem, & æternam meritorum meorum retributionem:

4. Amare me ex animo, unicè Amabilem Deum meum, & amaturum, quidquid etiam adversi immiserit; ac præter mentem, arbitriumque meum futurum, si quid natura dolendi impatiens, reluctetur.

5. Invisas mihi esse, & ut confido, deinceps fore, omnes rerum caducarum illece-



bras, nec iis captum, detrectare me, aut detrectaturum divinæ tuæ Providentiæ circa me, vitamque ac mortem meam placitum.

6. Nolle me, ullum rei cuiuspiam à me bene gestæ plausum ac omnino, velle vivere, ac mori, quomodo me tu, Deus mes, volueris.

7. Et hanc voluntatem meam, firmissimè mihi modò decretam cupere me, in vita & in morte esse incommutabilem.

Quod ut consequar, à te imprimis, Deus Optime, Maxime, à te deinde Virgo Mater, Archangele Michaël, Custos Angele, Sancte Joseph, Cæteri Patroni N. N. Sancti omnes, ex animo obtestor.

### Brevis Superiorum affectuum Synopsi ad usum frequentiore contracta.

**C**redo in te, O Deus Veritas, & quid quid te revelante Fides docet, & Ecclesia proponit: adauge in me Fidem, & da, ut in illa sincerè vivam & constanter moriar.

Spero in te, O infinita Fidelitas, unicum ac summum Bonum meum; & spero à te, quam promisisti, Veniam, Gratiam, Gloriam; & precor, ut hæc spes me non deferrat in vita, non confondat in morte.

Amo te, O Immensa Bonitas, & quidquid tecum, ac propter te est amabile, idque ex toto corde meo. Et hoc amore opto anima-



ri totam vitam meam, & vitæ meæ exitum terminari.

Detestor ex animo, O æterna Majestas, omne peccatum meum, non quia summum meum malum est, sed quia summa tua offensa est. Et nollem illud unquam à me commissum: ac statuo te adjuvante, nunquam illud committere, petoque, ut, quem nôsti sine peccato non vivere, dones sine Pœnitentia non mori.

Resigno me tibi, O supreme rerum omnium Domine; tuoque beneplacito vitam meam universam subdo, firmitérque decerno, ab illo nec in prosperis, nec in adversis, nec in vita, nec in morte recedere.

Agnosce Beneficentissime Deus, divinam tuam in me liberalitatem, tot beneficiis testatam, quot vixi momentis; tot meis obsequiis dignam, quot habeo mentis, cogitationis, animi affectus, corporis membra, respirandi vires: gratiásque ago ex animo, méque in compensationem integrè reddo, quoad totus per mortem transeam in Gratitude holocaustum, æternis à me gratiis tibi offerendum.


O Deus meus & omne bonum meum! pudet me, quòd te non contentus, Bono infinito, bonitatis exiguæ umbras sim sectatus: detestor præposterum illud studium meum, & renuntio omni bono, quod te minus est, illudque peto, ut tu solus deinceps expleas omne meum desiderium.



Mitissime Deus, qui non minus te patiendo Misericordem, quàm agendo Potentem ostendis! Offero me tibi ad ferendum, quidquid immiseris, aut permiseris, ideo solum, quia tu me ferre jubes: petoque istam à te gratiam, ut non sinas patientiam meam, aut vitæ molestiis, aut malevolorum injuriis, aut morborum, mortisque doloribus convelli.

Benignissime Deus! qui, ut me ad petendum allicias, petenti omni promittis: Ecce fretus promissis tuis, petam veniam Reo, socium Afflicto, subsidium Egeno, Ignaro ductum, Infirmo robur, vivo gratiam, Morituro perseverantiam: perque ipsa illa promissa tua, quibus divinam tuam obligasti Fidem, rogo, petenti annuas, petita dones, donata, conserves. O Deus, Pater misericordiarum! O Fili Dei! miseriarum Consors! O Spiritus sancte, Miserorum Consolator, per ista mihi dulcissima nomina obtestor; ut, quem Patrem appello, Patrem habere merear: quem Fratrem, & consortem agnosco, Fratrem experiar: quem Consolatorem veneror, Consolatorem sentiam, tum maximè, quando cum Morte luctandum erit pro Æternitate; utque refectus Pane vitæ, Crucis virtute adjutus, patrocicante Matre Virgine, tutante Archangelo Michaële, assistente Angelo custode, Patronis meis succurrentibus, Beatis omnibus auxiliantibus, felicem consequar devicta morte æternitatem, Amen.





# CORONA PRECATORIA

de Sanctissimis & Suavissimis.

*JESU Christi Plagis, ab iis recitanda, qui bonæ mortis cupidi, se Crucifixo Jesu & Mariæ, prope Crucem collacrimanti, mancipaverunt.*

**A** Urea hæc de quinque JESU Christi Plagis Corona, quinque continet peculiarium Orbium series, in quorum singulis quinque Orationes Dominicæ, & una Oratio Angelica recitantur. In Orationibus Dominicis considerantur acerbissimi cruciatus JESU Christi: in Oratione Angelica Mariæ dolor contempletur. E singulis verò Plagis, dulcissimis tanquam è fontibus, donum aliquod est hauriendum: è Plaga sinistri Pedis omnium peccatorum remissio expetitur; è Plaga Pedis dexteri adeptio virtutum, & præsertim fortitudo contra tentationes, & conatus mali Dæmonis exposcitur; è Plaga sinistræ ab inferorum suppliciis libertas postulatur: è Plaga dextæræ coelestis regni possessio efflagitatur: è Plaga lateris, suavissimo vel ex alveo, melis, & sincerus JESU, ac Mariæ amor exoratur: unicuique demum Coronæ hujus seriei his cantiunculis finem impones.



Gloria Patri , & Filio , & Spiritui sancto ,  
sicut erat in principio , & nunc , & semper ,  
& in sæcula sæculorum , Amen.

*Sancta Mater istud agas ,  
Crucifixi fige Plagas  
Cordi meo valide.*

Qui tamen coronam hanc recitare nequibit , quinque Orationes Dominicas , & quinque Angelicas , cum quinque Gloria Patri recitabit , ad dulcissimarum Plagarum decus , & ornamentum , quinque illa dona nuper relata , & eo , quo dictum est , ordine postulanda.

*Methodus meditandi hanc eandem  
Coronam.*

**Q**uinque Plagarum precatoriam Coronam meditari unusquisque poterit , varios tum intelligentiæ , tum voluntatis actus eliciendo. In singulis Plagis tres ab intelligentia actus eliciendi sunt , amorem modò , modò dolorem , modò plagæ illius , quam meditatur , pretium perpendendum ; voluntas quoque tres actus eliciat , gratias agendo , veniam precando , & quinque illa dona modo nuper dicto , exorando ; in quinque verò precariis globulis alii etiam actus eliciantur hoc modo.

*Primò* in globulis precariis primæ seriei quinque actibus sinistri Pedis Plagam veneraberis. 1. Recognoscendo re hominem nequam , imbecillem , & peccantem ; hujusmodi enim es , in iniquitatibus , & peccatis conceptus.



ceptus. 2. Talem te hominem esse, pro certo habeas. 3. Talem ab omnibus haberi cupias. 4. Omnibus te creatis rebus postponas, in illarum singulis Dei immortalis dona contemplans, in te verò, quod à te habes, considerans. 5. Æquo animo adversas res omnes patiaris, cum bono illo fure conclamans, *Nos quidem justè: nam digna factis recipimus*, quinimo, *inferiora meritis*, cum inferorum poenas promerearis.

*Secundò*, in globulis precariis secundæ seriei, quinque etiam actibus, dexteri Pedis Plagam observabis, expressa Christi vestigia sequendo. 1. Christum imiteris in studio propriæ perfectionis. 2. In studio salutis, & perfectionis hominum. 3. In studio divinæ gloriæ. 4. In Cruce tuam vitam degere cupias, in quam tuus JESUS est adactus, ut cum Divo Paulo dicas: *Christo confixus sum Cruci*; 5. Pro Christo mori desideres, qui pro te mortuus est, atque his verbis tuum desiderium excites, & pro te mortuum Jesum alloquaris: *Amore amoris tui moriar, qui amore amoris mei dignatus es mori.*

*Tertiò*, in globulis precariis tertiæ seriei, quinque actibus, sinistræ Plagam vereberis, quinque erga homines amoris signa præbendo; 1. Illos tanquam Dei Filios, Christi Fratres, ipsius sanguine redemptos, & divini Spiritûs templum contempleris; 2. Omnia illis bona cupias; 3. Verbo, & re illis auxiliaris, Christi verbis intentus; *Quod uni*



*ex minimis meis fecistis* ; 4. Illorum salutem, & incolumitatem procures ; 5. Pro ipsorum salute tuam offeras vitam.

*Quartò* in globulis precariis quartæ seriei, quinque actibus, dexteræ Plagam meditaberis, quinquies erga immortalem Deum tuum amorem exercendo ; 1. Deo suam naturam, suasque perfectiones innumerabiles gratuleris ; 2. Illis gaudeas, oblecteris ; 3. Omne illi creatarum rerum obsequium desideres ; 4. Te ad divinam voluntatem conformes ; 5. Augustissimam Dei naturam videre ex animo cupias.

*Quintò*, in globulis precariis quintæ seriei, quinque actibus, in suavissima divini lateris Plaga immoraberis, quinquies ad æternam beatitatem inhiando ? 1. Caducas, & fluxas hujus vitæ res asperneris ; 2. Maximi ducas æterna, & firma futuræ beatitudinis bona ; 3. Hæc bona ab immortali Deo pro viribus postules : 4. Pro tot tantorumque bonorum adeptione Deo quinque plagarum pretium offeras ; 5. Omnes tuas cogitationes, verba, & opera. *Ad majorem Dei gloriam, & ad vitam æternam dirigas.*

Fructus denique, quem ex hujus precatoriæ Coronæ contemplatione, aureâ velut ex arbore, decerpere poteris, hic erit, nimirum perfectissima observantia horum trium verborum *Inspice, Abstine, Sustine*, Habitabis siquidem cogitatione, & amore in dulcissimis Jesu Christi Plagis, in quibus quinque tibi facies tabernacula : in iis enim te esse bonum est.



est. Abstinebis ab omni humanarum rerum  
jucunditate, unâ sacrorum quinque Christi  
vulnerum suavitate expletus. Sustinebis de-  
nique lubenti animo calamitatum omnium  
impetum, omniâque tuorum hostium tela tu-  
tus excipies, fortissimo quinque Jesu Christi  
Ducis nostri Plagarum clypeo protectus.

*In sanguine Christi, & gratia Maria:*  
*Amen.*



# ASPIRATIONES.

## PRO FELICI OBITU

### AD CHRISTUM

**N**on intres in judicium cum servo tuo dul-  
cissime JESU! quia non justificabitur in  
conspectu tuo omnis vivens.

Ne memineris, bone JESU, iniquitatum  
mearum: citò anticipent me misericordiæ tuæ,  
quia pauper factus sum nimis.

Illumina, mansuetissime JESU! oculos me-  
os, ne unquam obdormiam in morte, ne-  
quando dicat inimicus meus, prævalui adver-  
sus eum.

Domine JESU Christe Fili Dei vivi! pone  
Passionem, Crucem & Mortem tuam inter  
judicium tuum & animam meam.

Bone JESU! per extremas illas in Cruce  
voces, quibus Patri Spiritum commendasti,  
te



te rogo! suscipe Spiritum meum in fine vitæ  
meæ.

O mi amantissime Domine JESU Christe !  
ob honorem & virtutem tuæ benedictæ Passio-  
nis, jube me adscribi in numerum electorum  
tuorum.

Salvum fac servum tuum, Domine Deus  
meus, sperantem in te.

Tuus sum ego, salvum me fac. Ne perdas  
cum impiis Deus animam meam.

JESU ! esto mihi JESUS & salva me. Domine  
JESU accipe spiritum meum.

In te Domine JESU speravi, non confundar  
in æternum.

*Ad Beatissimam Virginem.*

**M**Ater Dei memento mei, nunc & in horâ  
mortis.

Adsis mihi, Domina, in omnibus actionibus  
meis, nec me deseras in hora mortis.

Adesto mihi, Domina, cum tota æternitate  
depugnanti.

Maria Mater gratiæ,

Mater misericordiæ.

Tu nos ab hoste protege,

Et in horâ mortis suscipe.

Vitam præsta puram,

Iter para tutum.

Sempee collætetur.



*Ad Sanctos Angelos.*

**S**uccurite, subvenite O vos omnes beatissimi Spiritus, sancti Angeli Dei: & cum in extremis vestram opem non amplius implorare potero, ne me deserite.

Sancte Angele Custos, defende me in hoc prælio, ut non peream in tremendo iudicio.

*Ad omnes Sanctos.*

**S**ancti Dei omnes intercedere dignemini animæ meæ.

Moriatur anima mea Morte Justorum, sed vivat prius Vitâ Justorum, Amen.







# HOMAGIA

In Vita & Morte Deo præstanda.

*Reddite, quæ sunt Dei, Deo. Matth. 22 1*

## HOMAGIUM. I.

Summæ Excellentiæ, Primo Fonti omnis  
Esse, Domino Vitæ & Mortis.

Actus adorationis.

*Dominum Deum tuum adorabis. Luc. 4.*

**A**gnosco te, ô mi Deus! ut supremum Dominum meum, Primum Principium, & Ultimum Finem meum, Authorem Naturæ, Gratiæ, & Gloriæ profundissima cum humilitate te adoro Dominum Vitæ & Mortis, tibi que sponte sacrifico vitam meam, in unione Sacrificii Filii tui Domini nostri Jesu Christi in Cruce, & Adorationis, quâ B. V. Maria, & omnes Sancti te adorârunt in terra, æternum te adorabunt in Cœlo.

HO-



## HOMAGIUM II.

Primo Veritati.

Actus Fidei.

*Sine Fide impossibile est, placere Deo. Hebr. 11.*

**O** Mi Deus ! Suprema & Essentialis Veritas ! Credo te unum in Essentia , & Trinum in Personis , Patrem , Filium , & Spiritum Sanctum. Credo , teneo , ac profiteor Fidem illam , quam Christus docuit , quam prædicaverunt Apostoli , quam Sancta Romana Dei Ecclesia docet ac profitetur , & singulos Catholicæ Fidei articulos paratus sum sanguine meo subsignare , & morte mea confirmare.

## HOMAGIUM III.

Omnipotentia & Misericordia Dei.

Actus Spei.

*Nolite amittere Confidentiam vestram , quæ magnam habet remunerationem. Hebr. 10.*

**O** Mnipotens & Misericors Deus ! cui proprium est misereri semper & parcere ! Spero per Sanguinem & merita JESU Christi Redemptoris mei ab infinita Bonitate tua , ac Clementia remissionem peccatorum , quibus te Summum bonum meum gravissimè offendi.



di. Spero in te, ô æterna Felicitas mea! qui es meta omnium desideriorum, & humanæ mentis plena satietas. Spero firmissimè, me à paterna liberalitate tua obtenturum omnia, ad salutem obtinendam mihi necessaria, gratiam copiosam, & gloriam sempiternam.

## HOMAGIUM. IV.

### Summæ Bonitati Dei.

#### Actus Amoris.

*Diliges Dominum Deum tuum ex toto corde tuo. Luc. 10.*

**A**Mo te, ô amabilissime Deus! ex toto corde meo super omnia, propter infinitam Bonitatem tuam. Vellem, si possem, amare te illo amore, tuo te amant omnes Sancti, & Jesus Christus Filius tuus; quo te ipsum infinitè amas: & ex sincerissimo tui amore intensissimè doleo, quòd te summum Bonum meum peccatis meis toties offenderim. Quidquid unquam perpessus sum, & quidquid patior patiârve, omne illud ex motivo sanctissimi amoris tui offero Gloriæ tuæ. Amor tuus perficiat dolores meos, efficiâtque, ut quantum me cruciant, tantum te delectent. Patiar, quia tu præcipis, quem ardentissimè amo super omnia. Tibi me totum in holocaustum consecro, ô Deus cordis mei, & Pars mea Deus in æternum!



## HOMAGIUM V.

Divinæ Providentiæ.

Actio Gratiarum pro omnibus Mediis  
ad Salutem.*In omnibus gratias agite. 1. Thess. 5.*

**G**ratias tibi ago infinitas, liberalissime Deus! pro innumeris beneficiis mihi & toti mundo à Paterna & Benignissima Providentia tua indefinenter collatis, pro mediis ad salutem aptissimis ab æterno mihi præparatis, pro copiosis naturæ & gratiæ donis, quibus me miserrimam & ingratiſſimam, tuoque amore indigniſſimam creaturam cumulare non desinis. O utinam tantis beneficiis tuis nunquam contra te abutar, sed omnia puriſſimâ intentione referam in te ſolum, Fontem inexhaustum bonorum omnium! In gratiarum actionem offero tibi, ô Pater amantiſſime, me totum, & omnia mea, atque ex animo gaudeo, hæc omnia infinitis titulis tibi jam dudum fuiſſe debita, quæ tibi novo amoris & gratitudinis affectu integerri-  
mè conſecro.



## HOMAGIUM VI.

Divinæ Justitiæ.

Actus Pœnitentiæ &amp; Humilitatis.

*Cor contritum & humiliatum Deus non despicies. Psal. 50.*

**O** Justissime Deus ! ego abominandus peccator ; coram infinita Majestate ac Bonitate tua prostratus , corde contrito & humiliato confiteor me reum Læsæ supremæ Majestatis tuæ , veniámque meorum criminum supplex rogo. Detestor ex animo omnia peccata , quibus te amabilissimum Deum meum frequentissimè offendi ; & cum gratia tua propono firmissimè , nunquam deinceps offendere infinitam Bonitatem tuam. O utinam omnes hálitus mei sint gemitus dolentis ac pœnitentis cordis mei ! O Justissime scelerum Vindex , & misericordissime Pater ! híc ure , híc seca , dummodo in æternum parcas.

## HOMAGIUM VII.

Sacrosanctæ Trinitati.

Actus Glorificationis.

*Laudate Dominum omne gentes. Psal. 116.*

**B**enedico te , laudo te , Glorifico te , ô Sacrosancta Trinitas , unus Deus ! Tibi soli laus ,



laus honor, & gloria ab omni creatura nunc  
& semper. Gloria Patri, qui creavit me.  
Gloria Filio, qui redemit me. Gloria Spi-  
ritui Sancto, qui sanctificavit me. Gloria Pa-  
tri, qui me sustentat per suam Potentiam.  
Gloria Filio, qui me gubernat per suam Sa-  
pientiam. Gloria Spiritui Sancto, qui me  
sanctificat per suum Amorem. Benedicta sit  
Sancta & individua Trinitas ab omnibus An-  
gelis & Sanctis & ab omnibus creaturis, nunc &  
semper, & in sæcula sæculorum, Amen.

*Vide soliloquia S. Augustini. cap. 37.*

## HOMAGIUM VIII.

Divinæ Sapientiæ, Omnipotentiae &  
Bonitati.

\* Actus Conformitatis.

*Fiat Voluntas tua sicut in Cælo & in terra.*  
Matth. 6.

**O** Mi Deus infinitæ Sapientiæ, & Poten-  
tiæ, & Bonitatis! O utinam semper in-  
tegrè exequar Sanctissimum Beneplacitum  
tuum nec unquam contradicam sermoni-  
bus Sancti! Tu, Domine noster, quid mihi  
ad salutem sit magis proficuum. Tu potes  
& vis me, & à me semper perfectissimè


C c 3

ad-



adimpleri. O Pater amantissime ! quidquid  
vis , quantum vis , quomodo vis , & ego  
volo. Fiat , Domine , in me , de me , per  
me , circa me , & circa mea omnia Sanctis-  
sima Voluntas tua in omnibus , nunc  
& in æternum , Amen.

F I N I S.



IN-





# INDEX MEDITATIONUM.

Prima Pars Meditationum.  
Pro via purgativa.

Medit.	Fol.
1. De fine hominis.	1
2. De Dominio Dei in creaturas.	2
3. De cura propriæ salutis.	5
4. De avulsione à Creaturis.	7
5. De voluntate Dei.	8
6. De obligationibus, Deum amandi, eique serviendi.	9
7. Cogitationes utiles ad mentem à mundo a- vellendam.	10
8. De morte.	11
9. De morte Justorum.	13
10. De morte peccatorum.	15
11. De Judicio.	17
12. De inferno.	19
13. De duplici Æternitare.	21
14. De peccato mortali.	22
15. De peccato veniali.	24
16. De pœnitentia.	25
17. De conversione non differenda.	26
18. De conditionibus veræ pœnitentiæ.	29
19. De Fuga occasionum, & malarum societa- tum.	32



# Index Meditationum.

20. De bona & mala Conscientia,	35
21. De pace animæ.	36
22. De vanis desideriis.	38
23. De Tepiditate.	39
24. De odio mundi.	40
25. De parvo numero Electorum.	43
26. De scandalo & malo Exemplo.	54
27. De poenitentia exteriori, & mortificatione.	47
28. De Exoellentia mortificationis.	49
29. De utilitate & necessitate tentationum.	50
30. De causis nostrarum tentationum.	52
31. De perturbationibus animi, & anxietatibus mentis.	54
32. De inclinationibus naturalibus.	55
33. De animo ab aliis averso.	57
34. De immodica sui fiducia.	60
35. De bono usu temporis.	63
36. De persecutionibus.	64
37. De necessitate Afflictionis & persecutionis.	66
38. De respectu humano.	68
39. De Detractione.	70
40. De Tristitia.	71
41. De malis effectibus tristitiæ.	73
42. De remediis tristitiæ.	75
43. De Superbia.	78
44. De remissione injuriarum.	80
45. De judiciis hominum contemnendis.	83
46. De avaritia.	85
47. De iterata prolapsione in peccatum.	87
48. De consuetudine peccandi.	89
49. De præparatione ad mortem.	92
50. De morte promptè acceptanda.	94



## Index Meditationum.

- 35 51. Affectus animæ iustæ, morte appropin-  
36 quante. 96  
38 52. Paraphrasis Orationis Dominicæ, in sola-  
39 tium ægrorum. 103  
40

## Secunda pars Meditationum.

### Pro via illuminativa.

- 47 53. De cura propriæ perfectionis. 111  
49 54. De oratione & difficultatibus in ea occu-  
50 rentibus. 113  
52 55. De fide. 116  
us 56. De fidei directione. 118  
54 57. De spe & fiducia in Deum. 120  
55 58. De charitate. 123  
57 59. De pura intentione. 125  
60 60. Quæ sit intentio nobilissima. 126  
63 61. De signis puræ intentionis. 128  
64 62. De humilitate. 129  
io- 63. De patientia. 131  
66 64. De Exercitio patientiæ. 133  
68 65. De cruce, seu variis motivis patiendi. 134  
70 66. De conformitate voluntatis nostræ cum  
71 Divina. 139  
73 67. De amore proximi. 141  
75 68. De obligatione parentum erga Liberos, &  
78 Dominorum erga servos. 143  
80 69. De mansuetudine & ira. 146  
83 70. De remediis iræ. 148  
85 71. De actionibus bene peragendis. 150  
87 72. De fidelitate in rebus minimis. 151  
89 73. De bonis operibus. 153  
92 74. De eleemosina. 154  
94



## Index Meditationum.

75. De via recta, per quam Deus justum ducit.	157
76. De felicitate eorum, qui se Dei directioni permittunt.	159
77. De infelicitate eorum, qui se subtrahunt directioni Dei.	160
78. De siccitatibus & ariditatibus.	163
79. De silentio.	164
80. De morbis.	166
81. De modestia.	168
82. De inspirationibus divinis.	170
83. De verbo Dei.	173
84. De felicitate statûs Religiosi.	174
85. De paupertate.	176
86. De castitate.	177
87. De obedientia.	179
88. De disciplina Religiosa.	181

## Tercia Pars Meditationum.

De præcipuis Mysteriis, vitæ & mortis Filii Dei  
& sanctissimæ Matris ejus.

89. De imitatione Jesu Christi.	186
90. De virtutibus Jesu Christi, comparatis cum nostris vitiis.	187
91. De Nativitate Jesu Christi.	189
92. Affectus teneri erga parvulum Jesum.	190
93. De paupertate Pueri Jesu.	192
94. De humilitate Pueri Jesu.	194
95. De humilitate Divina in Mysterio Incarnationis.	195
96. De sanctissimo Nomine Jesu.	197
97. De regno Dei.	199
98. De regno Jesu Christi & Sathanæ.	200

99. De



# Index Meditationum.

220

99.	De Passione Iesu Christi in genere.	202
100.	De tristitia Filii Dei in horto Olivarum.	204
101.	De oratione Christi in horto.	206
102.	De injuriis à Christo Iesu toleratis in domo Annæ & Caiphæ.	208
103.	De Herode contempto à Iesu Christo, & de Iesu Christo spreto ab Herode.	209
104.	De Iesu Christo Barrabæ postposito.	211
105.	De flagellatione Iesu Christi.	212
106.	De Christo Iesu spinis coronato.	214
107.	De via Iesu Christi Crucembajulantis.	216
108.	De Iesu Crucifixo.	217
109.	De primo verbo Christi in Cruce.	220
110.	De Pœnitentia boni latronis, & impœnitentia mali.	221
111.	De Passione B. V. Mariæ.	223
112.	De derelictione Christi.	226
113.	De siti Christi in Cruce.	228
114.	De sexto verbo Christi in Cruce: Consummatum est.	230
115.	De ultimo Verbo Christi in Cruce: Pater in manus tuas &c.	233
116.	De morte Filii Dei.	235
117.	Oratio circa 7. Stationes Filii Dei patientis.	237
118.	De sepultura Iesu Christi.	241
119.	De Resurrectione Iesu Christi.	243
120.	De vulneribus Iesu Christi.	245
121.	De Iesu bono pastore.	247
122.	De ovibus Iesu Christi.	249
123.	De Ascensione Iesu Christi.	251
124.	De Adventu Spiritûs sancti.	253
125.	De SS. Trinitate.	255



## Index Meditationum.

126. De institutione SS. Eucharistiæ, Dialogus.	257
127. De amore Jesu Christi in SS. Eucharistiæ Sacramento.	261
128. De Sacra Communione.	264
129. Oratio ad Christum Jesum.	268
130. De devotione erga B. V. Mariam.	269
131. De Conceptione Immaculata B. V. Mariæ.	270
132. De Purificatione B. V. Mariæ.	272
133. De annuntiatione B. V. Mariæ.	274
134. De humiliatione Filii Dei, & exaltatione Mariæ in Mysterio Incarnationis.	276
135. De Visitatione B. V. Mariæ.	278
136. De morte B. V. Mariæ.	280
137. De B. V. Maria à morte resuscitatâ.	282
138. De Assumptione B. V. Mariæ.	284
139. De Nativitate B. V. & Nomine Mariæ.	286
140. De præsentatione B. V. Mariæ in templo.	288
Professio obsequii nostri erga B. V. Mariam.	290

## Quarta Pars Meditationum, Pro via unitiva.

141. De amore Jesu.	291
142. De unitate amoris.	292
143. De præsentia Dei.	294
144. De solitudine.	296
145. De derelictione sui ipsius.	297
146. Quomodo oporteat se penitus relinquere.	299
147. De Annihilatione.	301
148. De quinque gradibus perfectionis.	302



## Index Meditationum.

149. De perfectionibus Divinis.	303
150. De amabilitate Dei.	307
151. De amore Dei erga homines, & hominum erga Deum.	309
152. De incomprehensibilitate DEI.	311
153. De simplicitate.	313
154. De plenitudine Divitiarum DEI.	316
155. De Paradiso.	317
156. De unione Divina.	319

*Oratio ad SS. Trinitatem pro impetranda  
gratia unionis.*

Cantica Spiritualia pro animabus sanctis.

1. Canticum.	324	6. Canticum.	327
2. Canticum.	324	7. Canticum.	327
3. Canticum.	325	8. Canticum.	328
4. Canticum.	325	9. Canticum.	329
5. Canticum.	326	10. Canticum.	329

## INDEX MEDITATIONUM.

*In singulos Anni dies.*

Dominica I. Adventus.

*Evangelium S. Lucae cap. 21. à v. 25. usque  
ad v. 34. Medit.*

Domin. De Iudicio,	11
Fer. 2. De Morte.	8
Fer. 3. De fine hominis.	1
Fer. 4. De eodem argumento.	
Fer. 5. De bonis operibus.	73
Fer. 6. De poenitentia.	16
Sabb. De eodem argumento.	

Dominica II. Adventus.

*Evangel. S. Matth. c. 11. à v. 2. usque ad v. 11.  
Dom.*



## Index Meditationum.

<i>Domin.</i>	De respectu humano.	38
<i>Fer. 2.</i>	De persecutionibus.	36
<i>Fer. 3.</i>		
<i>Fer. 4.</i>	De paupertate.	85
<i>Fer. 5.</i>	De scandalo.	26
<i>Fer. 6.</i>	De bona & mala conscientia.	20
<i>Sabb.</i>		

### Dominica III. Adventûs.

<i>Evang. S. Joan. cap. 1. à v. 19. usque ad v. 29.</i>	
<i>Domin.</i>	De humilitate. 62
<i>Fer. 2.</i>	De eodem argumento.
<i>Fer. 3.</i>	De judiciis hominum contemnendis 45
<i>Fer. 4.</i>	De vanis desideriis. 22
<i>Fer. 5.</i>	
<i>Fer. 6.</i>	Cogitationes utiles ad mentem à mundo abstrahendam aut de devotione erga B. V. Mariam. 130
<i>Sabb.</i>	

### Dominica IV. Adventûs.

<i>Evangelium S. Lucae cap. 3. à v. 1. usque ad v. 7.</i>	
<i>Dom.</i>	De conversione non differenda. 17
<i>Fer. 2.</i>	De conditionibus veræ poenitentiae. 18
<i>Fer. 3.</i>	
<i>Fer. 4.</i>	De peccato mortali. 14
<i>Fer. 5.</i>	De pace animæ. 21
<i>Fer. 6.</i>	
<i>Sabbat.</i>	De tepiditate. 23
<i>25. Dec.</i>	Nativitas D. N. Jesu Christi. Medit. de Nativit. Jesu Christi. 91
<i>Evang. primæ Missæ S. Lucae cap. 2. à v. 1. usque ad v. 15.</i>	

*Evang.*



# Index Meditationum.

*Evang. secund. Missæ S. Lucæ cap. 2. à v. 15. usque ad v. 21.*

*Evang. tertiæ Missæ S. Joan. cap. 1. à v. 1. usque ad 15.*

26. Dec. S. Stephan. de Remissione injuriarum. 44

*Evang. S. Matth. cap. 23. à v. 34. usque ad v. 40.*

27. Dec. S. Joan. De amore proximi. 67

*Evang. S. Joan. cap. 21. à v. 19. usque ad v. 28.*

28. Dec. SS. Innocentes. De necessitate persecutionis. 37

*Evang. S. Matth. cap. 2. à v. 13. usque ad v. 19.*

29. Dec. Affectus teneri erga parvulum Jesum. 92

30. Dec. De paupertate pueri Jesu. 93

31. Dec. De humilitate pueri Jesu. 94

## Præparatio ad mortem.

*Quatuor Meditationes sequentes institui possunt ultimis quatuor diebus cujusque mensis, ut discas bene mori.*

1. De præparatione ad mortem. 49

2. De morte promptè acceptanda. 50

3. Affectus animæ justæ, morte appropinquante. 51

4. Paraphrasis orationis Dominicæ in solatium ægrorum; 52

1. Januarii De Sanctissimo Nomine Jesu. 96

*Evang. S. Lucæ cap. 2. à v. 21. usque ad v. 22.*

2. Januarii. De bono usu temporis. 35

3. Januarii. De humilitate Divina in mysterio Incarnationis. 95

4. Jan. De virtutibus Jesu Christi. 90

6. Jan.



# Index Meditationum.

6. Jan. Fest. Epiphaniæ. De regno JESU Chri st 98

*Evang. Matth. cap. 2. à v. 1. usque ad v. 12.*

7. Jan. De eodem argumento.

8. Jan. De regno Dei. 97

## Dominica I. post Epiphaniam.

*Evang. Luc. cap. 2. à v. 42. usque ad v. 53.*

Dom. De obligatione parentum erga liberos. 68

Fer. 2. | De cura propriæ salutis. 3

Fer. 3. | De derelictione sui ipsius. 145

Fer. 4. | Quomodo oporteat se penitus relin-

Sabb. | quere. 146

## Dominica II. post Epiphaniam.

*Evang. S. Joannis cap. 2. à v. 3. usque ad 12.*

Dom. De felicitate status Religiosi. 84

aut de unione Divina, 156

Fer. 2. De eodem argumento.

Fer. 3. De castitate. 86

Fer. 4. | Cogitationes utiles ad mentem à mun-

Fer. 5. | do abstrahendam. 7

Fer. 6. | De patientia. 63

Sabb. |

## Dominica III. post Epiphaniam.

*Evang. Matth. cap. 8 à v. 1. usque ad v. 14.*

Dom. De morbis 80

aut: de S. Communione. 128

Fer. 2. De Fide. 55

Fer. 3. De peccato veniali. 15

Fer. 4. De præparatione ad mortem. 49

Fer. 5.



# Index Meditationum.

<i>Fer. 5.</i>	De morte promptè acceptanda.	50
<i>Fer. 6.</i>	Affectus animæ justæ, morte appropinquante.	51
<i>Sabb.</i>	Paraphrasis Orationis Dominicæ in solatium agrorum.	52

## Dominica IV. post Epiphaniam.

*Evang. Matth. cap. 18. à v. 23. usque ad 28.*

<i>Dom.</i>	De utilitate tentationum.	29
<i>Fer. 2.</i>		
<i>Fer. 3.</i>	De Dominio Dei in creaturas.	2
<i>Fer. 4.</i>		
<i>Fer. 5.</i>	De Spe & fiducia in Deum.	57
<i>Fer. 6.</i>	De motivis patientiæ.	65
<i>Sabb.</i>		

## Dominica V. post Epiphaniam.

*Evang. Matth. cap. 13. à v. 24. usque ad v. 31.*

<i>Dom.</i>	De fuga Occasionum.	19
<i>Fer. 2.</i>		
<i>Fer. 3.</i>	De pura intentione.	59
<i>Fer. 4.</i>	De inferno.	12
<i>Fer. 5.</i>	De odio mundi.	24
<i>Fer. 6.</i>		
<i>Sabb.</i>	De duplici Æternitate.	13

## Dominica VI. post Epiphaniam.

*Evang. Matth. cap. 13 à v. 31. usque ad v. 36.*

<i>Dom.</i>	De fidelitate in rebus minimis.	72
	D d	<i>Fer. 2.</i>



## Index Meditationum.

<i>Fer. 2.</i>	De immodica sui fiducia.	34
<i>Fer. 3.</i>		
<i>Fer. 4.</i>	De fidei directione.	56
<i>Fer. 5.</i>	De perturbationibus animi.	38
<i>Fer. 6.</i>	De inclinationibus naturalibus.	32
<i>Sabb.</i>		

## Dominica Septuagesimæ.

*Evang. Matth. cap. 20. à v. 1. usque ad v. 17.*

<i>Dom.</i>	De parvo numero Electorum.	25
<i>Fer. 2.</i>	De detractiōe.	39
<i>Fer. 3.</i>	De actionibus benè peragendis.	71
<i>Fer. 4.</i>	De præparatione ad mortem.	49
<i>Fer. 5.</i>	De morte promptè acceptanda.	50
<i>Fer. 6.</i>	Affectus animæ justæ morte appropinquante.	51
<i>Sabb.</i>	Paraphrasis Orationis Dominicæ in solatium ægrorum.	52

## Dominica Sexagesimæ.

*Evang. Luc. cap. 8. à v. 4. usque ad v. 16.*

<i>Dom.</i>	De verbo Dei.	83
<i>Fer. 2.</i>	De siccitatibus & ariditatibus.	78
<i>Fer. 3.</i>	De elemosyna.	74
<i>Fer 4</i>		
<i>Fer. 5.</i>	De inspirationibus Divinis.	82
<i>Fer. 6.</i>		
<i>Sabb.</i>	De avaritia.	46.
	aut: De devotione erga B. V. M.	130

Dom.



# Index Meditationum.

## Dominica Quinquagesimæ.

*Evang. Luc. cap. 18. à v. 31. usque ad v. 44.*

*Dom.* | De obligationibus amandi Deum, ei-  
*Fer. 2.* | que serviendi. 6

*Fer. 3.* De modestia 81

*Fer. 4. Cinerum.* | De poenitentia exteriori. 27

*Fer. 5.* | ri. 27

*Fer. 6.* De excellentia mortificationis. 28

*Sabb.* De consuetudine peccandi. 48

## Dominica I. Quadragesimæ.

*Evang. Matth. cap. 4. à v. 1. usque ad v. 12.*

*Dom.* De causis nostrarum tentationum. 30

*Fer. 2.* | De Passione Jesu Christi in gene- 99

*Fer. 3.* | re. 99

*Fer. 4.* | De tristitia Filii Dei. 100

*Fer. 5.* | De oratione Christi in horto. 101

*Fer. 6.* | aut: Septem Stationes. 117

*Sabb.* | aut: Septem Stationes. 117

## Dom. II. Quadragesimæ.

*Evang. Matth. cap. 17. à v. 1. usque ad v. 10.*

*Dom.* De Paradiso. 155. aut: de solitudi-  
ne. 144

*Fer. 2.* | De injuriis à Christo Jesu toleratis in 102

*Fer. 3.* | domo Annæ &c. 102

*Fer. 4.* | De Herode contempto à Jesu Chri- 103

*Fer. 5.* | sto, & de Jesu Christo spreto ab Hero- 103

*Fer. 6.* | de. 103



## Index Meditationum.

*Fer. 6.* De Iesu Christo Barrabæ postposito. 104

*Sabb.* Aut : quatuor Meditationes de præpar. mortis. 49, 51, 52.

### Dominica III. Quadragesimæ.

*Evang. Matth. cap. 11. à v. 24. usque ad v. 27.*

*Dom.* De iterata prolapsione in peccatum. 47  
aut : De detractiōe. 39

*Fer. . .* | De flagellatione Iesu Christi. 105

*Fer. 3.* | De Iesu Christo spinis corona-

*Fer. 4.* | to. 106

*Fer. 5.* | De Via Iesu Christi, crucem Baje-

*Fer. 6.* | lantis. 107

*Sabb.* | Aut : Septem stationes. 117

### Dominica IV. Quadragesimæ.

*Evang. S. Joannis cap. 6. à v. 1. usque v. 16.*

*Dom.* De elemosyna. 74. Aut : de Spe<sup>c</sup>. 57.

*Fer. 2.* | De Iesu crucifixo. 108

*Fer. 3.* | De primo verbo Christi in Cru-

*Fer. 4.* | ce. 109

*Fer. 5.* | De pœnitentia bonilatronis &c. 110

*Fer. 6.* | Aut : Septem Stationes. 117

### Dominica Passionis.

*Evang. Joannis. cap. 8. à v. 46. usque ad v. 60.*

*Dom.* De animo ab aliis averso. 33 Aut : de peccato veniali. 15

*Fer. 2.*



## Index Meditationum.

<i>Fer. 2.</i>	De Passione B. V. M.	111
<i>Fer. 3.</i>		
<i>Fer. 4.</i>	De derelictione Christi.	112
<i>Fer. 5.</i>		
<i>Fer. 6.</i>	De siti Christi in Cruce.	113
<i>Sabb.</i>	Aut : septem Stationes.	117

## Dominica Palmarum.

*Evang. Matth. cap. 21. v. 1. usque ad v. 10. Passio Christi Matth. 26.*

<i>Dom.</i>	De regno Jesu Christi &c.	98
	Aut : de conform. volunt. nostræ cum divina.	66

<i>Fer. 2.</i>	De sexto verbo Christi in cruce.	114
<i>Fer. 3.</i>		
<i>Fer. 4.</i>	De ultimo verbo Christi in cruce.	115
<i>Fer. 5.</i>		
<i>Fer. 6.</i>	De morte Filii Dei.	116
<i>Sabb.</i>	De sepultura Jesu Christi.	118
	Aut : septem Stationes.	117

## Dominica Resurrectionis.

*Evang. Matth. cap. 16. d v. 1. usque ad v. 8.*

<i>Dom.</i>	De Resurrectione Jesu Christi.	119
<i>Fer. 2.</i>	Aut : de malis effectibus tristitiæ.	41
<i>Fer. 3.</i>	De pace animæ.	21
<i>Fer. 4.</i>		
<i>Fer. 5.</i>	Tertium Canticum spirituale.	
<i>Fer. 6.</i>	De quinque gradibus perfectionis.	
<i>Sabb.</i>		148

Dd 3

Do-



## Index Meditationum.

### Dominica I. post Pascha.

*Evang. S. Joan. cap. 20. à v. 19. usque ad v. 32.*

<i>Dom.</i>	De Vulneribus Jesu Christi.	120
<i>Fer. 2.</i>		
<i>Fer. 3.</i>	De Charitare.	58
<i>Fer. 4.</i>		
<i>Fer. 5.</i>	De perturbationibus animi.	31
<i>Fer. 6.</i>		
<i>Sabb.</i>	De superbia.	43

### Dominica II. post Pascha.

*Evang. S. Joan. cap. 10. à v. 11. usque ad v. 17.*

<i>Dom.</i>	De bono Pastore.	121
<i>Fer. 2.</i>		
<i>Fer. 3.</i>	De ovibus Jesu Christi.	122
<i>Fer. 4.</i>		
<i>Fer. 5.</i>	De via recta , per quam Deus justum deducit.	75
<i>Fer. 6.</i>	De felicitate eorum , qui se Dei directioni permittunt.	76
<i>Sabb.</i>	De infelicitate eorum , qui se subtrahunt directioni Dei.	77

### Dominica III. post Pascha.

*Evang. Joannis cap. 16. à v. 16. usque ad v. 23.*

<i>Dom.</i>	De Tristitia.	40
-------------	---------------	----

*Fer. 2.*



## Index Meditationum.

<i>Fer. 2.</i>		De remediis tristicæ.	42
<i>Fer. 3.</i>			
<i>Fer. 4.</i>		De persecutionibus. 36. Aut: quatuor Meditationes de morte. 49. 50. 51. 52.	
<i>Fer. 5.</i>		De necessitate Persecutionis.	37
<i>Fer. 6.</i>		De inordinato Creaturarum amore extirpando.	4
<i>Sabb.</i>			

### Dominica IV. post Pascha.

*Evang. S. Joan. cap. 16. à v. 5. usque 15.*

*Dom.* De malis effectibus tristicæ. 41

*Fer. 2.* Cogitationes utiles ad mentem à mundo abstrahendam. 7

*Fer. 3.* | De odio mundi. 24

*Fer. 4.* | De odio mundi. 24

*Fer. 5.* Quæ sit intentio nobilissima. 60

*Fer. 6.* | De signis puræ intentionis. 61

*Sabb.* | De signis puræ intentionis. 61

### Dominica V. post Pascha.

*Evang. Joan. cap. 16. à v. 23. usque 31.*

*Dom.* | De oratione &c. 54

*Fer. 2.* | De oratione &c. 54

*Fer. 3.* | De amore Dei erga homines & ho-

*Fer. 4.* | minum erga Deum. 151

*Fer. 5.* De Ascensione Jesu Christi. 123

*Evang. S. Marci. cap. 16. v. 14. usque 21.*

*Fer. 6.* De Paradiso. 155

*Sabb.* De Amore Jesu. 141



## Index Meditationum.

### Dominica VI. post Pascha.

*Evang. S. Joan. cap. 15. à v. 26. usque ad v. 5.  
Capitis sequentis.*

<i>Dom.</i>	De motivis patientiæ.	65
<i>Fer. 2.</i>	De Respectu humano.	38
<i>Fer. 3.</i>	De silentio.	79
<i>Fer. 4.</i>	De solitudine.	144
<i>Fer. 5.</i>		
<i>Fer. 6.</i>	De fuga occasionum.	19
<i>Sabb.</i>		

### Dominica Pentecostes.

*Evang. S. Joan. cap. 14. à v. 23. usque 32.*

<i>Dom.</i>	De adventu Spiritûs S.	124
<i>Fer. 2.</i>		
<i>Fer. 3.</i>	De præsentia Dei.	143
<i>Fer. 4.</i>	Aut: quatuor Medit. de morte.	49
	50. 51. 52.	
<i>Fer. 5.</i>	De unione divina.	156
<i>Fer. 6.</i>		
<i>Sabb.</i>	Prim. & secund. Canticum.	

### Dominica SS. Trinitatis.

*Evang. Matth. 28. à v. 18. usque 21.*

<i>Dom.</i>	De SS. Trinitate.	125
<i>Fer. 2.</i>	De perfectionibus Divinis.	149
<i>Fer. 3.</i>		
<i>Fer. 4.</i>	De Amabilitate Dei.	150
<i>Fer. 5.</i>	Festum Corporis Christi.	

*Evang.*



Index Meditationum.  
*Evang. Joan. cap. 6. à v. 56. usque 60.*

*Fer. 6.* | De institutione SS. Sacramenti  
*Sabb.* | Eucharistiæ. 126

Dominica II. post Pentecosten.

Dom. De sacra Communione. 128

*Fer. 4.*      *ristiæ Sacramento.*      127

Fer 6. | De simplicitate. 158

*Sabb.* Aut: 5<sup>um</sup> & 6<sup>um</sup> Canticum.

Dominica III. post Pentecosten.

*Dom.* De amore Iesu. 141

Fer. 3. De amabilitate Dei. 150

minum erga Deum. 151

Fer. 5. De poenitentia. 16

*Fer. 6. De conversione non differenda.* 17

*Sabb.* De conditionibus veræ poenitentiae. 18

Dominica IV. post Pentecosten.

*Dom.* De Dominio Dei in creaturas. 2

Fer. 2. Aut: de disciplina Religiosa. 88

D d s

Fer. 3.



## Index Meditationum.

<i>Fer. 3.</i>	De pura intentione.	59
<i>Fer. 4.</i>	Quæ sit intentio nobilissima.	60
<i>Fer. 5.</i>	De Humilitate.	62
<i>Fer. 6.</i>	De Annihilatione.	147
	Aut: de felicitate status Religiosi.	84
<i>Sabb.</i>	De paupertate. 85.	
	Medit. de morte. 49. 50. 51. 52	

### Dominica V. post Pentecosten.

*Evang. Matth. cap. 5. à v. 20. usque 25.*

<i>Dom.</i>	De mansuetudine & ira.	69
<i>Fer. 2.</i>		
<i>Fer. 3.</i>	De remediis iræ.	70
<i>Fer. 4.</i>		
<i>Fer. 5.</i>	De animo ab aliis averso.	33
<i>Fer. 6.</i>	De Remissione Injuriarum.	44
<i>Sabb.</i>	De Imitatione Jesu Christi.	89

### Dominica VI. post Pentecosten.

*Evang. S. Marc. cap. 8. à v. 1. usque 10.*

<i>Dom.</i>	De S. Communione.	128
	Aut: de siccitatibus.	78
<i>Fer. 2.</i>	De spe & fiducia in Deum.	57
<i>Fer. 3.</i>		
<i>Fer. 4.</i>	De derelictione sui ipsius.	145
<i>Fer. 5.</i>	Septimum Canticum.	
<i>Fer. 6.</i>	De felicitate eorum, qui se Dei di-	
<i>Sabb.</i>	rectioni permittunt.	76

Dom-



## Index Meditationum.

### Dominica VII. post Pentecosten.

*Evang. S. Matth. cap. 7. à v. 17. usque 22.*

<i>Dom.</i>	De voluntate Dei.	
<i>Fer. 2.</i>		5
<i>Fer. 3.</i>	De bonis operibus.	73
<i>Fer. 4.</i>	De inferno.	12
<i>Fer. 5.</i>	De puritate.	58
<i>Fer. 6.</i>	De cura propriæ perfectionis.	53
<i>Sabb.</i>	De fide.	55

### Dominica VIII. post Pentecosten.

*Evang. S. Lucæ. cap. 16. à v. 1. usque 10.*

<i>Dom.</i>	De plenitudine divitiarum Dei	154
<i>Fer. 2.</i>		
<i>Fer. 3.</i>	De bono usu temporis.	35
<i>Fer. 4.</i>		
<i>Fer. 5.</i>	De elemosyna.	74
<i>Fer. 6.</i>	De iudicio. 11. Aut: quatuor Me-	
<i>Sabb.</i>	dit. de morte. 49. 50. 51. 52	

### Dominica IX. post Pentecosten.

*Evangelium S. Lucæ cap. 16. à v. 41. usque 45.*

<i>Dom.</i>	De amore Dei erga homines, & hominum erga Deum.	51
<i>Fer. 2.</i>	De morte iustorum.	9
<i>Fer. 3.</i>	De morte peccatorum.	10
<i>Fer. 4.</i>	De inspirationibus divinis.	82
<i>Fer. 5.</i>	De unitate amoris.	142
	<i>Fer. 6.</i>	



# Index Meditationum.

<i>Fer. 6.</i>		De oratione & difficultatibus.	54
<i>Sabb.</i>			

## Dominica X. post Pentecosten.

*Evang. S. Lucae cap. 18. à v. 9. usque 15.*

<i>Dom.</i>	De Annihilatione.	147
-------------	-------------------	-----

<i>Fer. 2.</i>		De immodica sui fiducia.	34
<i>Fer. 3</i>			

<i>Fer. 4</i>		De superbia.	43
<i>Fer. 5.</i>			

<i>Fer. 6.</i>		De conditionibus veræ Pœnitentiæ.	18
<i>Sabb.</i>			

## Dominica XI. post Pentecosten.

*Evang. S. Marci cap. 7. à v. 31. usque 38.*

<i>Dom.</i>		De consuetudine peccandi.	48
<i>Fer. 2.</i>			

<i>Fer. 3.</i>	De fine hominis.	1
----------------	------------------	---

<i>Fer. 4.</i>	De cura propriæ salutis.	3
----------------	--------------------------	---

<i>Fer. 5.</i>	De silentio.	79
----------------	--------------	----

<i>Fer. 6.</i>		De conformitate voluntatis nostræ cum divina.	66
<i>Sabb.</i>			

## Dominica XII. post Pentecosten.

*Evang. S. Lucae cap. 10. à v. 23. usque 38.*

<i>Dom.</i>		De amore JEsu.	141
<i>Fer. 2.</i>			

*Fer. 3.*



# Index Meditationum.

54	Fer. 3.   De Charitate.	58
	Fer. 4.	
	Fer. 5. De imitatione JESU Christi.	89
	Fer. 6. De amore proximi.	67
	Sabb. Aut: quatuor Medit de morte.	49
	50. 51. 52.	

## Dominica XIII. post Pentecosten.

147	Evang. S. Lucæ cap. 17. v. 11. usque 29.	
34	Dom. De fuga occasionum.	19
43	Fer. 2. De avulsione à creaturis.	4
ten.	Fer. 3.   Cogitationes utiles ad mentem à	
18	Fer. 4.   mundo abstrahendam.	7
	Fer. 5. Octavum & nonum Canticum.	
	Fer. 6. De morbis.	80
	Sabb. De obedientia.	87

## Dominica XIV. post Pentecosten..

1	Evang. S. Matth. cap. 6. à v. 24. usque 34.	
3	Dom. De unitate amoris.	142
79	Fer. 2.   De avaritia. 46. Aut: de quinque	
66	Fer. 3.   gradibus perfectionis.	148
	Fer. 4. De vanis desideriis.	22
	Fer. 5. De obligationibus amandi Deum.	
	&c.	6
141	Fer. 6.   De cura propriæ perfectionis.	53
	Sabb.	

Domi-



# Index Meditationum.

## Dominica XV. post Pentecosten

*Evang. S. Lucae cap. 7. à v. 11. usque 17.*

<i>Dom.</i> De morte.	8
<i>Fer. 2.</i> De morte peccatorum.	10
<i>Fer. 3.</i> De tristitia.	40
<i>Fer. 4.</i> De malis effectibus tristitiæ.	41
<i>Fer. 5.</i> Decimum Canticum.	
<i>Fer. 6.</i> De remediis tristitiæ.	42
<i>Sabb.</i> De devotione erga B. V. M.	130

## Dominica XVI. post Pentecosten.

*Evang. S. Lucae cap. 14. à v. 1. usque 12.*

<i>Dom.</i> De humilitate. 62. Aut: de S. Communionem.	128
<i>Fer. 2.</i> De iudiciis hominum contemnendis.	45
<i>Fer. 3.</i> De superbia.	43
<i>Fer. 4.</i>   De incomprehensibilitate Dei.	152
<i>Fer. 5.</i>	
<i>Fer. 6.</i> De unione divina.	156
<i>Sabb.</i> Aut: quatuor Medit. de morte.	49
50 51 52	

## Dominica XVII. post Pentecosten.

*Evang. S. Matth. cap. 22. à v. 35. usque 46.*

<i>Dom.</i> De Amabilitate Dei.	150
<i>Fer. 2.</i>   De præsentia Dei.	143
<i>Fer. 3.</i>	

*Fer. 4.*



## Index Meditationum.

<i>Fer. 4.</i>	De perfectionibus divinis.	149
<i>Fer. 5.</i>	De imitatione JESU Christi.	89
<i>Fer. 6.</i>	De amore proximi.	67
<i>Sabb.</i>		

## Dominica XVIII. post Pentecosten.

*Evang. S. Matth. cap. 19. à v. 1. usque 9.*

<i>Dom.</i>	De morbis.	80
-------------	------------	----

<i>Fer. 2.</i>	De tepiditate.	23
<i>Fer. 3.</i>		

<i>Fer. 4.</i>	De detractiōe. 39. Aut : Canticum tertium.	
<i>Fer. 5.</i>		

<i>Fer. 6.</i>	De consuetudine peccandi.	48
<i>Sabb.</i>		

## Dominica XIX. post. Pentecosten.

*Evang. S. Matth. cap. 22. à v. 1. usque 15.*

<i>Dom.</i>	De amore JESU Christi in SS. Eucharistiæ Sacramento.	127
-------------	--	-----

<i>Fer. 2.</i>	De Regno Dei.	97
<i>Fer. 3.</i>		

<i>Fer. 4.</i>	De parvo Numero Electorum.	25
----------------	----------------------------	----

<i>Fer. 4.</i>	De inspirationibus Divinis.	82
----------------	-----------------------------	----

<i>Fer. 6.</i>	De duabus Æternitatibus.	23
----------------	--------------------------	----

<i>Sabb.</i>	De actionibus bene paragendis.	71
--------------	--------------------------------	----

## Dominica XX. post Pentecosten.

*Evang. S. Joan. cap. 4. à v. 46. usque 54.*

<i>Dom.</i>	De fidei directione.	36
-------------	----------------------	----

*Fer. 2.*



# Index Meditationum.

<i>Fer.</i> 2.	De patientia.	63
<i>Fer.</i> 3.	De motivis patientiæ.	65
<i>Fer.</i> 4.		
<i>Fer.</i> 5.	De cura propriæ salutis.	3
<i>Fer.</i> 6.		
<i>Sabb.</i>	De obligatione parentum &c. 68 Aut: quatuor Medit. de morte. 49 50 &c.	

## Dominica XXI. post Pentecosten.

*Evang.* S. *Matth.* cap. 13. à v. 23. usque 36.

<i>Dom.</i>	De Regno Jesu Christi & Sath-	
<i>Fer.</i> 2.	næ.	98
<i>Fer.</i> 3.	De remissione injuriarum.	44
<i>Fer.</i> 4.	De iterata prolapsione in pecca-	47
<i>Fer.</i> 5.		
<i>Fer.</i> 6.	De Scandalo.	26
<i>Sabb.</i>		

## Dominica XXII. post Pentecosten.

*Evang.* S. *Matth.* cap. 22. à v. 15. usque ad v. 22.

<i>Dom.</i>	De Respectu humano.	38
<i>Fer.</i> 2.		
<i>Fer.</i> 3.	De utilitate Tentationum.	29
<i>Fer.</i> 4.	De causis nostrarum Tentationum.	30
<i>Fer.</i> 5.	De Obligationibus amandi Deum , &c.	6
<i>Fer.</i> 6.	De Conformitate voluntatis nostræ cum Divinâ.	66
<i>Sabb.</i>	De Virtutibus Jesu Christi.	90

Domi-



# Index Meditationum.

## Dominica XXIII. post Pentecosten.

*Evang. S. Matth. cap. 9. à v. 18. usque ad v. 17.*

*Dom.* De morte. 8. aut: De S. Commu-  
nitione. 128

*Fer. 2.* De morte Justorum. 9

*Fer. 3.* | De Spe, & Fiducia in Deum. 57  
*Fer. 4.* |

*Fer. 5.* De Solitudine. 144

*Fer. 6.* De Odio mundi. 24

*Sabb.* De quinque Gradibus Perfectionis. 148

## Dominica XXIV. post Pentecosten.

*Evang. S. Matth. cap. 24. à v. 15. usque ad v. 36.*

*Dom.* De Cura propriæ Salutis. 3

*Fer. 2.* De Peccato veniali. 15

*Fer. 3.* De Fugâ Occasionum. 19

*Fer. 4.* De Exercitio Patientiæ. 64



*Fer. 5.* De Derelictione sui ipsius. 145

*Fer. 6.* Quando oporteat semetipsum penitus  
relinquere. 146

*Sabb.* De Præsentia Dei. 143

Aut: Quatuor Meditationes de morte.  
49. 50. 51. 51.





# INDEX MEDITATIONUM.

In Præcipua Anni Festa.

## *Januarius.*

Medit.

25. **C**onversio S. Pauli.  
*Evang. Matth. cap. 19. à v. 27. usque  
ad v. 30.*  
De Conversione non differendâ. 17

## *Februarius.*

- 2 Purificatio B. V. Mariæ.  
*Evang. Lucæ cap. 2. à v. 22. usque ad v. 33.*  
De Purificatione B. V. Mariæ. 132  
24. S. Matthias Ap.  
*Evang. S. Matth. cap. 11. à v. 27. usque ad 31.*  
De parvo numero Electorum.

## *Martius.*

19. S. Joseph.  
*Evang. S. Matth. cap. 1. à v. 18. usque ad v. 22.*  
De Pace animæ. 21. Vel: de silentio. 79.  
Vel de Conformitate, &c. 66  
25. An-



## Index Meditationum.

25. Annuntiatio B. V.

*Evang. S. Lucae cap. 1. à v. 26. usque v. 39.*

De Annuntiatione B. V. Mariæ. 133

Vel: de Humilitate Filii Dei, & Exaltatione B. V. M. in Myst. Incar. 134

## Aprilis.

24. S. Marcus Evangelista.

*Evang. S. Lucae cap. 10. à v. 1. usque ad v. 10.*

De Causis nostrarum Tentationum. 30

Vel: de Voluntate Dei. 5

## Majus.

1. SS. Philippus & Jacobus Apost.

*Evang. S. Joann. cap. 14. à v. 1. usque ad v. 14.*

De Perturbationibus animi & anxietatibus mentis. 31

3. Inventio S. Crucis.

*Evang. S. Joann. 3. à v. 1. usque ad v. 16.*

De Cruce, seu variis motivis patiendi. 65

## Junius.

24. Nativit. S. Joann. Bapt.

*Evang. S. Lucae cap. 1. à v. 57. usque ad v. 69.*

De Solitudine. 144

Vel: de Mortificatione. 27

Vel: de peccato veniali. 15

E e 2

29. SS.



# Index Meditationum.

## 29. SS. Petrus & Paulus Apost.

*Evang. S. Matth. cap. 16. à v. 13. usque ad 20.*

De Fide.	35
Vel: de Charitate.	58
Vel: de Obedientiâ.	87

## 30. Commemorat. S. Pauli

*Evang. S. Matth. cap. 10. à v. 16. usque ad 23.*

De viâ rectâ, per quam Deus justum ducit.	75
Vel: de Amore Jesu.	141

## Julius.

### 2. Visitatio B. V. Mariæ.

*Evang. S. Lucæ cap. 1. à v. 39. usque ad v. 48.*

De Visitatione B. V. Mariæ.	135
-----------------------------	-----

### 22. S. Magdalena.

*Evang. S. Lucæ cap. 7. à v. 36. usque ad v. 51.*

De Simplicitate.	153
Vel: de Conditionibus veræ Pœnitentiæ.	18
Vel: de Charitate.	58
Vel: de Unione Divina.	156

### 25. S. Jacob. Apostol.

*Evang. S. Matth. cap. 20. à v. 20. usque v. 24.*

De Obligatione Parentum erga Liberos.	68
Vel:	



## Index Meditationum.

Vel: de Conformitate, &c.	66
De vanis Desideriis.	22

### 26. S. Anna.

*Evang. S. Matth. cap. 13. à v. 44. usque ad v. 53.*

De Siccitatibus & Ariditatibus.	78
Vel: de voluntate Dei.	5
Vel: de Derelictione sui ipsius.	147

### 29. S. Martha.

*Evang. S. Lucæ cap. 11. à v. 38. usque ad v. 43.*

De bonis operibus.	73
Vel: de actionibus bene peragendis.	71
Vel: de Unione Divinâ.	156

### 31. S. Ignatius Conf.

*Evang. S. Lucæ cap. 10. à v. 1. usque ad v. 10.*

De amore Jesu.	141
Vel: de amore proximi.	67
Vel: Quæ sit Intentio nobilissima.	60
Vel: De Fidelitate in rebus minimis.	72

## *Augustus.*

### 5. S. Maria ad Nives.

*Evang. S. Lucæ cap. 11. à v. 27. usque ad v. 29.*

De Devotione erga B. V. Mariam.	130
---------------------------------	-----

### 6. Transfiguratio D. N. J. Christi.

*Evang. S. Matth. cap. 17. à v. 1. usque ad v. 20.*

De Solitudine.	144
Vel: De Imitatione Jesu Christi.	89
Vel: de Paradiso.	155



# Index Meditationum.

## 10. S. Laurentius.

*Evang. S. Joan. cap. 12. à v. 24. usque ad v. 26.*

De Patienriâ. 63

De Mortificatione. 27

De duplici Æternitate. 13

## 15. Assumptio B. V. Mariæ.

*Evang. S. Lucæ cap. 11. à v. 38. usque ad 43.*

De Morte B. V. Mariæ. 136

Vel: de B. V. à morte resuscitata. 137

Vel: de Assumptione B. V. Mariæ. 138

## 24. S. Bartholomæus Apost.

*Evang. S. Lucæ cap. 6. à v. 12. usque ad v. 26.*

De Excellentiâ Mortificationis. 28

Vel: de Mansuetudine & irâ. 69

## 25. S. Ludovicus Rex.

*Evang. S. Lucæ cap. 19. à v. 12. usque ad v. 27.*

De via recta, per quam Deus justum ducit. 75

De Felicitate eorum, qui se Dei Directioni permittunt. 76

De Infelicitate eorum, qui se subtrahunt Directioni Dei. 77

Vel: de Dominio Deil in creaturas. 28

## 28. S. Augustinus.

*Evang. S. Matth. cap. 5. à v. 13. usque ad v. 20.*

De Incomprehensibilitate Dei. 152

De Amabilitate Dei. 150

Vel:



# Index Meditationum.

Vel: de Fide. 55

Vel: Vel: de Humilitate. 62

20. Decollatio S. Joannis Baptistæ.

*Evang. S. Marc. cap. 6. à v. 17. usque ad v. 30.*

De odio mundi. 24

De Fidelitate in rebus minimis. 72

Vel: de Respectu Humano. 38

## September.

8. Nativitas B. V. Mariæ.

*Evang. S. Matth. cap. 1. à v. 1. usque ad v. 17.*

De Nativitate B. V. & Nomine Mariæ. 139

14. Exaltatio S. Crucis.

*Evang. S. Joan. cap. 12. à v. 31. usque ad v. 37.*

De Cruce, seu variis motivis patiendi. 65

Vel: de Remediis Tristitiæ. 42

21. S. Marthæus Apostolus. 25

*Evang. S. Matth. cap. 9. à v. 4. usque ad v. 14.*

De Avaritia. 40

Vel: de Paupertate. 81

Vel: de Inspirationibus Divinis. 82

29. S. Michaël.

*Evang. S. Matth. cap. 18. à v. 1. usque ad v. 12.*

De Superbiâ. 43

Vel: de Humilitate. 62

Vel: de Scandalo. 26

Octo



Index Meditationum.

October.

4. S. Franciscus Seraphicus.

*Evang. S. Matth. cap. 11. à v. 25. usque ad v. 31.*

De Paupertate. 85

Vel: de Cruce. 65

Vel: Cogitationes utiles ad mentem à mundo abstrahendam. 7

9. S. Dionysius.

*Evang. S. Lucæ cap. 12. à v. 1. usque ad v. 9.*

De Unione Divinâ. 156

Vel: de Perfectionibus Divinis. 149

Vel: de Oratione. 54

10. S. Franciscus Borgias.

*Evang. S. Lucæ cap. 12. à v. 35. usque ad v. 41.*

De Obedientiâ. 47

De SS. Nomine Jesu. 96

De Disciplinâ Religiosâ. 88

Vel: de bonis operibus. 73

5. S. Theresia.

*Evang. S. Matth. cap. 25. à v. 1. usque ad v. 14.*

De Siccitatibus & Ariditatibus. 78

De Annihilatione. 174

Vel: de Plenitudine Divitiarum Dei. 154

18. S. Lucas Evangelista.

*Evang. S. Lucæ cap. 10. à v. 1. usque ad v. 10.*

De Excellentia Mortificationis. 28

Vel:



# Index Meditationum.

Vel: De Pace animæ.	21
Vel: De Perturbationibus animi.	31
28. SS. Simon & Judas Apost.	
<i>Evang. S. Joan. cap. 15. à v. 17. usque ad v. 25.</i>	
De amore proximi.	67
Vel: De Persecutionibus.	36
Vel: De necessitate Persecutionis.	37

## November.

1. Festum Omnium Sanctorum.	
<i>Evang. S. Matth. c. 5. à v. 1. usque ad v. 13.</i>	
De Paradiso.	155
De duplici Æternitate.	13
De perfectionib. Divinis.	49
2. Commemorat. Defunctorum.	
<i>Evang. S. Joan. c. 5. à v. 25. usque ad v. 30.</i>	
De Peccato veniali.	15
Vel: de Pœnitentiâ.	16
Vel: de bono usu temporis.	35
III. S. Martinus Episcop.	
<i>Evang. S. Luc. cap. 11. à v. 33. usque ad v. 37.</i>	
De Eleemosyna.	74
Vel: de bonis operibus.	73
Vel: de morte Justorum.	9
Vel: affectus animæ justæ, morte appropinquante.	51
13. Beatus Stanislaus Kostka.	



## Index Meditationum.

<i>Evang. S. Luc. c. 12. à v. 35. usque ad v. 41.</i>	
De Molestia.	81
De Inspirationibus Divinis.	82
De Castitate.	86
De Disciplinâ Religiosâ.	88
De Fidelitate in rebus minimis.	72
<i>Eadem Meditationes usui esse poterunt in Festo</i>	
<i>B. Aloysii Gonz. 21. Jun.</i>	
21. Præsentatio B. V. Mariæ.	
<i>Evang. S. Lucæ, c. 11. à v. 27. usque ad v. 29.</i>	
De Præsentat. B. V. M. in templo.	140
30. S. Andreas Apost.	
<i>Evang. S. Matth. cap. 4. à v. 18. usque ad v. 23.</i>	
De Cruce.	65
Vel: de quinque Gradibus perfectionis.	148

## December.

3. S. Francisc. Xaver.	
<i>Evang. S. Marc. cap. 16. à v. 15. usque ad finem</i>	
<i>Capitis.</i>	
De Imitatione Jesu Christi.	89
Vel: de sexto Verbo Christi in Cruce.	114
Vel: de Spe & Fiduciâ in Deum.	57
Vel: Canticum nonum.	
6. S. Nicolaus Episcop.	
<i>Evang. S. Matth. cap. 25. à v. 14. usque ad v. 24.</i>	
De Eleemolynâ.	74
De bono usu temporis.	35
8. Conceptio B. V. Mariæ.	

*Evang.*



Index Meditationum.

*Evang. S. Matth. cap. 1. à v. 1. usque ad v. 17.*

De Conceptione Immaculatâ B. V. Mariæ.

21 S. Thomas Apost.

*Evang. S. Joan. cap. 20. à v. 24. usque ad v. 30.*

De Fide. 55

Vel: Vulneribus Jesu Christi. 120

*Meditationes pro Festo Nativitatis Christi, & sequentibus Festis, designantur in Meditationibus de Adventu.*

PRO RENOVATIONE VOTORUM.

*Usui esse possunt Meditationes sequentes.*

	<i>Medit. Pag.</i>	
De Fine hominis.	1.	1
De Dominio Dei.	2.	2
De Cura propriæ Salutis.	3.	5
De voluntate Dei.	5.	8
De obligationibus amandi Deum.	6.	9
De Tepiditate.	23.	39
De Consuetudine peccandi.	48.	89
De Conditionib. veræ Pœnitentiæ.	18.	29
De felicitate Statûs Religiosi.	84.	174
De Paupertate.	85.	176
De Castitate.	86.	177



## Index Meditationum.

De Obedientia.	87.	179
De Disciplina Religiosa.	88.	181

*Quibus non libuerit sequi hunc Ordinem Meditationum in singulos anni dies, liberum erit illis, uti secundum seriem, quâ una alteram sequitur, aut seligere illas, quarum argumenta magis videbuntur consentanea præsentis meditantium constitutioni. Expedit etiam quandoque adhibere illam, quæ librum aperiendi forte occurrerit ope Spiritûs sancti prius invocata.*






79  
81

em  
um  
te-  
ar-  
en-  
am  
be-  
ius








*S. Gabrielis Archangeli 24. Martii.*

Bene agere & illicita non prohibere, er-  
toris consensus est. S. Augustinus Epist. ad  
Bonif. Zelus adversus peccata. Ora pro ad-  
versantibus correctioni fraterna.







Biblioteka Jagiellońska



stdr0025225



